

ლევან სანიკიძე

# აღმოსანდგომ მაკედონელი



თბილისის უნივერსიტეტის გამომცემლობა  
თბილისი 1994

წიგნი მონოგრაფიულად გვისურათებს ალექსანდრე მაკედონელისა და მისი თანამედროვეობის ისტორიას. იგი განკუთვნილია სპეციალისტების, სტუდენტებისა და მკითხველთა ფართო წრისათვის.

წიგნი წარმოადგენს მეორე გამოცემას.

რედაქტორი ნ. ლომოური

რეცენზენტები: გ. გამრეკელი  
გ. ქავთარია

© თბილისის უნივერსიტეტის გამომცემლობა, 1994

© საწარმოო ფირმა „ბუბა“, ქვესაწარმო „დოლამისი“, 1994

4702170104

ს

608 (06) — 94

ISBN 5 — 511 — 00596 — 7



## წ ი ნ ა ბ ზ ი

უთქვამს პერაკლიტე ეფესელს:

„ღმერთები უკვდავი ადამიანები არიან, ხოლო ადამიანები — მოკვდავი ღმერთები“.

კაცობრიობა, ანუ „მოკვდავ ღმერთთა“ ერთობლიობა, ჟამ-ჟამად, დროისა და სივრცის გარკვეულ ნაკვეთში, თითქოს „საჭიროებისდა მიხედვით“ — თავის წილში წარმოშობს „რჩეულ შვილს“, ანუ „გმირს“, რომლის ცხოვრება და სახელი სანიშანსვეტო ხდება მთელი ეპოქისათვის; ან კიდევ — ეს „რჩეული მოკვდავი ღმერთი“ თვითონ არიან შემოქმედნი და წარმმართველნი მთელი ეპოქებისა საზოგადოებრივი ცხოვრების ურთულესსა და უძძიმეს გზაზე.

სწორედ ასეთ „მოკვდავ ღმერთთა“ წყებას განეკუთვნება ალექსანდრე დიდი, მაკედონელი, რომლის წუთისოფლიდან გავიდა 23 საუკუნეზე მეტი და ამ დროის მანძილზე არ განელეზულა ინტერესი ამ, მართლაცდა, გამორჩეული და გასაოცარი პიროვნების მიმართ. საისტორიო ტრადიციამ ალექსანდრე მაკედონელს პირველს მიანიჭა „დიდის“ თიკუნი. მას შემდგომ ალექსანდრე დიდის შესახებ წერდნენ ისტორიკოსები ანტიკურ ხანაში, შუა საუკუნეებში, ახალ დროში და წერენ დღეს, ჩვენს თანამედროვეობაში. ამასთან, საისტორიო-სამეცნიერო კვლევის გასწვრივ, „ალექსანდრული წიაღსვლების“ გარეშე არ დარჩენილა არც ერთი ჟანრი მხატვრული სიტყვიერებისა. ითხზებოდა სერიები „ალექსანდრიანებისა“ — რომანებისა, პოემებისა, მოთხრობებისა, პიესებისა, ზღაპრებისა, ლეგენდებისა. ალექსანდრეს ცხოვრება „სასიწვი ქვა“ იყო ყოველი სერბოზული ფილოსოფიური დაკვირვებისა და გააზრებისა.

სავსებით ბუნებრივად გამოჩანს ალექსანდრე მაკედონელისადმი ასეთი მრავალმხრივი და მარად უწყვეტელი ინტერესი. ალექსანდრე

მაკედონელმა, ჰავსებით ახალგაზრდა კაცმა, თავისი მძლავრი გონებით და დაუღალავი მარჯვენით საფუძველი დაუდო მსოფლიო ცივილიზაციის ერთ უხანგრძლივეს, ურთულესსა და უმშვენიერეს ეპოქას, ე. წ. ელინიზმს, რომლის სულიერი და ნივთიერი ფუძემდებლური მონაპოვარნი ჩვენს თანადროულ საუკუნეშიც აღწევენ სრული ძალისხმევით და ცხოველმყოფელობით.

ჩვენ ამჟერად მანაც „ალექსანდროლოგიის“ საისტორიო-სამეცნიერო დარგთან გვაქვს საქმე. ამ მხრივ ძალზე ბევრი რამ დაწერილა, ბევრი რამ ორიგინალურიც თქმულა, ბევრიც „ნამღერი გადამღერებული“. ბევრი შრომა დაწერილა ავტორის სრული მეცნიერული სინდისიერების მაუწყებელი პრინციპით — *sine ira et studio* — მაგრამ დღემდე იწერება ისეთი წიგნებიც, რომელთა ავტორები ორ ურთიერთგამომრიცხველ ტენდენციას გამოსდევნებიან: ერთნი ალექსანდრეს უაღრესად განადიდებენ და რაღაც ზებუნებრივ თუ „ზეკაცურ“ ფენომენად წარმოსახვენ, მეორენი კი მის დაკნინებასა და დამცრობას მიეღობიან თავგამოდებით (ამ უკანასკნელ ხანს გამოცემულ ერთ წიგნს რეცენზენტები სწორედ იმით აქებენ, რომ ავტორები ალექსანდრეს პირად ღირსებებს სულაც უარყოფენ!). არა და, ორივე რიგისა და „ტენდენციის“ მქონე მკვლევართათვის ალექსანდრეს ცხოვრების საკვლევი და შესასწავლი წყაროები სავსებით ერთი და იგივეა. მაშ, თითქოს, აქაც რად უნდა მომხდარიყო, რომ ერთი და იმავე ხისგან ჯვარიც გამოსულიყო და ბარიც? კაცმა რომ თქვას, საკითხის ამნაირი გამრუდებაც მიანიშნებს მკვლევარ-სპეციალისტს, ერთხელ თვითონაც მიუბრუნდეს „ალექსანდრეს თემას“, თვითონაც გულდასმით შეისწავლოს და იქნებ სწორადაც გაიზაროს სხვათაგან მრავალგზის შესწავლილი და განსჯილი ის წყაროები, საიდანაც ზოგს „ჯვარი“ გამოჰყავს და ზოგს „ბარი“.

ალექსანდრე დიდის პიროვნებისა და ღვაწლის შესასწავლად მეცნიერებას ძირითადად ისევ წერილობითი წყაროები აქვს ხელთ. ალექსანდრეს თან ახლდნენ „მისი ისტორიკოსები“ — არისტობულე, კალისტენე, პტოლემეაიოსი, კლიტარქოსი, პოლიკლეტოსი, ონესიკრიტოსი, ტიმაგენე, ასკლეპიადე, არატოსი, ნეარქოსი, — მაგრამ არც ერთი მათგანის შრომას ჩვენამდე არ მოუღწევია. მხოლოდ მათი ჩანაწერების ფრაგმენტები იხსენიებიან მომდევნო დროის ავტორთა „ისტორიებში“. როგორც ჩანს, თვითონ ალექსანდრეც წერდა რაღაც „დღიურებს“, თუ „გემუარებს“. მისი სასახლის კარზეც, უეჭველად,

წერილობით ფიქსირდებოდა ყოველდღიური მოკლენები, მაგრამ არც მეფისა და არც მისი კარის მდივანთა „ჩანაწერები“ გადარჩენია დროის უღმობელ დინებას. ასე რომ, ალექსანდრეს შესახებ დაწერილი ისტორიული შრომები მხოლოდ მისი სიკვდილიდან 280 წლის შემდგომდროინდელ ავტორებს განეკუთვნება, ამათგან მაინც ყველაზე სრული, უწყვეტი და სისტემატური საისტორიო თხზულებების ავტორები არიან: ფლავიოს არიანოსი (95—160 წწ.), დიოდოროს სიცილიელი (ძვ. წ. 90—21), პლუტარქოს ქერონეელი (45—127 წწ.) და ქვინტუს კურციუს რუფუსი (ახ. წ. I ს.).

ამ ოთხთაგან ორი — არიანოსი და დიოდოროსი — „წმინდა ისტორიკოსები“ იყვნენ, ხოლო პლუტარქოსი და კურციუსი — „მხატვარ-ისტორიკოსები“.

ყველაზე სანდო და თითქმის ბოლომდე ანგარიშგასაწვევი ცნობები ბაიცი არიანოსმა შემოგვინახა, თავის მთავარ თხზულებაში — „ანაბასისი“ ანუ „ლაშქრობა“ ალექსანდრესი. იგი მცირეაზიელი ბერძენი იყო, ქალაქ ნიკომედიიდან. სწავლობდა საბერძნეთში, ეპიკტეტეს სტოიკურ-ეტიკოსოფიურ სკოლაში; ცხოვრობდა რომში, შეისწავლა სამხედრო საქმე. პოლიტიკური მრწამსით იყო მონარქისტი და რომის იმპერატორის კარზე ეჭირა დიდი თანამდებობანი (კონსული, სენატორი, კაპადოკიის პროკურატორი). სხვათა შორის, ფლავიოს არიანოსი იმყოფებოდა მცხეთაშიც, სადაც მან, ვითარცა ელჩმა, იმპერატორ ადრიანესგან წარმოგზავნილი ძვირფასი საჩუქრები და „სამოკავშირეთ-სამეგობრო“ აღთქმანი გადასცა ქართლის მაშინდელ მეფეს — ფარსმან ქველს.

არიანოსი თავის „ანაბასისში“ პირველ წყაროებად სწორედ ალექსანდრეს თანადროულ ისტორიკოსთა და თანამებრძოლთა ჩანაწერებს იყენებდა, და თანაც, იყენებდა არა ხელალებითი მინდობით და განუკითხაობით, არამედ კრიტიკული თვალთახედვით, მკაცრი განსჯითა და გააზრებით. იგი, ალექსანდრეს თანამგზავრთა და თანამებრძოლთაგან, ყველაზე მეტად არისტობულესა და პტოლემეაიოს ლაგიდის ცნობებს ენდობა და მათვე ეყრდნობა „ანაბასისის“ წერის ყაძს. არიანოსის მეორე თხზულება — „ინდიკე“ — ძვირფას მასალებს გვაწვდის ალექსანდრე მაკედონელის ინდოეთში ლაშქრობის შესწავლისათვის.

ფრიად საყურადღებო წყაროა დიოდოროს სიცილიელის „საისტორიო ბიბლიოთეკა“, 40 წიგნად, საიდანაც XVII წიგნი მთლიანად ეძღვნება ალექსანდრე მაკედონელსა და მის თანამედროვეობას. მი-

უხედავად იმისა, რომ მასში ხშირია ქრონოლოგიური აღრევა და უზუსტობანი, არიანოსის „ანბასისთან“ შეჯერებით, დიოდოროსი დღევანდელ მკვლევარ-ისტორიკოსს მაინც ფასდაუდებელ დახმარებას უწევს ალექსანდრე მაკედონელის დროინდელ მრავალ მოვლენათა რეალური სურათების აღსადგენად.

თავის „პარალელურ ბიოგრაფიებში“ ალექსანდრე მაკედონელს საკმაოდ ვრცელი ადგილი დაუთმო პლუტარქოსმა, ძველი დროის სახელოვანმა მწერალმა, ისტორიკოსმა და ფილოსოფოსმა. მისი „ალექსანდრე მაკედონელი“, — ისევე, როგორც ყოველი სხვა მისეული „ბიოგრაფია“ — დაწერილია არა მკაცრი მეცნიერულ-ისტორიული კანონიკით, არამედ მხატვრულ-ფილოსოფიური გარდასახვითა და გააზრებით. ამ შემთხვევაში, უკეთუ ჩვენ გავიხსენებთ და ვიწამებთ იმ მეცნიერ სჯულმდებელთა (ვთქვათ, არისტოტელეს და ეფრემ მცარეს) შეგონებებს, რომ ჭეშმარიტი ისტორიული მეცნიერება სწორედ მხატვრული გააზრებითა და „განშეენებით“ უნდა იწერებოდესო — მაშინ აღარც პლუტარქოსთან უნდა გვეკონოდა რაიმე სასაყვედურო; მაგრამ პლუტარქოსი ისტორიის მხატვრული „გარდასახვისას“ ხშირად, მხატვრულ-ფილოსოფიურ და ფსიქოლოგიურ გააზრებათა „სასაყვედულად“, ისტორიული ჭეშმარიტების გაყალბებას ან დაკნინებასაც აღარ ერიდება. მრავლს მიმანიშნებელია თვითონ პლუტარქოსის, ასე ვთქვათ, „მეთოდოლოგიური განაცხადი“ — მე ცხოვრებას ვწერ და არა ისტორიასო. მართლაც, მას უწინარესად ცალკე, კერძობობით ადამიანს — ამ შემთხვევაში ალექსანდრე მაკედონელს — „ცხოვრება“, ანუ პიროვნება აინტერესება, ხოლო მთელი დახარჩენი, ამ პიროვნების გარშემო განუფენილი ისტორიული სამყარო, არის მხოლოდ „მეორე პლანი“, ან, გნებავთ, „ანტურაჟი“, ანუ „დამხმარე ნაწალი“ ალექსანდრეს ფსიქოლოგიის, აღნიანური და ხედამიანური ვნებების, ღირსებებისა და სისუსტეების „კომპლექსური“ შესწავლისა და წარმოსახვისათვის. ამიტომ პლუტარქოსის სამწერლობო შემკვიდრობა მეცნიერისგან გვარიანად ფრთხილ მიდგომას და „ძოვარგებას“ მოითხოვს. ასეთი კრიტიკული შესწავლისა და სხვა წყაროებთან შედარება-შეჯერების შემდგომ, შესაძლებელი ხდება პლუტარქოსის თხზულების მრავალი პასაჟი ჭეშმარიტი მეცნიერული ჭკრეტის სამსახურში ჩაგაყენოთ.

მეცნიერული თვალთახედვით, კიდევ მეტ სიმკაცრესა და კრიტიკულ დამოკიდებულებას მოითხოვს რომელი კურციუს რუფუსის

ლათინურად დაწერილი „ალექსანდრე დიდის ისტორია“, რომლის მეცნიერული ღირებულება დიდად ჩამოუვარდება წინარე მოხსენიებულ ავტორებს. ეს თხზულება უფრო მხატვრულ რომანს ჰგავს და იგი კიდევაც საფუძვლად დაედო შემდგომდროინდელ რომან-სერიებს — „ალექსანდრიანებს“. აშკარად შეინიშნება, რომ კურციუსი თავისი თხზულების წერისას უპირატესად ალექსანდრეს სამტროდ განწყობილ წყაროებს ეყრდნობოდა. ავტორის ასეთი ტენდენციურობაც ხშირად მეცნიერებისთვის სასარგებლო ხდება, რამდენადაც მტრული კალმისგან დაცდენილი ღირსება საკვლევ გმირს აკი ჰეშმარიტ ღირსებად მიეთვლება!.. ბევრი რამ კურციუსს შეთხზული უხდა ჰქონდეს, მაგრამ ბევრი რამეც, მისგან თქმულნი, სხვა წყაროებით დასტურდება და ამდენად ეს თხზულებაც საყურადღებო წყაროდ რჩება ალექსანდრე მაკედონელისა და მისი დროის შემსწავლელი მკვლევრისათვის.

წყაროთა ამ „მთავარი ოთხეულის“ გარდა, ჩვენამდე მოაღწიეს, აგრეთვე, ცალკეულმა, ფრაგმენტულმა ცნობებმა, რომელთა ავტორები არიან: თეოპომპე, დემოსთენე, პოლიბიოსი, სტრაბონი, პავსანია, დიონ ქრისტოსტომი, იოსებ ფლავიუსი, კლავდიუს ელიანუსი, იუსტინე, ფრონტინუსი, პოლიენუსი, ვალერიუს მაქსიმე, ციცერონი, პლინიუს უფროსი.

ყველა აქ მოხსენიებული წყარო — დიდნი თუ მცირენი — ერთად აღებულნი, ერთმანეთთან შედარებულნი და შეჯერებულნი, საშუალებას გვაძლევენ აღვადგინოთ დრო და სახე ალექსანდრე მაკედონელისა — „მოკვდავ ღმერთთა“ შორის ერთი უსაჩინოესი პიროვნებისა.

წყაროთა გარდა, მეცნიერულ შრომათაგან, ეს წიგნი ყველაზე მეტად დავალებულია იოჰან გუსტავ დროიზენის „ჰელინიზმის ისტორიით“, რომელიც ალექსანდრე მაკედონელზე დაწერილ სამეცნიერო ლიტერატურაში (ფაქტოლოგიის ასპექტით მაინც), ჩვენი ღრმა რწმენით, კვლავ ინარჩუნებს „პალმას პირველობისას“.

## ზღუბლი

დასაწყისშივე, მკვლევრისა თუ მწერლის ყურადღებას იტაცებენ გასაოცარი „ტრიალები“ ძველი (ანტიკური) მსოფლიოს ისტორიისა:

გეოგრაფიული ტრიადა — ბალკანეთი, ეგეოსის არქიპელაგი, მცირე აზიის სანაპირონი;

ქრონოლოგიური ტრიადა — ქრისტეს წინარე III, II, I ათასწლეულები;

კულტურული ტრიადა — კრეტა-მიკენური (წინაბერძნული), ელინური (ბერძნული), ელინისტური (ბერძნულ-აღმოსავლური);

ფუძემდებელ-პიროვნული ტრიადა — მინოსი (კრეტა-მიკენისა), ჰომეროსი (ელინურისა), ალექსანდრე მაკედონელი (ელინისტურისა).

ამ წიგნში ლოგოსი განეფინება „მესამე გმირის“ — ალექსანდრე მაკედონელის გარშემო.

შუაგული ძველი წელთაღრიცხვის IV საუკუნისა.

უკვე გასულა და ისტორიის კუთვნილებად გამხდარა ათასი წელი „მინოსის ხანისა“, კიდევ ათასი წელიწადი ანტიკური საბერძნეთისა, ანუ „წმინდა ელინური“ კლასიკისა — კაცობრიობის უბრწყინვალესი ცივილიზაციისა.

გარდასულია ხუთასწლოვანი დრო-ჟამი, გასაოცარი, „სოკოსავით ნამრავლი“ გენიალური ბერძნებისა — მეცნიერების, ხელოვნების, საზოგადოებრივ და პოლიტიკურ დეაწლმოსილებათა მსოფლიო კორიფეესებისა. გარდასულ არიან — ჰომეროსი და ჰესიოდე, თალესი და ტირტეოსი, პითაგორა და ანაკრეონტი, საფო და ალკეოსი, ჰერაკლიტე და სოლონი, ჰიპოკრატე და ფიდიასი, ჰეროდოტე და იქტიონოსი, თუკიდიდე და კალიკრატე, ჰსენოფონტი და პინდაროსი, დე-

მოკრიტე და ესქილე, სოკრატე და სოფოკლე, პლატონი და ევრიპიდე-პოლიგნოტე და არისტოფანე.

განვლილია სანიშანსვეტო ეპოქები — „დიდი ბერძნული კოლონიზაციისა“ (VIII—VII სს.), ბერძნულ პოლისთა (ქალაქ-სახელმწიფოთა) ჩამოყალიბებისა (VI ს.), ბერძენ-სპარსელთა ომიანობისა (500—449 წწ.) და ბერძენთა ბრწყინვალე ძლევამოსილებისა. უკვე ისტორიის წიაღში განისვენებენ გმირობანი ბერძნული საძყაროს მესაქვე პოლისებისა — ათენისა და სპარტისა, თემისტოკლე ათენელისა და ლეონიდე სპარტელისა, ათენელებისა — მართონის ველზე, სპარტელებისა — თერმოპილეს ხეობაში, გაერთიანებული ბერძნებისა — ლამინის სრუტეში, ქალაქ პლატეასთან და მიკალეს კოხცხთან. განვლილია მწვერვალი ანტიკურ-კლასიკური ცივილიზაციისა — „ეპოქა პერიკლესი“. მაშინდელი ათენი — „ელადა ელადაში“...

და, უცებ, ყველაფერი, რაც ბერძენთა „უნივერსალურ ნიჭიერებას“ (ენგელსის ლოგოსია) შეუქმნია, — ერთბაშად ინგრევა, იქცევა, ირეცება. ეს არის პელოპონესის ომი (431—404 წწ.), ოცდაშვიდწლიანი შინაური ხოცვა-ჟლეტა. ეს არის თვითმკვლელობა ერისა, — ვითარცა თვითმკვლელობაა ყოველი ომი თანამემამულეთა და ოთხ-მომძმეთა შორის.

დამხობილია ათენი — უმაღლესი სული და უმკვრივესი სხეული საბერძნეთისა.

და ასე — პელოპონესის ომების შედეგად და შეძღვომ — V საუკუნის დასასრულსა და IV საუკუნის დამდეგს საბერძნეთი მოუცავს საყოველთაო კრიზისს, „ბანელინურ“ („საყოველთაო-ბერძნულ“) კრიზისს, — ეს არის კრიზისი კლასობრივი, კრიზისი სოციალური, კრიზისი პოლიტიკური, კრიზისი ნივთიერ-ეკონომიური, კრიზისი სულიერ-ზნეობრივი.

ახლა კი დასდგომია დრო-ყამი სპარსეთს — რევანში აიღოს საბერძნეთისაგან მიღებული მძიმე მარცხისთვის. თანაც, რევანში უნდა იყოს „ყოვლისმომცველი“, საბერძნეთისთვის სრულად გამანადკურებელი. საბერძნეთს, ისედაც მცირე ქვეყანას, ახალი შინაური ომებით უარესად დამცრობილსა და დამხობილს, შინაგანად ძალა აღარ მოეძევება თავი დაიხსნას სპარსეთის მხრივ წალეკვისაგან, — იმ სპარსეთისგან, რომელიც ძლიერი აქემენიდური დინასტიის მეთაურობით, აგერ ორასი წლის მანძილზე გადაჭიმული და გავრცობილია ხმელთაშუა ზღვიდან ინდოეთამდე.

და როცა ქვეყანას თავის დახმანისა და გადარჩენის შინაგანი ძალა აღარ აღმოაჩნდება, იგი იძულებულია ეძიოს გარეშე ძალა, თუნდაც „უცხო“. ანუ „ბარბაროსი“. მაგრამ უცხოთაგან „ნაკლებ ბარბაროსი“, „შედატებით ახლობელი“, რომელსაც დაერქმევა „მფარველი“. ან „მოკავშირე“, ან „თანამებრძოლი“, ან „თანამდგომი“ და სხვა რამ მისთანანი (მხოლოდ — არავითარ შემთხვევაში „დამპყრობელი“!).

ასეთ „გარეშე მხსნელ ძალად“ მაშინდელი საბერძნეთისათვის მიჩნეულ იქნა მაკედონია. იქვე, ჩრდილოეთიდან მოსახლკრე, „კარს მებობელი“ ქვეყანა.

სწორედ მაკედონია უნდა ყოფილიყო საბერძნეთისთვის უცხოთა („ბარბაროსთა“) შორის ყველაზე „ნაკლებად ბარბაროსი“, ან ბარბაროსთაგან „ყველაზე ახლობელი“, „მეზობელი გულისაო...“

ბერძნებსა და მაკედონელებს იმ სამი კონტინენტის გზასაყარზე ყველაზე მეტად და უკეთ „ესმოდათ“ ერთმანეთისა — ესმოდათ ენობრივად და ესმოდათ სულიერად.

მაკედონური ენა ნათესავი იყო ბერძნული ენისა.

საბერძნეთს სხვა გზა არ ჰქონდა — მისი დაშრეტილი ფიზიკური სხეული უნდა აეღორძინებინა ახალგაზრდა, ფიზიკურად გამძლეარებულ მაკედონიასთან „შეერთებას“.

მაკედონიასაც სხვა გზა არ ჰქონდა — მისი ველური ბული უნდა გაენაყოფიერებინა და გაემდიდრებინა უზენაესი ბერძნული სულიერი სამყაროს „შემოერთებას“ (არა „დაპყრობას!“). სულიერის გარდა. საბერძნეთს ნივთიერ და საომარ ძალთა „შემოერთებაც“ ფრიად „მოუხდებოდა“ მაკედონიას...

რინი ერთმანეთისაკენ მიილტვოდნენ:

მაკედონელები — სრულის თავდავიწყებით,

ბერძნები — მაინც ჰპანწყვეტით.

ასე იყო, ვინათგან ბერძენთა დიდ ნაწილს მაინც სწამდა, რომ მაკედონელებიც „ჩვეულებრივი ბარბაროსები“ იყვნენ და მათთან „შეერთებით“ ვერაფერსაც ვერ მოიმკიდნენ, გარდა „ჩვეულებრივი ბარბაროსული უღლისა“.

ასე იყო და ერთმანეთს ებრძოდა მაშინდელ საბერძნეთში ორი პოლიტიკური პარტია — „მაკედონური“ და „ანტიმაკედონური“.

სხვა გზა კი მაინც არ იყო.

საისტორიო ბედისწერის ჩარხი მაინც „შეერთების“ ტვიფრით ბრუნავდა.



მაკედონია მცირე ქვეყანაა შუა ბალკანეთზე, ჩრდილოეთით — მთაგორიანი (ზედა მაკედონია), სამხრეთით — დაბლობ-ველიანი (ქვემო მაკედონია).

ოთხი მთავარი მდინარე რწყავს მაკედონიის მიწას: აქსიოსი (ახლანდელი ვარდარი), სტრიმონი (სტრუმა), ლიდიასი (მიასტა) და ვალიაქმონი (ბისტრიცა).

ჩრდილოეთიდან და აღმოსავლეთიდან მაკედონელებს მათ მსგავსადვე ნაკლებ კულტურული ხალხები ემეზობლებოდნენ — თრაკიელები, აგრიანები, ილირიელები, ტრიბალები, ტრერები. სამაგიეროდ სამხრეთით მაკედონია უშუალოდ ესაზღვრებოდა უზემოესი კულტურის სამყაროს — საბერძნეთს. ჯერ, სამხრეთ-აღმოსავლეთით, მაკედონიას ეკვროდა დიდი ბერძნული სავაჭრო ქალაქებით მოფენილი ქალკიდიკა; მერე, უშუალოდ სამხრეთით მაკედონია ესაზღვრებოდა საბერძნეთის ყველაზე დიდ ოლქს — თესალიას; აქ მათი გამყოფი იყო ოლიმპოსა და კამბურნის მთები, ხოლო მაერთებელი — მდინარე პენეესის შესართავი, ანუ ტემპერის ველი; სამხრეთ-დასავლეთით კი მაკედონია უკავშირდებოდა ჩრდილოეთი საბერძნეთის მეორე ოლქს — ეპირს. მაკედონიასა და ეპირს შორის გაწვართულია პინდოს მთაგრებილი.

მაკედონიის მთიანეთი ნოციერი საძოვრებით ხელსაყრელ პირობებს ქმნიდა მესაქონლეობის განვითარებისათვის. მაკედონური მოსახლეობაც უმეტესწილად მესაქონლე-მწყემსური და მონადირული ცხოვრებით ცხოვრობდა. ნაკლებად ყინვიანი და მშრალი ფერდობები მევენახეობის დანერგვის საშუალებასაც იძლეოდნენ. მაკედონიის მიწათმოქმედი მოსახლეობა ძირითადად მდინარეთა ხეობებში ცხოვრობდა, მკვიდრი, სამიწათმოქმედო ცხოვრებით.

„ისტორიის მამა“, პეროდოტე, მაკედონიის სახელმწიფო შექმნას მიაწერს სამხრეთ საბერძნეთიდან, არგოსიდან გამოქცეულ ბერძენს — პერდიკას<sup>1</sup>. ეს ლეგენდარული ამბავი (VIII—VII საუკუნეთა

მიჯნას უნდა განეკუთვნებოდეს. პერდიკას შემდეგ, მწირი საისტორიო ნაფლეთები კიდევ ოთხ მეფეს ასახელებენ. ეს „მეფეები“, ანუ პონეროსის გმირებს — აგამემნონებისა და ოდისევსების მსგავსი „ბასილევები“, სინამდვილეში ტომის ბელადები უნდა ყოფილიყვნენ, რომლებსაც „სტახტო ქალაქად“ ედესა, ანუ ეგე გამოუცხადებიათ და იქლანვე განუწყვეტელი ბრძოლა უწარმოებიათ ცალკეულად და განკერძოებულად დაქსაქსული მაკედონური ტომების გასაერთიანებლად.

მაკედონიის „სახელმწიფოს“ შესახებ საუბარი შესაძლებელი ხდება V საუკუნიდან, მეფე ამინტა I-ის (540—498) შემდეგ. მის დროს მაკედონიის საზღვრები სამხრეთით მტკიცედ მიებჯინენ ოლიმპოსა და კამბურნის მთებს, ხოლო აღმოსავლეთით — სტრიმონის აუზს. ამინტამ დაიპყრო ქალკიდიკაზე ოლქი ანტიმეაუნტისა, მაგრამ შემდგომი მისი წინაულა თრაკიაში შემოჭრილმა სპარსელებმა აღკვეთეს. ამ ამბავს წინ უძღოდა სპარსეთის დიდი ხელმწიფის, დარიოს I-ის ლაშქრობა სკვითების წინააღმდეგ — ბალკანეთ-თრაკიისა და ისტროსის (დუნაის) გადალახვით (512 წ.). დარიოსი მარცხნაჰში დაბრუნდა, მაგრამ თრაკიაში ჯარი მანც დატოვა, მეგაბაზის სარდლობით. სპარსელთა ამ პირველ „ევროპულ წიაღსვლას“ მთელი ბალკანეთის და უწინარესად არქიპელაგური და კონტინენტური საბერძნეთის დაპყრობა უნდა მოჰყოლოდა „გაგრძელებად“ (მცირეაზიურ საბერძნეთს, ანუ იონიას უკვე ფლობდა მაშინ სპარსეთი).

მეგაბაზმა წინასწარ წამოიწყო მაკედონიის მეფესთან „დიპლომატიური თამაში“. დიპლომატიურს „ტრაგიკული თამაშიც“ მოჰყვა: იმის გამო, რომ სანადიმო სუფრასთან შექეიფიანებულმა შვიდმა სპარსელმა „დიპლომატმა“ მაკედონელ ქალებს ხელი შეუთამამა, მეფის ძემ, უფლისწულმა ალექსანდრემ შვიდივე სტუმარი იქვე სუფრაზე დააკლა. სპარსეთის სასახლის კარმა იმის გაანგარიშებით, რომ საბერძნეთიდან ომის კვირამალს მაკედონიასთან მოულოდნელი ომის გაჩაღება არ გამოადგებოდა, სპარსული სისხლის ასე კანდიერი დაქცევისა და „საერთაშორისო ნორმების“ დარღვევისათვის მხოლოდ მეფე ამინტას მობოდიშება იკმარა.

ამინტას სიკვდილის შემდეგ გამეფდა სწორედ სპარსელთა სისხლზე ხელგაწაფული ალექსანდრე I (498—454). მის დროს უკვე დაიწყო ბერძენ-სპარსელთა დიდი ომი. დარიოსის პირველი და მეორე ლაშქრობა მწარე მარცხით დამთავრდა. მარათონის ველზე ათენელ-

თა გამარჯვებამ ქვეყანა შეაზანზარა. დარიოსიცი მიიცვალა და ათენისა და სპარტის ჯავრი სამარეში თან ჩაიყოლა. მას შემდგომ დარიოსის ძემ, ქსერქსემ სცადა რევანშის აღება და ბერძენთა „ძიწისა და წყლის“ გადაყლაპვა. ქსერქსეს „მილიონიანი შემოსევა“ მოინელა ბერძნულმა პატრიოტიზმმა — არტემისიონის კონცხთან, თერმოპილეს ხეობაში, სალამინის სრუტეში.

სპარსეთის სახელმწიფო კარმა დაზავებაზე ფიქრი იკადრა და ათენთან მოსალაპარაკებლად შუამდგომლობა სთხოვა მაკედონიის მეფეს, რომელიც აქამდე ორივე მხარესთან „მიუმხრობლობის პოლიტიკას“ ინარჩუნებდა.

ალექსანდრეს შუამავლობამ შედეგი არ მოიტანა. „სანამ მზე ივლის იმ გზით, რა გზითაც ახლა დადის, მანამ არ იქნება ზავი ქსერქსესთან“ — იყო პასუხი ათენისა.

ომი გაგრძელდა.

მაკედონიის მეფე „მიუმხრობლობას“ დაუბრუნდა.

მაგრამ სპარსელებმა ალექსანდრე და მისი მაკედონური მხედრობა შინც გაიყოლიეს ბერძნებთან განახლებულ ბრძოლაში. ქალაქ პლატეასთან, გადამწყვეტი ბრძოლის წინ (479 წ.), ალექსანდრეს „ბერძნულმა სიმპათიებმა“ სძლიეს და, ღამით, იღუმალ, ბერძნებს სპარსელთა სარდლობის განაზრახი შეატყობინა.

სპარსელები ისევ დამარცხდნენ სასტიკად. მაშინ ალექსანდრე აშკარად დაემტერა სპარსეთს და, როცა პლატეას ხოცვა-ჟლეტაში გადარჩენილი და გაქცეული სპარსელები მაკედონიის გასასვლელებში შეცვივდნენ, მაკედონელები მისდგნენ და ჰხოცეს შეუბრალებლად „აზიელი ბარბაროსები“.

ალექსანდრე I განაგრძობდა და ავითარებდა ბერძნებთან სიახლოვეს. დაერქვა კიდევაც მას „ფილელინი“ — „ბერძენთმოყვარე“. ელინური ცივილიზაცია წარმატებით იკვლევდა გზას მაკედონურ არისტოკრატიაში. თვითონ ალექსანდრე ბერძნულად ლაპარაკობდა, საყოველთაო ბერძნულ ასპარეზობებზე — ოლიმპიადებზე იგი პირადად ეჯიბრებოდა ბერძენ მოჭირითე-ეტლოსნებს. მაკედონელი მეფე არც თავის საგანძურებს ზოგავდა, ვინძლო ოლიმპიისა და დელფოს ტაძრებისათვის თვითონ ბერძნებზე უბრწყინვალესი შესაწირავები მიერთმია. მაკედონია ხშირად თავშესაფარი იყო საბერძენთიდან გაქცეული „პოლიტიკურად არასაიმედო ელემენტებისა“. ალექსანდრე

1-ის სასახლეში დღახანს ცხოვრობდა სახელოვანი ბერძენი პოეტი პინდაროსი.

ყოველი ახალი კულტურის დანერგვა ყოველთვის მძიმე რეაქციას და თავკამოდებულ მტრობას იწვევს ძველ სულიერ-სხეულებრივ ჩვევებსა და აღათ-წესებში. სწორედ ასევე უნდა მომხდარიყო მოსულ ბერძნულსა და დამხვედურ მაკედონურს შორის. ჯერ კიდევ გვაროვნული წყობიდან გამოუსვლელ მაკედონელ მეჯოგესა და ძიწათმოქმედს უმაღლესი სინატიფით ნაძერწ ბერძნულ კრატერს და ამფორას მაინც მამაპაპური, უბრალო და უფასური, ხისგან გამოჩორკნილი ჯამივრჩინა. ალბათ, სწორედ ამ ჭიდილს ემსხვერპლა ალექსანდრე ფილელინიც, — იგი შეთქმულება მოკლეს 454 წელს.

მაშინვე მაკედონიის სამეფო ტახტისათვის ბრძოლა ატყდა ოთხძმას შორის. გაიმარჯვა და გამეფდა პერდიკა II (454—413). დანარჩენი სამი ძმა „ზედმეტობისთვის“ სიკვდილს მიეცა.

მაკედონიის ახალ მეფეს გამარჯვებული შინაური კოხსერვატიზმისთვის ანგარიში უნდა გაეწია და ბერძენთა წინსვლას ჩრდილოეთით წინ გადაეღობა. მაგრამ ბერძნებმა, ათენელების მეთაურობით, მაინც იძალეს, მაკედონელთა აქტივობა აღკვეთეს, მთელი ქალკიდია თავის ბატონპატრონობაში მოაქციეს და მდინარე სტრიმონის შესართავშიც ახალი დიდი ციხე-ქალაქი — ამფიპოლისი ააშენეს. ათენელებმა ესეც არ იკმარეს და უშუალოდ მაკედონიას დაემუქრნენ. მეფე პერდიკა II იძულებული შეიქნა ხარკი ეძლია ათენისათვის.

მაგრამ მალე დაიწყო პელოპონესის ომი. მთელს საბერძნეთს და უწინარესად ათენს — უსაშინელესი წლები დაუდგათ. მაკედონიამ ათენის ხარკისგანაც თავი დაიხსნა და დანგრევა-დაქცევის გზაზე დაქანებული საბერძნეთის შინაურ საქმეებშიც იწყო ჩარევა.

ბერძნული კულტურა კი მაინც ვრცელდებოდა მაკედონიაში. სამეფო კარი და არისტოკრატია აშკარად „ბერძნობდა“. მეფე პერდიკა II პირადად იწვევდა სასახლის კარზე დიდ ბერძენ მოღვაწეებს და მოაზროვნეებს. მასთან კარგა ხანს სტუმრობდა „მედიცინის მანა“ — ჰიპოკრატე კოსელი.

კიდევ უფრო გააქტიურდა მაკედონიის მომდევნო მეფე, არქელაოსი (413—399). მან სამეფო ტახტი ეგედან პელაში გადაიტანა და იქაურობა ელინურ ყაიდაზე მორთო და მოკაზმა. ქალაქ დიონში, — სადაც მონიშნული იყო ლეგენდარული ბერძენი მომღერლის, ორფეუსის აკლდამა — არქელაოსმა დააწესა ზევისისა და მუზების ყოველ-

წლიური ცხრადღიანი დღესასწაული<sup>2</sup>. მაკედონიის მეფე ყოველ ოლიმპიადაზე გზავნიდა საასპარეზოდ თავის ეტლებს და ყოველთვის გამარჯვებულის გვირგვინებს ღებულობდა. პელაში თავისი სასახლე სახელოვან ბერძენ მხატვარს, ზევქსის ჰერაკლეელს მოახატვინა არქელაოსმა. მის მიწვევაზე პელაში მივიდა და სიცოცხლის დასასრულამდე იქვე იცხოვრა დიდმა პოეტმა და ტრაგიკოსმა ევრიპიდემ, რომელმაც მაკედონელთა ცხოვრებაზე ტრაგედიაც დაწერა — სახელად „არქელაოსი“. პელაში, მეფის დიდი პატივით გარემოსილნი, ცხოვრობდნენ აგრეთვე ტრაგიკოსი აგათონი და პოეტი ქერილო სამოსელი, „პერსიდის“ ავტორი. უდიდესი ბერძენი ისტორიკოსი, პელოპონესის ომების იონაწილე და აღმწერელი, თუკიდდე ათენელიც ბტუმრობდა ერთ ხანს მაკედონიის სასახლის კარზე. სამაგიერო ქებაც დაიმსახურა მაკედონიის მეფემ ისტორიკოსისგან: არქელაოსმა ააშენა, ააგო ციხესიმაგრეები, გაიყვანა გზები, შექმნა მხედრობა და ქვეითი ჯარი, მან სამხედრო საქმესა და ჯარის მომარაგებაში მაკედონიისთვის გაცილებით მეტი გააყეთა, ვიდრე მანამდელმა რვა მეფემ ერთადო<sup>3</sup>. არქელაოსი პელაში, გულმხურვალედ და მდიდარი საჩუქრების აღთქმით იწვევდა სოკრატეს, მაგრამ ეს „ახირებული ბრძენი“ ყოველთვის უარით პასუხობდა: მაკედონიაში რა მინდა, როცა აქ, ათენში, პურიც იაფია და წყალსაც ყველა უფასოდ სვამსო. სამაგიეროდ, სოკრატეს დიდი პოწაფე, პლატონი, ახლო მეგობარი იყო მაკედონიის მეფისა.

მაგრამ ბერძნული კულტურის „გავრცელება“ მაკედონიაში ჯერ ისევ ზედაპირული, გარესახოვანი და ფარისევლური ხასიათისა იყო. „ბერძნობდა“ მხოლოდ მეფე და მისი უახლოესი კარისკაცების წრე — ეგრეთ წოდებული „ჰეტერები“ („მეგობრები“, „ამხანაგები“) — და საერთოდ არისტოკრატია. ხალხი ისევ ჩამორჩენილი, უეცი და უხეში ზნითა და ჩვევებით ცხოვრობდა. მაკედონიის არისტოკრატიაც შიშობდა და იბრძოდა, ხალხში ბერძნული დემოკრატიზმი და პირადი „ელევთერიისადმი“ (თავისუფლებისადმი) მისწრაფების ბერძნული სიმტკიცე არ დაბადებულყო და ამით არისტოკრატის წოდებრივი პრივილეგიები არ დასუსტებულყო. თვითონ მეფე არქელაოსიც, გარეგნულად მბრწყინავი ელინურობის საბურველს შიგნით, მაინც რჩებოდა ცრუმორწმუნე; გარყვნილ და სულმოკლე ხელმწიფედ.

399 წელს არქელაოსი დაიღუპა ნადირობის დროს, ვითომ შემთხვევით, მისი უახლოესი ადამიანის, ვინმე კრატევადეს ხელით<sup>4</sup>.

ამის შემდგომ, მთელი ორმოცი წელიწადი (399—359) შაკედონია შორცვა მძიმე, სისხლმათხევარმა შინააშლილობამ, გა-თავებელმა ბრძოლებმა სამეფო ტახტსათვის, შეტაკებებმა შაკედონხელთა და მე-ზობელ ტომთა შორის, ხოცვა-ჟლეტის სერიებმა თვითონ შაკედონელ ტომებსა და მთავრობებს შორის. სამხრეთ-აღმოსავლეთიდახ ქალკი-დიკელი ბერძნები აწვებოდნენ ქვეყანას. დანარჩენი მხარეებიდან შაკედონიაში უკვე ღრმად შემოჭრილიყვნენ თრაკიელები, ილირიელები და პეონები.ეს იყო ათი უნიჭო მეფის ანარქიული ხახა. რომელშიც არც ერთი მათგანი თავისი ბუნებრივი სიკვდილით არ გაშორებია შუთხოფელს.

ქვეყანა დაღუპვის უფსკრულზე იყო გადამხობილი.

მაგრამ შაინც გადარჩა.

გადარჩა, ვინათგან მხსნელად მოევლინა ძლიერი პიროვნება.

ეს იყო ფილიპე II შაკედონელი.

!ტახტზე ასვლისას ფილიპე 23 წლის ქაბუკი იყო. იგი იძულებს და იცოცხლებს კიდევ 23 წელიწადი (359—336) და ამ დროის მანძილზე ჩამოყალიბდება და გამყლავნდება ყველა მისი თანდაყოლილი და შექენილი თვისება, ვითარცა კაცისა და ვითარცა გვირგვინოსნისა.

გარეგნულად ახოვანი და მომხიბლავი ვაჟკაცი იყო, შთამბეჭდავი რიტორი და საამურად მოსაუბრე, უმამაცესი ჯარისკაცი და დაუღალავი მოლაშქრე, სიკვდილთან შეუპოვარი მოპაექრე, თუმცა არც ისეთი მაღალნიჭიერი სარდალი, როგორადაც თვითონ მოქმონდა თავი. თავგამოდებით ეღინოფილობდა, მაგრამ ბოლომდე შაინც თავი ვერ დაეღწია „მშობლიური“ ჩამორჩენილობისათვის, მოუხეშავი, ვულგარული ქცევებისა და მანერებისთვის. იყო მოქნილი დიპლომატი, მაგრამ მასთანვე ვერაგი, ფლიდი, ცბიერი და ქვეგამხედვარი. უაღრესად ჰკვიანი ადმინისტრატორი და ანგარიშიანი მეურნე იყო, მაგრამ ზოგჯერ ფუქსავატი, განუკითხვად მხარჯველი და მფლანგველი. გასაოცარი უნარი ჰქონდა ადამიანის ღირსებათა გამოყენებისა, ერთგული სამსახურის ფასიც იცოდა, მაგრამ ნამსახურსაც ადვილად ივიწყებდა და წყალს ატანდა. მეგობრისადმი უხვი იყო და დიდსულოვანი. მაგრამ ნაღველფიციხელს უეცარი გარისხებისას შეეძლო ყოფილიყო უკიდურესად დაუნდობელი და შურისმგებელი. იყო დიდად მიზანსწრაფული, თუმცა მიზნის მისაღწევად, ეს ძველი დროის „მაკიაველისტი“, არ თავილობდა ყოვლად უპატიოსნო და უწმინდურ საშუალებებსაც. ადამიანის სიყვარულიც მისთვის საკუთარ მიზანთა იქით არც არსებობდა. ფიცისა და აღთქმის გატეხვა არად მიაჩნდა. სიტყვის შენახვაც მანამ იცოდა, სანამ იმ სიტყვას მისთვის სარგებლის რგება შეეძლო. იყო ოსტატი მტრის წინააღმდეგ ერთნაირად ხმლისა და ოქროს ხმარებისა. მისი ნათქვამია ეს შეგონება: არ არსებობს ისეთი სიმალის ციხე-გალავანი, რომელზედაც ოქროთი დატვირთული ვირი ვერ გადააბიჯებსო. საომარი ყოფინაც უყვარდა და

სანადიმო სუფრის ხმაურიც, თავაწყვეტილი ტრფიალება ღვინისა და ქალისა. უძილარს, ნამთვრალევსა და ნამრუშალს შეეძლო უმძიმესი სალაშქრო გზების გადალახვა და ბრძოლაში ჩართვა...

ასეთი იყო ფილიპე II მაკედონელი — პირველი დიდი ხელწიფე ევროპის ტანტზე<sup>1</sup>.

გამეფებიდან ორი წლის შემდეგ 25 წლის ფილიპემ ცოლად შეირთო ბერძენი ქალი — ოლიმპიადა — ეპირის მეფის, ნეოპტოლემეიდოსის ასული, ქალი მეტად ლამაზი და ამპარტავანი, ფილიპეზე არანაკლებ გულფიცხელი და დაუთმინარი, თრაკიელ ქალთა ღამეული, დიონისური ორგაიების მონაწილე და ვნებიანი მოტრფიალე, ჯადოს მღევარი და მისგანვე გაჩხიბულ გველთა მესაიდუმლე...

ფილიპე დიდად იყო დავალებული საბერძნეთისგან. ყმაწვილკაცობისას იგი ხშირად იყო საბერძნეთში — ზოგჯერ მძევლად წაყვანილი, ზოგჯერაც მაკედონის ტანტის მაძიებელთაგან შევიწროებული და დევნილი. იქ, ელადამში, მისი მასწავლებლები და მეგობრები იყვნენ დიდი თებელი სარდლები და პოლიტიკოსები — პელოპიდა და ეპანინონდა. იგი ბეჯითი დაკვირვებითა და გატაცებით სწავლობდა ყველაფერს — ელინური კულტურის მონაპოვრებს, გამორჩევით „ყოველ ბერძენთა“ (ათენელთა, სპარტელთა, თებელთა) საომარ ხელოვნებას, რათა შემდგომში ყოველივე სრულქმნილად მოეხმარა დაღუპვის გზაზე დამდგარი თავისი ქვეყნის გადასარჩენად და ასამაღლებლად.

მაშ, მეფობას იწყებს ფილიპე მაკედონელი, რომლის სამეფო გაენიახლვრება რაღაც 30 ათასი კვადრატული კილომეტრით და მასზე დასახლებული 450 ათასი მცხოვრებით.

საისტორიო ბედისწერამ დედამიწის ამ უმცირეს ნაფლეთს უნდა დააკისროს ფლაგმანობა მსოფლიო ცივილიზაციისა მთელი სამასი წლის მანძილზე.

ფილიპემ გამეფებისთანავე აღკვეთა ანარქია სახელმწიფოში. განკერძოების გზაზე შემდგარი ტომთა ბელადები დათრგუნა და დაიმორჩილა. „დიდი დამპყრობელის“ თიკუნისათვის მეოცნებე მეფე გაცხოველებით შეუდგა ქვეყნის სამხედრო რეორგანიზაციას. ბრძოლისუნარიან მოსახლეობას წვრთნიდა, ახალგაზრდა არისტოკრატებს სამხედრო განათლებას აძლევდა და ჯარის მეთაურებად ამზადებდა. ფილიპემ შესანიშნავად გამოიყენა ბერძენთა მდიდარი გამოცდილება.



განსაკუთრებით თებელი სარდლის, ეპამინონდას სამხედრო ხელოვნება, და მათზე დაყრდნობით, შექმნა ჯარის აბალი წყობა და სახეობა — „ფალანგა“<sup>2</sup>. ეს იყო მუდმივი („რეგულარული“) ქვეითი ჯარი, საგანგებოდ გაწვრთნილი და გაწაფული ჯარისკაცებით. „ფალანგები“ აღჭურვილი იყვნენ დიდი ფარებით, ორღესული მახვილებით და გრძელი სარისებით (შუბებით). ფალანგა სიღრმით შედგებოდა არანაკლები 16 რაგისა. ზუთმეტრიანი სარისები უკანა მეომრებს წინა მეომრების მხრებზე ჰქონდათ გადაწყობილი. წინა მწკრივის სარისების სიგრძეზე გამოდიოდნენ და თავს იყრიდნენ კიდევ შობდევნოთხი მწკრივის სარისები, — თანმიყოლებით, ყოველი მწკრივის შესაბამისად „დაგრძელებულნი“. და ასე, მთელი განლაგების წინ იქმნებოდა ერთიანი, ჯაგარივით ხშირი ტყე სარისებისა. ასე შერკინულ-შეჯაგრული, ერთ განურღვეველ სხეულად ქცეული მეომრული მასა ზვავის წამლეკავი ძალით მოქმედებდა მოპირდაპირის საჯარისო განლაგებაზე. ფალანგას შეეძლო განსაკუთრებული გამანადგურებელი ძალმოსილებით ემოქმედა გაშლილ ველზე. ეს იყო, რომ ფალანგა სწრაფი, მოქნილი მანევრირების უნარს მოკლებული იყო, საფლანგო შეტევებისა და კონტრშეტევების განვითარებაც ნაკლებ ძალედვა. სუსტი იყო ფალანგის ზურგიც. ამიტომ ფილიპემ ფალანგის ფლანგებზე და ზურგში ძლიერი, საგანგებოდ გაწვრთნილი ცხენოსნობა ჩააყენა. ეს იყო გამორჩეული, გაბედული და მძლავრსხეულოვანი მაკედონური ტომებისაგან შეყრილი მსუბუქი კავალერია. ამას გარდა, მეფემ მაკედონიის არისტოკრატისაგან შექმნა მძლავრი, მძიმედ შეჭურვილი მხედრობა. ფალანგისა და მხედრობის გარდა, ფილიპე მაკედონელის საომარ ძალებში შედიოდნენ მსუბუქად შეიარაღებული მეომრები, მოსარნი და მეშურდულენი, უმეტესწილად მთიელ ტომთაგან — მწყემსნი, მეჭოგენი და მონადირენი.

ფილიპემ ყველაზე ერთგული, მამაცი და ნიჭიერი ძეომრებისაგან შექმნა ცალკე ჯარი, „სამეფო აგემა“, რომელიც მას მუდამ თან ახლდა, ვითარცა „დაცვა“, „გვარდია“, თუ „ამალა“.

საერთო ანგარიშით, ფილიპე მაკედონელის საომარი ძალები მოითვლიდა 40 000 კაცს<sup>3</sup>.

მაკედონიის მეფემ თავის ქვეშევრდომებში სამხედრო სამსახური უმადლესი ზნეობის, ვაჟკაცობისა და კაცური ღირსების საქმედ აქცია. ახალგაზრდა მაკედონელები თავგამოდებით მიიღებოდნენ მეფის სამსახურში, ყველაზე რჩეულნი და „ბედნიერნი“ სასახლის კარზე მეფის

პირად „პაეებში“ ირიცხებოდნენ. „პაეთა კორპუსიდან“ დაწინაურებულინი ქმნიდნენ მეფის მთავარ სახელმწიფოებრივ საყრდენს — სამხედრო მეთაურებს, კარისკაცებს, დიპლომატებსა და ემისრებს. ეს უმაღლესი სამხედრო და სამოქალაქო ხელისუფალნი წარმოადგენდნენ მეფის „პეტერთა საბჭოს“.

მეფეს უმკაცრესი წვრთნისა და დისციპლინის ქვეშ ჰყავდა ჯარები, უმძიმეს სასწავლო ლაშქრობებს აწყობდა, მისი ბრძანებით, ჯარს უნდა ევლო სასტიკ ყინვაში ან პაპანაქება სიცხეში, სრული საბრძოლო ამუნიციით, დღელამსწორებით, შეუსვენებლივ. უძილარსა და მშვიერ-მწყურვალს. ბრძანებიდან მცირე გადახვევასაც არ აპატიებდა სამხედრო მსახურს. ქერონეის დიდი ბრძოლის წინ მეფემ ორი უმაღლესი სამხედრო პირი გადააყენა იმის გულისთვის, რომ ამათ თვითნებურად არფის დამკვერელი ქალი მოუყვანიათ საომარ ბანაკში<sup>4</sup>.

სამხედრო რეფორმის გასწვრივ, ფილიპე გაცხოველებით იღვწოდა ქვეყნის ეკონომიური განმტკიცებისათვის, ფულადი მეურნეობისა და ვაჭრობის გაფართოებისათვის. მან განავითარა წიაღისეულ სიმდიდრეთა მოპოვება და გამოყენება. განსაკუთრებული დატვირთვით ამუშავა პანგეის მთების ოქროს მადაროები, რომლებიც წელიწადში 1000 ოქროს ტალანტს\* აძლევდა მეფის ხაზინას. ფილიპემ გაატარა ფინანსური რეფორმა: შემოიღო ბიმეტალიზმი — ორი მონეტა ძირითად ფულად ერთეულებად, ვერცხლისა და ოქროსი („ფილიპიკები“)\*\*, რომლებიც მან დაუბირისპირა ბალკანეთზე შემოჭრილ სპარსულ „დარიკს“ (დარიოს I-ის ოქროს მონეტა. იწონიდა 8,5 გრამს).

მაკედონიის ეკონომიკის ძირითადი საძირკველი მაინც მიწათმეურნეობა იყო. მიწის ნაკვეთები მაკედონელებს უფრო ფართო და ნაყოფიერიც ჰქონდათ, ვიდრე ბერძნებს. მარტო 800 მაკედონელ მიწათმფლობელს 10 000 ბერძენზე გაცილებით მეტი მიწის ფართობი ეკირა.

ფილიპემ მაკედონია პირველხარისხოვან სახელმწიფოდ აქცია ბალკანეთზე. მაგრამ ეს არ იყო საკმარისი ამ პატრიმოყვარე, ენერგიული კაცისთვის, ანუ „პირველი დიდი ევროპელი გვირგვინოსნისთვის“. იგი ფრთხილ შორს უმიზნებდა: მაკედონია მხოლოდ საყრდენი უნდა ყოფილიყო მომავალი დიდი „მაკედონური სახელმწიფოსი“. აქ, როგორც

\* ერთი ტალანტი იწონიდა 26,2 კილოგრამს.

\*\* ერთი ოქროს „ფილიპიკა“ არქეოლოგებმა იპოვეს ვანში.

ეტყობა, ფილიპე ვარაუდობდა ჯერ თრაკიისა, ილირიისა და სავროთოდ ჩრდილოეთ ბალკანეთის დამორჩილებას, შემდეგ საბერძნეთის „შემო-  
ცრთებას“ და ბოლოს სპარსეთის დაპყრობას, — ყოველ შემთხვევაში, სპარსეთისაგან მცირე აზიის წართმევას მაინც.

პირველი განაზრახვი გამეფებისთანავე განახორციელა ახალგაზრდა მეფემ, — რამდენიმე „ელვისებური“ შეტევით დაიპყრო თრაკიაც და ილირიაც.

და მაშინვე საბერძნეთისკენ შემობრუნდა ფილიპე მკაცდონელი.

ქალკიდიკისა და თრაკიის ზღვის სანაპირო ბერძნული ქალაქები — ამფიპოლისი, პოტიდეა და პიდნა — ფილიპემ ერთმანეთის მიყოლებით ჩაიგდო ხელში, ათენელები, — რომლებიც თავიდანვე პატრონობდნენ ეგეოსის ჩრდილო აუზის ბერძნულ სამყაროს — ვერაფერს გახდნენ მკაცდონელი მეფის ხმლისა და ოქროს წინააღმდეგ. განსაკუთრებით ამფიპოლისისა და ოლინთოსის დაკარგვას ვერ ურიგდებოდნენ ათენელები.

357—355 წლებში ათენს ომი ჰქონდა თავის „მოკავშირეებთან“ — ქიოსთან, კოსთან, როდოსთან და ბიზანტიონთან. ამ ომმა ამოსწურა ათენის უკანასკნელი ძალები. იგი იძულებული გახდა ეცნო „მოკავშირეთა“ დამოუკიდებლობა და საბოლოოდ აეღო ხელი საბერძნეთში „ჰეგემონობის“ ოცნებაზე. ათენის ძალისა და ავტორიტეტის დაცემა კი უფრო და უფრო ამძლავრებდა და ათამამებდა მკაცდონის გვირგვინოსანს.

იმავე ჟამს ატყდა ომი შუა საბერძნეთში თებესა და ფოკიდას შორის. ფოკიდელებმა დაიკავეს და გაძარცვეს დელფოს აპოლონის სახელოვანი ტაძარი და იქ დაგროვილი საგანძურებით შექმნეს ძლიერი, ბრწყინვალედ აღჭურვილი ჯარები. საბერძნეთი ორად გაიყო. ათენელები და სპარტელები მიემხრნენ ფოკიდას, და ერთად დაუპირისპირდნენ თებელთა, ლოკრიდელთა და თესალიელთა ბანაკს. ეს ახალი, ეგრეთ წოდებული „საღვთო ომი“ გაგრძელდა ათი წელიწადი (356—346). საბერძნეთი ერთხელ კიდევ ითხევდა დაქანცულ სისხლს. მკაცდონის მეფე წვიპზე იყო შემდგარი. დიდი ცდაც აღარ დასჭირვებია. ფოკიდელები შეიქრნენ თესალიაში. თესალიელებმა დასახმარებლად მოუხმეს ფილიპე მკაცდონელს.

ფილიპეს ახალი დაპყრობილი ჰქონდა ქალაქი მეთონა, ათენელთა უკანასკნელი საყრდენი თერმის ყურეში. იქვე, მეთონისათვის ბრძოლაში, მტრისგან ნასროლ ისარს მარცხენა თვალი გამოეთხარა მეფის-

თვის. გაცოფებულმა ფილიპემ მეთონის მოსახლეობა ერთიანად მონებალ გაპყიდა, ხოლო ქალაქი ძირიანად მოთხარა. ამასობაში თესალიელთა მოწვევაც მიიღო და სასწრაფოდ სამხრეთისაკენ წარემართა.

პირველი ორი ბრძოლა ფოკიდელებმა მოიგეს და ფილიპე იძულებული გახდა უკუქვეულებო თესალიიდან. მაგრამ ისევ მოიწვიეს თესალიელებმა მაკედონიის ხელმწიფე, ისევ წარემართა ფილიპე ახალი სამხარი ძალებით, თესალიელებიც შეუერთდნენ და გადაძწყვეტ ბრძოლაში გაიმარჯვეს კიდევ. 6000 ფოკიდელი გაწყდა, 3000 ტყვედ წაიყვანეს მაკედონელებმა. ბრძოლაში დაიღუპა ფოკიდელთა მამაცი სარდალი, ონომარქოსი. ფილიპემ მისი გვამი მოანახვინია და ჯვარზე გააკურვეინა.

მაკედონელები მტკიცედ ჩადგნენ თესალიაში, მთელს ჩრდილოეთ საბერძნეთში. ფილიპემ ეს არ იკმარა და შუა საბერძნეთისკენ დაიძრა. იგი მიადგა თერმოპილეს ხეობას, მაგრამ თერმოპილე უკვე ჩაეკეტათ ათენელებს, სპარტელებსა და აქეელებს.

ფილიპემ ჯერჯერობით ხელი აიღო შუა საბერძნეთის დაპყრობაზე, თერმოპილედან დაიხია, თესალიის ქალაქებში მაკედონური ციხიონები შეაყენა და თვითონ მაკედონიაში დაბრუნდა. ამის შემდეგ, სანამ ბერძნები ერთმანეთის ხოცვა-ჟლეტას თავდავიწყებით განაგრძობდნენ, ფილიპე ფლოტიტ დათარეშობდა ჩრდილოეთ და შუა ეგეოსზე, ორკვავდა და აოხრებდა აქაურ კუნძულებს (განსაკუთრებით, ლემნოსა, იმბროსს და ეგებას), იპყრობდა ათენელთა სავაჭრო გემებს, კეტავდა სამიმოსვლო გზებს.

ათენში კი ამ დროს ერთიმეორეს გამძაფრებოთ ებრძოდა ორი პარტია — „მაკედონური“ და „ანტიმაკედონური“. პირველხი მაკედონიასთან შერიგებასა და შეერთებას მოითხოვდნენ, მეორესი — მასთან შეურიგებლობასა და დაუნდობელ ბრძოლას.

მაკედონური პარტიის მეთაურები იყვნენ გამოჩენილი ორატორები — ესქინე, დემადე და ისოკრატე, რომელთაც ფილიპესთან „დაპყრობებაში“ თავგამოდებით უჭერდა მხარს ატიკის მსხვილი მონათმფლობელური არისტოკრატია. ესქინე და დემადე მოსყიდული ჰყავდა ფილიპეს და ბერძენი ორატორები გაცხოველებით მოუწოდებდნენ თანამემამულეებს, ეცნოთ საბერძნეთის „ერთადერთი მსხნელი-სა“ და „მეგობრის“, მაკედონიის მეფის უმაღლესი ხელისუფლება.

კიდევ უფრო „მაკედონელობდა“ ისოკრატე, რომელმაც საგანგებო „პანეგირიკი“ დაწერა ფილიპეს სახობობოდ და სადიდებლად. ეს იმა-

ვე დროს იყო თავისებური „თეორიული პროგრამა“. რაც ფილპე მკედონელს პრაქტიკულად უნდა შეესრულებინა მკედონიისა და საბერძნეთის გაერთიანებისთანავე — მას უნდა დაეწყო „საღვთო ომი“ სპარსეთის წინააღმდეგ და შური ეძია სპარსთაგან ელინთა „წმიდა სალოცავთა შეგინებისთვის“. მაგრამ ეს მაინც იდეოლოგიური მხარე იყო საკითხისა, მთავარი კი ეკონომიკური მიზანდასახულობა ჰქონია ნაგულისხმევი ისოკრატეს: აზიაში ჩვენ დიდი სიმდიდრეები გველოდებო, გადავიტანოთ ომი სპარსეთში და სამაგიეროდ იქიდან გამდიდრებული დავბრუნდეთო. — სწერდა ისოკრატე ფილიპეს.

ერთი წერილით ისოკრატე პირდაპირ მოუწოდებდა მკედონიის მეფეს, — შუა საბერძნეთში შემოდიო, ათენს დაეუფლე და მთელს საბერძნეთზე შენი „ჰეგემონობა“ დაადგინეო. „თუ შენ მართლა ჰერაკლეს ღირსეული შთამომავალი ხარ. — განაგრძობდა ისოკრატე წერილს ფილიპესადმი: — ყველაფერი ისე მოიმოქმედე. როგორც გწერ და მაშინ ყველა აღივსება შენდამი უდიდესი მადლიერებით: ბერძნები — მათდამი შენგან გაწეული ქველმოქმედებით, მკედონელები — იმსახურს. რომ შენ მათთვის იქნები კანონიერი ხელმწიფე და არა თვითმპყრობელი, ხოლო დანარჩენი კაცობრიული მოდგმა — იმისთვის, რომ შენ იხსნი ბერძნებს სპარსული დესპოტიზმისაგან და ყველა ხალხს გააბედნიერებ ელინური კულტურით“.

ისტორიის ბედის ჩარხი მკედონური პარტიის საწაღმართოდ ბრუნავდა, ვინათგან საკუთარი ხელით ყელგამოლადრულ საბერძნეთს მართლაც მხოლოდ მკედონიასთან შეერთება თუ გადაარჩენდა გარდუვალად მოსალოდნელი სპარსული უღლისაგან.

მაგრამ ანტიმკედონური პარტიაც ძლიერი იყო ათენში და ეს სიძლიერე უწინარესად ელინდებოდა მის ლიდერში, უაღრესად ძლიერ პიროვნებაში. ეს გახლდათ დემოსთენე, უბრწყინვალესი ორატორი და გუმბურვალე მამულიძვილი. გამახადგურებული პოლემისტური სიმძაფრით გაისმოდა მისი სიტყვები მკედონელთა წინააღმდეგ. განსაკუთრებული სიმწვავით გამოირჩევა დემოსთენეს „ფილიპიკები“ — სიტყვები ფილიპეს წინააღმდეგ. ეს სახელი — „ფილიპიკები“ — შემდგომში ფიგურალურ გამოთქმად და მწვავე ხასიათის სიტყვის ზინონიმად გავრცელდა ზოგად სიტყვიერებაში.

ფილიპე მკედონელი კი უკვე ბატონობდა საზღვაო და სახმელეთო მაგისტრალზე თერმოპილედან პროპონტიდამდე (ძარმარლოს ზღვამდე). ჯერჯერობით მხოლოდ ქალკიდის კიდევ ერთი დიდი ქა-

ლაქი, ოლინთოსი და თრაკიის ხერსონესა ინარჩუნებდნენ მაკედონელთაგან დამოუკიდებლობასა და ათენის „მფარველობას“. ფილიპე გამალებით ემზადებოდა ორივეს დასაუფლებლად, მაგრამ მოულოდნელმა ავადმყოფობამ შეუშალა ხელი. ათენში ფილიპეს სიკვდილის ამბავსაც კი ავრცელებდნენ ვილაციები. დემოსთენე კი აფრთხილებდა და მოუწოდებდა ათენელებს, არ მისცემოდნენ უდარდებლობასა და უმოქმედობას და გამუდმებული სიფხიზლით ეომათ „იმ კაცის“ წინააღმდეგ. სწორედ მაშინ წარმოთქვა დემოსთენემ თავისი პირველი „ფილიპიკა“.

349 წელს ფილიპემ ისევ შეიყვანა ჯარები ქალკიდიკაზე, იერიშით აიღო სტაგირა (არისტოტელეს სამშობლო)<sup>5</sup> და ალყით გარს შემოეწყო აქაურთა ჰეგემონ-ქალაქს — ოლინთოსს. ოლინთელებმა ათენელებს უხმეს საშველად. დემოსთენემ სახალხო კრებაზე სამჯერ წარმოთქვა ჭიტყვა („ოლინთური ჭიტყვები“) და მოუწოდა ათენს გაეგზავნა დამხმარე ძალები ოლინთოსათვის.

თითქოს გამოიღვიძა ათენმა ლეთარგიისგან და გაგზავნა საომარი ძალები ქალკიდიკისაკენ, ჯერ — 30 ხომალდი და 2000 დაქირავებული მეომარი, ქარესის სარდლობით, მეორედ — 18 ხომალდი და 4000 მოქირავნე, ქარიდემოსის სტრატეგოსობით.

ათენელებმა შეძლეს პირველ წელს უკუეჭკიათ ფილიპე, მაგრამ წარმატება ბოლომდე ვერ გამოიყენეს და „მაკედონური პარტიის“ მეთაურთა მოწოდების წყალობით, ისევ შეასუსტეს ყურადღება ჩრდილოელი „მოკავშირეების“ გადასარჩენად ამასობაში მაკედონელთა მეფემ ხმალთან ერთად ისევ აამუშავა ოქრო და ვერცხლი (თითქოს პითია დელფოელსაც უმკითხავია მისთვის: იბრძოლე ვერცხლის შეუბებით და ყველას დაამარცხებო) და ოლინთოსის გალავანსზეც „გადააბიჯა ოქროთი დატვირთულმა ვირმა“. ოლინთოსის ცხენოსანთა ჯარის უფროსებმა, ლესთენოსმა და ევთიკრატოსმა, მდიდარი ქრთამი აიღეს და მაკედონელებს ქალაქის კარი გაუღეს. ფილიპემ საშინელი ხოცვა-ჟლეტა და ძარცვა-რბევა გააჩაღა საკუთარ შვილთაგან გაცემულ და დაცემულ ქალაქში. მეფემ ოლინთელთა უმრავლესობა ამოწყვიტა, დანარჩენები მონებად გაჰყიდა, ქონება დაიტაცა და გატიტვებული ქალაქი საძირკვლამდე დაანგრია.

<sup>1</sup>32 ბრწყინვალე ბერძნული ქალაქი დაიქცა და დაიშრია ქალკიდიკის ნაბევარკუნძულზე მაკედონელი მეფის მძვინვარე ხელით.

ათენს ისღა დარჩენოდა, ზავი ეთხოვა გამარჯვებული მაკედონე-

ლისთვის. ელჩობას მეთურობდა ფილოკრატოსი. ელჩთა შორის იყვნენ „მაკედონელი“ ესქინეც და „ანტიმაკედონელი“ დემოსთენეც.

ფილიპე სიამოვნებით შეხვდა ათენელთა „სამშვიდობო წამოწყებას“<sup>1</sup> და 346 წელს დაიდო კიდევ ზავი („ფილოკრატოსის ზავი“), რომელიც ცნობდა და აღიარებდა მაკედონელი მეფის ყოველ დაპყრობას, სამაგიეროდ კი აცხადებდა მაკედონელთა და ათენელთა „კავშირს“, „მეგობრობას“ და საქიროების შემთხვევაში, საომარ თახადვომას.

იმავე წელს დამთავრდა „საღვთო ომი“ საბერძნეთში. ფილიპე მაკედონელმა თერმოპილეს ხეობა განიერი ნაბიჯით გაიარა, შუა საბერძნეთში შევიდა და მტკიცედ დამკვიდრდა. მან მკაცრად დასაჯა ფოკიდელები — როგორც დამნაშავენი და ომის წამომწყებნი. 22 ქალაქი დაანგრია ფოკიდაში. აღვივლ ქალაქთა მცხოვრებნი 50—50 ოჯახად დაყოფილ სოფლებად მიმოფანტა შუა და ჩრდილოეთ საბერძნეთის სხვადასხვა კუთხეში.

ათენს კრინტიც არ დაუძრავს თავისი მოკავშირის გადასარჩენად, მაგრამ როცა მაკედონელთა ჯარი ატიკის საზღვრებთანაც ჩამოდგა, მიუხედავად ფილიპეს „დამამშვიდებელი ალთქმისა“, ათენში მაინც შფოთალძრული ხმაური ატყდა. ამზუედ, ესქინემ ასე დაამშვიდა ფილიპეს ელჩები: ნუ გეფიქრებათ, ათენში ყვირილის მსურველები გაცილებით მეტნი არიან, ვიდრე ომის მსურველებიო.

არც დემოსთენე აღმოჩნდა იმეამად მაკედონიასთან ომის მომხრე. უმოკავშირეოდ, მარტოდმარტო, მრავალრიცხოვან მტერთან შებმა სიგიჟეაო, არ ღირს „დელფოს აჩრდილისთვის“ თავის დაღუპვაო და ახლა გვიჯობს ისევ მშვიდობიანობა დავინარჩუნოთო. — ამბობდა იგი.

ფილიპე დათანხმდა, ათენის მფლობელობაში დარჩენილიყვნენ კუნძულები — დელოსი, სამოსი, ლემნოსი, იმბროსი და სალამინი, მაგრამ სამაგიეროდ მაკედონიის მეფემ ათენს ხელი ააღებინა სტრატეგიულად და ეკონომიურად უაღრესად მნიშვნელოვან თრაკიის ხერსონესზე.

შებრუნდა ფილიპე მაკედონელი დამორჩილებული და დავარდომილი საბერძნეთიდან და ისევ შეუტია ჩრდილოელ მტრებს — ილირიელებს, აგრიანებს, ტრიბალებს, მოლოსებს, თრაკიელებს; შეუტია და ზედისზედ აიღო გამარჯვებანი, კვლავ გააფართოვა და განავრცო თავისი სამფლობელონი ჩრდილოეთ ბალკანეთზე.

მაგრამ ჩრდილოეთში წარმოებულ ომების გასწვრივ, ფილიპე ერთის წუთითაც არ ივიწყებდა, რომ მისი სამომავლო ამბღლება-გამ-

ძღვაკრებისათვის უმთავრესი მაინც საბერძნეთის სრული შემოერთება იყო. მაკედონელი აეშაგები დაუცხრომლად მოქმედებდნენ ელადის ყოველ კუნძულში.

სრულიად ელადაც ისევ „მაკედონურ“ და „ანტიმაკედონურ“ მოძრაობათა ორომტრიალში იყო ჩათრეული. ყოველი ბერძენი ისევ ან „მაკედონელობდა“, ან „ანტიმაკედონელობდა“.

ფილიპეს აგენტები გამოარჩეული აქტიურობით ცდილობდნენ სპარტის „ანტიმაკედონურობის“ დანგრევას. ისინი სპარტის წინააღმდეგ ახვედრებდნენ პელოპონესის სხვა ტომებს — არკადიელებს, მესენიელებს, არგოსელებს.

ზაგრამ ბოლოს მაინც ათენი აღმოჩნდა „ანტიმაკედონიზმის“ ყველაზე საშიშ კერად საბერძნეთში. დემოსთენეს „მეორე ფილიპიკამ“ ფეხზე დააყენა ათენის პატრიოტული ძალები.

343 წელს, ფილიპეს ბრძანებით, მისმა უერთგულესმა და უახლოესმა სარდალმა, პარმენიონმა დაიპყრო ევბეა — ეგეოსის კუნძულთაგან ყველაზე ახლო მოსაზღვრე ატიკისა. ამან კიდევ მეტად გაამწვავა დამოკიდებულებანი ათენსა და მაკედონის შორის.

341 წელს „მესამე ფილიპიკა“ წარმოთქვა დემოსთენემ. იგი ათენელებს მოუწოდებდა, დანარჩენ ბერძნებთან შეერთებული ძალებით გაემართათ ბრძოლა „საძულველი ბარბაროსი-მაკედონელის“ დასამხობად და გასანადგურებლად. დემოსთენეს ახალმა სიტყვამ ფეხზე დააყენა ათენი. მაშინვე მოკავშირეების ძებნას შეუდგნენ და მოიმხრეს კიდევ — ქიოსი, როდოსი, აბიდოსი და ბიზანტიონი. ათენელებს დახმარება აღუთქვეს სპარსეთის მცირეაზიელმა სატრაპებმაც, რომლებიც შეშფოთებით უცქერდნენ მაკედონის ეგზომ უეცარ აღზევებას. ევბეელებმაც გამოილეს ხელი, მაკედონელთა ციხიონის უფროსი მოკლეს და ისევ ათენის მოკავშირედ გამოაცხადეს თავი.

დემოსთენე სახალხო გმირი გახდა. სახელმწიფოს წინაშე დიდი დამსახურებისათვის, დიონისობის დღესასწაულზე, ათენელებმა მას ოქროს გვირგვინით შეუქმეს თავი, სახალხო კრებამ დაადგინა, საომარ ჭაშხადისს მოხმარებოდა ყველაფერი, რაიც მანამდე დღესასწაულებასა და სანაპაობებს ხმარდებოდა, ან რიგით მოქალაქეებზე რიგდებოდა საჩუქრად და ჭილდოებად. ხალხი საზრდოდ მხოლოდ ზეთისხილს, მწვანილს, პურსა და ხმელ თევზს კმარისობდა, ოლონდკი საომარ სიძლიერეს არაა მოჰკლებოდა.

ფილიპემ დროზე შეიტყო ბერძნთა საომარი სამზადისი და, —



ისე რომ, თრაკიულ ტომებთან ომი არ შეუწყვეტია — საყვედურები-  
ბითა და ბრალდებით აღსავსე წერილი გაგზავნა ათენში. თან, წერი-  
ლის პასუხისთვისაც არ დაუტოია, ისე გააჩალა თავდასხმები ათენელ-  
თა საეპრო გემებზე ჰელესპონტ-ხერსონესის მიდამოებში. ეს კი  
ზავის დარღვევასა და ომის განაზღვრას ნიშნავდა. ათენელებმაც  
შექმნილი მდგომარეობა ასევე შეაფასეს, მაკედონისთან შვიდი  
წლის წინათ დადებული ზავის სახსოვრად საზეიმოდ აღმართული  
სვეტი საზეიმოდვე ძირს დაანარცხეს და საომარ ძალთა შეყრას  
შეუდგნენ გამალებულნი.

ფილიპემ კვლავ წარმატებით დაამარცხა თრაკიელები და მაშინვე  
ათენელთა მოკავშირეებს შემოუტია. იგი ჯერ პერინთოს დაესხა,  
პროპონტიდის სანაპიროზე, მერე ბიზანტიონსაც შეუტია. მაგრამ  
ორივე იერიში უნაყოფოდ გაუტოლდა მეფეს. ათენელებმაც ზედოზედ  
მოუსწრეს საზღვაო ძალებით, ჯერ — ქარესის, შემდეგ — ფოკიონის  
სარდლობით. ფილიპე უკუიქცა დამარცხებულნი.

პერინთოელებმა, ბიზანტიონელებმა და ხერსონელებმა, მადლობის  
ნიშნად, ათენს ოქროს გვირგვინები გაუგზავნეს.

მარცხმა ძალზე დასცა ფილიპეს ავტორიტეტი. ბერძნულ პოლი-  
სიებს მხნეობა დაუბრუნდათ და მაკედონელთა წინაშე შიში და-  
უჭრათ.

ფილიპე კი ცდილობდა მარცხი მარცხად არ ჩაეთვალა და ისევ  
მდინარე ისტროსის (დუნაი) მიმართულებით წარემართა ახალ ძლევა-  
მოსილებათა გვირგვინების მოსაპოვებლად და წინარე მარცხთა გასა-  
ქარწყლებლად. კიდევაც ბევრჯერ გაიმარჯვა, კიდევაც უამრავი ნა-  
ძარცვ-ნატყვენავი იშოვა, თვითონაც დაიჭრა, საკუთარიც და მტრის  
სისხლიც უხვად აქცია, მაგრამ ბერძენთაგან განცდილი მარცხისათვის  
მას დიდი რევანშის აღება მაინც სჭირდებოდა, უკიდურესი საჭი-  
როებით.

ისევ ამოქმედდნენ ფილიპეს აეშაგები საბერძნეთის ყოველ კუთ-  
ხეში. მეფე საბაბს ეძებდა საბერძნეთში კვლავ შესაჭრელად. საბაბი  
ყოველთვის იოლად იძებნება და მით უფრო ცბიერ ფილიპეს არ გა-  
უჭირდებოდა.

339 წელს შუა საბერძნეთში ატყდა ახალი „საღვთო ომი“ — იმ  
„საღვთო მიწისათვის“ რომელიც ლოკრიდის ქალაქმა, ამფისამ დაიჭი-  
რა და სახნავ-სათესად გამოიყენა. ასეთი „მკრეხელობისათვის“ ომის  
წამომწყები გახდა ესქინე, მაკედონური პარტიის ლიდერი და ფი-

ლიპსეგან მოსყიდული პოლიტიკოსი: ესქინეს წაქეზებით მოწვეულ იქნა დელფოს ამფიკტიონთა (რელიგიურ მოკავშირეთა) სხდომა, რომელმაც ამფისას ომი გამოუცხადა და თავის სარდლად მაკედონის მეფე მოიწვია.

ფილიპე მაკედონელი ძველ სამყაროში პირველი იყო, რომელიც ომს ზამთრის პირობებშიც აწარმოებდა და სწორედ ზამთრის დამდეგს (339—338) თავისი ჯარებით გაიარა თესალია, თერმოპილეს ხეობა და შეიჭრა შუა საბერძნეთში. შეიჭრა, აიღო და დაანგრია „მკრეხელი ქალაქი“ ამფისა და „სადეთო მიწა“ ისევ დელფოს დაუბრუნა. მასუკან ფილიპემ აიღო ფოკიდის მეორე დიდი ციხე-ქალაქი, ელატეა — „კლიტე შუა საბერძნეთისა“ — და იქვე დაიბანაკა, ახალი „ბერძნული წიაღსვლებისათვის“.

წინა დღით ერთმანეთზე გადამტერებული თებე და ათენი ისევ ერთ ტაფაზე აღმოჩნდნენ. ელატეაში ჩამოწოლილი მაკედონური ზეავი ორივეს წალეკვით ემუქრებოდა, ჯერ — თებეს, მასუკან — ათენს.

წინავე ამოქმედდნენ, — ძაღლებისა და მგლის არაკისამებრ — შუა საბერძნეთის მთავარი პოლისები. დაივიწყეს გუშინდელი წყენა და ღრენა და ისევ გაერთიანდნენ „მაკედონელი მგლის“ წინააღმდეგ საომრად.

338 წლის ადრე გაზაფხულზე შეიყარნენ ათენელები და თებელები. მალე მათ შეუერთდნენ ევბეელები, მეგარელები, კორინთელები, აქეელები და კორკირელები.

ამრიგად, ერთხელ კიდევ, ნაწილობრივ მაინც, დაძლეულ იქნა პარტიკულარიზმი — თანდაყოლილი ცოდვა ბერძენი ხალხისა<sup>6</sup>.

პირველი შეტაკებანი ფოკიდაში მოხდა და ბერძენთა მცირე უპირატესობით წარიმართა. მაგრამ ფილიპემ, ხერხიანი მანევრით, ფოკიდის ეოწრობებს თავი დააღწია, არმია ბეოტიკაში გაიყვანა და ქალაქ ქერონეისს ახლოს, მდინარე კეფისის ზეობაში, ფართო ველზე დაიბანაკა.

მას, 338 წლის მეტაგიტნიონი (აგვისტო), ქერონეისს ველი, სანიშანსვეტო და საბედისწერო ბრძოლა ანტიკური სამყაროსა.

მოწონააღმდეგენი რიცხვით თითქმის თანაბრი ძალისანი იყვნენ, — დაახლოებით, თითოეულ მხარეს — 30 000 მეომარი.

ზოლო, ბრძოლისუნარიანობით:

ბერძნები — „პარტიკულარული ცოდვიანი ბუნებით“ — ჭრელნი.

სახელდაწველოდ შეყრილნი და ერთიან საომარ გამოცდილებასა და მთლიანობას მოკლებულნი:

მაკედონელნი — ჩრდილოეთ ბალკანეთის მამაც ტომებთან ბრძოლებში ნაწრთობნი, ბერძენთა საომარი გამოცდილების მცოდნენი და ახალი („ფლანგიტური“) წყობის მფლობელნი, ერთიანი საომარი დისციპლინით შეკრულნი და შემტკიცებულნი.

საბედისწერო პერსპექტივას ქმნიდა ისიც, რომ ბერძენ მოკავშირეთა ლაშქარს არც ერთიანი მტკიცე სარდლობა გააჩნდა, არც ცოტად თუ ბევრად გამოჩეული „ვინმე“ სარდალი ჰყავდა. ბრძოლაში არ მონაწილეობდა ფოკიონი, ყველაზე დიდი სარდალი, სარდლობით ღარიბ მაშინდელ საბერძნეთში.

ხოლო მაკედონელთა არმიას სათავეში ედგა მაშინდელი მსოფლიოს ყველაზე დიდი სარდალი („მანც ყველაზე დიდი“) — მეფე<sup>1</sup> ფილიპე II.

და აქვე, ფილიპეს გვერდით ედგა ძე და მეგვიდრე მისი, 18 წლის ალექსანდრე ბატონიშვილი, „ამომავალი ვარსკვლავი მსოფლიო საომარი ხელოვნებისა.“

მოწინააღმდეგენი საომრად დალაგდნენ.

ბერძენთა მარჯვენა ფლანგი თებულებმა დაიჭირეს, თეაგენეს სარდლობით. ეს იყო სახელოვანი „სალთო რაზმი“, რომელსაც ჯერ კიდევ ამშვენებდა ეპამინონდას დროინდელი გმირობანი უმამაცეს სპარტელთა ძლევისა, ლევეტრასთან და მანტინეასთან. მარცხენა ფლანგზე ათენელები დადგნენ, ქარესის, სტრატოკლესა და ლისიკლეს სარდლობით. ათენელთა წინა რიგებში რიგით მეომრებად იდგნენ „ანტიმაკედონელი“ დემოსთენეც და „მაკედონელი“ დემადეც. თებელთა და ათენელთა შუაში მათი მოკავშირეები ჩადგნენ.

ფილიპემ ეპამინონდას „ირიბი წყობით“ გადაწყვიტა ბრძოლის წარმართვა — მთავარი, სრულძალოვანი შეტევა მარცხენა ფლანგიდან, მოწინააღმდეგის მარჯვენა ფლანგისა და ცენტრისაკენ. აქ, მთავარი დარტყმის სამეთაუროდ მეფემ დააყენა თავისი სისწლფიცხელი ძე — ალექსანდრე ბატონიშვილი<sup>2</sup>. თვითონ ფილიპე მარჯვენა ფლანგს ჩაუდგა სათავეში.

ბრძოლა დაიწყო და წარმართა ორივეს მხრივ სრულის სისასტიკით. თავდავიწყებით და დაუნდობლობით. ათენელების პირველსავე დატაკებაზე უკუიქცა მაკედონელთა მარჯვენა ფლანგი. ათენელებმა ეს გამარჯვებად მიიჩნიეს და „გაქცეული“ მტრის დენაში არივ-და-

რებს ვ. ვი. ნაი რიგები. მათ არ იცოდნენ რა ხდებოდა ამ დროს მათგან ხელმარჯვნივ. ხოლო, აქ თებელთა წინააღმდეგ ალექსანდრემ უძნაფრესი ხმალთაქვეთებით დაძრა მაკედონელთა და თესალიელთა კავალერია. არც ერთ თებელს ნაბიჯით არ დაუხევიან, ისე შეაკვდნენ გახელებით მოიერიშე მოპირდაპირეს. დაიღუპა მათი სარდალიც, თეაგენე. ფილიპე ათენელებთან ფიცხელ შეტაკებაში დაიჭრა. საბედისწერო ბრძოლის ბედის გადაწყვეტა მთლიანად ალექსანდრემ იტვირთა. მან თებელთა განადგურების კვალდაკვალ აჩეხა ბერძენ მოკავშირეთა ცენტრი და ზურგიდან შეუტია წინ გაჭრილ და ჭგუფ-ჭგუფად აკვეთილ ათენელთა ლაშქარს. 10 000 ათენელი მკვდარი დაეცა, 2 000 ტყვედ ჩავარდა. ასევე, უმრავლესობა გაწყდა ან ტყვედ ჩავარდა მოკავშირეთა ლაშქარი — ევბეელნი, მეგარელნი, კორინთელნი, აქეელნი, კორკირელნი. ბერძენთა გვამებით მძიმედ დარეცილ ქერონეის ველზე, „ალექსანდრეს მუხათან“, შემდგომში აღიმართა ლომის კოლოსალური ქანდაკება, ყოველგვარი წარწერის გარეშე, — ვინათგან თვითონ ღვრემამორეული ლომის სახე იყო სიმბოლო დიდი ბერძნული ტრაგედიისა — მღუმარებით მეტყველი ძეგლი ბერძნული სიმამაცისა ბერძნული თავისუფლების საფლავზე <sup>8</sup>.

მართლაც, ეს იყო დასასრული: საბერძნეთს მეორე ასეთი ბრძოლის გამართვა აღარ შეეძლო. მისი ბედი ახლა მთლიანად დროის გმირის, ჩრდილოელი მეზობლის ხელში იყო.

ფილიპე მაკედონელს შეეძლო ეზეიმა და იზეიმა კიდევც, — მაგრამ იზეიმა ფრიად მკრეხელურად, სულმდაბლად და წამგებიანი დაუკვირვებლობით. მან დამარცხებულ, სიკვდილს გადაარჩენილ ბერძნებს უარი უთხრა ბრძოლაში დაღუბულ თანამებრძოლთა დაკრძალვაზე და იქვე, გვამებით დაფენილ ბრძოლის ველზე, სანადიმო სუფრა გაშალა, ინადიმა, უზომოდ დათვრა და გაღეშილმა იმავ გვამებზე ეტლით იჯირითა, დამარცხებულთა და დახოცილთა უშვერი გინებით. და ყველა ამ საზიზღრობას მეფე სჩადიოდა იქვე, დატყვევებულ ბერძენთა თვალწინ. საბერძნეთის „მხსნელისა“ და „მეგობრის“ ასეთმა უზნეო თავაწყვეტილობამ და უტაქტო თვითგამოაშკარაებებამ ყველაზე მეტად სწორედ „მაკედონური პარტიის“ წარმომადგენლები შეაშფოთა. მათგან ყველაზე მთავარმა, ორატორმა დემადემ ველარ მოითმინა და შეპყვირა ფილიპეს: „მეფეო, ბედისწერამ შენ აგამემნონის როლი დაგაკისრა და თერატიეს როლს კი თამამობ!“ ამ შეძახილმა გამოათხიზლა და ქკუჟს მოაგო ფილიპე. იგი მიხვდა თავის

დაუქვირვებელ ცდომილობას. მართლაც — აქამდე რომ მაკედონელთა და ბერძენთა ერთიანი საომარი ძალების მთავარსარდლად თვლიდა თავს (ვითარცა აგამემნონი), ახლა ერთბაშად თავი გამოიშკარავა, ვითარცა ბერძენთა ნამდვილმა მომტერემ და დამპყრობელმა. მიხვდა, რომ შეცდომა სასწრაფოდ უნდა გაესწორებინა. მაშინვე დემადეს ბორკილები აპყარა, მოიბოდიშა და დახოცილები პატრიოტით დააკრძალვინა ბერძენებს.

გამარჯვებული მაკედონელები თებეში შევიდნენ. ქალაქს აღარავითარი წინააღმდეგობის გაწევა აღარ შეეძლო. კადმეაში, თებეს აკროპოლისში, მეფემ მაკედონური ციხიონი შეაყენა, ბეოტიის კავშირი დაშლილად გამოაცხადა, მეთაური პატრიოტები ამოწყვიტა და თებე დამოუქიდებელ ბერძნულ სახელმწიფოთა სიიდან საეხებრით ამოფხიკა<sup>9</sup>.

ასეთივე ბედს მოლოდინში უნდა ყოფილიყო ათენიც, ქერონეის ტრაგედიით ზარდაცემული და სამგლოვიარო ძაძვით მოსილი. 98 წლის ისოკრატემ, თანამოქალაქეთა წუხილით გულშემძრულმა, შიმშილით თავი მოაკლა.

მაგრამ ათენმა მაინც მოახერხა ტრადიციული მხნეობისა და სიმტკიცის დაბრუნება. დემოსთენეს მოწოდებით, სახალხო კრებამ სტრატეგოსებს უბრძანა ჯარი გაემზადებინათ და ბეოტიიდან შემომავალ გზებზე ციხეები გაემაგრებინათ. ქალები და ბავშვები სოფლებიდან ქალაქში შემოიყვანეს და მცველებად მოხუცი მამაკაცები დაუყენეს, ხოლო ახალგაზრდები და ჭარმაგნი საომრად აწვიეს. მონები გაათავისუფლეს და ისინიც ლაშქარში ჩააყენეს. ამნისტია გამოუცხადეს და სამშობლოს დამცველთა რიგებს დაუბრუნეს პოლიტიკური დევნილი და გაძევებული მოქალაქენი. არეოპაგს (უხუცესთა საბჭოს) ნება მიეცა სიკვდილით დაესაჯა ყველა, ვინც გაქცევით ან მიმალვით დეზერტირობას შეეცდებოდა. დიდი და პატარა, ქალი და კაცი — ამაგრებდნენ ქალაქის კედლებს, თხრიდნენ თხრილებს, მართავდნენ მიწაყრილებს, ჩეხდნენ და თავდაცვისათვის იყენებდნენ ხეივანთა ხე-ტყეს, იხმარდნენ საფლავთა ქვებს, ტაძრებში შეწირულ აღჭურვილობას. მოქალაქენი მშობლიური ქალაქის გადასარჩენად ნებაყოფლობით იმეტებდნენ ძვირფას ნივთებსა და საოჯახო დანაზოგებს.

ათენის საომარმა სამზადისმა მძიმედ ჩააფიქრა ფილიპე მაკედონელი. ისედაც ვერ უნდა გაეგებდა მას ხელყოფა ათენისა, რომელ-

საც, — მიუხედავად მისი ზრავალი მარცხისა და დაცემისა — მაინც  
შტკიცედ შემორჩენოდა უზუნაესი ავტორიტეტი სრულიაუ ელონური  
ნაძყაროს „პეგემონისა“ და „კორიფეისისა“. სპარსეთიც იმჟამად  
საგანგებოდ შემართულიყო დასავლეთისკენ სალაშქროდ და საბერ-  
ძნეთში ომის გაქიანურება მას უეჭველად გაუადვილებდა მაკედონიის  
საპატროდ ბალკანეთზე და ეგეიდაზე, საყრდენი „მეგობრების“ მო-  
ნანჯას

ერთი სიტყვით, ათენთან მტრობა კი არა, ათენთან მეგობრობა, მოყვრობა და ერთობა სჭირდებოდა მაკედონიის მეფეს. ამიტომ მან „მისი თერსიტეობის“ მამხილებელი დემადე უზვად დაასაჩუქრა და ათენში გაუშვა ზაეისა და შერიგების საშიებლად. მასთან — ყოველგვარი სასყიდლის გარეშე გაათავისუფლა ქერონეის ბრძოლაში დატყვევებული ათენელები, ყველა ახალი სამოსით დამოხა, ყველა დასაჩუქრა და ისე გაუშვა. ბრძოლაში დახოცილ ათენელთა ნაშთებიც სპატიო ესკორტით მიაცილა ათენის კარიბჭემდე, წინაპართა მიწისთვის მისაბარებლად.

ფილიპეს დიპლომატიურმა მანევრმა გაჭრა. ათენელებმა სისხლის უკანაქენელი წვეთების გაღებაზე ხელი აიღეს და „დამპყრობელს“ თუ „შემეართებელს“ შეურიგდნენ. შუამავლები კი იყვნენ: ათენის  
ჭარკი — დემადე, მაკედონიის მხრივ — ანტიპატროსი (პარმენიონთან  
ერთად, მეფის უახლოესი კარისკაცი და სარდალი. „როცა ანტიპატროსი ფიზილობს, მაშინ მე მშვიდად მძინავსო“, — ამბობდა ფილიპე). მშვიდობიანობის პირობები კი ასეთი იყო: ათენი ხელს იღებდა მისი „პეგემონობის“ ქვეშ მყოფ „კავშირზე“ და, დანარჩენ ბერძნულ პოლისებთან ერთად, თვითონ უერთდებოდა მაკედონიასთან „კავშირს“. სამაგიეროდ ფილიპე უარს ამბობდა ათენში და პირველში მაკედონური ციხიონებს ჩაყენებაზე. ამას გარდა, ძველი „კავშირიდან“ ათენს მეფე სამფლობელოებად უტოვებდა სამ კუნძულს: სალამინს, დელოსსა და სამოსს.

ათენელები კმაყოფილი უნდა დარჩენილიყვნენ, მაკედონელმა რომ პირში სული შეარჩინათ. ქალაქის მთავარ მოედანზე მათ ფილიპეს ბრინჯაოს ქანდაკება აღმართეს და გვირგვინებით შეამკეს. თვითონ ფილიპე, მისი ძე ალექსანდრე და სარდალი ანტიპატროსი ათენის საპატიო მოქალაქეებად გამოაცხადეს. ქერონეის ცოდვიან მიწაზე დაღვრილი ათენური სისხლი სარდალ ლსიკლეს დააკისრეს და სიკვდილით დასაჯეს.

მაშ, ათენში „მაკედონურმა პარტიამ“ გაიმარჯვა. ბრძოლაში და-  
ლუპულ მეომართა დაკრძალვაზე სამგლოვიარო სიტყვა უნდა თქმუ-  
ლიყო და ესეც მაკედონისა და მათი მეფის მეხოტბეებმა დაიჩემეს.  
სიტყვა მაკედონელთა მოძულე და მომტერე დემოსთენემ კი არა,  
ესქინემ ან დემადემ უნდა წარმოთქვასო, — გაიძახოდნენ „მაკედონუ-  
რი პარტიისანნი“. მაგრამ ხალხს სინდისმა მაინც თავისი გაიტანა:  
ვისაც დახოცილთა მტრებთან და მესისხლეებთან ერთ ჭერქვეშ  
დრო გაუტარებია, მათთან ერთ სუფრაზე პური გაუტეხია და უნა-  
დიშია. ვისაც დახოცილთა დახოცივისათვის მკვლელებთან ერთად  
უზეიშია, ბერძენთა მარცხისთვის ჰამნები უმღერია და ჯილდოებით  
მკერდი დაუმშვენებია — იმათ ნება არა აქვთ თავისი უღირსი სი-  
ტყვიით მიცვალებულნი შეგვიგინონ; არამედ, სამგლოვიარო სიტყვის  
პატივი ეკუთვნის მხოლოდ იმას, ვინც ყალბი აქტიორივით დამწუხ-  
რებულს როლს არ თამაშობს, ვინც ჭეშმარიტად სუფთა სულით  
წუხს და გოდებს გმირთა დაღუპვას! — ითქვა და სახალხო კრებამ  
სამგლოვიარო სიტყვის თქმა მიანდო დემოსთენეს. გმირთა სახსოვარი  
ქელუხიც დემოსთენეს სახლში გადაიხადეს ათენელებმა.

დემოსთენეს სიტყვა (რომელსაც ჩვენამდე არ მოუღწევია) უმძი-  
მნეს სამგლოვიარო რეკვიემად უნდა დარსხებულიყო სრულიად სა-  
ბერძნეთის კაეშნიან ცისგვამში. მთელი ჩრდილოეთი და შუა საბერ-  
ძნეთი მაკედონელთა სამფლობელო საზღვრებში მოქცეულიყო. ფი-  
ლიპე მაკედონელს მახვილი კორინთოს ყელს მიბჯენოდა. იქიდან  
სამხრეთ საბერძნეთი — პელოპონესი იწყებოდა.

ფილიპეს პაუზები არ უყვარდა და ჯარები დაძრა კორინთოს  
ყელზე. პირველმა კორინთომ ჩააბარა თავისი კლიტეებიც და თავისი  
ბედიც მაკედონელ მბრძანებელს. მერე დანარჩენი პელოპონესელნი  
მიჰყვნენ, ქალაქები ჩააბარეს და თვითონაც ჩაბარდნენ — არგოსელე-  
ბი, აქეელები, არკადიელები, ელიდელები, მესენიელები. მხოლოდ  
სპარტელები მაგრობდნენ ისევ, ლაკონიის ოლქში ჩაკეტილნი და სა-  
ომრად ჩასილაღებულნი.

X „თუ ლაკონიაში მოვედი, ძირფესვიანად ამოგთბრით!“ — მიუწე-  
რია ფილიპეს მუქარა სპარტელებისთვის, ასე მოკლედ — „ლაკონი-  
ურად“.

„თუ!“ უპასუხნიათ სპარტელებს „ულაკონიურესად“.

და დაიძრა ფილიპე ლაკონიისკენ. დანარჩენი პელოპონესელებიც

მიჰყენენ — მარად სპარტის წინაშე მოშიშარნი, მოქიშპენი და მოკრიბენი.

სასტიკად ააოხრეს ლაკონია, სპარტის შემოგარენი, მაგრამ თვითონ სპარტაზე — მტერთაგან მარად აულებელ და უძლეველ ლაქედემონზე — ხელყოფა მაინც ვერ გაბედეს მაკედონელებმა.

ფილიპემ ბერძნულ პოლისთა წარმომადგენლებისაგან სასამართლო დანიშნა და სპარტის ბედის გადაწყვეტა იმ სასამართლოს „მიანდო“. და ასე — ვითომ თვითონ ფილიპე არაფერ შუაში იყო — ბერძენთა გადაწყვეტილებით დადგინდა: სპარტას ჩამოერთვას ყველა სამფლობელო პელოპონესზე და შეიზღუდოს თავდაპირველი დასახლების საზღვრებში.

ფილიპე მაკედონელს სამომავლო პოლიტიკის სარგებლიანობა და მომგებიანობა მაინც საბერძნეთ-მაკედონიის „კავშირს“ უნდა დაყრდნობოდა და არა საბერძნეთის „დაპყრობას“. საქირო და გადაუღებელი იყო ამ „კავშირის“ საგანგებოდ გაფორმება და საქვეყნო გამოცხადება.

337 წელს ფილიპე მაკედონელმა ქალაქ კორინთში შეკყარა კონგრესტი, სადაც მიიწვია ყველა ბერძნული პოლისის წარმომადგენლობა. ყველა გამოცხადდა, გარდა სპარტელებისა, რომლებიც ისევ „სპარტანული სიმტკიცით“ უარყოფდნენ „კავშირს“, რომელიც უფრო „დაპყრობას“ მოასწავებდა.

უწინარესად ფილიპემ კონგრესზე გამოაცხადა მარადიული „სადვითო ზავი“ აქამდე დანასისხლად გადამტერებულ ბერძნულ ქალაქ-სახელმწიფოთა შორის. ცალკეულ ქალაქებშიც იკრძალებოდა შინაური, სამოქალაქო შეტაკებანი, კაცთა განუკითხავი კვლა და ქონების დატაცება-კონფისკაცია.

და ცხადდებოდა მარადიული კავშირი მაკედონიისა და საბერძნეთისა, მარადიულად ურთიერთდახმარებისა, ურთიერთდაცვისა და ურთიერთ-მოვლა-პატრონობისა.

ცხადდებოდა თავისუფალი მიმოსვლა და ვაჭრობა ყოველ გზაზე და გზაჯვარედინზე, ზღვაზე და ხმელზე.

„კავშირში“ შემავალი ყოველი ქალაქი ინარჩუნებდა დამოუკიდებლობას, არავის უხდიდა ხარკს და არავის ყმად არ ცნობდა თავს. იყო მხოლოდ „კავშირი თანასწორთა“.

მაგრამ ყოველი კავშირის „თანასწორობა“ არის მაინც ცნება პირობითი და შეფარდებითი. „თანასწორ მოკავშირეთა“ შორის აუცი-



ლებელია „პეგემონი“, და ასეთი „პეგემონი“ ახალი ბალკანური კავშირისა ამერიკიდან იქნება მაკედონია (იყო ოდესლაც ათენი, მერე — სპარტა, მერე — თებე, ახლა კი — მაკედონია!).

მოკავშირეთა საომარი ძალების მთავარსარდლად ცხადდებოდა მაკედონიის მეფე ფილიპე II.

აქვე ჩამოყალიბდა სინოდი — სამოკავშირეო საბჭო, რომელიც აერთიანებდა მეფის რწმუნებულებს და ყველა ბერძნული პოლისის წარმომადგენელს. სინოდი უმაღლეს კონტროლსა და მეთვალყურეობას უწევდა კონგრესის დადგენილებათა სრულიად და განუხრელად შესრულებას. საწინააღმდეგო მოქმედება სინოდს მიერ განიზილებოდა, როგორც უმძიმესი დანაშაული და ღალატი სრულიად საბერძნეთისა.

კორინთოს კონგრესის ყველა ეს გადაწყვეტილება თავს იყრიდა უმთავრეს განაზრახსა და გადაწყვეტილებაში — ომის დაწყება სპარსეთის წინააღმდეგ. ფილიპე აქაც თითქოს ბერძნებისთვის „იკლავდა თავს“, როცა სპარსეთთან ომის დაწყების მიზეზს ისოკრატეს ცნობილ ნათქვამში აყალიბებდა: ომს ვიწყებთ, „რათა სპარსელებს ვაზღვევინოთ ბერძნულ ტაძრებზე მათგან გაწეული მკრეხელობანი“.

კონგრესმა გაითვალისწინა ისიც, რომ ბევრი ბერძენი სპარსეთის სამსახურში იდგა დაქირავებულ მეომრად. ამიტომ კონგრესმა მკაცრად გააფრთხილა ყველა ბრძოლისუნარიანი ბერძენი, სპარსეთთან ომის პირობებში, რომელიმე მათგანი მაკედონიის მეფის სამტრო ბანაკში არ აღმოჩენილიყო.

აქვე დადგინდა, რომელ პოლისს რამდენი საომარი ძალა უნდა გამოეყვანა ზღვაზე თუ ხმელეთზე.

ასე დაასრულა საბერძნეთმა თავისი პოლიტიკური დამოუკიდებლობა და ჩაესვენა წიაღსა მაკედონიისასა.

ასი წლის შემდეგ იტყვის ციცერონი, დემოსთენეს დიდი რომაელი მემკვიდრე: „სჭობს არ ვიყოთ, ვიდრე სხვისი ნებით ვიყოთ!“ მაგრამ არც ერთი ხალხი, არცა „დიდი“ და არცა „მცირე“, არცა ციცერონამდე და არცა ციცერონის შემდეგ, გამხდარა აღმსრულებელი რომაელი ორატორის ამ შეგონებისა — არავინ არ დარჩენილა, ისტორიის უამსაბრუნავის გარკვეულ ნაკვეთში, რომ „სხვისი ნებით“ არ ეცხოვრა. ყველა ხალხს დასდგომია ეს „საკითხავი“: ან სრული გადამშენება, ან სხვისი ნებით არსებობა (არსებობა-მეთქი!).

და დიდ საბერძნეთსაც დაუდგა ეს დღე: სპარსეთთან სასიკვდილო

სისხლთა თხევით და საკუთარი თვითმკვლევლობით მას უეჭველი გადაშენება ელოდებოდა. მას „თავისი ნებით“ არსებობა აღარ შეეძლო. მას მხოლოდ „სხვისი ნებით“ უნდა ეარსება, და ეს „სხვისი ნება“ იყო ნება „ერთმორწმუნე მაკედონისა“.

ეს იყო „გაერთიანება“ მაკედონიასთან, მაგრამ ამავე დროს იყო გაერთიანება საკუთარ თავთან. ყოველ შემთხვევაში, აქამდელი გაერთიანებანი საკუთრივ საბერძნეთისა — ათენის საზღვაო კავშირი, პელოპონესის კავშირი, ბეოტიის კავშირი და სხვა რამ „კავშირნი“ — არა ყოფილან უფრო მტკიცენი და ნაკლებ სისხლდამდინარნი, ვიდრე ახლანდელი „კავშირი“ და „ერთიანობა“ საბერძნეთ-მაკედონიისა.

ბერძენ-მაკედონელთა „გაერთიანების“ ყველაზე რეალური გამოხატულება მაინც ის იყო, ამიერიდან რომ ყოველ ბერძენს სწორედ რეალურად შეეძლო თავის პირად ღირსებათა შესაფერისი ფასი და აღიარება მიეღო. ყოველი ბერძენი მაკედონიის კარზე მაკედონელის უფლებით რეალურად სარგებლობდა. ფილიპესა და შემდგომ ალექსანდრეს დროს ყოველი ღირსეული ბერძენი ღირსეულ ადგილს იჭერდა მეფის უახლოეს „ჰეტერთა“, უახლოეს თანამებრძოლთა, თანასარდალთა, თანაპოლიტიკოსთა და თანაინტიმთა შორის. ის კი არა და, ამიერიდან მაკედონელი უფრო მიილტვოდა „ბერძნობისაკენ“, ვიდრე ბერძენი „მაკედონელობისაკენ“.

„გაერთიანების“ მთავარი აზრი და მიზანი, როგორც ითქვა, მაინც საუკუნოვანი მოსისხლისა და მომტერის — სპარსეთის განადგურება და აზიის სიმდიდრეთა და სივრცეთა დაპყრობა იყო.

კორინთოს კონგრესზე ფილიპემ ბარბაროსულ სპარსეთთან საღვთო ომი გამოაცხადა,

იმავე წელს ფილიპემ 10 000 მეომრით მცირე აზიაში გაგზავნა თავისი რჩეული სარდლები — პარმენიონი და ატალოსი. ამათ უნდა დაეწყოთ იონიელი ბერძნების, ანუ „აზიელი ძმების“ გათავისუფლება ბარბაროსი სპარსელებისაგან და მოემზადებინათ ნიდაგი ბერძენ-მაკედონელთა სრული საომარი გადასვლისათვის, რასაც თვითონ მეფე უნდა წასძლოლოდა მომავალი წლის გაზაფხულს<sup>10</sup>.

დადგა ის წელიც — 336.

ბერძენ-მაკედონელთა სრული საომარი ძალებიც მზად იყო სპარსეთს შესევისათვის (45 წლის წინათ, სპარსეთს მეფის ქსერქსეს მეთაურობით, „აზია შეესია ევროპას“. ახლა სამაგიეროდ, შურისმგებ-

ლური ცეცხლით გატენილი ევროპა იძვროდა „აზიის ჩასაყლაპავად!“).

იდგა დიდი სანიშანსვეტო წელიწადი მსოფლიო ისტორიისა.

დელფოს აპოლონის ტაძარსაც შემოეთვალა, „მსოფლიო მკითხავის“, პითიას პირით:

„ხარი უკვე შემკულია გვირგვინით,  
და იგი მალე დაიკვება კიდევ“.

და „დასაკლავ ხარში“ მაშინვე სპარსეთი ირწმუნეს მორწმუნეებმა. მაგრამ „რწმენა“ გაცუდდა და სრულიად მოულოდნელად სულ „სხვა ხარი“ დაიკლა...

ეგემი, მაკედონიის ძველ სატახტოში, ქორწილი იყო. მეფე ფილიპე ქალიშვილს ათხოვებდა. სადედოფლოს სახელი იყო კლოპატრა. კარგად არ ჩანს — ფილიპეს იგი „პირველი ქორწინებისგან“ ჰყავდა, თუ „უკანონო ქორწინებისგან“. სინამდვილე კი ის იყო, რომ ფილიპე თავის კანონიერ თუ უკანონო ასულს (ცოლად აძლევდა ცოლისძმას, ეპირის მეფეს, ალექსანდრეს (ამით ფილიპეს სურდა შერიგებოდა წაჩხუბებულ ცოლს, ოლიმპიადას).

არამცთუ ქორწილი, არამედ მცირე ნადიმიც კი ფილიპემ იცოდა ზომიერების სრული დარღვევით, დღელამ-სწორებით და ხმაურით, აურზაურით და აყალმაყალით, თავაწყვეტილი ლოთობით და მრუშობით (მსგავსად კენტავრებისა და ლესტრიგონებისა<sup>11</sup>).

ბერძნულ ქალაქებს ოქროს გვირგვინები გამოეგზავნათ მოზეიმე მეფისთვის, ცამეტი მარმარილოს ქანდაკებაც მოედგნათ — 12 ოლიმპიელი ღმერთი და ერთიც თვითონ „ღვთისდარი“ ფილიპე.

ორი დღე-ღამის ველურ ორგიათა შემდგომ მეფე, ნალოთარი და ნამრუშალი, თანაც საზვარაკე ტარიგივით თეთრი ქათქათა კაბით შემოსილი, თეატრში წავიდა. იქ, რომელიღაც კარის დრამატურგისგან მის სახოტბოდ დაწერილი პიესა მიდიოდა. მეფე სიძე-ქალიშვილს შუაში ედგა, უკან ბრწყინვალე ამაღა, ჰეტერები, „პაჟები“ და მცველები მოჰყვებოდნენ.

უცებ მცველთა რაზმიდან ერთი ახალგაზრდა კაცი გამოიჭრა ელვასავით, მეფეს მივარდა, მაზვილი მარცხნიდან აძგერა და ძუძუ-გული შეუშუსრა. ფილიპემ კრინტის დაძვრაც ვერ მოასწრო, ისე დაეცა სულგავარდნილი.

მკვლელი გაიქცა იქვე გამარჯვებული ცხენებისკენ. მკვლელები დაედევნენ, წამოეწივნენ და აკეუწეს. იგი აღმოჩნდა ვინმე პავსანია, სასაბჭოს კარზე არც ისე უცნობი კაცი, თვითონ მეფის ერთი მკვლელთაგანი.

მკვდარი იყო ერთიც და მეორეც — მეფეც და მკვლელიც. მოწმენდილ ცაზე მეხის ქუხილმა გადაიარა.

ფილიპეც მიწის შვილი იყო და მიწას მიაბარეს.

და როცა გლოვაც ჩათავდა და ემოციებმა გზა ისევ გონების პრიმატს დაუთმეს, ფილიპეს მკვლელობის მიზეზები და მოტივები სამი ეკრსიით გამოიჭრა და გავრცელდა ისტორიაში:

ფილიპე პირადი ნაწყენობის გამო მოჰკლათ პავსანიამ;

ფილიპეს მკვლელი სპარსეთის სამეფო კარისგან მოსყიდული აგენტი იყო;

ფილიპეს მკვლელობაში ხელი ერიათ მის ცოლსა და შვილსაც.

ქორი საერთოდ უსაყვარლესი „სახალხო ჟანრია“ ხალხთა შინა, — მაგრამ მით უფრო, თუ საფუძველიც ზოგჯერ ძალიან განივთებულად გამოჩნდება. საქმე ის გახლავთ, რომ ოლიმპიადამ აშკარად გაიზარა ქმრის სიკვდილით. მკვლელის, პავსანიას ცხედარიც გვირგვინით შეამკო, ხოლო მის მახვილზე, — რომელიც ვინმე გული ფილიპესი — თავისი ქალიშვილობის სახელი — „მირტალიდა“ — ამოკვეთა და სამადლობელ ძღვენად აპოლონის ტაძარს შესწირა.

რაკი ასეა, საჭირო ხდება ვისაუბროთ ოჯახურ წრეზე, რომელსაც „ავი ენების“ მტკიცებით, თითქოს მეფე ფილიპე დიდების მწვერვალთან ერთბაში მოსხლეტით სამარეში ჩაეგდოს და ჩაექვესკნელებინოს.

## ალექსანდრეს ზეობის დასაწყისი

ზემოთაც ითქვა, რომ 357 წელს 25 წლის ფილიპე მაკედონელმა ცოლად შეირთო ბერძენი ქალი, ეპირის მეფის, პტოლემეოსის ასულა — მირტალიდა, რომელსაც მაკედონიის დედოფლობის დღიდან დაერქვა და საისტორიო სახელად შემორჩა — ოლიმპიადა. მამა ადრე მოუყვდა და ძმასთან, ალექსანდრესთან ერთად ბიძის — არივას შეურვეობის ქვეშ იზრდებოდა, ეპირის მეფეები თავიანთ წარმომავლობას აქილევსს უკავშირებდნენ და ეს „აქილევსური გულზვიადობაც“ უზომოდ გამოჰყვა მაკედონიის ახალ დედოფალს.

356 წელს ახალგაზრდა მეფე-დედოფალს შეეძინათ ვაჟი, რომელსაც დაარქვეს ალექსანდრე. საისტორიო ტრადიცია<sup>1</sup> ნაირ-ნაირი ლეგენდითა და ზღაპრით ამკობს მომავალი გმირის ჩასახვესა და დაბადების ჩვეულებრივ. მიწიერ ამბავს — ჭეკა-ჭუხილი, მენი და ცეცხლი, გველა და ლომი, ზესკნელური და გარესკნელური მოვლინებანი თავს იყრიან მართლაც გველებთან წილნაყარი, გრძნეული დედოფლის სარეცლის გარშემო. ამ ლეგენდებიდან შეიძლება მხოლოდ ეს იცოდეს სარწმუნო, რომ ალექსანდრე დაიბადა სწორედ იმ დღეს (იქნებ, იმ წუთსაც!), რა დღესაც მსოფლიოში ყბადაღებულმა ბოროტმოქმედმა პეროსტრატემ ქალაქ ეფესოში დაწვა ქალღმერთ არტემიდეს ტაძარი — ერთ-ერთი უბრწყინვალესი ხუროთმოძღვრული ქმნილება ძველი სამყაროს „შიდი საოცრებისა“. ზეცაში ასე გადაწყდაო, ვინათგან დიდი კულტურული დანაკლისი მსოფლიოში დიდი ადამიანის დაბადებით უნდა შეესებულებოთ. ტაძრის დაწვა უფროვე იმიტომ გადავიღებულა, რომ მაშინ თვითონ არტემიდეს არ ეცალა მიეხედა თავის ტაძრისთვის, რადგან იგი სწორედ ალექსანდრეს დაბადებაზე ბრძანებულა, ვითარცა ახალშობილის ამქმელი ბებია-ქალი! ამ პოეტური ხუმრობის შემდეგ, უფრო დამაჯერებელია, რომ ფილიპემ ძისა და მემკვიდრის დაბადების დღეს სამი გამარჯვების ამბავი შეიტყო — პოტიდიის აღება, ილირიელების განადგურება და ოლიმპი-

~~ადის დღესასწაულზე ეტლოსანთა ჭირთში მეფეს ცხენებს გამარ-  
ჯება. მისნებმაც ასე დაუბეჭდეს მეფეს: სამი ძღვევამოსილების ჟამს  
შობილი უფლისწული უეპველად უძღვევლი იქნებაო<sup>2</sup>. ამდენი სი-  
ხარულით „ღამფრთხალ“ ფილიპეს თითქოს ესეც წამოეძახებინოს:  
„ღმერთებო, ამდენ ბედნიერებასთან და სიხარულთან ერთად,  
გთხოვთ მცირეოდენი უბედურებაც მომივილინოთ“. მაგრამ იმჯე-  
რად თითქოს ღმერთებმა მაინც უბედურების „კომპენსაციის“ გარე-  
შე“ შეარჩინეს მეფეს ამდენი ბედნიერება და სიხარული!~~

მაშ, მაკედონიის სახელმწიფო სანთიობოში დაიბადა ყრმა, რომ-  
ლისთვისაც ხაისტორიო ბედსწერას მომავალი მსოფლიო პოლიტი-  
კური ცხოვრების „სოლისტის“, თუ „ღირაყოფის“ როლი დაუქის-  
რებია.

ტანად ტანმორჩილი იყო, მაგრამ უაღრესად მკვრივი, ჩაკირული  
და წყობილნაკეთოვანი, სახით სახიერი, თეთრ-ყირმიზი, თვალთ ალი-  
ელი — მარჯვენა თვალი შავი ფერისა, მარცხენა ლურჯი; თმა — წაბ-  
ლისფერი, მარებაძდე ტალღოვან ვარჯებად დაშვებული. სხეულით,  
თითქოს, საოცარ მომაჯადოებელ სურნელებას გამოსცემდა, რაც  
მისი ცეცხლოვანი მგზნებარებით აღსავსე ტემპერამენტის ნაყოფად  
მიუჩნევიათ თანამედროვე კალმოსნებს:<sup>3</sup> აკი მცენარეებშიც ასე  
ხდებაო — მასში რაც მეტი ჩაგუბდება მზის მზურვალემა, მით უფრო  
ხრწნადი სინესტე აორთქლდება და განიდევნება; აკი ნესტიანი ადა-  
მიანიც უფრო ხრწნადი და ამდენად „ნაკლებ სურნელოვანი“ არსე-  
ბაა, ვიდრე ცხელი, მზურვალე, „მზით ნაჯერი“ ადამიანი?! ღვინი-  
სადმი ალექსანდრეს სიყვარულსაც მისი ტანის გამორჩეული მზურ-  
ვალეებითა და „მზიური სურნელებით“ ხსნიდნენ თანამედროვენი.

სუფთად ვაპარსული, ალერსიანი ღიმილით დაფენილი სახით და-  
დიოდა, მარცხნივ ყელმოღერებული. საბერძნეთი, მისი მიბაძვით, სა-  
უკუნეების მანძილზე ნატარებ წვერ-ულვაშს გაიპარსავს. საუკუნე-  
ების მანძილზე „ალექსანდრობის“ მაძიებელი ავანტიურისტები მარ-  
ცხნივ ყელმოღრეცილნი ივლიან...

ძლიერი ნებისყოფა ჰქონდა. შეეძლო ყოფილიყო თავდაპყერილი  
და წონასწორობადაურღვეველი ერთნაირად — ყოველი უკიდურესი  
სიხარულისა და თუ უმძიმესი წუხილის ჟამს. იგი ერიდებოდა მამი-  
სეულ სხეულებრივ აღვირახსნილობას და საერთოდ ყოველგვარ ჰე-  
ღონისტურ გატაცებას, რასაც კი მისი საპოლიტიკო ცხოვრების და-  
ზიანება, დაჯინება თუ შერცხვენა შეეძლო.

მეომრული ბუნება და პატივმოყვარეობა მამამისზე გაცილებით უმეტესი სიდიდით დაჰყვა. მის გულში დაბუდებული ლომის მძვინვარება უხვად აპოხიერებდა უმადლესი სახელ-დიდებისა და მსრფლიო მბრძანებლობის მარად დაუცხრომელ ამბიციებს. ვაი თუ, მამაჩემმა ყველაფერი დაიპყროს და ჩვენ საომარი და საგმირო ამ ქვეყანაზე აღარაფერი დავგიტოვოსო, — მშფოთვარედ შესძახებდა იგი თავის თანატოლებს, როცა სასახლის კარზე მაჰარობელი ფილიპეს რომელიმე მორიგი გამარჯვების ამბავს მოაფრენდა<sup>4</sup>.

მეგობრებთან, თანატოლებთან და თანაშემწეებთან ნამდვილი თავდადებული მეგობარი და სწორფერი იყო, მაგრამ არასდროს არც თავის გამორჩეულ ღირსებათა ფასი ავიწყლებოდა. როცა ჰკითხეს აქილევსივით ფეხმარდ უფლისწულს — ოლიმპიურ ასპარეზობაზე რბენაში თუ მიიღებ მონაწილეობასო — „სიამოვნებით, უკეთუ ჩემი მოპაექრენი ხელმწიფეები იქნებიანო“, — უპასუხნია ალექსანდრეს<sup>5</sup>.

სწორუპოვარი მორბენალიც იყო, მოჯირითეც, მოკრივეც და მოქიდავეც, მაგრამ თვითონ ყველაზე მეტად ტრაგიკული მსახიობებს, კითარაზე დამკვრელებს, მომღერალი რაფსოდების, მონადირეების და რაბდომანების (დაშნებით მებრძოლნი) შეკიბრი და მასში მონაწილეობა უყვარდა. განსაკუთრებით საომარი სიმღერა იტაცებდა ჰაბუკს. მყისვე საჭურველს წაეტანებოდა საომარი სიმღერით სისხლანღვრული.

მკვირცხლი, გამჰკრიახი, შორსმხედველი გონება ჰქონდა. თოთხმეტი წლის ყმაწვილს, სატახტოში მამამისის არყოფნის ჟამს, სპარსელი ელჩები მიუღია და განუტკიფრებია დარბაისლური თავაზიანობით, კეთილგონივრულობით, განასაჯის ღრმანაზროვნებით. ალბათ, ღრმად უნდა ჩაეფიქრებინა სპარსი დიპლომატები, რა გულდასმით, ცხოველი ინტერესით და შორეული მინიშნებებით ეკითხებოდა მათ მაკედონის მომავალი საჭეთმპყრობელი სპარსეთისა და საერთოდ აზიის ხალხებზე, მათი ცხოვრების წესებზე, თვისებებზე, ბუნებრივ გარემოთა და სხვათა ყოვლთა შესახებ.

ბედისაგან „ნებიერა უფლისწულის“<sup>6</sup> ყოველი ქცევა იყო მუდამ უქცეველი და ზელუცარავი. ფილიპეს ცხენი მოჰკვარეს — „ბუკეფალა“ („ხარისთავა“ — ასე ერქვა, რაკი დაშლა ჰქონდა ხარის თავისა გამონატულებით); ფერად ყორნისფერი და შუბლთეთერი; ფიცხი და მიუჯარებელი. ვერც ერთმა გაწაფულმა მჩოდარმა ვერ მოახერხა მასზე შეჯდომა. მაშინ ჰაბუკმა უფლისწულმა, — რომელმაც შენიშნა, რომ

ტუნს ჩრდილის თამაში აშმაგებდა — მას პირი მზისკენ აქნევინა, ზურგზე ელვასავით მოეწლო, რეალის მკლავით ფაფარში ჩაეჭიდა, აქნა, დაიურვა და დაითვინიერა. „მაკედონია შენ ვერ დაგიტევს, შენთვის უფრო ვრცელი საბრძანისი ქვეყანა უნდა ეძიო“, — უთქვამს მაშინ ფილიპეს შვილისთვის 7.

ბუკეფალა იქნება ალექსანდრეს „თანამოლაშქრე“ საბრძოლო ტაიკი. რომლის ფლოქვების ქვეშ გაიქროლებს დედამიწა ხმელთაშუა ზღვიდან ინდოეთამდე...

„ნებიერა უფლისწულს“ ბედი მასწავლებლებსა და აღმზრდელებშიც დაჰყვა. საომარ ხელოვნებას რჩეული სარდლები ასწავლიდნენ. საბრძოლო „თეორიასაც“ და „პრაქტიკასაც“ გასაოცარი სისრულითა და სისწრაფით ითვისებდა, ისე, რომ ხშირ შემთხვევაში მოწაფე მასწავლებლებს სჯაბნიდა კიდევ. ალექსანდრეს ძიძების, აღმზრდელებისა და პედაგოგების ხელმძღვანელობა და მეურვეობა მეფისგან დავალებული ჰქონდა ორ ბერძენს — მკაცრ ლეონიდას და ლისიმაქოსს. ლეონიდა მსუბუქ ჰამას-სმას აჩვევდა და დედა-დედოფალსაც ნებას არ აძლევდა შვილისთვის რაიმე ზედმეტი ლუქმა მიეწოდებინა.

მაგრამ ალექსანდრეს ყველაზე დიდი მასწავლებელი იყო მანქარისტოტელე — ყველა დროს გენიალური მოაზროვნე, ფილოსოფიის მეცნიერებისა და ხელოვნების მრავალმხრივი მესაფუძვლე და სჯულმდებელი.

არისტოტელეს მამა, ნიკომაქოს სტაგირელი, ფილიპეს მამის, ამინტას კარის ექიმი იყო. მომავალი ფილოსოფოსის ჰაბტუკობაც, როგორც ჩანს, მაკედონიის სასახლის კართან სიახლოვეში მიედინებოდა. უფლისწულს დაბადების ეამს, 31 წლის არისტოტელე უკვე სახელგანსმენილი მეცნიერი იყო. სწორედ ასეთი აღმზრდელი სჭირდება ჩემს შვილს, რომელიც „ბევრ აღვირსა და საქვს“ მოითხოვსო, — ამბობდა მეფე.

და მისწერა ფილიპემ არისტოტელეს: მე უფლისწულის დაბადება განსაკუთრებით იმიტომ მახარებს, რომ იგი დაიბადა შენს დროს და გთხოვ შენვე იყისრო მისი აღზრდაო. არისტოტელემ სიამოვნებით მიიღო მეფის შეთავაზება. მეფემაც მაშინვე სამადლობელი პატივი მიუგო: სანწრაფოდ აღადგინა მისგანვე დანგრეული სტაგირე, არისტოტელეს მშობლიური ქალაქი. ამას გარდა, მეფემ მეცნიერს სამოღვაწეოდ და ტახტის მემკვიდრის აღსაზრდელად მიუძღვნა ნიმფაიონი (მუზებისაღმი მიძღვნილი ხეივანი), ქალაქ მიეზას ახლოს 8.



ასე ჩზრდებოდა ალექსანდრე მაკედონელი — მახვილით მსოფლიოს მპყრობელი, აზრით მსოფლიოს მპყრობელისაგან. უთვალსაჩინოე'ნი მოწაფე და მიმდევარი შეიქნა ალექსანდრე მისი დიდი მასწავლებლისა. იგი დიდის წარმატებით და სისრულით ითვისებდა მეცნიერებისა და ხელოვნების ყოველ დარგს — ფილოსოფიას, ფიზიკას, მედიცინას (განსაკუთრებით, ომში მულამ საჭირო ქირურგიაში იწაფებოდა), მათემატიკას, ასტრონომიას, ბუნებისმეტყველებას, რიტორიკას, მუსიკას, ლიტერატურას, სახვით ხელოვნებას. დიდი ურთიერთსიყვარული და პატივისცემა ჰქონდათ ერთმანეთისა მოწაფეს და მასწავლებელს. თვითონვე იტყოდა ხოლმე ალექსანდრე — ფილიპესაგან სიციოცხლით ვარ დავალებული, არისტოტელესგან კი სულითო. ჰომეროსის „ილიადა“ მახვილთან ერთად განუყრელად სასთუმალქვეშ ედო ალექსანდრეს. შემდგომში, აზიაში რომ უძვირფასეს ურნას მიართმევენ, მასში იგი „ყველაზე ძვირფას ნივთს“ შეინახავს — „ილიადას“. დედით ხომ აქილეუსის შთაშობაველად ითვლებოდა, თვითონაც თავგამოდებით აქილეუსობდა, აქილეუს-პატროკლეს ლეგენდარულ შეგობრობასაც არ ივიწყებდა და „თავისი პატროკლეს“ ჰყავდა — უსაცვარლესი თანამზრდილი მეგობარი — ქეფუსტიონი.

თვითონ ფილიპეს სრული რწმენა ჰქონდა მისი შვილის განსაკუთრებული, „ზედამიანური“ შესაძლებლობებისა და ადრიდანვე, უკვე 16 წლის ასაკში, ანდობდა კიდევ მას სახელმწიფო ბეჭედს და საქმეების დამოუკიდებლად წარმოებას. ამავე ასაკში დამოუკიდებლად ომის წარმართვისა და ნიჭიერი სარდლობის ნათლობაც მიიღო ალექსანდრემ. 340 წელს, — როცა ფილიპე ბიზანტიონის ალყით იყო გართული — თექვსმეტი წლის უფლისწულმა სასტიკად დაამარცხა მაკედონელთა მეზობელი და მომტერე მედების ტომი. ამ გამარჯვების აღსანიშნავად მან იქვე თავისი სახელობის ქალაქი დააარსა — ალექსანდრეპოლისი (წინაპორბედი შემდგომ მისგან მსოფლიოში განფენილი „ალექსანდრიებისა“ და „ალექსანდრეპოლისებისა“). ერთი წლის შემდეგ კი, ჩვიდმეტი წლის ბატონიშვილმა სასტიკ ბრძოლაში მძიმედ დაამარცხა ილირიელთა მთავარი პლევიროსი<sup>9</sup>. მასუკან, აკი 18 წლისამ დიდი სიმამაცით და გონიერებით გადაწყვიტა ბედი სანიშანსვეტო ბრძოლისა ქერონეის ველზე.

ჩვენი მეფე ალექსანდრეა, ხოლო ფილიპე — მთავარსარდალიო, — უკვე ისმოდა მაკედონელებში და მამა ამაყობდა კ'დეც ასეთი „სახალხო ხუმრობით“ და შვილის უპირატესობათა აღიარებით.

მაგრამ მალე მამაშვილური ნდობა და სიყვარული ოჯახში ერთბაშად ცოლქმრულმა აყალმაყალმა და ორომტრიალმა გააცუდა.

ფილიპე თავაწყვეტილი ქალთამოლალე იყო. უამრავი ხარკა და ხასა ჰყავდა და მათგან — უამრავი უკანონო შვილიც. არც ოლიმპი-ადა აკლებდა ხელს და მეუღლეს მეფურ თავს ხშირად რქებით „ულამაზებდა“. ცოლ-ქმარს შორის აშკარა, დაუძლეველი სიძულვილი ჩამოწვა. ფილიპემ უკიდურესი ნაბიჯი გადადგა და მეორე ცოლად შეირთო — ახალგაზრდა ლამაზი ქალი, სახელად კლეოპატრა, მეფის უახლოესი სარდლის, ატალოსის ძმისწული. მეფემ, როგორც სჩვეოდა, უზარმაზარი საქორწინო ნადიმი გამართა. ღვინო რომ გამძლავრდა, გაღვიძლდა და მეფის დამოყვრებით ატაცებულმა ატალოსმა, ახალი დედოფლის ბიძამ, სუფრაზე დაიდრიალა — მაკედონელებო, ევედრეთ ღმერთებს, რათა კლეოპატრას და ფილიპეს კანონიერი ტახტის მემკვიდრე შეეძინოთო. ასეთმა კანდიერებამ ააფეთქა ალექსანდრე. „ბრძეო, ნუთუ მე შენ ნაბიჯვარი გგონივარ?!“ — შეჰყვირა ატალოსს და ღვინით სავსე კრატერი სახეში შეანარცხა. შვილის ასეთმა ქცევამ მეფე გააშლევა, მახვილი გაიძრო და ალექსანდრესკენ გაექანა, მაგრამ ღვინით და მღელვარებით დატვირთულს ნაბიჯი აერია, წაიბორძიკა და დაეცა. ალექსანდრემ კი დამწვარს მღუღარე დაასხა: „შეხედეთ, მეგობრებო, ამ კაცს — ევროპიდან აზიაში რომ სალაშქროდ ემზადება — სკამიდან სკამამდე ისე ვერ მიუღწევია, ძირს არ გაშხლართულიყო“, — დაცინვით შესძახა მან აშლილ სუფრას<sup>10</sup>.

თვითონ ალექსანდრეს დედა გამორჩევით უყვარდა და ოჯახურ კინკლაობაში თითქმის ყოველთვის დედის მხარე ეჭირა. ხოლო ამ ინციდენტის შემდეგ, ოლიმპიდა ალექსანდრეთურთ სამშობლოში წავიდა და ფილიპეს სიცოცხლეში მაკედონიაში აღარ დაბრუნებულა. მაგრამ ალექსანდრე ოჯახური კინკლაობის და დაკა-დაკას ზვარაკად არ იყო დაბადებული — მას „მაოფლიო სისხლი“ უყიოდა და აუცილებლად უნდა მობრუნებულიყო მაკედონიის სასახლეში, იქ, სადაც მამინდელი მსოფლიოს ბედის ბორბალი უკვე სრულის სისწრაფით აბრუნებულიყო.

ალექსანდრეს დაბრუნება სხვა მოვლენებმაც დააჩქარეს. ერთბაშად ფილიპეს მისი უახლოესი მეგობარი სწვევია — კორინთელი დემარიატონი. როგორი თანხმობით ცხოვრობენ ბერძნები — უკითხავს მეფეს. საბერძნეთისას რას კითხულობ, როცა საკუთარი ოჯახისთვისაც ვერ მოგივლიაო, — მოურიდებლად უპასუხია სტუმარს. ფილიპე

გონს მოეგო და დემარტოსი თვითონ გაგზავნა ალექსანდრესთან, შუამავალად და შემოსარიგებლად.

ალექსანდრე პელაში დაბრუნდა, მაგრამ ოლიმპიადა ეპირიდან მაინც აქეზებდა და ახლებდა შვილს მამის წინააღმდეგ. ალექსანდრე-საც წაქეზება არ სჭირდებოდა. იგი თვითონაც კარგად ჰხედავდა, როგორ პარპაშებდნენ და „პირველობდნენ“ მაკედონიის ტახტის გარშემო ახლად გადედოფლებული კლეოპატრა, ბიძამისი ატალოსი და მათი ნათესაური „დასი“. კლეოპატრა ფეხმძიმედ იყო და ალექსანდრეს მემკვიდრეობას საფრთხე ელოდა. სამემკვიდრეო საფრთხე სხვა მხრიდანაც ვაუჩნდა ალექსანდრეს. მან შეიტყო, რომ კარიის ღინასტმა, პიქსოდოროსმა, თავისი უფროსი ასული ფილიპეს შესთავაზა რძლად, მაგრამ სასიძოდ იგულისხმებოდა არა ალექსანდრე, არამედ ფილიპეს სხვა ვაჟი, სახელად არიდაიოსი, რომელიც მეფეს თესალიელი ზარჭისაგან ჰყავდა „უკანონოდ შეძენილი“. საქმე ისე მიდიოდა, ქორწინება უნდა შემდგარიყო, მაგრამ ამოქმედდნენ ალექსანდრე და მისი „დასი“. პიქსოდოროსს ალექსანდრეს ერთგული კაცი ეწვია — კორინთელი მსახიობი თესალოსი და უთხრა — შენს ასულს რაღა უკანონო და გონებაჩლუნვ არიდაიოსს აძლევ, როცა მას ტახტის კანონიერი მემკვიდრე და უბრწყინვალესი ვაჟკაცი, თვითონ ალექსანდრე გთხოვს!

ფილიპე დაფრთხა, ალექსანდრეს მივარდა შეშფოთებული, მისი უახლოესი მეგობრის ფილოტას თანხლებით და გაკიცხა — ბარბაროსი მეფის მონა-ქალს ცოლად როგორ ირთავო!.. ალექსანდრეს მეგობრებსა და მრჩეველებსაც დაერია მეფე, ყველანი გააძევა, მათ შორის — ჰარპალოსი, ნეარქოსი, ერიგიოსი, პტოლემეაიოსი და ლაომედონტოსი<sup>11</sup>. ოლიმპიადას „დასთან“ შერიგებაც სცადა ფილიპემ და სწორედ ამიტომ შეეძგა ქორწინება ფილიპეს ასულისა (მისი სახელიც კლეოპატრაა) და ოლიმპიადას ძმისა.

და სწორედ ამ ქორწინებაზე დაიკლა „სამსხვერპლო ზარი“.

ფილიპე პავსანიამ მოკლა.

პავსანია იმიტომ ყოფილა გამწყვრალი, ახალ დედოფალს კლეოპატრას და მის ბიძას ატალოსს მისთვის რაღაც შეურაცხყოფა მიუყენებიათ, შეურაცხყოფილს მეფესთან უჩივლია, მეფესაც თავის მხრივ მომჩივანისთვის ყურადღება არ მიუქცევია და... ამიტომ მოუკლავს პავსანიას მეფე ფილიპე მაკედონელი.

ამ ვერსიიდან მომდინარე პიროვნული შურისძიების მოტივი თა-

ვიტავედ დ.საშვებია და ანგარიშგასაწევი, მაგრამ აშკარად დასტურდება, რომ პავსანია, მაინც არ ყოფილა ცალკე, მარტოხელა მკვლელი. ჩანს, არსებობდა შეთქმულთა ძლიერი წრე, რომელსაც აზიური გალაშქრების კვირახალს უნდა მოესპო ამ მსოფლიო წამოწყების მთავარი გმირი. შეთქმულთა შორის იყვნენ ფილიპეს ყრმობის დროინდელი ტახტის მეთოქენი, ლინკესტიდური დინასტიის შთამომავალი, სამი ძმა — ჰერომენესი, არაბეოსი და ალექსანდრე. ამათ გარდა, ფილიპეს მკვლელობის მონაწილენი იყვნენ მაკედონიის გამძლავრების მომტერენი, ფილიპეს ზეობის ეპოს პრივილეგია-წართმეული არისტოკრატები და ანტიმაკედონური ორიენტაციის ბერძენი პატრიოტები, რომელთაგან ერთ-ერთს, სოფისტ ჰერმოკრატოსს, პავსანიას კითხვაზე — რით შეიძლება კაცმა უდიდესი სახელი მოიპოვოსო — უპასუხნია: მოკალი იგი, ვისაც უდიდესი საქმენი უწარმოებიაო<sup>12</sup>. ამ ანეკდოტსაც თუ თავს დავანებებთ, მთავარი ის იქნება, რომ შეთქმულთა წრე და უწინარესად მისი მთავარი გმირი, პავსანია, უხვი სასყიდლით მოესყიდა სპარსეთის სასახლის კარს. თვითონ ალექსანდრემ შემდგომში უტყუვრად შეიტყო, რომ მამამისის მკვლელები სპარსეთის მეფის მოსყიდული აგენტები იყვნენ.

ოლიმპიიდან ქმრის სიკვდილის შეტყობისთანავე გაჩნდა პელაში. იგი სიზარულს ველარც მალავდა და აღარც მალავდა. არც იმას ერიდებოდა, მიიჩნევდნენ თუ არა მას მკვლელობის მონაწილედ. თითქოს, მნიშვნელობაც აღარ ჰქონია, ვინათგან მისი შვილი, მრავალ „პრეტენდენტთა“ შორის, მაინც ერთადერთ რეალურ კანდიდატად ჩანდა მაკედონიის დაცარიელებულ ტახტზე.

მაკედონელებმა, მაკედონიის არისტოკრატებმა, ჰეტერთა და სარდალთა ორივე თაობამ — ფილიპეს თანამებრძოლებმაც და მით უფრო ალექსანდრეს თანატოლებმა — ერთადერთ კანონიერ და ღირსეულ მეფედ ისევ და ისევ ცნეს ალექსანდრე.

მაშ, იდგა ძვ. წ. 336 წელი და მეფობას იწყებდა 20 წლის ჰაბუკი ალექსანდრე მაკედონელი.

ტახტზე ასვლის დღესვე მან სიკვდილით დასაჯა მამის მკვლელები, მათ შორის ლინკესტიდელი ძმები ჰერომენესი და არაბეოსი; მესამე ძმამ კი, ალექსანდრემ, გამოძიებას დაასწრო, ტახტის მემკვიდრეს ყველაზე პირველად ეახლა და მეფობა მიულოცა. ალექსანდრემ ალექსანდრეს ძველი ცოდვები შეუწდო და სიცოცხლე აჩუქა<sup>13</sup>.

ახალი მეფე თითქოს რაიმე სიახლის შემოტანას არ აპირებდა სა-

ხელმწიფოს მართვა-გამგეობაში. მხოლოდ მეფის სახელი გამოიყენებოდა და არა მეფეო — გამოაცხადა ალექსანდრემ — სახელმწიფოს სადავეებიც ისევე წარიმართება, როგორც მამაჩემის დროსო<sup>14</sup>. მართლაც, მაკედონური სკიპტრის მბრძანებლობა ისევე ორი უმთავრესი მიზანდასახულებით უნდა წარმართულიყო: ერთიანობა მაკედონიასაბურძნეთსა და ომი სპარსეთის დასაპყრობად. „სიახლე“ ამ შემთხვევაში მხოლოდ პიროვნების სიმძლავრესა თუ სისუსტეში იყო, კერძოდ, — რამდენად უფრო ძლიერი აღმოჩნდებოდა ახალი საჰემპყრობელი იმ განაზრახთა აღსრულების საქმეში, რასაც გუშინ სათავეში ედგა აწ გარდასული ძველი გვირგვინოსანი.

დრო გამოცდიდა ყოველივეს.

ხოლო, დროის ბორბალი დასაწყისში არც ისე სახარბიელოდ და სასურველად დატრიალდა ახალი და ახალგაზრდა გვირგვინოსნისთვის.

მცირე აზიაში ატალოსი აჯანყებისთვის ემზადებოდა გამალებული. საბერძნეთშიც ერთბაშად აფეთქებულა რამდენიმე კერა აჯანყებისა, რაიც ბერძნულ-მაკედონური „ერთიანობის“ სრული დაშლით იშუქრებოდა. ათენელებმა, საგანგებოდ მორთული და გვირგვინით თავშემკული დემოსთენეს მეთაურობით, ფილიპეს სიკვდილი იზეიმეს და მის მკვლელს, პავსანიას, სახალხო კრების საპატიო ფსეფსმა (დადგენილება) მიუძღვნეს. დემოსთენემ იმავე კრებაზე წარმოთქმულ სიტყვაში მაკედონიის ახალ მეფეს „ტიტრუსკანა“ („მარგიტეს“) უწოდა და ისეთ მშინარად წარმოსახა, რომელიც მაკედონიის სასახლიდანაც ვერ გაბედავს ფეხის გამოდგმას. კორინთოს კონგრესზე დადებულ ფიცს ძალა აღარ აქვსო, მამისადმი მიცემული ფიცი შეილის წინაშე ვალდებულებას არ გულისხმობსო, — გაჰყვიროდა დემოსთენე და მოუწოდებდა ათენს, თებეს, თესალიას და მთელს საბერძნეთს — დაუყოვნებლივ გადასდგომოდნენ მაკედონიას. მაშინვე დემოსთენემ შიკრიკები და წერილები აფრინა მცირე აზიაში ატალოსთან და სპარსელ სატრაპებთან, მაკედონიის წინააღმდეგ ჯარის გამოსაყვანად და ფულის გამოსაღებად<sup>1</sup>.

მთელი საბერძნეთი ფეხზე დადგა. ყოველმა პოლისმა კვლავ მოინდომა „ელევთერიისა“ და „ავტონომიის“ დაბრუნება. ათენელები საბმელეთო და საზღვაო ძალებს იკრებდნენ გამალებულნი. თებელები კადმეადან მაკედონური ციხიონის განდევნას ამზადებდნენ. ამბრაკიელებმა უკვე განდევნეს მაკედონელები. მთელი პელოპონესი იარაღს აელარუნებდა მაკედონური უღლის დასამზობად. სპარტა ზომთავიდანვე არ ცნობდა მაკედონიის ბატონობას<sup>2</sup>.

ალექსანდრემ ჯერ უსისხლოდ სცადა ბერძენთა „გონზე მოყვანა“

და ელჩები დაგზავნა ყველა ბერძნულ ქალაქში, მაგრამ ბერძნებმა ახლოსაც არ გაიყარეს მაკედონელი „ბიჭუნას“ დიპლომატიური შეგონებანი, მათ ეჭვიც აღარ ეპარებოდათ გამარჯვებაში, უკეთეს ალექსანდრე შეეცდებოდა ომის გამართვას. ახლა ხელახლა დაიწყეს ქერონეის ტრაგედიის „გადახილვა“ და „გადაფასება“. ქერონეასთან სრულიად მაკედონურმა ძალებმა, თანაც თესალიელი ბერძნების თანადგომით, ძლივს მოახერხეს მარტო ათენელებისა და თებელების დამარცხება; ახლა კი მთელი საბერძნეთი ერთიანი ძალებით დამდგარა ფეხზე და რას უნდა გახდეს ერთიან საბერძნეთთან მაკედონიის უმწიფარი მეფე, რომელიც საკუთარ ტახტზეც მორყეულად ზის და რომლის უნარიც „ჩლიფინა“ არისტოტელუს „პერიპატეტიკობას“ ვერ გაშორებია\* მერე — მაკედონიის ორივე დიდი სარდალი, პარმენიონი და ატალოსი, მაკედონიიდან შორს არიან, მცირე აზიაში, და ორივენი გაყრილნი არიან, თანაც — პარმენიონს მალე სპარსელები მოუღებენ ბოლოს, ბოლო ატალოსი თვითონ ამზადებს ჯარებს ალექსანდრეს „უქანონო მეფობის“ დასამბობად. ამას ემატება ისიც, რომ მარტო ბერძნები კი არა, მაკედონიის ჩრდილოელი მეზობლებიც — თრაკიელები, ილირიელები, აგრიანები, გეტები და პეონები — ფეხზე დამდგარან მაკედონიის დასამბობად და მოსათხრელად.

და ყოველივე ეს მართალი იყო.

და ალექსანდრეს, ვითარცა მეფეს, მეფობის დასაწყისშივე უმძიმესი გამოცდა ელოდა.

მის ახლო თანამებრძოლებსაც დაჰკარგოდათ იმედი ხსნიისა და ურჩევდნენ დაჟინებით — დაეთმო და შეერიგებოდა ატალოსს, ძღვენით და საჩუქრებით მოეგო თრაკიელების და ილირიელების გული, ბერძენთა მოალერსებით ჩაექრო საომარი სუნთქვა მთელს ბალკანეთზე და ეგვიდაზე. ასე, რომ ალექსანდრესთვის ახლა გადაუდებლად საჭირო იყო დროის გარკვეულად ხანგრძლივი პაუზა, რომლის შემდეგაც ალექსანდრე, მამამისივით, ყველაფერს დაიწყებდა თავიდან — საბერძნეთის შემოერთებასაც, ჩრდილოელ ტომთა დამორჩილებასაც და აზიაში ლაშქრობის ფიქრსაც.

---

\* სიტყვისაგან — „პერიპატეო“, „ესეირნობ“ — „პერიპატეტიკოს“, „მოსეირნე“; არისტოტელე სეირნობდა და ისე გადასცემდა თავის ფილოსოფიას. ამიტომ მასთან „თანამოსეირნე“ მოწაფეებს ეწოდათ „პერიპატეტიკოსები“ და ასევე, მომავალში — არისტოტელეს ყველა მიმდევარს.

მაგრამ ალექსანდრე არ აღმოჩნდა პაუზების მოყვარული საქეთ-მპყრობელი.

მან ერთბაშად თვალსაწიერში მოიქცია, გაზომა და გაიანგარიშა სამივე საფრთხე — საბერძნეთი, თრაკია და მცირე აზია. და ამოქმედდა ელვის სისწრაფით, მანამ სანამ ეს „სამი ძალა“ მის წინააღმდეგ ერთიანი ფრონტის შეკვრას მოისაზრებდა.

დაიწყო აზიით, ანუ ატალოსით. თანაც, დაიწყო არა ომით, — რაიც თავისთავად საზიფათოც უნდა ყოფილიყო და სამარცხვინოც (განა, მეფეს ქვეშევრდომთან ომი ეკადრებოდა?!), არამედ მარტივი და პირდაპირი განჩინებით: ატალოსი ქვეყნის მოლაღატედ გამოაცხადა და სიკვდილი მიუსაჯა. მაშინვე თავის პეტერთაგან ამოარჩია ჰეკატეოს კარდიელი და რაზმით გაგზავნა აზიაში. ჰეკატეოსი უნდა შეერთებოდა პარმენონს და ორივეს ერთად ატალოსი, ან ცოცხალი ან მკვდარი, ჩამოეყვანათ მაკედონიაში.

და იმავე უამს მეფემ ჯარებიც შემოიყარა საბერძნეთს სალაშქროდ. მაგრამ მეფემ სალაშქრო გზაზეც გასვლა ვერ მოასწრო, რომ პელაში აზიიდან ატალოსის შიკრიკები მოცვივდნენ გულგახეთქილნი. ატალოსი ალექსანდრეს წერილით აუწყებდა სრულ მორჩილებას, ერთგულ ქვეშევრდომობასა და ქვედავრდომილობას, ცრემლიანი სტრიქონებით ცდილობდა მასზე გავრცელებული ხმები მეფეს ბოროტადამიანთა ცილისწამებად მიეჩნია, და ერთგულების „საბოლოო სიმტკიცისათვის“, დემოსთენესგან გაგზავნილ წერილსაც აახლებდა ატალოსი თავის ქლესაურ ეპისტოლეს<sup>3</sup>.

მაგრამ ალექსანდრეს თავი არ შეუწუებია იმაზე ფიქრით, წრფელი იყო თუ ყალბი ატალოსის წერილი. ამისთვის არც დრო ჰქონდა და არც სურვილი. ატალოსი უნდა მომკვდარიყო, თუნდაც იმიტომ, რომ მკვდრები ეჭვებს აღარ იწვევენ (მკვდრები ცოცხლებს ეჭვებისგან ახვენებენ!). ჰეკატეოსმა ატალოსი მოჰკლა, მისი ჯარი პარმენონს შეუერთდა<sup>4</sup> და ამით „ატალოსის საფრთხეც“ გაქრა.

ალექსანდრე კი საბერძნეთისკენ მიისწრაფოდა ლაშქრით. სწრაფად შევიდა თესალიაში. სწრაფადვე, წვეთი სისხლს დაუქცევლად გაითავისა საბერძნეთის ეს უვრცესი ქვეყანა, გაახსენა თესალიელებს „ნათესაობა“, რომელიც მათ „საერთო წინაპრებიდან“ — ჰერაკლედან და აქილევიდან „მოსდგამდათ“. ასე „დაახვია თავბრუ“ თესალიელებს<sup>5</sup>, თესალიური კავალერიაც აიყოლია და შუა საბერძნეთისკენ გაქუსლა. თერმოპილეს ხეობაში რომ მივიდა, შედგა და ბერძნული



ქალაქები „სამეგობრო თათბირზე“ მიიწვია. ალექსანდრეს წვევაზე დელფოს აპოლონის ტაძრის ამფიქტიონები გამოცხადდნენ და ალექსანდრეს „ჭეგემონობა“ ისევე აღიარეს, როგორც აღრე მამამისის უმაღლესი ხელისუფლება. მაგრამ მთავარი ის იყო, რომ ალექსანდრეს მიწვევას დუმილით უპასუხა საბერძნეთის დიდმა სამეუღლმა — თებემ, ათენმა და სპარტამ.

ასეთ დროს დუმილი, თითქოს, რაღაც ძალაზე დაფუძნებულ მუქარას უნდა ნიშნავდეს, მაგრამ ეს ვარაუდიც ფუჭი გამოდგა. გამოჩნდა თუ არა ალექსანდრე თებესთან — მაკედონელთაგან ყველაზე დაზარალებულ და გადამტერებულ ქალაქთან — თებელებმა ხელის გაუხდრევლად შეუშვეს იგი აკროპოლისში, კადმეაში, სადაც აქამდეც არხეინად იდგა მაკედონური ციხიონი. ათენშიც, როგორც ხშირად სჩვეოდათ, ბევრს ლაპარაკობდნენ და არაფერს აკეთებდნენ<sup>6</sup>. ხმებს ავრცელებდნენ, ალექსანდრე ყოველ ათენელს თვალების დათხრას უპირებო, მაგრამ არც ამ მუქარას გამოუფხიზლებია საბერძნეთის „თვალი“ და „ტვინი“ უმოქმედო აპათიისაგან. მხოლოდ დემოსთენეს დაუცბრომელი ლოგოსი სჩქედა ამაოდ ათენელთა აგორაზე.

როგორც კი ალექსანდრე თებედან ათენისაკენ წარემართა, ათენელებმა, — რაც კი რამ სურსათი და საქონელი გააჩნდათ — სოფლებიდან ქალაქში შეჰყარეს და ამნაირად ათენი, მთელი საბერძნეთის თვალისჩინი — „ელადა ელადაში“ — უცებ ცხვარ-ძროხის აქოთებულ თავლად გადაიქცა. ალექსანდრე კი სწრაფად ახლოვდებოდა. მეტი საშველი აღარ იყო და იკადრა ათენმა ელჩობის გაგზავნა. ელჩობაში დემოსთენეც იყო, მაგრამ იგი გზიდან გაბრუნდა, — ალბათ, შეუშინდა ატალოსთან და სპარსელებთან მიწერ-მოწერის გამქლავებმა<sup>7</sup>.

ალექსანდრემ ალერსიანად მიიღო „საყვარელი ათენელები“, დაუყვავა, „უნებლიე შეცოდებანი“ აპატია, თვალების დათხრის მუქარისა თითქოს არაფერიც არა სცოდნოდა, მხოლოდ ფილიპეზე მიცემული ფიცის დაცვა „შეაძნენათ“ და ახალ „დაკისრებად“ ჰხვია არაფერი უკადრებია, გარდა იმისა, რომ ათენს წარმომადგენელი უნდა გაეგზავნა კორინთოში, სადაც ახლა თვითონ მეფე მიემგზავრებოდა ახალი, საყოველთაო ბერძნული „კონგრესის“ გასამართავად.

მაშ, იდგა 336 წელი და ალექსანდრე მაკედონელი, — ისე ვითარცა ერთი წლის წინათ მამამისი ფილიპე II — იწვევდა „მეორე კონგრესს“ კორინთოში. მოწვეული იყვნენ ყველა ბერძნული ქალაქები, მათ შორის სპარტა. და ისევ მარტო სპარტელები არ გამოცხადდნენ

და მხოლოდ მათთვის ჩვეული „მშობლიური ლაკონიურობით“ შემოთვალეს: წინაპართაგან ჩვენ ნაანდერძევი გვაქვს არა სხვის კულში ჩანჩალი, არამედ თვითონ ვიყოთ მუდამ სხვათა წინამძღოლნიო<sup>8</sup>.

მაგრამ კორინთოს მეორე კონგრესიც სპარტელების გარეშე ისევ მაკედონიის სასახლის კარის წარმატებით დამთავრდა. ისევ გამოცხადდა ბერძენ-მაკედონელთა „ერთიანობა“ და „კავშირი“, ისევ დაიფიქს ბერძნებმა ამ „კავშირის“ და მისი „პეგემონის“ — მაკედონიის მეფის ერთგულება. კვლავ გამოცხადდა „ნაციონალური“ და „საღვთო ომი“ სპარსეთის წინააღმდეგ, და დადგინდა ბერძენულ-მაკედონური ერთიანობის საომარ ძალთა მთავარსარდლად მეფე ალექსანდრე მაკედონელი<sup>9</sup>.

კორინთოდან გამობრუნდა ალექსანდრე<sup>10</sup>. პელაში მისვლამდე დედამისს ოლიმპიადას ქერივი დედოფლის, კლეოპატრასთვის, ახალშობილი ვაჟი ზედ მკერდზე მიეკლა და კლეოპატრასაც მაშინვე სარტყელით თავი ჩამოეხრჩო<sup>11</sup>. დედის ასეთი სისასტიკე თითქოს „იწყინა“ ალექსანდრემ. მაგრამ მეფის „წყენას“ ანგარიში არ გაუწიეს და ალექსანდრეს ყველა „უკანონო ძმა“ ამოწყვიტეს, არიდაიოსის გარდა. არიდაიოსი ჰეკუაშერყეული იყო და მეფობისთვის უვარგისი, და ასეთ „უფლისწულს“ ჰქონდა სიცოცხლის „უფლება“...

335 წლის ადრიან გაზაფხულზე ალექსანდრემ ჯარები დაძრა ჩრდილუ ბალკანეთის აჯანყებული ტომების ზელაწლა დასამორჩი-

---

\* არსებობს ვადმოცემა, რომელიც მოგვითხრობს კორინთოში ალექსანდრეს შეხვედრას ცნობილ ფილოსოფოს დიოგენესთან. როცა აქ ალექსანდრეს ყველა ცნობილი ადამიანი ეახლა და გამარჯვებები მიულოცა, მხოლოდ დიოგენემ არაფრად ჩააგდო ახალგაზრდა მეფე და არ წავიდა მის სანახავად, მაშინ თვითონ ალექსანდრე ეახლა მოხუც ბრძენს, რომელიც მისი მარადიული „საკნოვრისიდან“ — კასრიდან გამოძქვარალიყო და მზეზე თბებოდა. ალექსანდრე მივიდა, მიესალმა და უთხრა: მითხარ, რაც გინდა და შეგისრულებო; — გთხოვ, ცოტა იქით გაიწიო, მზეზე ნუ მეფარებიო. — უპასუხია გულგრილად დიოგენეს. „ფვიცავე ღმერთებს, მე რომ არ ვიყო ალექსანდრე, ვინატრებდი დიოგენობასო“, — უთქვამს მეფეს თავისიანებისთვის (იხ. პლუტ., ალექს., 14; პავს., II, 2, 4).

\*\* კიდევ ლეგენდა: ალექსანდრემ უკან დაბრუნებისას დელფოში გამოიარა, აპოლონის ტაძრის მისანთან, პითიასთან სამკითხაოდ. პითიამ უარი შეუხებდა მკითხაობაზე. მაშინ ალექსანდრემ მჭაში ხელი ჩაავლო და ძალით სცადა სამკითხაოდ მისი წაყვანა. პითიამ შეჰყვირა: „ყმაწვილო, შენ ვერაფერი უნდა დაგიღვდეს წინ!“ — „საკმარისია, შენ უკვე მიწინასწარმეტყველე: მე ვერაფერი დამიღვება წინ!“ — შესძახა და მოეშვა მკითხავს ალექსანდრე.

ლებლად. ამფიპოლისიდან გავიდა, როდოპის მთებში ჩასაფრებული „დამოუკიდებელი თრაკიელები“<sup>10</sup> გადაქელა, მთის მწვერვალზე ავიდა და ღმერთ დიონისე თრაკიელს მსხვერპლი შესწირა. იქიდან ალექსანდრე გაეშურა ტრიბალეისკენ, რომლებიც არც ფილიპეს მორჩილებას ურიგდებოდნენ, არც მისი შვილისას. ალექსანდრემ მძიმედ დაამარცხა ტრიბალები, მაგრამ ვერ შეძლო აეღო ისტროსზე მდებარე კუნძული პევკე, სადაც თავი შეაფარა ტრიბალთა ბელადმა სირმიოსმა, სიკვდილს გადაჩენილი თანამებრძოლებით, ოჯახებით და ავლადიდებით. კუნძულს თავი მიაწება ალექსანდრემ, ისტროსი გადალახა და მის მარცხენა ნაპირზე გაანადგურა გეტებუს მეოპრული ტომი. უკანვე გადმოლახა მდინარე და გადმოსვლისთანავე მორჩილება და „კუბოს კარამდე“ ერთგულების ფიცი შეაგებეს ტრიბალებმა.

ტრიბალთაგან პეონიაში გადმოვიდა ალექსანდრე, იქიდან ილირიისში შეიჭრა და პელიონის მთაში ჩასაფრებულ აჯანყებულებს მიამუხრა. ილირიელებმა ბრძოლის წინ ღმერთებს სამი ბიჭი, სამი გოგო და სამი შავი ცხვარი დაუქლეს და, მეფე კლიტოსის მეთაურობით, მტერს შეებნენ. მძიმე ბრძოლები ისევ მაკედონელთა გამარჯვებით გათავდა. მეფე კლიტოსი მეზობელ ტომთან, ტავლანტიელებთან გაიქცა მაშველი ჭარის საშოვნელად. ტავლანტიელთა ბელადმა, გლავკიამ, მეზობლის გასაჭირი გაიყო და თვითონაც იარაღი აისხა. ბრძოლა გაგრძელდა. ალექსანდრეს ნიჭმა და სიმამაცემ მაინც თავისი გაიტანა. ილირიელები და ტავლანტიელები დამარცხდნენ. ილირიამ მაკედონელთა ბატონობის უღელი იტვირთა. კლიტოსი ისევ ტავლანტიელებთან გადაიხვეწა<sup>11</sup>.

საბერძნეთი კი მთელი ზაფხული გაჩუმებული და გამტკნარებული უსმენდა ჩრდილოეთიდან კანტიკუნტად მოვარდნილ საომარ ყიყინასა და საჭურვლის ზრიალს.

უცებ ჩრდილოეთიდან ამბავი მოიჭრა, მოულოდნელი და ბერძენი პატრიოტებისთვის ფრიად სანატრელი: ალექსანდრე მაკედონელი ტრიბალებთან რომელიღაც შეტაკების ეამს დაიღუპაო! სიხარულით აფოფინებულმა დემოსთენემ ათენელთა სახალხო კრების წინაშე წარადგინა კაცი, რომელმაც გამოაცხადა, რომ იგი თვითონ მონაწილეობდა იმ საბედისწერო ბრძოლაში, თვითონ კიდევაც დაიჭრა და თავისი თვალთ იხილა როგორ დაეცა მკვდარი ალექსანდრე მაკედონელი!<sup>12</sup> სხვა რაღა იყო საჭირო მეოცნებეთა დასარწმუნებლად! ისევ

აულორძინეს საომარი სუნთქვა ათენელებს დემოსთენემ, ლიკურგემ და მათმა თანამებრძოლმა „ანტიმაკედონელებმა“.

ალექსანდრეს სიკვდილის ამბავმა გაახარა და ალაფრთოვანა თებე, რომლის აკროპოლისში, კადმეაში, ჯერ ისევ იდგა მაკედონური ციხიონი. ათენში თავშეფარებული თებელი ემიგრანტები ჯარსა და ხალხს ამზადებდნენ კადმეის გასათავისუფლებლად. კორინთოს კონგრესზე დადებული ფიცით ყოველი ქალაქი უარს ამბობდა საომარი ძალებით დანმარებოდა სამშობლოში დაბრუნების მოსურნე ემიგრანტებს. მაგრამ ახლა, როცა მეფე „მკვდარი იყო“, მკვდრად ცხადდებოდა მასთან დადებული ყოველგვარი ფიციც და მტკიციც! ერთი სიტყვით. დემოსთენესა და მის თანამებრძოლთა ხელშეწყობით, ემიგრანტები ღამით შევიდნენ მშობლიურ თებეში, მათ სათავეში ედგნენ ფენიქსი და პროთიტესი, რომელთაც მისვლისთანავე, — ვითომ მშვიდობიანი „რაიმეს სათქმელად“ — კადმეადან გამოიხმეს მაკედონური ციხიონის მეთაურები ანემეტა და ტიმოლაოსი. გამოიხმეს და იქვე ჩახოცეს. მასუკან საომარი განგაში ასტეხეს, თებელთა კრება შეჰყარეს, ალექსანდრეს სიკვდილი ამცნეს და უმეფოდ დარჩენილ მაკედონელთა წინააღმდეგ საომრად მოუწოდეს. თებელებმა იარაღი აისხეს და კადმეაში გამაგრებული მაკედონელები ალყაში მოაქციეს. დემოსთენემ სპარსეთიდან მიღებული ფულით იარაღი იყიდა და თებელებს გაუგზავნა. ათენელებიც შესდგომოდნენ საომრად აღჭურვას. პელოპონესიდან თებეს საშველად უკვე წამოსულან ელიდელნი და არკადიელნი. შუა საბერძნეთში ეტოლიელებიც იკაზმებოდნენ თებელებთან თანასაომრად.

და უეცრად, მოულოდნელი ღვთის რისხვასავით, გაჩნდა ალექსანდრე ჯარით შუა საბერძნეთში. როგორც კი თებეს აჯანყება შეეტყო, მაშინვე დაძრულიყო და ილირიიდან თებემდე უმძიმესი გზა ექვს დღეში დაეფარა მგლურით მომავალს.

მოდოდა და მოიქაძნინდა ალექსანდრე: დემოსთენე ათენელი ილირიაში ჩემი ყოფნისას თურმე ბიჭს მეძახდა, თესალიაში ყოფნისას — ბიჭუნკელას და ახლა ათენში ვაჟკაცად ვეაზღვებო.

„მკვდრეთით აღმდგარი მეფის“ გამოჩენამ შეარყია საბერძნეთი. იქნებ მეფე არ არის და „სხვა ვინმე ალექსანდრე“ არისო, — ეჭიღებოდნენ ხავს ზოგიერთები. მაგრამ მწარე სინამდვილე უმაღვე სარწმუნო გახდა.

ალექსანდრეს გამოჩენის პირველივე ნაყოფი ის იყო, რომ თებეს

საშველად ფეხზე დამდგარი ბერძენი მოკავშირენი ადგილზევე ჩაქ-  
კავდნენ და ჩაიჩუმებოდნენ.

თებე მარტო დარჩა.

უფრო მეტიც, — ბერძენთაგან ზოგიერთები — ფოკიდელნი, პლა-  
ტეელნი, თესპიელნი და ოქრომენელნი — მაკედონელებს შეუერთდნენ  
მათი მარადიული მეტოქე-მომძის, თებებს დასამზობად და მოსათრე-  
ლად.

მაგრამ მოულოდნელად, თვითონ ალექსანდრემ თებელებს სისხლ-  
დაუქცეველი შერიგება შესთავაზა, ოღონდ თებელებს, პატიების სა-  
ფასურად, მეფისთვის მძევლებად აჯანყების მეთაურები, ფენიქსი და  
პროთიტესი უნდა მიეცათ.

საგანგებოდ შეყრილმა თებელთა კრებამ მძულვარებით უარყო  
მაკედონელის მოთხოვნა და მტკიცედ გადაწყვიტა სამკედრო-სასი-  
ცოცხლოდ შებმოდნენ კარს მომდგარ მტერს.

პირველნი თვითონ თებელები გამოუხტნენ მაკედონელებს, მაგრამ  
მაკედონელებმა პირველი დატაკებისთანავე უკუაქციეს ისინი. ასე  
გაგრძელდა „მი-მო-ქცევა“ რამდენიმე დღეს. ალექსანდრე უცდიდა,  
როდის „მოეგებოდნენ გონს“ თებელნი. ბოლოს, პერდიკამ ველარ მო-  
ითმინა და ალექსანდრეს დაუკითხავად, თავისი რაზმით, ქალაქზე  
იერიში მიიტანა. სასტიკ შეტაკებაში პერდიკა მძიმედ დაიჭრა და  
ბრძოლიდან გაიტანეს. პერდიკა ამინტამ შეცვალა და მაკედონელთა  
იერიშები გაგრძელდა. თებელები გააფთრებით იცავდნენ თავს.

მაშინ ალექსანდრე თვითონ გაუძღვა მთავარ ძალებს. იმადრო-  
ულად კადმეადან მაკედონური ციხიონიც გამოიჭრა და ზურგიდან და-  
ეცა, ალექსანდრესთან პირისპირ შებმულ თებელთა ლაშქარს.

ალექსანდრეს ფალანგამ თებებს კარბიჭენი შემუსრა და ქალაქში  
შეიჭრა. თებელები ისევ იბრძოდნენ თავგანწირვით, სიკვდილთან  
წილყრით; იბრძოდნენ ქუჩებში, მოედნებზე, შუკებში, სახლის ყო-  
ველ კუთხესა და კუნჭულში. გამხეცებული მაკედონელები დაუნ-  
დობლად და განუკითხავად უღეტდნენ ყველას — კაცსა და ქალს,  
დიდსა და მცირეს, ჩვილსა და მოზუსს; ხოცავდნენ ყველგან, სადაც  
წაეწვოდნენ — გზაში თუ სახლში, საწოლზე თუ სალოცავ საკუთხე-  
ველზე.

ბრძოლა გათავდა. 6000 თებელი მკვდრად დარეცილიყო მშობ-  
ლიური ქალაქის მიწაზე. ალექსანდრემ ბეოტიელი „მოკავშირეები“  
შეპყარა და დამარცხებული ქალაქის გასამართლება მიანდო. ბე-

ოტიელთა „სასამართლომ“ ბეოტიის ყველაზე დიდ ქალაქს ისეთი სასჯელი დაუდგინა, რასაც მოძმე-მეზობელი კი არა, რომელიმე აღმოსავლელი მოსისხლე დესპოტი თუ მოიფიქრებდა. (თუმცა წინარე ხანაში არც თებე აკლებდა ხელს მეზობელი ბეოტიური ქალაქების აკლებასა და აოზრებს). 30.000 თებელი მონად გაჰყიდეს (მათი გაყიდვით ალექსანდრემ 440 ვერცხლის ტალანტი მიიღო). მთელი ქალაქი, კადმეას გარშემო, დაანგრის, მოთხარეს და უდაბნოდ აქციეს. კადმეაში ისევ მაკედონური ციხიონი ჩადგა, ტაძრებისა და ნაქალაქარის სამეთვალყურეოდ. მიწა-წყალი, რაც აქამდე თებეს ეკუთვნოდა, მაკედონელის ყმა-ქალაქებმა — ორქომენმა, თესპიამ და პლატეამ გაინაწილეს<sup>13</sup>.

მხოლოდ ქურუმებისა და პინდაროსის შთამომავალთა საცხოვრებლები დარჩა დაუნგრეველი თებეში. ასეთი იყო ბრძანება სახელოვანი პოეტის მოთაყვანე ალექსანდრე მაკედონელისა.

სოცვა-ელეტის დასასრულს ალექსანდრეს მისმა ჯარისკაცებმა ერთი დატყვევებული თებელი ქალი მოჰგვარეს, სახლად ტიმოკლეა. იგი აღმოჩნდა დაი იმ თეაგენესი, თებელთა „სადღთო რაზმს“ რომ მეთაურობდა ქერონეის ბრძოლაში და იქვე რომ დაიღუპა თავის თანამემამულეებთან ერთად. ტიმოკლეა თურმე რომელიღაც თრაკიელ ჯარისკაცს გაუბახებია და მერე ოქრო-ვერცხლიც მოუთხოვია. ქალს ჯარისკაცი ჭასთან მიუყვანია. ოქრო იქ დავმალეო, — უთქვამს და ჭიკენ გადახრილი გამბახებლისთვის ხელი უკრავს. შიგ გადაუღვია და ზევიდან ქვა-ლოდით ჩაუქვავებია. ალექსანდრეს დიდსულოვნური პოზების გათამაშება უყვარდა და ტიმოკლეა მისი შვილებითურთ თავისუფალი განუტევა<sup>14</sup>.

თებეს ტრაგედიამ თავზარი დასცა მთელს საბერძნეთს. ველურმა შიშმა სავსებით დათრგუნა გუშინდელ პატრიოტული ენთუზიაზმი. თებელთა სინანულით მოხსენიებასაც ველარ ბედავდნენ და „გარისხებული აქილევსის“ მახვილის ხელახალ მოქნევას კისრის ქრეოლით ელოდნენ.

არკადიელებმა სასწრაფოდ უკან გაიწვიეს თებეს საშველად გამოგზავნილი ჯარი და მაკედონიის სამტროდ წამოყენებული ომის ინიციატორები სიკვდილს მისცეს. ელიდამ განდევნილი „მაკედონური პარტიის“ წარმომადგენლებს ამნისტია გამოუცხადა. ეტოლიელებმაც ალექსანდრესთან ელჩები გაგზავნეს პატიებისა და შეწყნარების თხოვნით.

პირველი პასუხისგება მაინც ისევ ათენს მოეთხოვებოდა — მთელი საბერძნეთისთვის ყოველთვის „პირველ პასუხისმგებელს“. თებელთა ყოველი აღზევებაც ყოველთვის თებეს მესვეურთა „ათენური ემიგრანტობით“ იწყებოდა და ეს უკანასკნელი ანტიმაკედონური გამოხდომაც თებელმა პატრიოტებმა „ათენური ბუდიდან გადმოფრენით“ დაიწყეს.

თებეს ამოწყვეტისა და დანგრევის ამბავი ათენში სექტემბრის დამდეგს, დიდი მისტერიების დღესასწაულის დროს მოვიდა. შეძრწუნებულმა ათენელებმა ზეიმი შეწყვიტეს და მოძრავი ქონება სოფლებიდან ისევ ქალაქში შეზიდეს. შიში შიშად გავრცელდა, მაგრამ თებედან გამოქცეულ ახალ ემიგრანტებს თავშესაფარზე უარი მაინც ვეღარ უთხრეს. შეიყარა სახალხო კრება. პირველი გამოვიდა დემადე, რომელმაც მოითხოვა დაუყოვნებლივ შეედგინათ ელჩობა, ალექსანდრესთვის „სასიამოვნო“ ათი კაცისაგან; ელჩობა სასწრაფოდ უნდა ხლებოდა მეფეს, ჯერ მისთვის უნდა მიეღოცა ტრიალებზე და ილირიელებზე გამარჯვება, მერე აჯანყებული თებეს დამარცხება და მიწასთან გასწორება და ბოლოს, ათენის ძველი სტუმართმოყვარეობის უფლებრივი ცნობა, მათთან თავშეფარებულ ემიგრანტთა ხელშეუხებლობის დაცვით.

ასეთი სათხოვრით წარსდგა „სასიამოვნო ათელი“, დემადეს მეთაურობით, ალექსანდრეს წინაშე, — თითქოს სხვა რამ დანაშაული ათენს „თებეს კახუსთან“ დაკავშირებით არც ჩაედინოს და ამიტომ არც რაიმე „შესაწყალბელი“ სათხოვარი გასჩენოდეს.

ალარც ალექსანდრემ გაართულა საქმე. მას აზიამში ჯარების გადასახმა ეჩქარებოდა და ათენთან საომარი მდგომარეობის შექმნა, თუ არ ჩაშლიდა, უეჭველად ძალზე დააბრკოლებდა მეფის მთავარი განზრახვის განხორციელებას. ამიტომ მან ხმალზე ხელი აიღო; მაგრამ ეს ორი მოთხოვნა მაინც წაუყენა ათენს: თავშეფარებულ თებელთა განდევნა და იმ ათენელ პოლიტიკოსთა გაცემა, რომლებიც ფილიპეს დროიდან განუწყვეტლივ ომსა და მტრობას აღვივებდნენ მაკედონელთა წინააღმდეგ. ასეთ ომის გამჩალებლად ალექსანდრე ასახელებდა ათ კაცს და მათ შორის — დემოსთენეს, ლიკურგეს, ჰიპერიდეს, ეფიალტეს, ქარიდემოსსა და ქარესს.

ალექსანდრეს მოთხოვნებმა ცხარე კამათი გამოიწვია ათენელთა სახალხო კრებაზე. ერთხმად იქნა უარყოფილი თებელ ლტოლვილთა განდევნა, მეორე მოთხოვნასთან დაკავშირებით კი, ორი სხვადასხვა

აზრი დაეჯახა ერთმანეთს: „მაკედონური პარტიისანი“, ფოკიონის მეთაურობით, მოითხოვდნენ მოწინააღმდეგე „ანტიმაკედონური პარტიის“ მესვეურთა გაცემას, ზოლო „ანტიმაკედონელები“ თავს იცავდნენ და კრებას მოუწოდებდნენ ალექსანდრეს მოთხოვნის უარყოფას. თვითონ დემოსთენე შებლაოდა ხალხს: ისე ნუ მოიქცევით, როგორც ერთ იგავში ცხვრები თავის დამცველ ძაღლებს მგელს აძლევენო. თავის მხრივ, ფოკიონ „პატიოსანი“ გაიძახოდა დაჟინებულად — ვის გადაცემასაც მეფე მოითხოვს, იმათ ვაუკაცობა უნდა ეყოს. თვითონ ჩაბარდნენ და სამშობლო მოსალოდნელი უბედურებისგან იხსნანო. ბოლოს, დემოსთენემ დემადეს მოსყიდვა მოახერხა, მასუკან ფოკიონიც დაითანხმა და სახალხო კრებამ ალექსანდრეს მეორე მოთხოვნაც უარყო.

ათენელთა ეს დადგენილება თვითონ ფოკიონმა და დემადემ მიართვეს ალექსანდრეს. მაკედონიის „დიდსულოვანმა“ ხელმწიფემ ისევ დაუთმო ათენს. თებელ ემიგრანტთა და ანტიმაკედონელ ათენელთა განდევნის მოთხოვნაზე ხელი აიღო, მაგრამ შერისხულთაგან ერთი მაინც გააძევიებინა ათენელებს — ქარიდემოსი, ყველაზე თავზეხელაღებული ანტიმაკედონელი ათენში. ქარიდემოსი გაიქცა სპარსეთში. მალე მის კვალს მიჰყვა ეფიალტეც.

ბალკანეთზე საომარი ყიეინა და ნალარის ხმა შეწყდა. დუნაიდან იონიის ზღვამდე ყოველივე ხელთ ეპყრა ალექსანდრე მაკედონელს. 335 წლის შემოდგომაზე იგი, — ჯერხნობით მხოლოდ „ბალკანეთის მეფე“ — დაბოუნდა პელაში, მაკედონიის სასახლეში. დაბრუნდა და გამალებით შეუდგა მომავალი წლისთვის აზიის დესალაშქრავ-დასაპყრობ საზხადისს. თვითონაც შეგნებული ჰქონდა, რომ წელიწადი ესე — შემდგომი დროის წელსათვალავით, ქრისტეს წინარე 334 — სანიშანსვეტო უნდა ყოფილიყო არა მარტო მისი ჩიატანოვანი სამშობლოსათვის, არამედ სრულიად მაშინდელი და მომავალი მსოფლიოსათვის.

იგი „მსოფლიო ომს“ ამზადებდა. კრებდა ჯარებს, აგებდა ზომალდებს, აწყობდა თათბირებს, კრებდა ცნობებს აზიის ქვეყნებზე, მათ ბუნებრივ პირობებზე, სწავლობდა ყოველ წვრილმანს, რასაც მის სალაშქრო გზაზე რაიმე როლის შესრულება დაეისრებოდა. რაც მთავარია, მას ყოველდღიური, ახალ-ახალი ცნობები ჰქონდა სპარსეთის შინაური ცხოვრების, პოლიტიკური ცვლილებების, ახალ პოლიტიკურ



ვნებათა და ტენდენციათა წარმოშობა-წარმომავლობის, საომარ ძალთა განლაგების და განწყობილების შესახებ.

ზოიურ ლაშქრობაში, ურიცხვი სიმდიდრისა და უდიდესი სახელდიდებისათვის, იგი იწვევდა ყოველ ბალკანელ ბელადს — ბერძენსა და მაკედონელს. თრაკიელსა და ილირიელს, აგრიანსა და ტრიბალს — ყველას, ვისაც ადგილზე დაჩენილს შეიძლება „ანტიალექსანდრულ“ შეთქმულების უნი აღძვროდა, ხოლო ალექსანდრეს თანამოლაშქრობით ნამდვილი „ალექსანდრული სიმამაცე“ გამოეჩინა და პირველი დიდი ევროპული ლაშქრობისთვის სარგებლობა მოეტანა.

მძ-მე და ზანჯრძლივ ომში მიმავალს ადვილობრივ, ბალკანურ სამფლობელოთა შენარჩუნებაზე ფიქრი ერთის წუთითაც არ ავიწყდებოდა. მას მაკედონიაში უეჭველად ძლიერი „თავის მაგიერი“ უნდა დაეტოვებინა და შეარჩია კიდევ ასეთი. ეს იყო ანტიპატროსი — უერთგულესი კაცი ჯერ ფილიპესი, მერე ალექსანდრესი. ანტიპატროსს ევალეობდა დაუკლებლად შეენარჩუნებინა მეფისგან მიბარებული სამბრძანებლო საზღვრები, დაეცვა შინაგანი სიმშვიდე, ტახტის სიმტკიცე და ყოველივე ნივთიერი თუ სულიერი კეთილდღეობა. საომარ ძალად მეფემ ანტიპატროსს დაუტოვა 12 000 ქვეითი და 1500 ცხენოსანი მეომარი.

ანტიპატროსი და პარმენიონი იმასაც ურჩევდნენ ალექსანდრეს, ჯერ ცოლი შეირთო, ტახტის მემკვიდრე გაიჩინე და აზიაში მერე გაილაშქრეო, მაგრამ მეფემ შორს დაიჭირა, — განა სირცხვილი არ იქნება. მთავარსარდალი, რომელსაც ჯარები სალაშქროდ ელოდება, ქორწილით ერთობოდეს და შვილების დაბადების ცდაში უქმად იჯდესო! 15

ისე მიიღტვოდა აღმოსავლეთის უსასრულო წიაღისაკენ, თითქოს, უკან დაბრუნებას აღარც ფიქრობდა. ყოველივე და ყველაფერი, რაც პირად ქონებად გააჩნდა, სულ ერთიანად დააროგა და დაფანტა ახლობელთა და მეგობართა შორის. „~~კი მაგრამ ასე ყველაფერს რომ არიგებ, შენთვის რაღას იტოვებ, მეფეო? — უკითხავს მისთვის პერდიკას. (ჩემთვის იმედს ვიტოვებო), — უპასუხია ალექსანდრეს. „მამინ ჩვენც, შენი თანამოლაშქრენი, მაგ იმედს გავინაწილებთო“~~ — ამ სიტყვებით პერდიკას უარი უთქვამს თავის წილ სამეფო ძღვენზე. ხოლო „იმათ, — ვინც იღებდა ნაბოძებს და ვისაც დახმარება მართლა სჭირდებოდა, ალექსანდრე ყველას ხალისით და უხვად ასაჩუქრებდა.

ასე დაანაწილა მან თითქმის მთელი ქონება, რაც მაკედონიაში მოექვე-  
ვებოდა“<sup>16</sup>. ასე, რომ აზიაში გალაშქრების წინა დღით სახელმწიფო  
ხაზინაში 60 ტალანტზე მეტი აღარ მოიქვევებოდა<sup>17</sup>.

დიდი „ღეთაებრივი იმედით“ ავსებული ახალგაზრდა გვირგვინოს-  
ნის წინაშე გაშლილი იყო მსოფლიოში უდიდესი სახელმწიფო —  
სპარსეთი.

სპარსეთს ამ დროისათვის უკვე გავლილი ჰქონდა თავისი დიდი ისტორია. უკვე ორას წელს გადაშორებოდა მისი ბატონობა მსოფლიოზე.

სპარსეთის საბელმწიფო დააარსა 550 წელს კიროს უფროსმა, აქემენიდმა (550—529), რომლის შემდგომ მის მალალსა და მორკმულ ტახტზე თანმიყოლებით ისხდნენ: კამბიზი (529—522), დარიოს I (521—486), ქსერქსე (486—465), არტაქსერქსე I (465—424), ქსერქსე II (424), სოგდიანე (424—423), დარიოს II (423—404), არტაქსერქსე II (404—358), არტაქსერქსე III (358—338) და არსესი (338—336).

აქედან — პირველი ოთხი დიდი ხელმწიფის დროს სპარსეთი იქცა მანამდე გაუგონარი სივრცისა და სიფართოვის ქვეყნად. ეგი ვადაჭიმული იყო კავკასიონიდან არაბეთის ზღვამდე და ინდოეთიდან — ეთიოპია-ლიბიამდე —

აქ დასახლებულ ხელმწიფეთაგან ორი უკანასკნელი — არტაქსერქსე III და არსესი — ფილიპე II მაკედონელის თანამედროვენი იყვნენ.

არტაქსერქსე III — ზედნადები სახელით „ოზოს“ — ტიპიური ძველალმოსავლელი დესპოტი იყო, სისხლისმოყვარე, ვერაგე, ცბიერი, გარყენილი სულით და მრუში სხეულით. მეფობა ძმებისა და მათი „თანამოდასეების“ ამოწყვეტით დაიწყო, მერე სახელმწიფოს ყოველ კუთხეში ოდნავ „საეჭვოებს“ მისდგა და უწყალოდ გაუუუა.

მონარქიაში აჯანყებანი მძვინვარებდნენ, განუწყვეტლევ და განუცადებლად.

შეკავშირდნენ და აჯანყდნენ იონიისა და ფრიგიის მმართველნი „სატრაპნი“ — ორონტი და არტაბაზი. ორონტმა ათენთან გააბა საკავშირო ურთიერთობა, არტაბაზმა კი როდოსთან, რომელსაც მამაცი

და ნიჭიერი ძმები განაგებდნენ — მენტორი და მემნონი. ორივე ძმა დაიმოყვრა აჭენყებულმა სატრაპმა — ცოლად შეირთო მათი და. ცოლის ძმებმა ბერძენ მოქირავენეთა ჯარები მოართვეს სიძეს. ათენიდანაც მოვიდა დამხმარე ძალა ქარიტეს, ქარიდემოსისა და ფოკიონის სარდლობით. 357 წელს ათენელებმა დაამარცხეს კიდეც სპარსელი მეფის ჯარი, მაგრამ არტაქსერქსემ მუქარა შეუთვალა ათენს, — თუ ქუთას არ მოეგებით, სამას ხომალდს ახლავე გამოგვზავნი თქვენი მტრების მისაშველებლადო. ათენელებიც უმაღვე „მოეგნენ გონს“ და მეფის სამტრო კავშირს ჩამოშორდნენ. სამაგიეროდ არტაბაზმა თებედან მიიღო მაშველი — 5000 მოქირავენე მეომარი, პამენოსის სტრატეგოსობით. თებელთა დახმარებით, არტაბაზმა ორჯერ ზედიზედ დაამარცხა მეფის ჯარები. მაგრამ უცებ მდგომარეობა შეიცვალა. არტაბაზმა შეიტყო, რომ პამენოსი არტაქსერქსეს კართან რაღაც საიდუმლო მოლაპარაკებას აწარმოებდა. სპარსეთის მეფეს თებეში დიდძალი ფული გაეგზავნა და, ეტყობოდა, პამენოსიც თებედან საიდუმლოდ მიღებული მინიშნებით მოქმედებდა. არტაბაზმაც აღარ დააყოვნა და თებელი სარდალი დილეგში ჩაამწყვდია. მაგრამ მალე ამას აჯანყების კრახი მოჰყვა (351 წ.). არტაბაზი და მემნონი მაკედონიაში გაიქცნენ. ხოლო მენტორი — ეგვიპტეში.

თითქმის ორასი წელიწადი გასულიყო მას შემდეგ, რაც სპარსეთის ხელმწიფეს, კამბიზს ეგვიპტე დაეპყრო (525 წ.). ეგვიპტე — ეს „მთელი მსოფლიოს პირველი სკოლა“<sup>1</sup> — მუდმივი აჯანყების, თავსუფლებისა და დამოუკიდებლობისათვის დაუცხრომელი ბრძოლის კერა იყო სპარსეთის „ყოვლისმომცველ“ მონარქიაში.

მეფე არტაქსერქსე III ჯერ კიდევ უფლისწულობის ჟამს, მამის ზეობისას, მოუხდა აჯანყების ცეცხლში გახვეულ ეგვიპტეში წასვლა. მაშინ მაინცდამაინც ვერ ისახელა თავი „ოზროსმა“. ეგვიპტის აჯანყება შინაურმა არეულობამ, ფარაონის ტახტისათვის ბრძოლამ და ურთიერთმტრობამ ჩააქრო. მაგრამ არტაქსერქსე III ტახტზე ასვლის დღიდანვე განუცადებლად გრძნობდა ნილოსის დელტიდან ახალ აჯანყებათა სპშიშროებას.

354 წელს საბერძნეთში ხმა დაირხა, რომ სპარსეთის მეფე არტაქსერქსე ოზროსი ამზადებდა ახალ გრანდიოზულ, „ორ-ნაწილიან ლაშქრობას“ — ჯერ, ეგვიპტის ხელახალ დაპყრობას, მერე საბერძნეთში შესევას. იგი თოქოს იმეორებდა დარიოს I-ისა და ქსერქსეს დროინდელ „მსოფლიო შესევებს“ საბერძნეთში, რასაც ორივეჯერ წინ

უსწრებდა აჯანყებული ეგვიპტის ხელახალი დალაშქვრა და დათ-  
რგუნვა. ათენში დაბეჯითებით გაიძახოდნენ, რომ ოხოსი უკვე დაპრუ-  
ლა ზღვით და ხმელეთით, მოდის და უკან, „უკვდავ ათასეულთა“  
გარდა, მოსდევს ოქროთი დატვირთული 1200 აქლემი და ამ სა-  
ჭურჭლეებით მან აზიურ საომარ ძალებს გვერდით უნდა ამოუყუროს  
ბერძენ მოქირავნეთა ათასეულები. მაგრამ ხმები გაზვიადებული  
აღმოჩნდა. სპარსელთა ჯარები ჯერ კიდევ ბაბილონიდან არ გამოსუ-  
ლიყვნენ. რაც მთავარია, ევროპაში ახალ დიდ „აზიურ შესევას“ ისევ  
აზიელებმა შეუშალეს ხელი. მცირე აზიაში იონიელი ბერძნებისა და  
ფრიგიელების აჯანყება ისევ გრძელდებოდა. მცირეაზიელებს კიდევ  
ფინიკიელები შეუერთდნენ. აჯანყდა დიდი ფინიკიური ქალაქი —  
სიდონი მისი მმართველის, ტენესის წინამძღოლობით. ტენესმა ფინი-  
კიისა და ტრიპოლისის ყველა ქალაქი შემოიფიცა, ეგვიპტის ფარა-  
ონთან, ნექტანებ II-სთან, კავშირი შეკრა და საომარი ნაღარა და-  
ჰკრა. აჯანყებულებმა ყველაფერი დაანგრიეს, აიკლეს და გააცამტვე-  
რეს, რასაც კი სპარსეთის მეფის სახელი ერქვა, გაწყვიტეს ყველა  
სპარსელი, ვინც კი მოიხილეს და მოიხელთეს. ფინიკიელები განუ-  
წყვეტილვ იარაღდებოდნენ, მოქირავნეებს ქირაობდნენ და გადა-  
მწყვეტი ბრძოლისათვის ემზადდებოდნენ.

არტაქსერქსემ ბრძანება გაუგზავნა სირიისა და კილიკიის სატრა-  
პებს — ბელეზისსა და მაზეიოსს — დასწრაფოდ დასხმოდნენ თავს  
სიდონს. მაგრამ ტენესმა ნექტანებ ეგვიპტელისგან 4000 ბერძენი მო-  
ქირავნე-მეომარი მიიღო მენტორ როდოსელის სარდლობით. მენ-  
ტორმა წარმატებით უკუაქცია ბელეზისისა და მაზეიოსის ჯარები<sup>2</sup>.  
იმავე ეამს კიპროსზე ცხრა ქალაქი აჯანყდა და ეგვიპტელ და ფინი-  
კიელ ინსურგენტებს შეუერთდა.

არტაქსერქსე ოხოსმა ეგვიპტე-საბერძნეთის მიმართულეებით „მე-  
სამე შესევისათვის“ საომარი ძალები დასძრა, თან, წინასწარ, ბერ-  
ძნულ ქალაქებს დასახმარებლად მოუწოდა (ვითომდა, საბერძნეთის  
„შეწუხებას“ როდი ვაპირებო...).

საბერძნეთში „საღვთო ომი“ ჯერ კიდევ არ დასრულებულიყო,  
მაგრამ მაინც მიიღო ბერძნული ძალები სპარსეთის მბრძანებელმა:  
თებემ 1000 მეომარი გაუგზავნა, ლაკრატოსის სტრატეგოსობით, არ-  
გოსმა — 3000 მეომარი, ნიკოსტრატოსის სარდლობით. ათენმა და  
სპარტამ „მიუმბრობლობის პოზიცია“ აღუთქვეს სპარსთა ხელმწი-  
ფეს<sup>3</sup>.

ამას გარდა, არტაქსერქსემ იონიაში, მცირე აზიის ბერძნულ ქალაქებში, 6000 მეომარი შემოიყარა, საჭურის ბაგოასის სარდლობით. თვითონ არტაქსერქსემ ფინიკიისაკენ დასძრა ჯარები, ხოლო აჯანყებული კიპროსისკენ გაგზავნა იდრიეოსი, კარიის სატრაპი.

აჯანყებულები დააფრთხო მტრის ჯარბი ძალების ხილვამ. კიპროსელებმა უბრძოლველად დაჰყარეს იარაღი. სიღონელები ერთ ხანს განაგრძობდნენ ბრძოლას. მათ თვითონ დაწვეს თავიანთი ხომალდები, გაქცევის იმედიც რომ არავის დარჩენოდა, მაგრამ ბოლოს, ტენესმა და მენტორმა თვითონვე გაუღეს ქალაქის კარი მტერს. მეთაურთაგან განწირულმა აჯანყებულებმა ქალაქი ცეცხლს მისცეს და თვითონაც ხანძარში ჩაინთქნენ. 40 000 სიღონელი ემსხვერპლა ცეცხლსა და რკინას.

არტაქსერქსემ ტენესს მშობლიური ქალაქის ღალატისათვის იმით გადაუხადა, რომ თავი გააგდებინა, ხოლო მენტორი პატივით მიიღო და დაიახლოვა.

სიღონის ალებით სპარსთა მეფეს გზა გაეხსნა ეგვიპტისაკენ. სპარსელებმა სუეცის ყელი გადაიარეს და ნილოსის დელტის აღმოსავლეთ განტოტებაზე, ქალაქ პელუსიონს მიადგნენ. ფარაონმა ნეკტანებმა 5000 მოქირავნე ბერძენი შემოაგება მტერს, ფილოფრონეს სარდლობით. ბერძნებს ბერძნები შეატაკა სპარსელმა ხელმწიფემ. თებელები დაწინაურდნენ, ლაკრატოსის წინამძღოლობით, და თავგანწირვით შეებნენ ფილოფრონეს რაზმებს. სპარსელები გაშტერებულნი უცქერდნენ, რა თავგამეტებით ხოცავდნენ ერთმანეთს „ეგვიპტის ბერძნები“ და „სპარსეთის ბერძნები“. ღამემ გაჰყარა მომტერენი. თებელები უკუიქცნენ.

ასი ათასი მეომარი კიდევ ქვეყნის შიგნით ჰყავდა გამზადებული ფარაონ ნეკტანებს — 60 000 ეგვიპტელი, 20 000 ბერძენი და ამდენივე ლიბიელი. მაგრამ ნეკტანების საბედისწერო შეცდომა ის იყო, რომ ამოდნა საომარ ძალთა მთავარსარდლობა რომელიმე ნიჭიერ და მამაც ბერძენს კი არ ანდო, არამედ თვითონ იტვირთა, სამხედრო საქმეებში სრულად უწვრთნელმა და უმეცარმა.

არტაქსერქსემ სარდლებს ამოცანები დაურთო, თვითონ თავისი წილი ჯარი აიყოლია და სამხრეთ-დასავლეთის გეზით, ეგვიპტის უძველესი სატახტო ქალაქის, მემფისისკენ წარემართა. ამასობაში — ლაკრატოსს თებელებით და ლიდის სატრაპ რესაკეს სპარსთა ქვეითი ჯარით — უნდა აეღოთ პელუსიონი; არგოსელებს, ნიკოსტრატო-

სის სარდლობით და რჩეულ სპარსელთა ათასეულს, არისტაზანის წინამძღოლობით, მასთან 80 ხომალდით — ზღვიდან ალყა და იერიში უნდა დაერთყათ პელუსიონზე. ხოლო, მეოთხე ნაყადს — 6000 ბერძენს, მენტორისა და ბაგოასის მეთაურობით, უნდა გადაეკრათ მკურთხეული გზები პელუსიონსა და მემფისს შორის.

ოთაივე ნაკადით ბრწყინვალედ გაიმარჯვეს არტაქსერქსე ოხოსის ჯარებმა. ნექტანებმა, უძვირფასესი საჭურჭლეებით დატვირთული ხომალდით, ეთიოპიას შეაფარა თავი. სრულიად ეგვიპტე სპარსელებით აივსო.

იღვა ქრისტეს წინაზე 344 წელი, საბედისწერო წელიწადი ეგვიპტის ისტორიისა. ამიერიდან ეგვიპტეს საკუთარი, ეროვნული სახელმწიფოებრიობა აღარ მოსწრებია. მისი მფლობელნი, მბრძანებლები და ბატონ-პატრონნი იქნებიან მუდამ უცხოელნი, სხვა ქვეყნისანი. სხვა სჯულისანი...

საშინელა სისასტიკით მოექცა არტაქსერქსე ოხოსი დაპყრობილ ქვეყანას. კამბიზის შემოსევის შემდგომ, ასეთი შემადრწუნებელი უბედურება აღარ ახაოვდა ეგვიპტეს. სპარსელებმა დაანგრიეს და დაამიწეს ბრწყინვალე ქალაქები, ციხესიმაგრენი, დააშანჯრიეს უძვირფასესი ძეგლები, დაძარცვეს და იავარპყვეს უმდიდრესი ტაძრები, შეურაცხყვეს და შებილწეს სალოცავები და საკურთხეველები. თვითონ მეფე არტაქსერქსე ოხოსმა საკუთარი ხელით, შუბის დაკვრით, მოჰკლა ეგვიპტის ღმერთი — ტოტენი, (ხალი აზრით) ამით ოხოსმა გაიმეორა ველური მკრეხელობა კამბიზისა. ამიტომ ორივეს სახელი ყველაზე საძულველ სახელებად შემოინახა ეგვიპტურმა ტრადიციამ.

არტაქსერქსემ უზავდ დააჩილდოვა და ისე განუტევა თავისი ბერძენი მოკავშირენი. მენტორი და ბაგოასი ურიცხვი საჩუქრებითა და წყალობით აავსო. ბაგოასი თავისი „გვარდიის“ უფროსად დანიშნა. მენტორ როდოსელს საზღვაო სანაპიროთა მთავარსარდლობა ჩააბარა. მენტორის ძმა მემნონი და მათი სიძე არტაბაზი — ადრე რომ მეფეს აუჯანყდნენ — მენტორის თხოვნითვე შეიწყნარა და შეირაგა.

სპარსეთის ახალმა გამარჯვებებმა შეარყია მამინდელი მსოფლიო. არტაქსერქსე III ოხოსი დიდებამოსილებით ლამის გააწორობოდა აქემენიდური დინასტიის „დიდებულ ოთხეულს“ — კიროსს, კამბიზს, დარიოსს. ქსერქსესა. არტაქსერქსე აღარ იყო მხოლოდ „სახმელეთო მსოფლიოს“ მეფე. ფინიკიის, კიპროსისა და ეგვიპტის დამორჩილების შემდეგ, სპარსეთის ხელში გამთლიანდა შავი ზღვის, ბოსფორის,

პროპონტიდის, ჰელესპონტის, ეგეოსისა და ეგვიპტის წყალმართებელი მაგისტრალები.

ახლა ფილიპე II მაკედონელს უფრო იმაზე უნდა ეფიქრა, სპარსეთი არ დაძრულიყო ბალკანეთისკენ, ვიდრე თვითონ წასულიყო სპარსეთისკენ. ბლოს და ბლოს, ფილიპემ — არტაბაზის, მენტორისა და მემნონის დახმარებით — შეძლო კიდევ არტაქსერქსესთან სამშვიდობო და სამოკავშირეო ხელშეკრულების დადება<sup>4</sup>. მხარეებმა ერთმანეთს აღუთქვეს — ორივეს თავისი ნებით და ერთმანეთისთვის ხელის შეუშლელად ემოქმედათ, ევროპელს — ევროპაში, აზიელს — აზიაში.

დროის ბორბალი კი მაინც ევროპელის სასიკეთოდ და აზიელის საზიანოდ ბრუნავდა. ეგვიპტეში გამარჯვებით გაზულუქებული არტაქსერქსე ოხოსი სატახტო ქალაქ სუზაში დაბრუნდა და განუკითხავი მკვლელობებისა და აღვირახსნილი გარყვნილების მორევში გადაეშვა. ახლობელთაგან ძალადაც აღარავის აგდებდა, ყველას სიკვდილის მომასწავებელი ექვის ქვეშ აყენებდა. ერთადერთი, ვისაც ენდობოდა და სახელმწიფოს სადავეებსაც ანდობდა, იყო ისევ საჭურისი ბაგოასი, რომელმაც აქამდე მართლაც რომ დიდი სამსახური გაუწია შიშითა და მძულვარებით გარშემოგარსულ გვირგვინოსანს. მაგრამ ბაგოასი ეგვიპტელი იყო და, თურმე მკაცრი იღუმალებით გულდაკეტილი პატრიოტიც. თურმე, ვერა და ვერ მოენელებინა ბაგოასს სპარსთა მიერ მისი სამშობლოს აწიოკება და შეგინება, სპარსთა შლეგიანი ხელმწიფის მიერ ეგვიპტელთა ხარ-ღმერთის, აპისის განგმირვა და უცდიდა ხერხიან დროს, როცა სამშობლოს ჯავრს ამოანთხევინებდა უბოროტეს მკრებელს. ეს დროც შეაჩნია საჭურისმა, მეფის პირადი ექიმი გაიერთგულა და სასმელში საწამლავი შეარევინა.

იღვა 338 წელი და ცოცხალთა შორის აღარ იყო სპარსეთის მეფე არტაქსერქსე III ოხოსი. ბაგოასმა ტახტზე აიყვანა მისგანვე მოკლული მეფის უმცროსი ძე, არსესი. აიყვანა და უფროსი ძმები და ტახტის სხვა მოცილენი მასვე დაახოცვინა.

ეს ის დრო იყო, როცა ფილიპე მაკედონელმა ქერონეის ბრძოლაში ათენელები და თებელები გაანადგურა, მერე კორინთოს კონგრესზე მთელი საბერძნეთი შემოიყარა და სპარსეთის წინააღმდეგ „საზღვაო ომზე“ შემოიფიცა.

სპარსეთის სატახტოში კი ტახტის გარშემო შხამიან ვნებათა ქვაბი ისევ დუღდა და „ევროპის საქმეებისთვის“ არავის ეცალა. ბაგოასის-



გან გამეფებულმა არსესმა თავისი კეთილისმყოფელს ამაგი არად ჩა-  
აგლო, მის კადნიერ ქცევებს ვერ შეუტიგდა, მამისა და ძმების ამო-  
წყვეტაც არ აპატიო და იღუმალ სიკვდილი დაუპირა. მაგრამ საქუ-  
რისმა თავის „კრეატურას“ უმადური განაზრახი შეუტყო, დაასწრო  
და მეფეც და მისი შვილებიც თვითონ შეპყარა სიკვდილს (336 წ.).

სპარსეთის სამეფო გვირგვინი ისევ ზელთ ეპყრა მედროვე ნა-  
ღუმს, სამეფო სისპლიერთაგან თითქოს აღარავინ ჩანდა, ის გვირგვინი  
რომ დადგმოდა თავზე. სამეფო საგვარეულო, ორივე არტაქსერ-  
ქსე, არსესი და მათი ნაშიერნი სრულად იყვნენ ამოწყვეტილნი.  
„დიადი აქემენიდური სისპლი“ სრულ დაწრეტაზე დასულიყო.

მაგრამ მაინც მიგნებულ იქნა, ასე თუ ისე, ღირსეული სამეფო კა-  
ცი, აქამენიდთა ნათესავი გვერდითი ხაზით — არტაქსერქსე II-ის  
ღისწული — სახელად კოდომანი, რომელსაც ერთ ბრძოლაში მოწი-  
ნააღმდეგის ბელადი ორთა ბრძოლაში მოუკლავს და ასეთი გამირო-  
ბისათვის არტაქსერქსე ოხოსს სომხეთის სატრაპად დაუნიშნავს.

და აი, ამ კოდომანს დაადგა თავზე სპარსეთის სახელმწიფო გვირ-  
გვინი დროის მეუფე საქურისმა, ბაგოასმა.

ახალმა მეფემ ახალი სახელი დაირქვა და ისტორიაში შევიდა, ვი-  
თარცა — დარიოს III კოდომანი (336—330). ახოვანი, მომხიბლავი  
კაცი იყო, ალერსიანი და თავდაჭერილი. პირადი ზნეობით იგი მაღლა  
იდგა ყოველ მანამდელ აქემენიდზე, მაგრამ — როგორც სულ მალე  
დადასტურდება — მსოფლიო პოლიტიკის მოასპარეზედ გაცილებით  
სუსტი და უძლური; ეიდრე რომელიმე გარყენილი „ოხოსი“.

ტახტზე ასვლისთანავე ახალმა მეფემ ბაგოასს ეჭვითა და უნდობ-  
ლობით დაუწყო ცქერა. საქურისი ისევ ამოქმედდა, მაგრამ მეფე გა-  
აფრთხილეს და, როცა მას საწამლავით სავსე თასი მიართვეს. ალერ-  
სიანმა დარიოსმა „ალერსიანი თავაზით“ შეუბრუნა სასმური „ერთ-  
გულ“ კარისკაცს.

ბაგოასის სიკვდილს მაინც და მაინც არ გამოუფხიზლებია სპარ-  
სეთის სასახლის კარი. ფილიპე მაკედონელი, აზიელთაგან ხელშეუშ-  
ლელად, გამალებით ემზადებოდა აზიაში შესაქრელად. 336 წლის  
დამდეგს მან, როგორც ითქვა, ავანგარდული ჯარები უკვე გაგზავნა  
აზიაში, პარმენიონისა და ატალოსის სარდლობით. როგორც ჩანს,  
მხოლოდ ამის შემდგომ იგრძნეს სუზაში მდგომარეობის უკიდურესი  
სიმწვავე და კიდევაც ამოქმედდნენ სწორედ დროის სიმწვავისა და  
სიმძაფრის შესაფერისად. უეჭველად, სპარსელთა ამ „აქტიურ გა-

მოფხიზლები“ შედეგი უნდა ყოფილიყო ომის „მთავარი გამჩალებლის“ — ფილიპე მაკედონელის მკვლელობა. მაგრამ შეცდომა ის იყო, რომ ეს „მსოფლიო მკვლელობა“ მაკედონიის კარზე სპარსელმა პოლიტიკოსებმა საკმარისად მიიჩნიეს. თითქოს, სხვა რაღა უნდოდათ — ფილიპე მკვდარი იყო, ხოლო „ცხვირმოუხოცელი ალექსანდრე“ რა ანგარიშში უნდა ჩაეგდოთ! თუ რაიმე საფრთხედ უნდა ჩაეთვალოთ, ეს მხოლოდ მცირე აზიაში გადასხმული პარმენიონისა და ატალოსის ჯარები უნდა ყოფილიყო, მაგრამ ატალოსი თვითონ ალექსანდრემ შეიწირა მსხვერპლად, ხოლო მარტოდ დარჩენილ პარმენიონს „იოლად მოუვლიდნენ“ სპარსელები.

მართლაც, დარიოსმა პარმენიონის წინააღმდეგ გაგზავნა მემნონი, რომელსაც მისი ძმის მენტორის სიკვდილის შემდეგ, მთელი ზღვის სანაპირო სატრაპიათა მთავარსარდლობა მიეღო სპარსეთის სამეფო კარისგან.

ბრძოლები მემნონსა და პარმენიონს შორის წონასწორად წარიმართა. „სპარსეთის ბერძენმა“ „მაკედონიის ბერძენს“ ქალაქი ეფესო წაართვა, მაგრამ ქალაქ კიზიკოსთან სამაგიერო მარცხი მიიღო. ამის შემდეგ ალექსანდრემ პარმენიონი მაკედონიაში გაიწვია, ხოლო პარმენიონის ადგილზე დატოვებული კალასი მემნონმა დაამარცხა და ჰელესპონტ-აბიდოსისკენ გამოაქცია.

მაგრამ ეს ყველაფერი სპარსეთისთვის მანინც აღმოჩნდა არაფერი.

იდეა 234 წელი და ევროპული გრიგალი უკვე მოილტვოდა აზიის წასალეკავად.

ცბრა დღე, ცალ-ცალკე ცბრავე მუზის სახელზე, იზეიმა და ინა-  
დიმა ალექსანდრე მაკედონელმა და მეათე დღეს — 334 წლის 9 მარტს  
იგი დაიძრა აზიისაკენ.

მიდიოდა და სახმელეთო საომარ ძალად მიჰყავდა, სულ — 30 000  
ქვეითი მეომარი და 4500 ცხენოსანი; აქედან:

მაკედონელები — 12 000 ქვეითი და 1500 ცხენოსანი,

თესალიელი ბერძნები — 1500 ცხენოსანი,

დანარჩენი ბერძნები — 7000 ქვეითი და 600 ცხენოსანი,

ჩრდილო-ბალკანელი — 6000 ქვეითი და 900 ცხენოსანი,

დაქირავებულნი — 5000 ქვეითი<sup>1</sup>.

საზღვაო საომარ ძალად კი 160 სამხედრო ზომალდი მიჰყავდა  
ალექსანდრეს<sup>2</sup>.

მიდიოდა და თანამებრძოლ დასად მიჰყავდა ორი თაობა სამხედ-  
რო-პოლიტიკური „სკოლებისა“ — თაობა მამამისის ფილიპესი და  
თაობა საკუთარი, ალექსანდრესი.

აქ იყვნენ: პარმენიონი და მისი სამი ძე — ფილოტა, ნიკანორი და  
ჰექტორი, ჰეფესტიონი — ალექსანდრეს უსაყვარლესი მეგობარი  
(მისი „პატროკლე“), კლიტოს შავი („მელანოს“) — ალექსანდრეს დე-  
დამძუძის ძმა, პერდიკა, ამინტა, ევმენე, პოლიპერხონტი, კენოსი,  
ლეონატოსი, პევკესტა, პტოლემეაოს ლაგოსის ძე, პტოლემეაოს  
სელევკოსის ძე, ნეარქოსი, ლისიმახოსი, კრატეროსი, სელევკოსი,  
მელეაგრე, მენანდრე და სხვანი — ჰეტერნი, მეგობარნი, თანამებ-  
რძოლნი და თანასარდალნი.

ალექსანდრეს თან ახლდნენ ისტორიკოსები, გეოგრაფოსები და  
ფილოსოფოსები, მათ შორის — არისტობულე, კლიტარქოსი, პოლიკ-  
ლეტოსი, ონესიკრიტოსი, ტიმაგენე, ასკლეპიადე, არატოსი და კა-  
ლისთენე — არისტოტელეს დისწული და უსაყვარლესი მოწაფე. თვი-  
თონ ალექსანდრეს „თანასკოლელი“. ამათ გარდა, „ისტორიკოსობ-

დნენ — თვითონ ალექსანდრე, ნეაქროსი და პტოლემეოსს ლაგოსის ძე.

მეფეს თან მიჰყავდა ექიმები, — მათ შორის, „მთავარი ექიმი“ ფილოპე აკარნანიელი. მიჰყავდა მკითხავნი, — მათ შორის, „მთავარი მკითხავი“ არისტანდროსი, რომელსაც უკვე ეთქვა თავისი პირველი „წინასწარმეტყველება“: დიდი შრომა და ჯაფა ელს ეპიკოს და ლირიკოს პოეტებს, ყოველ მეცნიერსა და ისტორიკოსს. — ყველას, ვინც კი უნდა უმღეროს ალექსანდრეს და მის დიად საქმეებს!<sup>3</sup>

ალექსანდრე თვითონ მართავდა საფლაგმანო ზომალდის საქვს, ოქროს გვირგვინით თავშემკობილი. შუა ჰელესპონტზე თავისი ხელით პოსეიდონს ხარი დაუქლა და ზედაშით სავსე ოქროს თასი ზღვაში ისროლა, მერე ზომალდი აზიის მიწას მიაყენა, შუბი სტყორცნა და ამ პირველ გასროლას, სრული აღჭურვილობით ჩასილაღებულნი, თვითონაც მიჰყვა ცქვიტი ნახტომით. იქვე, სადაც მან, სამომრად აღჭურვილმა, აზიის მიწაზე პირველი ფეხი დადგა, საკურთხევლები აღუმართა ზევსს, ათენას და ჰერაკლეს.

მას, ევროპული ლაშქარი აზიის მიწაზე შევიდა სავსებით გულდანილობილად. ვინათგან სპარსელებს ამჯერადაც, — როგორც მათ საერთოდ სჩვეოდათ<sup>4</sup> — არავითარი დროული ზომები არ მიუღიათ მტრის შემოსევის უქუსაგდებლად.

სანამ პარმენიონი ჰელესპონტზე, აბიდოსთან, სრული საომარი ძალების გადაყვანას აწესრიგებდა, მანამ ალექსანდრემ თანამებრძოლთა თანხლებით ლეგენდარული ტროას მიდამოები მოიარა და მოიხილა. ღრმად სიმბოლური იყო ბერძენ-მაკედონელთა მისვლა იმ ადგილზე, სადაც ათასი წლის წინათ აგამემნონის მთავარსარდლობით ტროა-ილიონთან სამომრად იდგა აქეველ-ბერძენთა ერთიანი ლაშქარი. ილიონის ნანგრევებზე და ნაპანძრალზე აღმართულ ათენა-პალადას ტაძარში შევიდა ალექსანდრე; კედლებზე ჩამორიგებულ საქურველთაგან, — რომლებიც ტროას ომში მონაწილე გამირთა იხრალად იწოდებოდა — ზოგი იარალი, პირველ რიგში „აქილევის ფარი“ აიჩიო და ჩამოხსნა, სამაგიეროდ მათ ადგილზე, საკუთარი საქურველი აიყარა და ჩამოჰკიდა. აქვე მსხვერპლი შესწირა ტროას მეფის, პრიამოსის სულს და შესთხოვა ამიერიდან შეეწყვიტა რისხვა და წყევლა აქილევის ნაშიერთადმი<sup>5</sup> (ლეგენდით — პრიამოსი აქილევის ძემ, ნეოპტოლემეოსმა მოჰკლა).

მასუკან თავისი სათაყვანო „წინაპრისა“ და საოცნებო გამირის,

აქილევსის საფლავთან მივიდა ალექსანდრე და გვირგვინებით შეამკო იგი. მსხვერპლი შესწირა, ტანი ზეთით დაიზილა და მრავალჯის გარს შემოუტარბინა. ფარზე მახვილს ცემით. იგივე მოიმოქმედა ჰეფესტიონმა აქილევსის უსაყვარლესი და უერთგულესი მეგობრის, პატროკლეს საფლავზე. ამით ჰეფესტიონმა ერთხელ კიდევ გაითამაშა „ალექსანდრეს პატროკლეობა“.

ფრიალ სიძბოლური გამოდგა სიტყვა, რომლითაც ალექსანდრეს მიუმართავს აქილევსის სულისთვის: „ნეტავ შენ, ბედნიერო ჭაბუკო, რომ სიცოცხლეში პოვე უერთგულესი მეგობარი, ხოლო სიკვდილის შემდგომ უდიდესი მეხოტბეო“. რასაკვირველია, მეგობარში პატროკლეს გულსხმობდა. მეხოტბეში კი ჰომეროსს. უეჭველად დიდ შინაარსს სდებდა ამ პოეტურ ფორმულაში მომავალი დიდი დამპყრობელი. იგი, თითქოს, რალაცნაირი „სპაროგრამო მოწოდებაც“ იყო მისი თანამებრძოლებისა და თანამხლებლებისათვის: მე, ალექსანდრეს, თქვენ, ჩემმა თანამოლაშქრეებმა სიკვდილამდე ნამდვილი პატროკლეობა უნდა გამიწიოთ, ხოლო კალმოსნებმა ჩემი საქმენი ისე განადიდოთ, როგორც ჰომეროსმა განადიდა და განაწერცო აქილევსის გმირობანიო. აქ ქვეტექსტი ისიც იყო, — ჰომეროსი რომ არ ყოფილიყო, აქილევსიც არ იქნებოდა, რადგან მისი გმირობანი უჰომეროსოდ არავის ეცოდინებოდაო; ანუ — აქილევსის გმირობის სიდიადე ჰომეროსის სიდიდის შედეგიაო \*.

ერთი სიტყვით, ალექსანდრე, თითქოს, პირდაპირ მოუწოდებდა და ავალებდა თავისიანებს — მახვილოსნებმა პატროკლეობა გამიწიეთ, ხოლო კალმოსნებმა ჰომეროსობაო...

აქილევსისადმი ზორვას რომ მორჩა, ალექსანდრემ ილიონის აღდგენა ბრძანა, ავტონომია მიანიჭა და მისი ახალმოსახლენი ყოველგვარი ბეგარა-გადასახადისგან გაათავისუფლა.

ამასობაში სპარსეთის კარზე უფრო სერიოზულად შეიგნეს ევროპელთა შემოსევის საფრთხე და საომარი ნაღარაც დაჰკრეს. მემნონი უკვე საბრძოლო ბანაკად იდგა ქალაქ ზელეის ახლოს. მასვე შეუერთდნენ თავიანთი ძალებით მცირეაზიელი მმართველნი: სპითრიდატე — სატრაპი იონიისა და ლიდიისა, ატიზიოსი — სატრაპი დიდი

\* ასეთივე ნათქვამად ესმოდა ალექსანდრეს ეს სიტყვა დავით აღმაშენებლის ისტორიკოსს — „ეთიარცა იტყვის თვით საღამე ალექსანდრე: არა დიდ იყავ აქილევსი, არამედ დიდსა მიემთხვიე მაქებელსა უმიროსს“.

ფრივიზისა. არაიტე — სატრაპი მცირე ფრივიზისა, მითრობუზანი — სატრაპი კაპადოკიისა. ამათთან, სპარსთა უმაღლეს სარდლობაში მოსულიყვნენ მეფე დარიოს III-ის უახლოესი ნათესაეები: მითრიდატე — სიძე მეფისა, ფარნაქე — ცოლისძმა მეფისა, არბუპალი — შვილი-შვილი წინარე მეფის არტაქსერქსე III-ისა და ომარი — „სარდალი უცხოელებისა“ 6.

მაგრამ სპარსელთა ამ „უმაღლეს მთავარსარდლობაში“ დესახელე-ბული არ იყო უმაღლესი მთავარსარდალი. მათ შორის მთავარსარ-დლობისთვის ყველაზე ღირსეული მაინც მემნონ როდოსელი უნდა ჯოფრიყო, მაგრამ იგი „მაინც ბერძენი“ იყო და, მთავარსარდლობა კი არა. მისი რივითი სარდლობაც სპარსელებს მუდამ ექვიისა და უნ-დობლობის ქვეშ ჰქონდათ დაყენებულნი. ახლაც, სამხედრო თათბირ-ზე, სპარსელმა სარდლებმა უცებ დაიწუნეს მემნონისგან წამოყენე-ბული ყველაზე საღი და გონივრული საომარი სტრატეგია და ტაქ-ტიკა — ალექსანდრეს და მის ლაშქარს პირდაპირი დატაკებით კი არ უნდა შევხვდეთ, არამედ მასთან ომი გავაჭვიანუროთ, უკანდახვევით საომარ გზები და გარემონი გავანადგუროთ, მტერი შიმშილში ჩა-ვაგდოთ, მოულოდნელი თავდასხმებით დავასუსტოთ და ამასობაში, მოკვებული დროის წიაღში, მონარქიის სრული სახმელეთო და სა-ზღვაო ძალებით ომი აზიიდან ევროპაში გადავიტანოთ.

„უცხო“ და „საეჭვო“ მემნონის ეს საომარი განასაჯი დაიწუნეს და ჭარბი ალექსანდრეს შესახვედრად აღძრეს სპარსელმა სარ-დლებმა.

ალექსანდრესაც ეს უნდოდა. მას სპარსელებთან გადამწყვეტი ბრძოლები ეშურებოდა. იგი მივიდა აზიდოსს, სადაც პარმენიონს უკვე დაესრულებინა სრულიად საომარი ძალების გადმოყვანა. დიდი, სა-ზეიმო აღლუპისა და დათვალიერების შემდეგ, ალექსანდრემ ჭარბი დაძრა მტრის ბანაკისკენ. გზაზე ლამპსაკი იდგა, დიდი ბერძნული ქალაქი, რომელიც მემნონს ემორჩილებოდა და მის ერთგულებას არ ლაღობდა. ალექსანდრე ლამპსაკს წიაღგა და ბარბაროსთაგან გათა-ვისუფლება გამოუცხადა, მაგრამ ლამპსაკელებმა მაკედონელი მეფე გაათავისუფლებლად არ იწამეს და არც კარიბჭეთა კლიტენი მი-ართვეს, მაშინ ალექსანდრე მუქარაზე გადავიდა: თუ კარს ნებით არ გაიღებთ, ძალით შემოვალ და ქალაქს ისე დავანგრევ, შეწყყლების სათხოვრადაც არავის მივიღებო. ლამპსაკელებმა ისევ არ შეისმინეს და ალექსანდრეს მართლაც ძალით მოუხდა ქალაქის აღება. კიდევაც

უნდა დაენგროს გარისხებულს, დაფიცებულიც ჰქონდა — არც დამარცხებულთა ელჩობა მიეღო პატიების სათხოვრად და შესარიგებლად. მაგრამ ელჩობას ანაქსიმენე გამოუძღვა, სახელოვანი ფილოსოფოსი, რომელსაც ალექსანდრე დიდი პატივისცემით და მოწიწებით ეპყრობოდა. ადვილად მისახვედრი იყო — ლამპსაკელებს ანაქსიმენე შუამავლად იმითომ აერჩიათ, რომ გამძვინვარებული მეფე მისგან მოალერსებული სწავლულის თხოვნას უარს ვეღარ ეტყოდა და ქალაქის დანგრევაზე ხელს აიღებდა. ეს იაზრა ალექსანდრემ და სანამ ანაქსიმენე ენას დასძრავდა, შორიდანვე მიიძახა: ვფიცავ ოლიმპოს ყველა ღმერთს, რაც უნდა მთხოვო არ შეგისრულებო! ანაქსიმენეც თითქოს ამას ელოდა და შემოაგება: მე გთხოვ, დაანგრიო ქალაქი... და ალექსანდრემ, რაკი წამის წინ ნათქვამი ფიცი „ვეღარ გასტეხა“, ვეღარც ანაქსიმენეს „თხოვნა“ შეასრულა და ამნაირად ლამპსაკი დანგრევას გადარჩა?.

ლამპსაკიდან გამარჯვებულებმა გზა განაგრძეს აღმოსავლეთისკენ, პროპონტიდის (მარმარილოს ზღვის) გასწვრივ, მიაღწენ და აიღეს ქალაქი პრიპოსი, მდინარე გრანიკოსის (ახლ. ბიჯა-ჩაი) დელტის მარცხენა ფრთაზე.

გრანიკოსის მარჯვენა ნაპირზე კი უკვე მოსულიყვნენ და საომარ ბანაკად იდგნენ სპარსთა ჯარები. გრანიკოსი იღას მთიდან სწრაფად მოექანებოდა და მთაგორიანი, ღრანტეებიანი კალაპოტით ერთვოდა პროპონტიდას. სპარსელთა სარდლობას გადაეწყვიტა მდინარის სწორედ მთაგორიანი მიმოსახედი გამოეყენებინა და მტერი მის აღმოსავლეთით არ გადაეშვა. ზედ მდინარის პირთან სპარსელთა კავალერია ჩამდგარიყო. შემდეგ უკან, მთის ფერდზე — მემონი და მისი მოქირავნე ბერძნები შეფენილიყვნენ, ხოლო სულ ზემოთ — სპარსელთა ქვეითი ჯარები, ომარის წინამძღოლობით.

მაშ, 334 წლის ივნისი, ბრძოლა გრანიკოსთან — სპარსეთისა და მაკედონიის საომარ ძალთა პირველი დიდი შეხვედრა.

მდინარისაკენ დაბრუნლმა ალექსანდრემ მძიმედ შექუტრილი ქვეითი ლაშქარი, ფლანგა, ორ ფრთად გააწყო და მათ ფლანგებზე სრულად კავალერია განლაგა — მარჯვნივ მაკედონელები, მარცხნივ თესალიელები და დანარჩენი ბერძენი მხედრები; ზურგში კი მსუბუქი რაზმები და ალალ-ფორანი მისდევდა ძირითად ძალებს.

მეფემ ბრძანება გასცა, მისვლისთანავე მდინარე გადაელახათ და მტერს შებმოდნენ სრული სიმძაფრით. პარმენიონი მიეაზლა და ურ-

ჩიან. ხელი აიღე უცების იერიშზეო; უმჯობესია, ჯერ ბანაკად დავდგეთ მდინარის მარცხენა ნაპირზეო, — ამბობდა იგი — მოწინააღმდეგე, რომელსაც ქვეითი ჯარი ჩვენზე სუსტი ჰყავს, ვერ დაითმენს ჩვენს ღამეულ აალოყოფნას, შეშინდება, უუიქცევა და დილით იოლად გადავალთ მტრისგან მიტოვებულ მდინარეზეო; ისედაც დღე ილევს: ღამე მოგვისწრებს, მდინარეც უმეტეს წილად ღრმია, სწრაფი და ცივი, მოპირდაპირე ნაპირიც ციცაბო და ფეხმოუდგამი, სრულის წყობით გადასვლასაც ვერ მოვახერხებთ და ნაწილ-ნაწილად წყალში შესულეზს მტერი მანამ ჩაგვბოცავს, სანამ საომრად ზელს მივაწვდენ-დეთ; და თუ ანლა დავმარცხდით, შეიძლება ამ მარცხმა მთელი ომის ბედიც ჩვენს საუკუღმართოდ დააბრუნოსო, — დაასრულა პარმენიონმა.

„რასაც შენ ამბობ, მეც მშვენივრად მესმის — უპასუხა ალექსანდრემ — მაგრამ სირცხვილად მიმაჩნია ჰელესპონტის ეგზომ იოლად გადმოლაზვის შემდგომ ამ მცირე ღელეს შეეუშინდეთ; ეს არ ეკადრება არც მკედონელთა დიდებას და არც ჩემს ჩვევას საფრთხესთან პირისპირ შეჯახების ემს; ამასთან — თუ სპარსელებს ახლავე არ ვავრძნობანეთ და შევავგებანეთ, რომ ისინი ჩვენს წინაშე მუდამ შიშით უნდა ცაბცახებდნენ, მაშინ გაგვიტამამდებიან და თავის გატოლებასაც გაგვიბუდავენ“.

ეს თქვა, პარმენიონი მარცხენა ფლანგის სამეთაუროდ გაგზავნა, თვითონ მარჯვენა ფლანგს მიაშურა და იერიში ბრძანა.

მეფემ სამი ილა\* აიყოლია და პირველი გადაეშვა მდინარეში. სპარსელებმაც მეფედ შეიციენეს გამორჩეული ფარ-ხმალითა და ჯაჰვ-ჯაჰვანით ასამული ალექსანდრე, თავზე რომ მუზარადი უელეარებდა და ორი თეთრი ფრთა უფრიალებდა. შეიციენეს და ისრის ბეტყელს ქვეშ მოაქციეს მეფეც და მასზე მიდევნებული მხედრებიც. ფარის უსწრაფესი მოძრაობით ისხლეტდა ალექსანდრე ისრის ბარანს და ვაფთრებით მირღვევდა მძლავრად მომქროლავ მდინარის ტალღებს. გვიდა, გააღწია, ატალახებულ ნაპირზე აიჭრა და საოცარი გახელებით დაეძგერა მოპირდაპირეს. სპარსელებიც ჩამოეგებნენ მკიდრო წყობით. ზარდამცემი ყიფინით, შუბთა ძვერებით და ხმალთაკვეთებით. მძაფრად შეუტიეს მეფის გარშემო მემომარმა მკედონელმა მხედრებმა, რომელთაც ამონტა და პტოლემეიოს ლაგოსის ძე

\* ილა — ცხენოსანთა რაზმი, რომელიც შედგებოდა 150—300 მეომრისგან.



მიუძღოდნენ. ამო ჩანდა მემონისა და მისი ორი ძის თავგანწირული წინააღმდეგობა. მაკედონელებმა გაითვითვეს საყრდენი მიწა მდინარის პირას. პარმენიონსაც მარცხენა ფლანგით უკვე გაღმოელახა მდინარე. სადაც იყო, ფლანგაც მოაღწევდა გრანიტის მარჯვენა ნაპირს.

სპარსელთა სრული სარდლობა მარცხენა ფლანგზე შეყრილიყო მძვინვარედ მოიხრებდა ალექსანდრეს შესამუსრავად და მაკედონელთა უკანეე. მდინარეში გადასაყრელად.

შუბი გადაეწმხვრა ალექსანდრეს, სამაგიერო ფიცხლავ მოსთხოვა საჭურველ-სტეროვებს, მაგრამ აღარც მას აღმოაჩნდა მთელი შუბი — ისიც ნამსჯრევით ივერიებდა მტრის მოწოლას. დემარატოს კორინთელმა მიართვა მეფეს თავისი შუბი და, სწორედ რომ დროზე მიუსწრო: სპარსელთა ახალი რჩეული მხედრობა, დარტოსის სიძინა, მითრიდატეს სარდლობით მიუხტა ალექსანდრეს. შუბი აძგერა მითრიდატემ. ალექსანდრემ ფარი იფარა, მაგრამ მაინც დაიჭრა ბეჭში; ტყვილი შესჭამა და წამსვე საპასუხო შუბის დარტყმით მეფემ გული შეუნგრია და უსულოდ ძირს დაანარცხა მოპირდაპირე. მივარდა მოკლული მითრიდატეს ძმა, რესაკე, ელვასავით ხმალი თავში უხეთქნა მუფუს, მუხნარადი განუპო და შუბლზე სისხლის გეშიც გაალებინა, მაგრამ იმ წამსვე იუვე საპასუხოდ აძგერა შუბი ალექსანდრემ და რესაკეც მკერდშელეწილი გაღმომეშვა ცხენიდან. სანამ რესაკეს ანგარიშს უსწორებდა, მეფემ ვერ შენიშნა, როგორ მიუახლოვდა მას ზურგიდან ლიდის სატრაპი სპითრიდატე სმალამართული. ალექსანდრეს უეჭველი სიკვდილი უკვე თავს ადგა, მაგრამ დაასწრო წამისად მოვარდნილმა კლიტოს შავმა, ალექსანდრეს გამდელის ძმამ, და აღმართული ამალითურთ წარკვეთა ძკლავი სპითრიდატეს მკეროდ მოუხაცვლა კლიტოსმა და მკვდარი გაღმომეშვა ცხენიდან სპარსი სარდალი.

ბრძოლა უარესად გახურდა და გამძვინვარდა. დიდ სიმამაცით იბრძოდნენ სპარსელნი, შუბები რომ დალეწოდათ და ხმალს მინდობოდნენ მტრის გავეშებული იერიშების შესაკავებლად. მაგრამ შეუკავებლად მოდიოდა ფლანგა და ახალ-ახალ ლოხოსებად და ტაქსისებად \* იჭრებოდა უკვე ძლიერად შეთხელებული აზიელთა რიგებ-

\* ლოხოსი — 500-კაციანი რაზმი; ტაქსისი — სამი ლოხოსის ერთიანობა, ანუ 1500-კაციანი კოლონა.

ში. ზედზედ დაეცნენ სპარსი სარდლები — ნიფატე. პეტრე, მითრობუხანი, ფარნაქე და არბუპალი. სპარსელთა ცენტრი საბოლოოდ გატყდა, აიშალა და გაიქცა. ბრძოლის ველზე 2500 აზიელის გვამი დარჩა.

ალექსანდრემ, სპარსთა კავალერიის განადგურების შემდეგ, მთელი ძალები მათობებზე განლაგებულ ქვეითი ჯარების წინააღმდეგ წარმართა. შემოეგებნენ — ომარი აზიელებით და მემნონი დაქირავებული ბერძნებით. სპარსელებს დიდი წინააღმდეგობა აღარ უცდიათ, — უწყსრიგოდ იწყეს გაქცევა და გაფანტვა. ბევრი მათგანი ხმლის მოუქნევლად შეაკვდა მტერს. მხოლოდ ბერძენმა მოქირავნეებმა გაუშართეს მძინევარე ბრძოლა ალექსანდრეს და მის ჯარებს. ფიცხელ ხმალთაყვეთებაში ცხენი გამოუკლეს მეფეს ლაჭებში. იგი მყისვე მოახტა მარჯვად მიმყოლ ბუკეფალას და კვლავ შეუტია გააფთრებით. მემნონის ჯარიც გატყდა და გაიქცა. მათგან 2000 ალექსანდრემ ტყვედ აიყვანა<sup>8</sup>. ბრძოლა დამთავრდა.

20 000 ქვეითი და 2500 ცხენოსანი აზიელი ცხედრად დარჩა გრა-ნოკოსის ნაპირის გასწვრივ.

მცირე იყო ზოალი ალექსანდრესი. ჯერ, მას პირველ საცხენოსნო შეტაკებაში 25 მხედარი დაელუბა და ოცდახუთივესთვის მოქანდაკე ლისიპეს სპილენძის ქანდაკებანი ჩამოასხმევინა მეფემ<sup>9</sup>. ამათ გარდა, კიდევ 60 მხედარი და 30 ქვეითი დაელუბა ალექსანდრეს. მან ყველა დაზოცილი თანამებრძოლი ერთ სამო საფლავეში ჩააწვინა სრულის აღჭურვილობით, დიდი პატივით და მსხვერპლშეწირვით. ყველა დაზოცილის ქვრივი და ობოლი გადასახადებისგან გაათავისუფლა<sup>9</sup>.

ბრძოლაში დაქრილებზეც საგანგებოდ იზრუნა მეფემ. ყველა მოიკითბა. შეაქო, გაამხნევა, მოუფერა და დააჯილდოვა.

ბრძოლაში დაღუპული სპარსელი სარდლები და ბერძენი მოქირავნეებიც პატივით დააკრძალვინა ალექსანდრემ.

მხოლოდ ტყვედ წამოყვანილ ბერძენებს მოექცა სასტიკად მეფესენი სამშობლოს მოლატეებად გამოაცხადა, რაკი კორინთოს კონგრესზე გამოცხადებულ დადგენილებას არ დაემორჩილნენ და საბერძნეთის მოსისხლე მტერს, სპარსეთს მიეყიდნენ. ამიტომ 2000 ტყვე ბერძენი ალექსანდრემ ბორკილდადებულნი გაგზავნა მაკედონიამი, მაღაროებში კატორღულ სამუშაოზე.

<sup>8</sup> ლისიპეს დიდად აფასებდა ალექსანდრე. მხოლოდ ლისიპეს ჰქონდა უფლება ალექსანდრეს ქანდაკების შექმნისა.

დიდძალი ნადავლი დაინადავლეს გამარჯვებულებმა. ალექსანდრე-შაც ყველას უხვად დაურიგა. დედას, ოლიმპიადას, სპარსელ სარდალთა კარებში ნაპოვნი ოქროს თასები, ძოწით ნაქარგი ხალიჩები, სამოსელნი და სხვა ძვირფასი ნივთები გაუგზავნა. ათენში, კიდევ, პართენონის ტაძარში, ათენა-პალადას პატივსაცემად, ალაფად აღებული სამასი შეეკრა სპარსული საჭურველი გაგზავნა, წარწერით: „ალექსანდრემ, ძემან ფილიპესამან, და ყოველმა ბერძენმა — ლედემონელთა გამოკლებით — წავართვით აზიელ ბარბაროსებს“.

ამით ალექსანდრემ თავი მოუქონა საერთოდ ბერძენებს და „თავში ჩაართყა“ ურჩ სპარტელებს...

გრანიკოსთან განცილმა მარცხმა სრულიად მოშალა მცირე აზიის თავდაცვისუნარიანობა ტავრის მთის დასავლეთით. აქემენიდთა იმპერიის ამ რეგიონში აღარ არსებობდა რაიმე სერიოზული საომარი ძალა, რომელიც ასე თუ ისე შეძლებდა გამარჯვებით გალაღებული მტრის შეკავებას. განადგურებული იყო არმია. ამოწყვეტილი იყო სარდალთა უმრავლესობა. გადარჩენილ სარდალთაგან, კიდევ, მცირე ფრიგიის სატრაპმა, არსიტემ, თავი მოაკლა. მცირე აზიის ბერძნული ქალაქების უმრავლესობა, განსაკუთრებით მათი მოსახლეობის დემოკრატიული ნაწილი, სპარსული უღლის დასამზობად და „ალექსანდრე გამათავისუფლებელთან“ შეაერთებლად ემზადებოდა.

ალექსანდრეს „აზიური პოლიტიკის“ ამსახლელი დოკუმენტ სწორედ „გამათავისუფლებლობა“ იყო. იგი, თითქოს, სწორედ იმისთვის გადმოსულიყო აზიაში, რომ აქემენიდების ბოროტი უღლისგან გაეთავისუფლებინა ბერძნებიც და არაბერძნებიც, საერთოდ ყველა ხალხი და მათ შორის სპარსელებიც! ახალგაზრდა მაკედონელი ხელმწიფის ეს „გამათავისუფლებელი მისია“ შემდგომში, მისი განვითარების კვალობაზე, და მისვე დროის შესატყვისად — განსაკუთრებულ შედეგებს გამოიღებს... მანამდე კი ალექსანდრემ ადგილობრივ აზიელ მცხოვრებლებს და მმართველებს აგრძნობინა, რომ იგი მათ „შესაქმელად“ არ იყო მოსული. ყველა დაამშვიდა, ჩვეულებრივი სამეურნეო და საზოგადოებრივი ცხოვრებისკენ მოუწოდა, საშენდრო ტყვეები გაათავისუფლა და ოჯახებს დაუბრუნა.

ალექსანდრემ გამარჯვებაც იცოდა და გამარჯვების გამოყენებაც. იგი გრანიკოსის შემდეგ სწრაფად ამოქმედდა. ჰელესპონტის სანაპიროები და მცირე ფრიგია სამმართველოდ მისცა კალასს, რომელსაც უკვე ჰქონდა ამ ოლქთა მმართველობის ორი წლის გამოცდილება. შე-

ფის ბრძანებით, პარმენიონმა დაიჭირა და მაკედონური ციხიონი შე-  
აყენა დასკილეიონში — ფრიგიის მთავარ ქალაქში.

თვითონ ალექსანდრე სამხრეთისკენ დაიძრა, ლიდიის სიღრმეში,  
მთავარი და საბელგანთქმული ქალაქის — სარდესაკენ.

სარდეს ძლიერი, მიუვალი აკროპოლისი და ძლიერი სპარსული  
გარნიზონი იცავდა, მაგრამ ალექსანდრეს კარებთან მისვლა და ხმლის  
ტარით დაკავუნებაც არ დასჭირვებია, ისე გამოეგება და მიართვა მას  
ქალაქის კლიტენი თვითონ გარნიზონის უფროსმა, მითრინმა. მეფემ  
მადლიერებით მიიღო მითრინი და მისი თანმხლები წარჩინებულ მო-  
ქალაქეთა ამაღლა. ჯერ, ციტადელის ჩასაბარებლად ამინტა ანდრომენეს  
ძე შეგზავნა, მერე თვითონაც შევიდა ქალაქში. შევიდა და საზეიმოდ  
გამოაცადა, რომ ამიერიდან სარდესში და საერთოდ ლიდიაში დამხო-  
ბილია აქემენიდთა ორასწლოვანი უღელი და ყოველ ლიდიელს უფ-  
ლება ეძლევა იცხოვროს „თავისუფლად“, მამაპაპეული წესებით,  
ჩვეულებებით, ტრადიციებით. თვითონ მითრინს არ იშორებდა, პა-  
ტივით ეპყრობოდა და ამით ქვეყანას ერთხელ კიდევ აჩვენებდა, თუ  
როგორ „აფასებდა“ იგი ერთგულებას. თანადგომას და თანამებრძო-  
ლობას ყოველი კაცისას, განურჩევლად მაკედონელობისა, ელინობისა  
თუ „ბარბაროსობისა“.

სარდეს საპატიოდ და სამშვენიისად ალექსანდრემ ზევსის ტაძრის  
აგება გადაწყვიტა და ქალაქში შესაფერისი ადგილის ძებნას შეუდგა.  
იმ დღეებში კოკისპირული წვიმები ჩამოდგა, წვიმას მეხი მოჰყვა და  
აკროპოლისზე, — იმ ადგილზე, სადაც ადრე ლიდიის განთქმული მე-  
ფის, კრეზოსის უმდიდრესი სასახლე იდგა — ყველაფერი ნანგრევად  
და ნაცრად აქცია. და სწორედ ეს, „ღვთისგან მინიშნებული ადგილი“  
აარჩია ალექსანდრემ ზევსის ტაძრის ასაშენებლად<sup>10</sup>.

ქვეყნის „გამათავისუფლებელმა“ სარდეს აკროპოლისიდან აქ ნაგ-  
როვები უთვალავი ოქრო-ვერცხლი გაიტანა, ლიდიის მმართველად  
პარმენიონის ძმა, ასანდროსი დანიშნა, მოადგილეებად პავსანია და  
ნიკიასი დაუყენა — ერთი, ქალაქის კომენდანტად, მეორე — ხარკის  
აპკრეფად. ამის შემდეგ ალექსანდრე იონიისაკენ გაეშურა.

იონურ-ბერძნული ქალაქები დიდი ხანია სპარსული ან სპარსუ-  
ლობის გზაზე შემდგარი ოლიგარქიის ქვეშ იმყოფებოდნენ. ამიტომ,  
ბუნებრივია, ყველაზე დიდი ხალისითა და იმედით ისინი უნდა შეხ-  
ვედროდნენ „ღვთით მოვლენილ გამათავისუფლებელს“.

პირველი მაგალითი ყველას აჩვენა ეფესომ, იონიის ქალაქთა მე-

ფემ<sup>11</sup>. ეფესელმა დემოკრატებმა, ჯერ კიდევ გრანკოსთან ალექსანდრეს გამარჯვების შეტყობისთანავე გააჩაღეს ბრძოლა ქალაქის ოლიგარქიისა და სპარსელთა ციხიონის წინააღმდეგ. ერთხანს ალექსანდრესგან დამარცხებულმა და გამოქცეულმა მემნონმა სცადა ეფესოში გამაგრება, მაგრამ როგორც კი ალექსანდრე მოაწლოვდა. იგი პალიკარნასში გაიქცა. ასევე გაქცევით უშველა თავს ამინტა ანტიოქეს ძემ, ეფესოს ოლიგარქიის ლიდერმა და სპარსეთის მეფის ყურმორჩირილმა ყმამ. ეს ამინტა (რომელიც წინარედ მოხსენიებულ ამინტა ანდრომენიდში არ უნდა აეურიოთ) ადრე პელას სასახლის კარიდან გამოექცა ალექსანდრეს. სპარსელთა საშსახურში შევიდა და, სპარსელ სიფაქსთან ერთად, ეფესოს მმართველი გახდა. ალექსანდრეს მოახლოებამ და ამინტას გაქცევამ კიდევ უფრო გაათამაშა ეფესელი დემოკრატები. ქალაქში საშინელი ხოცვა-ჟლეტა ატყდა დემოკრატებსა და ოლიგარქებს შორის. დემოკრატებმა იმძლავრეს. ზიფაქსი, მისი ძე და ძმისწულნი არტემიდეს ტაძარში შეკვიდნენ სიკვდილისაგან თავდასახსნელად, მაგრამ გამხეცებული ხალხი ტაძარში შევარდა, ვანწირულნი საკურთხეველებს ააგლიჯა და ქვებით ჩაქოლა. ალექსანდრემ შემოუსწრო და შეაყენა ხოცვა-ჟლეტა. დააწყნარა და შეარიგა მარად შეურიგებელნი — დემოკრატები და ოლიგარქები — სახელმწიფო წყობილებად კი დემოკრატია გამოაცხადა „დემოკრატმა მეფემ“. აქვე მან ბრძანა, ყველა ის გადასახადი, რასაც ეფესელები აქამდე სპარსეთს უზდიდნენ. ალა არტემიდეს ტაძრის აღსადგენად გადაეხადათ. ასე მოუნდომებია ალექსანდრეს მსოფლიოს „შვიდ საოცრებათა“ ერთი უმშვენიერესი ძეგლის, არტემიდე ეფესელის ტაძრის აღდგენა, — იმ ტაძრისა, რომელიც ჰეროტრატეს დაუწვავს სწორედ ალექსანდრეს დაბადების დღეს.

ეფესოში ყოფნისას ალექსანდრეს ეწვივნენ კარიის ორი დიდი ქალაქის — ტრალესისა და მაგნეზიის \* — წარმომადგენელნი, რომლებმაც, მეფეს თავიანთი ქალაქების ჩაბარება და ქვეშევრდომობა შესთავაზეს. ალექსანდრემ დიდი მადლიერებით მიიღო ეს „საზრუნავი“ და მამინვე ამ ქალაქთა დასაკავებლად 5000 ქვეითი და 200 მხედრით გაგზავნა პარმენიონი. აქედანვე მეფემ კიდევ ერთი სარდალი, ალკიმახოსი, ძმა ლისიმახოსისა, გაგზავნა სხვა იონიურ და ეოლიურ ქალაქებში, ყველგან ოლიგარქიის დასამხობად, დემოკრა-

\* იყო კიდევ მეორე მაგნეზია — ლიდის სატრაპიაში.

ტირს აღსადგენად და სპარსელთა ხარკის აღსაკვეთად. და ასე აღსრულდა მისი ბრძანებანი არა მარტო კონტინენტის ბერძნულ ქალაქებში, არამედ კუნძულებზეც — ქიოსზე და ლესბოსზე.

ეფესოში ალექსანდრემ გაიციწო და დაიპატიმრა სახელოვანი ბერძენი მხატვარი — აპელსი. აქვე, არტემიდეს ახალ ტაძარში, აპელსმა დახატა ალექსანდრეს პორტრეტი, ზევსის მსგავსად — ხელთა შორის ელვით და მესით \*.

ეფესოში ალექსანდრე გეგმავდა ზღვის სანაპირო ბერძნულ ქალაქთა აღდგენით სამუშაოებს. პირველ რიგში აღადგინა კიდეც ლიდიელთაგან დანგრეული და იავარქმნილი ქალაქი სმირნა.

ბოლოს, ალექსანდრემ ახლადაგებულ არტემიდეს ტაძარში დიდი საზეიმო მსხვერპლწირვა გამართა, მასუკან ჯარების აღლუმში და საომარი განწესებების დათვალიერება მოაწყო და მომდევნო დღეს გაეშურა სამხრეთით — მილეტისაკენ.

მილეტი იონიის ქალაქთაგან პირველი იყო, რომელიც მის „გასათავისუფლებლად“ მოჰმავალ „თანამემამულე გმირს“ სერიოზულ ომს უმზადებდა. მილეტში სპარსული გარნიზონი იდგა და უფროსად ბერძენი სტრატეგოსი, იგისისტრატოსი ჰყავდა. იგისისტრატოსს მილეტის იწვიათი სტრატეგიული მდებარეობის და სპარსეთის დიდი ფლოტის იმედი ჰქონდა. ქალაქი ნახევარკუნძულზე იდგა და სამი მხრიდან ზღვა ეკვროდა, ხმელეთიდან კი დიდი გალავნებითა და განიერი თარილებით იყო დაცული. სპარსთა ფლოტიც უკვე მიდიოდა, ჰალიკარნასიდან კი ფრნიკური და ბერძნული 400 გემი მოემართებოდა, მაგრამ დაასწრო, იმარჯვა ალექსანდრეს ფლოტის სარდალმა, ნიკანორმა, 160 ხომალდით მიასწრო და ზღვიდან მისასვლელები დაუკეტა მილეტს. სპარსთა ფლოტმა შებრძოლება ვერ გაბედა და მიკალეს კონცხთან დადგა, გულგრილი და შიშრეული უმოქმედობით. ამასობაში ალექსანდრემ ხმელეთიდან იერიში მიიტანა და ქალაქი აიღო კიდეც <sup>12</sup>.

ამის შემდეგ იონიაში სპარსელთა ბატონობის ერთადერთ თავშე-

\* შეიძლება, ამ ნახატის შესახებ გავრცელდა ეს ანეკდოტი: ალექსანდრემ, თოქოს დიდი აღტაცება არ გამოთქვა, როცა იხილა ბუკეფალაზე ამხედრებული თავისი თავი. და მაშინ აპელსმა შემოიყვანა ბუკეფალა, რომელმაც როგორც კი კუჭელზე თავისი ორეული იხილა, ისე „შეიცნო“, რომ ჭიხვინითა და ტორების ცემათ მიიჯარა. მაშინ აპელსს უთქვამს ალექსანდრესთვის — ამ ცხენს ხელოვნება შენზე უკეთ ეამისო.

საფრად რჩებოდა ჰალიკარნასი, კარიის მთავარი ქალაქი, რომელსაც მაკედონელთა მოსვლამდე უკვე განვლილი ჰქონდა თავისი დიდი ისტორია. 150 წლის წინათ აქ დაიბადა „ისტორიის მამა“ ჰეროდოტე. 146 წლის წინათ, სალამინის სახელოვან ბრძოლაში, მოფლიო ალექსანდრე კარიის დედოფლის, არტემისია I-ის საარაკო ვმრობამ. 20 წლის წინათ კი დედოფალმა არტემისია II-მ მოფლიო გააკვირვა „ქმრის სიყვარულით“: გარდაცვლილ მეუღლეს, კარიის სატრასს, მავზოლოსს, აუშენა აკლამა — „მავზოლეონ“ — რომელიც მოფლიო საოცრებათა შვიდეულში შევიდა.

მაკედონელთა აღზევების ქაშს კარიაში ტანტისათვის ერთმანეთს ებრძოდა და-ძმა, ადა და პიქსოდოროსი. ადა დამარცხდა და მისი ციხესიმაგრეში, აღინდაში განმარტოვდა. პიქსოდოროსი ერთბაშს დამოუციდებლობისათვის იბრძოდა, ვერაფერს გახდა და ისევ სპარსელებს შეუბრუნდა. შან თავისი ასული ცოლად მისცა ახალგაზრდა წარჩინებულ სპარსელს, ოთონტოპატს. პიქსოდოროსიც მოკვდა და კარიის პბრძანებელი გახდა ოთონტოპატი, რომელსაც ბედისწერა თუბრმე აღექსანდრე მაკედონელთან შეხვედრას უმზადებდა.

მაგრამ ოთონტოპატი მარტო არ ყოფილა. მასთან მოსულიყო და მტკიცე ბურჯად დასდგომოდა მემონ როდოსელი, ერთადერთი გულგაუტრებილი და შეურიგებელი ბერძენი სტოატეგოსი აღექსანდრე კედონელის წაწაღმდეგ ომში. მემონის ტრაგედიაც სწორედ ეს იყო: ბერძენს ბერძენებთან მისასვლელი ხიდები სამუდამოდ ჩაეტეხა და უცხოელ სპარსელებთან თავგადამკედარ ერთგულებას თვითონ სპარსელები, „როგორც უცხოელს“, არ უფასებდნენ. ჰალიკარნასში რომ მოვიდა, მემონმა ცოლ-შვილი დარიოს მეფის კარზე გაგზავნა. ანით იგი ოჯახს საომარი ხიფათისგანაც იხსნიდა და სპარსელებსაც მიაწინებდა — ერთგულების დასამტკიცებლად სხვა რაღა გინდათ — ცოლ-შვილს მძევლად გაძლევთო. ახლა კი „დაუფასა“ ერთგულება „ანტი-ბერძენ ბერძენს“ დარიოს III-მ და დანიშნა იგი სრულიად საზღვაო და სანაპიროსახმელეთო ძალების მთავარსარდლად<sup>13</sup>.

ოთონტოპატთან და მემონთან ჰალიკარნასში კიდევ იყვნენ „გაქცეულები“ — ათენელი მაკედონელი ეფიალტე და ამინტა ანტიოქიდი.

ამ „დიდებულ ოთხეულს“ ვადაეწყვიტა აღექსანდრე მაკედონელის დამარცხება და დაქვესკნელება, უკეთუ იგი კარიაში შესვლასა და ჰალიკარნასის ზეღყოფას გაბედავდა.

ალექსანდრე კი „ბედავდა“ და მოდიოდა. იგი კარიაში შემოვიდა თუ არა, მამინვე ადა შეხვდა — „კანონიერი დედოფალი“ — და შეილად აყვანა შესთავაზა. ადას შეილობა ალექსანდრესთვის ზედმეტი არ იქნებოდა, — პირიქით, „კანონიერი დედოფლის“ შეილობიდან „კანონიერი უფლისწულობა“ მიიღებოდა და ალექსანდრესაც შეეძლო კარია-პალიკარნასის ტახტის მემკვიდრედ გამოეცხადებინა თავი. ასეც მოხდა. კარიის ქალაქთა სრულმა უმრავლესობამ ალექსანდრეს „გამათავისუფლებელი მანიფესტი“ უყოყმანოდ მიიღო. დარჩა მხოლოდ პალიკარნასი, ერთადერთი მთელს კარიაში, რომელიც ალექსანდრეს „თავისუფლებას“ ისევ სპარსეთის „შეჩვეულ უღელს“ ამჯობინებდა.

ქალაქი სამი მხრიდან მძლავრი კედლებით იყო შემოსაღტული, ხოლო მეოთხე, საზზრეთის მხრიდან იგი ეკვროდა ზღვას. შიგნით, მთავარი აკროპოლისის გარდა, კიდევ სამი ციტადელი ედგა პალიკარნასს. მემნონის ბრძანებით, ქალაქის გარშემო ახალი თხრილები გათხარეს და მიწაყრილები აღმართეს, ზღვიდან კიდევ სამხედრო გემები ჩაამჭიდროვეს.

ალექსანდრემ პალიკარნასს ჯარი ათას ნაბიჯზე მიუახლოვა და სააღყოლ დააბანაკა. მემნონმა ქალაქიდან თავისიანები გამოასხა და ალექსანდრეს შემოუტია. ალექსანდრემ პტოლემეაიოსს ლაგიდი შეახვედრა. მემნონი უკუიქცა და ისევ შეიკეტა ქალაქის კედლებში. ალყა გაჭიანურდა. მცირე, ფრთხილი, ღამეული შეტაკებები ორივე მხრივ ჯერჯერობით მხოლოდ უსაზნო სისხლს იწირავდა. ალექსანდრე გადაწყვეტ იერიშს და ქალაქის დანგრევას ერიდებოდა, — უნდოდა, პალიკარნასი ხელუხლებლად დაეპყრო და მოწინააღმდეგისაგან ნებაყოფლობით კაპიტულაციას ელოდებოდა. მაგრამ კვირა კვირას გადაება და გულისგამაწყალებელ მიხდომ-მოხდომას ბოლო არ უჩანდა. ერთ-ერთი შეტაკებძას გმირის სიკვდილით დაეცა ეფიალტე ათენელი, მაგრამ მემნონი მედგრად განაგრძობდა ქალაქის დაცვას. იგი ცეცხლს უკიდებდა მაკედონელთა საიერიშო მანქანებს, აღმოდებულ მორებს აყრიდა და ანთებულ ფისს ასხამდა მოიერიშე მაკედონელებს. ალექსანდრე ისევ გაურბოდა უკიდურესობას და მხოლოდ ალყას აძლიერებდა და ასაკლდევებდა.

მართლაც ალყაში მოქცეულებს სულიერი სიმტკიცე მოეშალათ და მოერღვათ. თვითონ მემნონმა და ოთონტოპატმა პირველებმა გადაწყვიტეს საკუთარი სიცოცხლის გადარჩენის ფასად ქალაქი გაეწირათ. რასაც ხელი დარიეს, გემებში ჩაჰყარეს, ქალაქი ცეცხლს მისცეს



და გადაიხვეწნენ. ალექსანდრემ ქალაქში სასწრაფოდ ჯარი შეიყვანა და ხანძარი ძლივს ჩააქრობინა.

პალიკარნასიცი ალექსანდრეს ფერხთა წინაშე დამბობილიყო. ამგვარად, კარიის დაპყრობის შემდეგ, მაკედონელი მეფის ხელში იყო მცირე აზიის სრულიად დასავლეთი ნაწილი. ტრადიციული „ელევთერიებისა“ და „ავტონომიებს“ აღდგენა ბერძნულ პოლისებში და მაკედონური გარნიზონები ფრიგია-ლიდია-კარიაში სრულ საფუძველს იძლეოდა, ამიერიდან მცირე აზიის დასავლეთ მხარეში სპარსული ექსპანსიის განმეორება სამუდამოდ აღკვეთილიყო და სტრატეგიულად და ეკონომიურად უდიდესი მნიშვნელობის მქონე ეს ქვეყანა ბერძნულ-მაკედონური სამყაროს მეუფის ხელში მტკიცედ დარჩენილიყო.

და ყოველივე ეს იყო შედეგი ერთი ზაფხულის ლაშქრობისა.

შემოდგომა მიიწურა. ნაადრევი ზამთარი დადგა. მომავალი წლისთვის ალექსანდრე ახალ დიდ ლაშქრობას ამზადებდა მცირე აზიის სიღრმეში შესაჭრელად. საჭირო იყო ახალი საომარი ძალებიც მიეღო ბალკანეთიდან. მეფემ ახლად დაოჯახებული ჯარისკაცები სამშობლოში დააბრუნა, ოჯახებში გამოსახამთრებლად და „გამოსატყბილებლად“. მაგრამ ადრიან გაზაფხულზე თვითონაც უნდა გამობრუნებულიყვნენ, ახალწვეულებიც წამოეყვანათ და ყველას ერთად თავი მცირე აზიის შუაგულში მოეყარათ — ქალაქ გორდიონში. ყოველივე ამის საორგანიზაციოდ და სამეთაუროდ — ახლოჯახიანთა და ახალწვეულთა შესაყრელად და გადასაყვან-გადმოსაყვანად — ალექსანდრემ მაკედონიაში დააბრუნა ახალნაქორწინევი სარდლები — პტოლემიოსის სელევკიდი, მელეაგრე და კენოსი (ამან პარმენიონის ასული შეირთო იმ წელს). დანარჩენი ჯარები („სტაჟიანი მეოჯახეებისა“) ალექსანდრემ ორად გაჰყო. ერთი ნაწილი, მაკედონური და თესალიური მხედრობანი, პარმენიონს ჩააბარა და ლიდიაში გაგზავნა. ლიდიაში უნდა გამოეზამთრებინა და მომავალი წლის ადრე გაზაფხულზე იმავე ჯარით პარმენიონი უნდა მისულიყო ყველა ჯარის შესაყრებ ადგილზე, ქალაქ გორდიონში. მეორე, უფრო მოზრდილი ნაწილით, თვითონ ალექსანდრე ზამხრეთ მცირე აზიისაკენ გაეშურა.

ალექსანდრე შევიდა ლიკიაში. მცირე აზიის ეს ოლქი კირაქსის დროიდან სპარსეთის ქვეშევრდომი ქვეყანა იყო. ლიკიელებიც ალექსანდრეს ისე შეხვდნენ, როგორც „გამათავისუფლებელს“ და მაკედონიის მეფემ წვეთი სისხლის დაუღვრელად ჩაიბარა ეს მდიდარი და

ლამაზი მხარე. 32 ქალაქი ტრიუმფით გაიარა. ყველგან ოქროს გვირგვინებითა და უმდიდრესი საჩუქრებით ეგებებოდნენ. ლიკიის მმართველად ალექსანდრემ დანიშნა თავისი უახლოესი თანამებრძოლთაგანი — ნეარქოსი.

განსაკუთრებული პატივით შეხვდა ალექსანდრეს ქალაქი ფასელიდა. აქაულებმა ოქროს გვირგვინი მიართვეს მეფეს. თავის მხრივ ალექსანდრემ ფასელიდაში გვირგვინებით შეამკო ახლადგარდაცვლილი აქაური პოეტისა და მისი საყვარელი მეგობრის, არისტოტელესთან თანამოსწავლის, თეოდექტეს ქანდაკება<sup>14</sup>.

აქვე მოულოდნელად გაიხსნა შეთქმულება ალექსანდრეს სიცოცხლის შესამუსრავად. გავისხენოთ ფილიპეს მკვლელობისათვის დასჯილი ლინკესტიდი ძმები — ჰერომენესი და არაბეოსი, რომელთაც ჰყავდათ მესამე ძმა ალექსანდრე. და ამ ალექსანდრე ლინკესტიდმა სასჯელს დაასწრო, ახლად ტახტზე ამეაღალ ალექსანდრე მაკედონელს ეახლა და გამეფება ყველაზე პირველმა მიულოცა. მას შემდეგ ალექსანდრე მეფეს ალექსანდრე ლინკესტიდი უახლოეს თანამებრძოლთა და თანამეგობართა შორის ჰყავდა. ახლა კი აღმოჩნდა, რომ „ძალის კუდი არ ვასწორებულა“. ალექსანდრე ლინკესტიდს აღუმაღლი კავშირი ვახუშტის დარბოს III-სთან. სპარსეთის მეფე მას ათას ოქროს ტალანტსა და მაკედონიის ტახტს აღუთქვამდა, თუკი ალექსანდრე მაკედონელს მოკლავდა.

მე) ალექსანდრე ლინკესტიდი შეიბყრეს და გაასამართლეს. ჩვეულებრივ, ნეფის მოკვლის განზრახვისათვის სასჯელად სიკვდილს რა დაუდებოდა, მაგრამ ალექსანდრე მაკედონელმა მოლაღატე სეხნიას ჯერჯერობით ბორკილები და პატიმრობა აკმარა. ასეთი „ღმობიერების“ მაგნი, ჯერ ერთი, ის იყო, რომ ალექსანდრე ლინკესტიდი მეფე უახლოეს კაცს, მაკედონიის მმართველად დატოვებულ ანტიპატროსს სიძედ ერვებოდა და, მეორეც — მეფეს არ სურდა მის პეტეოთაგან რომელიმეს მოკვლა უსიამო მითქმა-მოთქმის საგანი გამხდარიყო მტრებშიც და მოყვრებშიც<sup>15</sup>.

უკვე სამთარი იდგა. ალექსანდრე ლიკიიდან პამფილიაში გადასულიყო. პამფილიაც მას ხელგაშლით შეხვდა, მაგრამ მთავორიან და კლდოვან ქვეყანაში ჯარის მოძრაობა ძალიან გაჭირდა. უკვე ზღაპრებს ავრცელებდნენ იმის შესახებ, თუ როგორ „თავის ჭკუაზე“ იპორჩილებდა „ღვთაებრივი“ ალექსანდრე მაკედონელი ზღვასაც და ხმელეთსაც, — თვალის უბრალო მიპყრობით როგორ უკუაქცევდა

ზღვის ტალღებს, ან ზღვიდან რომ მშრალად ამოდოდა, ან როგორ აღიოდა და აჰყავდა ჯარი მანამდე კაციშვილისგან ფეხდაუდვამ კლდის „კიბეებზე“. მისი თანამგზავრი და „თანაპერიპატეტკოსი“, ისტორიკოს-გეოგრაფოს-ფილოსოფოსი კალისტენე წერდა, რომ ზღვას თვითონ სურდა ალექსანდრესთვის თაყვანი ეცა და მიტომ მის წინაშე თავდაღმა ემზობოდაო!

პამფილიიდან ჩრდილოეთით წარემართა და პისიდიის მთიანეთში გადავიდა ალექსანდრე მაკედონელი. აქ კი მტრულად დაუხვდნენ მკედონელებს თავისუფლებისმოყვარე პისიდიელები, რომლებიც მანამდე არც სპარსელთა მორჩილად თვლიდნენ თავს. განსაკუთრებით ქალაქი სალაგასი დაუხვდა მედგარი წინააღმდეგობით მტერს. ალექსანდრემ მხოლოდ სასტიკი იერიშებით შეძლო ამ ქალაქის აღება.

პისიდიიდან ფრიგიის მთავარი ქალაქისკენ, გორდიონისკენ წაიყვანა ჯარები ალექსანდრემ...

ღვას 333 წლის აღრიანი გაზაფხული. გორდიონში თავი მოუყრია ალექსანდრე მაკედონელის ყოველ ჯარს. პარმენიონიც მოსულა საზამთრო ბანაკიდან. მაკედონიიდან დაბრუნებულან პტოლემეაიოსი, მელეაგრე და კენოპი, შვებულებამოვლილი და ახალწვეული ჯარებით. ახალწვეული კი იყო 3000 ქვეითი და 300 ცხენოსანი მაკედონელი, 200 თესალიელი და 150 ელეელი მხედარი.

გორდიონის აკროპოლისში, ფრიგიის მეფეთა სასახლეში, ინახებოდა ლეგენდარული გორდიოს მეფის და შემდგომ მისი ძის, მიდას მეფის „ღვთისგან ბოძებული“ ეტლი, რომლის ხელნები (რვილები) შეკრული იყო თასმის მრავალნასკვოვანი, თავბოლო უჩინარი კვანძით, ეს იყო საუკუნეების მანძილზე ყბადაღებული „გორდიოსის კვანძი“, რომელსაც თან ერთვოდა „წინასწარმეტყველება“: ვინც ამ კვანძს გახსნის, მხოლოდ იგი შეძლებს აზიის დაპყრობასო. აქამდე თურმე ბევრ დიდსა თუ მცირე ავანტიურისტს უცდია ამ უცნაური კვანძის გახსნა, მაგრამ ამაოდ.

აწლა ალექსანდრე მაკედონელი მიადგა „გორდიოსის კვანძს“, ერთხანს ათვალეირა, უტრიალა, უცებ ხმალი გაიძრო, შემოჰკრა და განკვეთა კვანძი, — ხმლით დავიპყრობ აზიასო — თქვა და მომავალ საუკუნეებს მარად სახსოვარ ფიგურალურ თქმად დაუტოვა „გორდიოსის კვანძის განკვეთა“.

და კვლავ აღჯდა ალექსანდრე მაკედონელი ბუკეფალაზე და კვლავ გაუძღვა ჯარებს ახალ სალაშქრო გზებზე.

ხოლო, სპარსეთის სახელმწიფო კარს ისევ ჭეროვნად ვერ შეეფასებინა ევროპიდან მოსული საფრთხის სიდიდე. წინა წელს მტრის გამარჯვებათა მიზეზად მხოლოდ მთავარსარდლის დაუნიშნობას ასახელებდნენ. ახლა კი ჰყავდათ მთავარსარდალი სპარსელებს, მაინც ბერძენი, მაგრამ სპარსეთისთვის სპარსელზე უფრო ერთგული და თავდადებული, თანაც ყოველ სპარსელზე უფრო ნიჭიერი და მამაცი კაცი, ეს იყო ისევ და ისევ მემნონ როდოსელი, რომელსაც შეეძლო ღირსეული მეტოქეობა გაეწია „ცუნდრუკა“ ალექსანდრესთვის.

პალიკარნასის დაცვის ჟამს ძლიერად გამოჩნდა მემნონის ნიჭი და ვაჟკაცობა, უფრო ადრეც, მემნონისთვის რომ დაეჭვებინათ და გრანიკოსის კატასტროფა არ მომხდარიყო, სულ სხვა გეზით წავიდოდა ომის ბედი. მემნონის მთავარსარდალად დანიშვნა ნაგვიანევი რომ არ ყოფილიყო, მართლაც შეიძლებოდა დიდი ნაყოფი მოეტანა მის სტრატეგიულ განაზრახს, რაც ეგეოსზე დიდი საზღვაო ძალების შეყრას და მათი სპეშალებით საბერძნეთში ახალ, „ქსერქსესებურ“ შესევას და ევროპისგან ალექსანდრეს მაცოცხლებელ გზათა და არტერიათა გადაჭრას გულისხმობდა. ნაგვიანევი დიხანაც იყო, მაგრამ მაინც ამოქმედებულიყო სპარსთა „ნაგვიანევი მთავარსარდალი“. მის ხელში იყო ჭერ კიდევ ძლიერი ფლოტი, რომელიც შედგებოდა ფინიკიური, კიპროსული და ნაწილობრივ როდოსული გემებისაგან. მემნონის მხარე ეჭირათ როდოსს, კოსს და ყველა ჰპორადულ კუნძულს. მემნონს კარების გახსნით ელოდებოდნენ ქიოსისა და ლესბოსის ოლიგარქები. მართლაც, მიადგა თუ არა ქიოსს, მაშინვე ჩააბარეს კუნძული ოლიგარქებმა<sup>16</sup>. ქიოსიდან ლესბოსს მიადგა მემნონი; აქაური ქალაქებიც ზედიზედ ჩაიგდო ხელში, მაგრამ ლესბოსის მთავარი ქალაქი, მიტილენა, — სადაც მაკედონელთა გარნიზონი იდგა — ძნელი ასაღები შეიქნა. მემნონმა ქალაქი ძლიერ აღყაში მოაქცია და საშინელ შიმშილობაში ჩააგდო. დღე-დღეზე მიტილენა უნდა დაცემულიყო. ეგეოსის სხვა კუნძულებიდანაც ელჩები მოდიოდნენ მემნონთან შესაკავშირებლად. ევბეოს ქალაქები მესიასავით ელოდნენ მემნონს. სპარტელებიც იარაღს ისხამდნენ მასთან შესაერთებლად.

და უცებ „მემნონის კვანძი“ საფსებით მარტივად „განკვეთა“ სიკვდილმა: მემნონი აუად გახდა, მოკვდა და მისი „დიდი გეგმებიც“ სპარეში თან ჩაიყოლა. ასე გაქრა იმეამინდელი შფოთიანი ასპარეზიდან კაცი, რომელზეც თვითონ ალექსანდრე მაკედონელს უთქვამს:

ყოველი საქმე იოლად აღესრულება, უკეთუ მემნონი არ შეგვიშლის ბელსო 17.

მემნონის უეცარმა სიკვდილმა შეარყია სპარსეთის სამეფო კარი. მაგრამ ეს „შერყევა“ არ გამოხატულა მთავარსარდლის სიკვდილს ვამო გამოწვეულ სახელმწიფო გლოვაში, არამედ მძიმედ. მშფოთვარე კითხვაში — როგორ უნდა მოქცეულიყვნენ მემნონის სიკვდილის შემდეგ, უკვე საომარ გზაზე დამდგარი ალექსანდრე მაკედონელის წინააღმდეგ?

მეფე დარიოს III-მ სასწრაფოდ სამხედრო თათბირი შეჰყარა სუზაში<sup>18</sup>. და იკითხა მეფეთამეფემ: როგორ სჯობია ახლა — ისევ ადგილობრივი სატრაპები შევავადრო მათ საგანგოო სატრაპიებზე წამოსულ მტერს, თუ მე თვითონ ვუსარდლო სახელმწიფო ჯარებსო. მაშინვე ყველა სპარსელმა კარისკაცმა ერთხმად ურჩია, ჯარებს შენ თვითონ უნდა გაუძღვეო, ვინათგან შენი ღვთაებრიობის ერთი გამოჩენაც ჯარებს ზეადამიანურ მზნეობას ჩაუნერგავს და ერთი ბრძოლაც საკმარისი იქნება თაყვადი ალექსანდრეს გასანადგურებლადო. მაგრამ სხვა რამ ურჩია დარიოსს ქარიდემოსმა, ათენიდან გაქცეულმა და სპარსეთის კარზე დაწინაურებულმა „ანტიმაკედონელმა“ ბერძენმა (ზემოთ ხომ ითქვა ათენიდან მისი გაქცევის შესახებ) — აზიაში ალექსანდრეს შემოჭრა იმად არ ღირს, რომ მისთვის მთელი აზია გაწოროთო, — ამბობდა ქარიდემოსი — არ შეიძლება ყოფნა-არყოფნის სასწორზე შევადგოთ სახელმწიფო ლაშქარიო, მით უფრო ახლა, არც საჭიროა და არც საკადრისი, უმაღლესი, ღვთაებრივი მეუფე ბრძოლაში წავიდესო; ასეთ უკიდურესობას მხოლოდ უკიდურესი საფრთხის ქაშს უნდა მივმართოთო, ზოლო უკიდურესობა არც ახლა გვჭირს, არც მომავალში დაგვემართება, უკეთუ ფრთხილად და დაკვირვებულად მოვექცევით უპქუო, თავზუხელაღებულ მაკედონელსო; ბოლოს. გთხოვთ მე მომანდოთ ბრძოლის მეთაურობა და ჩემი ბერძნებით პირობას გაძღვეთ, კისერს მოვუტარებ ალექსანდრესო.

სპარსელებმა მაშინვე მტრობა და ღალატი დასწამეს ბერძენ ემიგრანტს. იგი ჩვენ, სპარსელებს ლაჩრობას გვაბრალებსო, უკადრისად შეურაცხყოფას გვაყენებსო, მეფის ერთი გამოჩენაც ჯარს უსაზღვრო სიზამაცეს და თავგანწირვის უნარს ჩაუნერგავს, ზოლო ეს ბერძენი მეფის ადგილზე თავის თავის დაყენებას ბედავსო; თუ „ეგ ბერძენი“ მართლა მთავარსარდლად დადგა, მაგ და მაგის ბერძენი მეომრები დიდ კაროსის ქვეყანას უეჭველად „ბერძენთა მეფეს“ მიჰყიდისო.

გაცეცხლებული წამოიჭრა ფეხზე ქარიდემოსი. — ბრძეები ხართ, ლაჩრები და პატივმოყვარეობის ჭიით შექმულებით, — შეუტრიალა სპარსელებს — თქვენ არ გესმით თქვენი უმწეობა და ბერძნების ძალმოსილება, და ბერძნები მართლა გადაყლაპავენ კიროსის ქვეყანას, უკეთუ სპარსეთის მეფის სიბრძნე ჩემს რჩევას ანგარიშს არ გაუწევსო.

ქარიდემოსის ასეთი სიტყვა შეფასებულ იქნა მეფის „ღვთაებრიობის“ შეურაცხყოფად და თვითონ დარიოსმა შეაბო ხელი სარტყელზე ბერძენს. სარტყელზე მეფის ხელის შეზება კი სიკვდილის განჩინებას ნიშნავდა და ჯალათებმა უმაღლვე შეიპყრეს ქარიდემოსი. რომელმაც მანც მოასწრო შეეძახნა დარიოსისთვის: „მაღე ინანებ ჩემი მოკვლისთვის, შურისგებაც გიახლოვდება, შენი სამეფოც დანგრევას ვეღარ გადაურჩება! <sup>19</sup> იგი მოაშთვეს. სპარსთა უმაღლესმა სამხედრო სათათბირომ გადაწყვიტა, შეეყარათ სახელმწიფო ჯარები და, მეფის პირადი სარდლობით, მაკედონელებს დახვედროდნენ კილიკიისა და სირიის შესაყარში. ამას გარდა, ის საომარი ძალები, რომლებიც სიკვდილამდე ემორჩილებოდა მეზნონ როდოსელს, გადაეცა ფარნაბაზს და ებრძანა მას ყველა ჯარისთვის თავი მოეყარა ფინიკიის ნაპირზე, ტრიპოლისში. იქვე გაიგზავნა თიმონდა მენტორის ძე (მემნონის ძმისწული); რომელსაც ტრიპოლისიდან ბერძენ მოქირავნეთა ჯარი უნდა წამოეყვანა დარიოსის ჯარებთან შესაერთებლად.

ამასობაში, გორდონიდან წამოსულმა ალექსანდრემ გამოიარა ანკირა, სადაც მას ეახლნენ ელჩები პაფლაგონიიდან და გამოუცხადეს თავისი ქვეყნის მორჩილება. მას უკან მაკედონელებმა გამოიარეს კაპადოკია, გადმოჰრეს ჰალისის ხეობა, მერე ტავრის ჩრდილოეთი ფერდობი და დაეშენენ კილიკიისაკენ — მისი მთავარი ქალაქის, ტარსოსისაკენ.

კილიკიის სატრაპს, არსამს, მისი სატრაპიის ჩრდილო საზღვარზე, მთიან და კლდოვან უღელტეხილზე, ჯარი დაეყენებია მტრის შესაკავებლად, — მანამ შესაკავებლად, სანამ თვითონ კილიკიის ქალაქებს გაძარცვავდა და ნაძარცვთან ერთად გაასწრებდა დარიოსთან შესაერთებლად. მაგრამ ალექსანდრეს გამოჩენისთანავე, სპარსთა მოდარაჯე ჯარი ისე გაიქცა და ალექსანდრემაც კილიკიაში შესავალი ისე სწრაფად გაიარა, რომ არსამამა ნაძარცვი კი არა, საკუთარი ტყავით ძლივს გაასწრო კილიკიიდან.

მაკედონელები მიაღწენ მდინარე კიდნოსს და მეფემ — უძილო-

ბით. მძიმე ლაშქრობებით, და ზაფხულის მძვინვარე სიციხით დაქან-  
ცულმა — მაშინვე ტანთ გაიძრო და. ყინულივით ცივ მთის მდინარეში  
გადაეშვა. ცივმა წყალმა ცხელ სხეულზე მაშინვე ავად იმოქმედა,  
გრძნობადაკარგული მეფე ძლივს ამოიყვანეს მდინარიდან. საშინელ-  
მა ტყვილებმა მოუბრუნეს გონი. ექიმები ევრაფერს გაადნენ. მეფე  
დღელამ-სწორებით გაუწელებელი კრუნჩხვებით და ტყვილებით  
იტანჯებოდა, გაუთავებლად ჭირის ოფლში იწურებოდა. ის იყო, მე-  
ფის მორჩენის იმედი გადაეწურათ, რომ, ბოლოს, ექიმთაგან ფილი-  
პე აკარნანიელმა დააიძვრა მეფე, — მე ისეთ წამალს გავმსაღებ,  
რომელიც უეჭველად მალე მოგარჩენსო. ეს ბერძენი ყრმობითგანვე  
ალექსანდრეს მკურნალი იყო და კარგად სცოდნოდა თავისი „დიდი  
პაციენტის“ სხეულის „კლინიკური თვისებები“. ალექსანდრესაც  
დიდი პატივისცემა და ნდობა ჰქონდა ფილიპესადმი.

მაგრამ წამლის მიღების წინა დღეს ალექსანდრემ პარმენიონის  
წერილი მიიღო; წერილში ეწერა — ფილიპე აკარნანიელს მოერიდეთ,  
ვინაითგან დარიოსს მისთვის ათასი ტალანტი გამოუფზავნია და ცოლა-  
დაც თავისი ასული აღუთქვია, უკეთუ შენ მოგწამლავსო.

მეორე დღეს ფილიპე შემოვიდა და უკვე შეზავებული წამლით  
სავსე ფიალა მიაწოდა მეფეს. ალექსანდრემ ფიალა ჩამოართვა, სულ-  
მოუთქმელად გამოაცალა და ცარიელ სასმურთან ერთად მკურნალს  
წერილიც გადასცა. ფილიპემ წერილი ისეთივე სიმშვიდით წაიკითხა,  
რა სიმშვიდითა და ახლობელი ადამიანისადმი რწმენით ალექსანდრემ  
ის წამალი დალია. წამალმა კი მეფე მოარჩინა<sup>20</sup>.

ალექსანდრე შევიდა ტარსოსში და განიმტკიცა ძალაუფლება კი-  
ლიკიაში, ამ უაღრესად მნიშვნელოვან ქვეყანაში, რომელიც მაერთე-  
ბელი რგოლი იყო მცირე აზიასა და სირია-ფინიკიას შორის. ტარ-  
სოსიდან ალექსანდრე შევიდა ანქიალაში, ასირიელი მეფის, სარდანა-  
პალის დაარსებულ ქალაქში. აქვე სარდანაპალის ძეგლი იხილა მსოფ-  
ლიოს ახალმა დამპყრობელმა, ფრიად დამაფიქრებელი წარწერით:

„სარდანაპალმა დააარსა ანქიალა და ტარსოსი ერთხა და იმავე  
დღეს; შენ კი, უცხოელო, ჰამე, სვი და იტრფიალე; სხვა ყველაფერი  
არაფრად არა ღირს ამ ქვეყანაზე“.

ანქიალას შემდგომ მაკედონელები შევიდნენ სოლში, ზღვის სანა-  
პირო და სანავსადგურო ქალაქში. სოლი ბერძნული ქალაქი იყო, მაგ-  
რამ სპარსეთის მორჩილებას შეგუებული. მაგრამ აქაური ბერძნები  
ახალ, „ბერძენ მეფესაც“ მაშინვე „შეეგუნენ“ და ქალაქიც უომრად

ჩააბარეს. აქ მაკედონელებმა და „მოსულმა ბერძნებმა“ დიდი საზე-  
იმო სანახაობანი გამართეს. ალექსანდრეს გამოჩანსაღებისათვის  
ღმერთმკურნალს, ასკლეპიოსს, მსხვერპლწირვა გაუმართეს; ჯარები  
საზეიმო სვლით, ანთებული მაშხალებით ვილოდნენ, იყო შეჯიბრი  
სირბილში, ჯირითში, ტანვარჯიშში, სახიობაში, პოეტურ და სოფის-  
ტურ პაექრობაში. მოსულმა ბერძნებმა დამხვედურებს საბერძნეთის  
ძველი დიდება გაახსენეს, მიძინებული ელინური სისხლი აჟმღვრიეს  
და გული აუჩუყეს, აზიური ბარბაროსობის პირობებში დამცრობილი  
ბერძნობა უმაღლესი სულის უპირატესობად აღადგინეს.

ალექსანდრემ სოლის შემდგომ დაიჭირა ასევე ბერძნული წარმო-  
მავლობის კიდევ ორი სანავსადგურო ქალაქი კილიკიაში — მაგარსი  
და მალი.

მალში ალექსანდრემ პირველად შეიტყო, რომ მეფე დარიოს III  
კოდომანი უთვალავი მხედრობით მოეშურება მასთან შესაწვედრად;  
მან უკვე გადმოიარა ევფრატი და დაბანაკდა ქალაქ სოხასთან, სირიის  
უკიდურეს ჩრდილო-დასავლეთ ნაწილში, კილიკიამდე ორი დღის  
სავალზე.

მეორე დღითვე ალექსანდრემ ჯარები მალიდან გამოიყვანა და  
აღმოსავლეთისკენ წარემართა. ხმელეთში ღრმად შემოჭრილი ყურის  
გასწვრივ იარა, მდინარე პინაროსი გადაიარა და ქალაქ ისოსში მივი-  
და. აქ, ისოსში, სირიისკენ გასასვლელად მეფეს გზაბოძალი ელოდე-  
ბოდა — ერთი, ხმელეთის სიღრმეში, ამანის მთების გადალახვით და,  
მეორე, ისევ ზღვის გაყოლებით. ქალაქ მირიანდრასკენ. დაღლილი,  
ნალაშქრევი ჯარებისათვის მთიანი გზებს დაძლევა ძნელი უნდა  
ყოფილიყო და ალექსანდრემაც, სავსებით ბუნებრივად, ისევ ზღვის  
პირითა და დაბლობით სიარული აირჩია. მან დაჭრილი და ავადმყო-  
ფი მეთომრები ისოსში დატოვა და თვითონ, სრული საომარი ძალებით,  
მირიანდრას მივიდა და დაბანაკდა. 1)

მირიანდრადან სირიის საზღვრამდე ერთი საათის გზა დარჩენი-  
ლიყო, საზღვრიდან კი — ორი დღის სავალზე — ქალაქ სოხასთან გაშ-  
ლილ ტრაპეზელ ველზე — სპარსეთის ხელმწიფე იყო თავისი უზარმა-  
ზარი არმიით დაბანაკებული და დასაძოვრებული.

ნოემბერი აბალი დამდგარი იყო. მირიანდრაში კოკისპირული წვი-  
მები დადგა, წვიმაში გრიგალი აირია, მძვინვარე ტაროსი გაგრძელდა  
და ჩადგომას თითქოს აღარც აპირებდა. არამცთუ სალაშქროდ გა-  
სულა. ბანაკიდან თავის გამოყოფაც აღარ შეიძლებოდა.



მაგრამ კარგი ამინდიც რომ ყოფილიყო, ალექსანდრეს მაინც არ უნდა წაეყვანა ჯარი სირიაში, სოხას ბანაკზე თავდასასხმელად, — არ უნდა წაეყვანა, ვინათგან მისთვის უაღრესად სახიფათო და უიმედო იქნებოდა რიცხვით, სულ ცოტა, ოთხჯერ უმეტეს მოწინააღმდეგესთან შეხვედრა სოხას ფართო ველზე, სადაც დარიოსს თავისუფლად შეეძლო თავისი რიცხობრივად დიდად უპირატესი ძალებით ალექსანდრე სალტეში მოექცია და მოესრინა.

რაღა თქმა უნდა, არც დარიოსს უნდა მოეცვალა ფეხი სოხას მიწდვრიდან, მისთვის ყოვლად უპირატესი საომარი ადგილიდან.

მაშ, მოწინააღმდეგეთაგან არც ერთი არ უნდა დაძრულიყო თავისი ბანაკიდან, უკეთუ რაიმე მოულოდნელობა „დეუს ექს მახინასავით“ არ შემოიჭრებოდა წონასწორად მოქანავე სასწორის ასაშლელად.

ალექსანდრე მიხვდა, რომ მირიანდრას ბანაკიდან არ უნდა წასულიყო სოხას ბანაკზე თავდასასხმელად.

დარიოსი კი ვერ მიხვდა, რომ ფეხი არ უნდა გაედგა მისთვის მომგებიანი სოხას ბანაკიდან.

სასწორი უკვე აშლილი იყო, ყოველგვარი „დეუს ექს მახინას“ გარეშე, წყალობითა უგუნურებისა სპარსეთის მეფისა და მისი შტაბისა!

სპარსეთის გვირგვინოსნის საომარი დროშების ქვეშ 200 000 მეომარი იდგა, აქედან — 170 000 აზიელი და 30 000 დაქირაებულ ბერძენი. დარიოსს სწამდა ამ არმიისა, სწამდა თავისი „სამართლიანი საქმისა“, სწამდა თავისი საშხედრო და სამოქალაქო სიბრძნისა და სწამდა იმ სიზმრისაც, გამოლაშქრების წინა ღამით რომ ესიზმრა და ისე სასიკეთოდ აუხსნეს ქალდეველმა მესიზმრებმა (ვითომ მაკედონელთა ბანაკს ხანძარი მოსდებოდა, მაკედონიის მეფე კი ჯერ ბაბილონის ქუჩებში მიაჭენებდა ცხენს, სპარსული ტანსაცმლით მოსილი, და უცებ გამქრალან კაციც და ცხენიც!). არც ერთ მის ქვეშევრდომს, ახლობელს, მეგობარს და ოჯახის წევრს არ ეპარებოდა ოდნავი ეჭვიც სრული გამარჯვებისა და „ალექსანდრე ცანცარას“ გაცამტვერებისა.

მოდით დავხსნათ სპარსელნი. წინ, ვერცხლის საკურთხეველზე ანთებული საღვთო ცეცხლი მოჰქონდათ მოგვებს, აპურამაზდას სადიდებელი სავალობლების ღიღინითა და ყვილით. მოგვება მოსდევდნენ ძოწით-მოსილი ყმაწვილნი, რიცხვით წელიწადის დღეთა ტოლნი — 365. შემდეგ, ოთხი თეთრი ცხენი მოაქანებდა ოქროს ეტლს, რომელშიც

იჭდა გასაოცარი სიშიდრითა და ბრწყინვალეებით მოძთულ-მოკაზ-  
მული თვითონ მეფეთამეფე დარჩოს III. მეფის ეტლს კიდევ ერთი  
ფაშატი მოსდევდა, მარჯავი, „შზის ცხენი“. თეთრად მოსილი მეჯი-  
ნ-ბენი გარს ეხვინენ ეტლსა და მარჯავს. მერე კიდევ ოქრო-ვერცხ-  
ლთ აღკასული ეტლი მოქროდა, შიგ დარჩოსის ოჯახი მოთავსებუ-  
ლიყო, ღედა — სიზიგამბისი, მეუღლე — სტატირა. მთელს აზიასში  
ულამაზესი ქალი (ფეხმძიმედ იყო), მეფის ასულნი — სტატირა და  
ბაზრანა და ექვსი წლის ყრმა-უფლისწული — არტაქსერქსე. ამათ,  
მცირე დამანძილებით, კიდევ ცხრა ვერცხლის ეტლი მოჰყვებოდა —  
მეფის ჰარამხანით, წარჩინებულებით, საჭურისებით, ენაამორთმეული  
და ყურდათლილი მსახურეულით. მთელი სპარსეთის სამეფო კარი  
წამოსულიყო „სეირის საყურებლად“. 10 000 „უკვდავი მეომარი“  
მოაგვლებდა ცხენს, მეფის „ღვთაებრიობის“ პირადი მცველნი,  
ოქრო-ვერცხლით და თვალ-მარგალიტით შემკულნი, უბრწყინვალესი  
აღჭურვილობით დასილალებულნი... და შემდგომ მოთქარუნობდა  
სრულად სპარსეთს ან უმეტესი აზიის ჯარები...

პირველ, ვინც დარჩოსის ბანაკს კილიკიაში აღექსანდრეს და  
მისი ჯარების ჩამოსვლა აუწყა, იყო კილიკიიდანვე გაქცეული სატრა-  
პი არსამი. მას უკან იდგნენ და ელოდნენ სპარსელები მაკედონე-  
ლებს. ალბათ აღექსანდრე ამანის უღელტეხილებზე გადმოვიდისო და  
გასცქეროდნენ დაავლეთს — ან აგერ გამოჩნდება მოჭენავე მტრის  
ფერხთაგან ავარდნილი მტკრის კორიანტელი და ან აგერო. მაგრამ  
ამოდ ელოდნენ. დღე დღეს მისდევდა და აღექსანდრე კი არ ჩანდა.  
დრო ყველაფერს ნთქავს და ყველაფერში — საფრთხისადმი სიფრთხი-  
ლის გრძნობასაც. სპარსელები გათამამდნენ, აღექსანდრესგან ნაწვნი-  
ვი მარცხს სიმწვევეც დაივიწყეს, მაკედონელს უკვე კიდევაც დას-  
ცინოდნენ, ლაჩრად და გულჩუქენად იხსენიებდნენ, მეფეთამეფე  
დარჩოსის ბრწყინვალეების ფონზე კატის კნუტად აღარ აგდებდნენ!  
ალბათ, იმ ზევზუვებშიც ის „ცუნდრუკა მაკედონელი“ იმითომ იმა-  
ლება, იცის. ფეხი რომ გამოდგას, სპარსული ცხენების ფლოქვებიც  
საემარისია მის გასასრესადო. აღექსანდრე გავს წვრილფეხა ნადირს,  
რომელიც მგზავრის შორეული ფეხის ხმაზეც სოროში იმალებაო<sup>21</sup>.

და ბოლოს, შეუჩნდნენ დარჩოსს მისი პირმოთნე, მსუბუქთავიანი  
კარისკაცები — აღექსანდრე ისეა დაშინებული, აქეთ გადმოსვლას  
ვერასგზობთ ვერ გაბედავს და, სანამ იქიდანაც გაგვექცეოდეს, საჭიროა  
ჩვენ თვითონ დავიძრათ, თავს დავესხათ და გავანადგუროთო. მხო-

ლოდ ერთი კაცო — მაკედონიდან ადრე გაქცეული და ალექსანდრეს მოსისხლე მტერი, ამინტა ანტიოქეს ძე, არწმუნებდა დარიოსს: არ დაიჯერო რომ ალექსანდრეს ეშინოდესო, იგი ძალიან მალე გამოიჩინებდა და უფრო დიდ საფრთხეს სწორედ ის მოასწავებს, ამდენახს რომ აგვიანებსო; არავითარ შემთხვევაში კილიკია ვიწრობებში არ უნდა გადავიდეთო — განაგრძობდა ამინტა ანტიოქიდი — ეს ადვილი, სობახს ველი, არის ჩვენთვის ყოვლად მოსახერხებელი ბრძოლია ადგილი, აქ ჩვენ უეჭველად გავიმარჯვებთ, ან, მარცხის შემთხვევაში, თავსაც იოლად გადავირჩენთ<sup>22</sup>. მაგრამ დარიოსმა არ დაუჯერა ამინტას. — ახლავე უნდა გავეშურო, ვინაშენ მესინია ალექსანდრეს გაქცევა არ მომასწროს და ზელიდან არ დამიპატივდეთო, — უთხრა მან ბერძენს. — მაგ მარცხ დამწვიდებულები ბრძანდებოდეთ, მეფეო, ალექსანდრე თვითონ გამოემართება შენკენ და, ვგონებ, უკვე მოდიხარ კიდეცო, — უბასუხა ამინტამ<sup>23</sup>. დარიოსმა კი ისევ სპარსელი კარსკაცებისა და საკუთარი „ღვთაებრივი გუჟანისა“ იწამა, თანხლებული საგანაურები დამასკოში ვაგზავნა და ჯარი სალამქრო გზაზე დააყენა. სპარსელები ამანის უღელტეხილებით გაემართნენ კილიკიისაკენ. ეს მთიანი ანუ. — როგორც უწოდებდნენ — „მკაცრი კილიკია“ გადაიარეს და ზღვის პირის „ბედნიერი ქალაქისაკენ“ — ისოსისკენ დაემშენნენ.

ისოსში სპარსელებს მხოლოდ ალექსანდრესგან დატოვებელი დამტრალი და დასნეულებული მეომრები დახვდათ. სპარსელმა ჯაღათებმა ყველას ხელები დააკრეს, გარდანაკვეთმა მოუწვეს. ასე ნატანჯნი ჯარების წინ ჩამოატარეს და გაუშვეს — გაიქცით და თქვენს მეფეს აუწყეთ, რაც იხილეთო.

ალექსანდრეს ვაოცებას საზღვარი არ ჰქონდა, როცა პოსმა წამებულმა მეომრებმა ზურგიდან დარიოსის ჩამოტრის ამბავი აცნობეს. მტრის ეს უგუნურება მისთვის იმდენად დაუჯერებელი იყო, რომ მაშინვე საგანგებო მზერაეები აფრინა სინამდვილის შესაქონებლად. ყოველივე სიმართლე აღმოჩნდა. ალექსანდრემ დმერთებს მადლი შესწირა, რომ მისი ამდენი ლოცვა შეისმინეს და ბრძოლის ადგილად სწორედ ეს ვიწრობები არგუნეს<sup>24</sup>.

დარიოსის არმიები ისოსის ვიწრობებში ჩაჭედდნენ და მდარცხოვნილი უპირატესობაც თავისთავად დაკარგული იყო.

თვითონ დარიოსი კი თავის თავს „ჩაქედილად“ არ თვლიდა და ჯარებს საომრად ალაგებდა.

მაშ, ქრისტეს დაბადებამდე 333 წელი, შუა ნოემბერი. სახელო-  
ვანი ბრძოლა ქალაქ ისოსთან.

ბრძოლის ადგილი — ისოსის ველი, ქალაქის სამხრეთით, სიგრძით 5—6 კილომეტრი, სიფართით 1000—1200 მეტრი, ზღვასა (დასავლეთით) და მთას (აღმოსავლეთით) შორის მოქცეული მიწის ნაჭერი, რომელსაც შუაზე კვეთს მთიდან მომავალი მცირე მდინარე — პინაროს (ახლ. დელი-ჩაი).

მდინარის მარჯვენა — დარიოსი, მარცხნივ — ალექსანდრე.

დარიოსმა მარჯვენა ფლანგზე, ზღვაზე მიყრდნობით, დააყენა სულ 50 000 მეომარი — 20 000 მოისარი და მოშურდულე ნაბარზანის მეთაურობით და 30 000 დაქირავებული ბერძენი, თიმონდა მენტორის ძის სარდლობით. მარცხენა ფრთაზე მეფეთამეფემ დააყენა 60 000 აზიელი ცხენოსანი და უჯიდურეს მარცხენა ფლანგზე, მთაზე მიყრდნობით — 20 000 ქვეითი აზიელი, არისტოლემეს სარდლობით. შუაგულში დადგა თვითონ დარიოსი, საკუთარი გვარდით — 10 000 „უკვდავით“. უკან სამ რიგად ჩადგა რეზერვი, თითოეულ რიგში — 20 000 მეომარი, სულ — 60 000. ასე რომ, მდინარე პინაროსის მარჯვენა მხარე, მთიდან ზღვამდე, სრულიად გატენილი და გაჭედილი იყო სპარსელი გვირგვინოსნის საომარი ძალებით.

ალექსანდრემ შუაზედ, ორის ფრთით, ქვეითი ფლანგები ჩაალაგა, ექვს ტაქსისად დაყოფილნი. მარცხენა ფლანგზე, ზღვისკენ, შუა და სამხრეთ-საბერძნეთის მხედრობანი დააყენა, პარმენიონის სარდლობით და კრატეროსის მოადგილეობით. მარჯვენა ფლანგზე, მთისკენ, თვითონ დადგა მაკედონელთა და თესალიელთა მხედრობით. მთელი განლაგების წინ მან გაამწკრივა თრაკიელი და კრეტელი მოისარნი და მოშურდულენი.

ასეთი წყობით მიიწვედა ალექსანდრე მდინარისაკენ და თან სიტყვებით ამზნევებდა და საომრად ახელებდა თავის მეომრებს, იგი მიმოქროდა ჯარების წინ, მიმართავდა ზოგს პირადად, ცალკეულად ან ჯგუფეულად. მოაგონებდა წინარე გამირობებს, აღუთქვამდა დიდ სახელსა და ურიცხვ სიმდიდრეს. სპარსეთიც, ბაქტრიაც, ინდოეთიც მაკედონიის პროვინციები იქნებიათ. მარტო აზია კი არა, მთელი დედამიწა ჩვენი იქნებო; ჩვენ მახვილებიც არ დაგვჭირდება, მარტო ფარებით გავლახავთ და გავაქცევთ მშვიდარა აზიელებსო. გამორჩევით ბერძნებს მოაგონებდა დარიოს I-სა და ქსერქსესგან მიყენებულ გულის წყენასა და სისხლის რწყევასა. ახლა დაგვიდგა დრო, ერთი-

ასად ვაზღვევინოთ საბერძნეთის წმიდა მიწის, სალოცაუებისა და საეკლესიოებების შეგინებისთვისო. ძარცვა-გლეჯის მოყვარე თრაკიელებსა და ილირიელებს ცალკე მიანიშნებდა აზიელ მეომართა ოქრო-ვერცხლით მოსევეადებულ აღქურვილობაზე — მიდით, ვაჟკაცებო, წაართვით ყოველივე ამ აზიელ დედაკაცებს და თქვენი შიშველი, ყინვით გათოშილი კლდეები გამოიცვალეთ აზიის მდიდარი ველმინდვრებითო, — და სხვა მისთანანი. ჯარებიც მხნე შეძახილებით პასუხობდნენ და ბრძოლაში ბარემ ჩაბმას მოითხოვდნენ.

საბრძოლო წყობა რომ არ აშლოდათ; მდინარემდე ალექსანდრემ ნელა ატარა ჯარები, ხოლო ისრის სასროლზე მისვლისთანავე ბრძანა, მდინარე მთელს სისწრაფით გადაელახათ და მტერსაც შებმოდნენ დაუყოვნებლივ.

ასედაც მოხდა. მტრის ხშირი ისრის ქვეშ, მაგრამ მცირე მსხვერპლით, გადალახეს მაკედონელებმა პინაროსი, გადალახეს და მტერს შეებნენ ზარდამცემი ყიუინით, გაბელებით და გაალმასებით.

სპარსთა მარცხენა ფლანგმა მტრის მძლავრ დატაკებას ვერ გაუძლო და ხანმოკლე წინააღმდეგობის შემდეგ აიშალა და უკუიქცა, თავგზააბნევით.

უკვე აჩეხილი მტრის მარცხენა კერძიდან, ირიბად, შუაგულს მიამურა ალექსანდრემ, იქ დარიოსი ეგულებოდა. გამოჩნდა კიდევ სპარსთა ხელმწიფე, ოქროს ეტლით და თეთრი ტიკებით, უკვე ერთსაომაარ წრეწირში მოექცნენ ევროპელი და აზიელი გვირგვინოსნები. დადგა სწმინელი ზმალთაკვეთება დარიოსის „უკვდავ გვარდიელთა“ და ალექსანდრეს „ჰეტერთა“ შორის. დიდი შემართებით იბრძოდა დარიოსის ძმა ოქსათრა, რომელმაც თავისი მხედრობა სალტედ შეკრა დარიოსის გარშემო. უარესი გააფთრებით შეუტიეს მაკედონელებმა. დარიოსის წინ აღმართულნი ზედიზედ გულგანგმირულნი დაეცნენ მისი სატრაპნი და სარდალნი — არსამი, რეომითრი, ატიზიოსი და შაბაკა — სატრაპნი ეგვიპტისა. ალექსანდრეც დაიჭრა ბარძაყში. თითქოს არც შეუტყვია, — უმძაფრესად შეუტია დარიოსის გასწვრივ. სადაც იყო, ხმალს მიაწვდენდა კიდევ, მაგრამ უეცრად დარიოსმა ეტლი გაატრიალა და... გაიქცა! გაქცეულ მეფეს მისიანებიც გამოედევნენ. სრული შუაგული და მარცხენა ფრთა სპარსელებისა გარბოდა თავგზააბნევით და თავ-პირის მტვრევით. ალექსანდრეც, მემარჯვენე თანამებრძოლებით, გამოედევნა გაქცეულ მტერს.

მეგრამ წინ გაქრილ ალექსანდრეს და მის მარჯვენა ფლანგს დასაწყისშივე ჩამორჩა ფლანგა, რომელსაც მძლავრი ხმალოაკვეთებით შემოუტია სპარსთა მარჯვენა ფრთიდან დაქირავებულ ბერძენთა ლაშქარმა, თიმონდა მენტორიდის სარდლობით. შეიქნა დამლუბველი საფრთხე: უკეთუ დარიოსის ბერძნები ალექსანდრეს ბერძნებს და მკვედონელებს უკანვე, მდინარის მარცხენა მხარეს გაემოისვრიდნენ, წინ ვაქანებული ალექსანდრე სავსებით მოწყვეტილი და გზამოკრილი რჩებოდა თავისიანთაგან. ეს კი ნიშნავდა ალექსანდრესთან მოგებულ ბრძოლის წაგებას. ორივე მხარეს კარგად ესმოდა ბრძოლის ამ ნაწილში მოგება-წაგების მნიშვნელობა და ორივე მხარე იბრძოდა უკიდურესი თავგანწირვით და სიკვდილთან წილყრით. ალექსანდრეს რამდენიმე სარდალი დაეცა კიდევ სასძკვდილოდ განგმირული, მათ შორის — ერთ-ერთი ტაქსისის შეთაურე, პტოლემეაიოს სელევკიდი. ალექსანდრეს მარცხენა ფრთის მდგომარეობა იმანაც გაართულა, რომ სპარსთა უკიდურესი მარჯვენა ფლანგიდან საჭიფათო მანევრით წამოემართა ნაბარზანი სპარსული კავალერიით. მან გაჯმოლანა პინაროსი და თავს დაესხა თრაკიელებს, რომელთაგან ერთი ილა სავსებით აჩეხა და დანარჩენებიც დიღხანს ველარ შეაკავებდნენ მტრის გააფთარებულ მიწოლას, რომ ალექსანდრემ დროზე შენიშნა მის მარცხენა ფრთაზე ავად ჩამოწოლილი საფრთხე. და ამ ბრძოლაში, ალბათ, ეს იყო მისი სარდლური ნიჭის ყველაზე დიდი გამოვლინება. მან თავი ანება გაქცეული დარიოსის დევნას. სასწრაფოდ ფლანგას მიუშველა ორბანოვანი მანევრით — ერთი თვითონ, მარჯვნიდან, და მეორე ნაწილიც — მარცხნიდან. შედრკნენ და უკუიქცნენ ბერძენი მოჭირავნენი, ნაბარზანისა და მისი სპარსელი მხედრობის ყურსაც მიღწია საშინელმა ძახილმა — „მეფე გარბის!“ შედგნენ ზარდაცმულნი, უმაღვე აირივნენ, მოწყდნენ და გაიქცნენ. გამოედგნენ თესალიელი ცხენოსნები უწყალო ჩეხვით. სრულიად უქმად და უმაქნისად დარჩა რეზერვა სპარსელებისა. 60 000 მეომარს ერთი ზმალაც არ მოუქნევია, ისე აიშალა, აგორდა და გაიქცა. ახლა უკვე სპარსელთა გაქცევა იყო საყოველთაო — მეფიან-სარდლიან-საქუერის-მსახურეანად. ვინც დაბლობზე იარაღს ან გათელვა-გაქელვას გადაურჩა, მთასა და ხევხევს მიაშურა. კიდევ მეტი ჩაწყდა, ჩაისრისა და ჩაიხლწა სწორედ მთასა და ტყე-ღრეში. იღვა გამაყრუებელი ჰოქერული გრკვენვა, გმინვა, ბლავილი, კვნესა. წყევლა-კრულვა, ჰიხვინი, თქარუნნი, გამარჯვებულთა აღფრთოვანებული ყიყინა და ყივილი.

დახოცალ აზიელთა გვაგებით ავსებულყო და დახვრგილიყო ისოსის ველი, მისი მიმდგომი მთანი, ტყენი, ხენი და გზაწვრილი.

დახოცილ სპარსთა გროვანი აფერხებდა მდევარ ალექსანდრეს და აადვილებდა დევნილი დარიოსის სარბლას. მთებსა და ვიწრობებს რომ შიატანა, უკვე სამოძრაოდ უქმი ეტლიდან გადახტა, წამოსასხამო, მშვილდი და ფარი შორს მოისროლა და ასე ტანგამსუბუქებული მოახტა მარქაფ ჭაკს, „მზის ცხენს“, რომელსაც შინ ძუძუნანანატრი კვიცი ელოდა და მიტომაც უფრო სწრაფად უნდა გაჰქნებულყო.

დაბრუნდებამდე სდია ალექსანდრემ ლტოლვილ მეტოქეს. გამარჯვების დიდებულ „ფინალურ პრიზად“ ესურვებოდა მას ჰერობილი მეფე. მაგრამ ვერ დაეწია და, ძლევამოსილების ტროფეუმად, დარიოსის ეტლი, წამოსასხამი, მშვილდი და ფარი იკმარა ალექსანდრემ. ამ ნივთებით მობრუნდა იგი ისოსის ველზე, სადაც მის მეომრებს მტრის ბანაკი უკვე დაეალაფებინათ და ღამის სათევადაც დაესადგურებინათ. თუმცა კილიკიაში გამოლაშქრების წინ დარიოსმა თავისი „სამგზავრო განძი“ დამასკოში გაგზავნა შესანახავად, ალექსანდრეს ჯარისკაცებს მაინც დიდძალი სიმდიდრე დაეტაცებინათ და მოეხვეჭათ, მათ ფეხქვეშ ამოგებულ მტრის ბანაკში. მხოლოდ დარიოსის დიდებული და მდიდარი კარავი დაეტოვებინათ ხელუხლებლად, — ეხეც ალექსანდრეს წილად და ძღვნად.

ალექსანდრემ საჭურველი მოიხადა და აბანოსკენ გაემართა. ჯერ, ბრძოლაში გადენილი ოფლი დარიოსის აბანოში ჩამოვირეცხოთო, — მიმართა მან გამარჯვებით სახეგაბრწყინებულ თანასარდლებს. დარიოსის აბანო კი არა, ალექსანდრეს აბანო, — შესძახა რომელიღაცამ — ასეა, ვინათგან ყველაფერი დამარცხებულისა, გამარჯვებულს ეკუთვნის და სახელსაც გამარჯვებულისას უნდა ატარებდესო.

შევიდა სპარსულ ყაიდაზე დიდებულად გაწყობილ აბანანაში ალექსანდრე, განიბანა, განიწმინდა, სხეული ნელსაცხებლებით დაიხილა, მოიკაზმა, დამშვენდა და იქიდან დარიოსის კარავში შევიდა, აქ კიდევ მეტი სიმდიდრე და ბრწყინვალეობა ელოდა მაკედონიის „ფარღალალა სასახლეში“ ნაშობ უფლისწულს. გაოცება ვეღარ დაფარა ალექსანდრემ და შესძახა შემოჯარულ მეგობრებს: „აი, თურმე რას ნიშნავს მეფობა!“ 25.

სანიშანსვეტო გამოდგება ეს შეძახილიც ალექსანდრეს ცხოვრებაში. რალაც დიდი ცვლილება იღებდა სათავეს დიდი დამპყრობელის სულში. ეს უნდა ყოფილიყო მაცდური ჯადო აზიური დესპოტური

მბრძანებლობისა, წივთიერი ფუფუნებისა და ბრწყინვალებისა. დიდი ხანი არ გაივლის და მისი მეგობრები გაიხსენებენ მეფის ამ „უწყინარ“ წამოძახილს...

ის იყო მეფე ინახად ჯდებოდა, რომ ახალი მოულოდნელი ანბავი მოუბრუნინეს: ტყვეები მოვიყვანეთ და მათ შორის დარიოსის მთელი ოჯახი აღმოჩნდათ — დედა, ცოლი და შვილები. დარიოსის ეტლი, მშვილდი და წამოსასხამი რომ დაინახეს, ტირილი აუტყდათ, რადგან დარიოსი უკვე მკვდრად მიიჩნეოდა.

ალექსანდრე ძალზე აღელვა დარიოსის ოჯახის ბედმა. მაშინვე ლეონატოსი გაგზავნა, რათა ეცნობებინა ქალებისთვის — დარიოსი ცოცხალია და, სიკვდილისთვის კი არა, მხოლოდ ძალაუფლებისთვის ვებრძვიო მას; ნურც შეშინდებით, არავითარი საფრთხე არც თქვენ არ გელით, ნუ იჯავრებთ და ყველაფერი გექნებათ ისე, როგორც გქონდათ თქვენს დარიოსთანო.

დილით ადრე, თანამებრძოლებით გარშემორტყმული გავიდა ალექსანდრე ბრძოლის ველის სახილველად და მსხვერპლთა „დასაჯამებლად“.

სპარსეთის საომარ ძალთაგან ცხედრად ესვენა 90 000 ქვეითი და 10 000 ცხენოსანი მეომარი. ხოლო, ალექსანდრეს მხოლოდ 300 ქვეითი ჯარისკაცი და 150 მხედარი დაჰკარგვოდა<sup>26</sup>.

დაქრლები მოიხილა და გასინჯა ალექსანდრემ. მერე დახოცილები დაკრძალა, დიდი, მეომრული პატივით, სამგლოვიარო აღლუმად დამდგარი ჯარების თვალწინ. სამი საკურთხეველი პინაროსის პირად აღამართინა ალექსანდრემ დაღუპულ თანამებრძოლთა სახსოვრად<sup>27</sup>.

იმ დღესვე ჰეფესტიონი აიყოლია და დარიოსის ოჯახს ეწვია ალექსანდრე. სიკვდილს ელოდნენ ტყვეები, — როგორც საერთოდ ელოდა ყოველი ტყვე თვითონ სპარსეთში. მეფეს ფეხებში უნდა ჩავარდნოდნენ და ფერხთა მტკრის მთხვევით ეთხოვათ შეწყალება, — ესეც ასე სჩვეოდათ სპარსეთისა და ყოველი აღმოსავლელი დესპოტის კარზე. და როცა მეგობრები ტყვეებთან შევიდნენ, მაშინვე ქალები ფეხებში ჩაუტყვივდნენ... ჰეფესტიონს! დიახ, — რადგან ალექსანდრეზე უფრო ახოვანი და „მეფურად მოხდენილი“ ჰეფესტიონი ეგონათ მეფე. ჰეფესტიონმა მაშინვე აუხსნა, — მე კი არა, აი ეს გახლავთ მეფეო — აჩვენა ალექსანდრეზე. ახლა სულ გადაიწურეს სიცოცხლის დანარჩუნების იმედი ამ შეცდომისა და „შეცოდებისთვის“ ტყვეებმა. ახლა ალექსანდრეს წინაშე დაემხო ცრემლთა თხე-



ვით და პატიების ვედრებით დარიოსის დედა, სიზიგამბისი. მაგრამ უმაღლვე წამოაყენა ფეხზე ალექსანდრემ და სიცილით უთბრა: „არა უშავს, რადგან არაფერიც არ შეგშლია — ისიც ალექსანდრე გახლავთო“ — ჰუფესტიონზე ანიშნა. მას უკან დარიოსის ატირებულ ძესთან, ექვის წლის არტაქსერქსესთან მივიდა, აიყვანა, მიუალერსა და აკოცა (თუმცა ეს ბიჭიც, მამამისთან ერთად, აკი მისი მეტოქე იყო!). დიდი კრძალვით და თავაზით შეხვდა ალექსანდრე დარიოსის მეუღლეს, სტატირას. სპარსეთის დედოფალი სწორუპოვარი სიმშვენიერის ქალი იყო, მაგრამ ალექსანდრეს ამჯერად არ მიუბაძავს მისი სათაყვანო ჰომეროსის გმირებისათვის, რომლებიც დამარცხებულ მეტოქეებს უბოდნობდნენ და ურცხვად უგინებდნენ სარეცლებს. შემდგომში ხშირად იტყოდა ალექსანდრე: ვერაფერს ჩემ მეგობართაგან დარიოსის ცოლზე გახუმრებასაც ვერ გამიბედავდა და მისი ტანსაკეთიანობის შესახებ სიტყვასაც ვერ ჩამომიდგებდაო.

ასევე ვაჟკაცური კრძალულებით შეხვდა ალექსანდრე დარიოსის ასულებს — სტატირას და ბარსინას (ჯერ არაფერს იცოდა, რომ ერთი მათგანი მომავალში ალექსანდრეს ცოლად უნდა შეერთო).

თუმცაღა ალექსანდრე თვითონვე ამბობდა — მხოლოდ ორი რაიმე, ძილი და ქალის ტრფიალი მაგრძნობინებენ ადამიანურ უძწყობასო. იმ დღესაც სპარსელი დედოფლების უმშვენიერესი მსახური ქალები რომ იხილა, წამოსცდა: სპარსი ქალები კაცის თვალთა მტანჯველნი ყოფილანო. მაგრამ ეს იყო და ეს, — ამაზე შორს აღარ წასულა „თვალდატანჯული“ მეფის სატრფიალო სითამამე და თავშეუთქაველობა. მეფისთვის საკუთარი ვნებების დამორჩილება უფრო სასახელოა, ვიდრე მტერზე გამარჯვებაო, — ამბობდა ხოლმე ალექსანდრე <sup>28</sup>.

ერთხელ კიდევ დაამშვიდა და დაარწმუნა ალექსანდრემ დარიოსის ოჯახი. სიზიგამბისის და სტატირას ერთხელ კიდევ ამცნო, რომ თქვენ ტყვეები კი არა, წინანდებურად ისევ დედოფლები ბრძანდებითო და ისეთივე პატივში იცნოვრებთ, როგორც აქამდე გიცნოვრიათო; მსახურებიც იგივე და იმდენივე გეყოლებათ, რამდენიც აქამდე გყოლიათო. ნადავლიდანაც, რაც გენებოთ, ხელი დაადეთ და უკანვე დაიბრუნეთო; დახოცილ სპარსთაგან, ვინც გენებოთ, პატივით დაკრძალეთო.

სწორედ უწინამორბედო იყო საქციელი მაკედონიის ახალგაზრდა მეფისა. არც დიადი საბერძნეთის ზნეობრივი სამყარო იცნობდა ამ-

ნაირ „კაზუსს“: ალექსანდრე მაკედონელი, სულით და გულით თვითონ ბერძენი, საერთოდ სამეფო სახლობას უფრო მალა აყენებდა, ვიდრე, საერთოდ მტერ-მოყვრობას და, რაც მთავარია, „ელინობას“ და „ბარბაროსობას“.

ალექსანდრე მაკედონელის ეს უცნაური „კაზუსი“, შემდგომ, განვითარების კვალობაზე — თავის შედეგებს ჯამოიღებს.

სპარსთა არმიის ნაფლეთები, — ვინც კი ისოსის კატასტროფას გადაურჩა, — ზოგი კაპადოკიაში გადაიხვეწა, ზოგი ლიდიაში, სხვები ფრიგიაში, სხვებიც პაფლაგონიაში. ბერძენ მოქირავნეთაგან 8000 კაცი გადარჩა სიკვდილს. მათ, სრული საომარი ორგანიზებულობით, — როგორც სჩვეოდათ „ნამდვილ ელინებს“ — ისევ ამინტა ანტიოქიდის მეთაურობით, გაიარეს ამანის მთები, სირია, და ვააღწიეს ტრიპოლისს. აქ მათ ელოდათ ფლოტი, რომლითაც მანამდე ისინი მოსულიყვნენ აზიაში საომრად. ფლოტის ნაწილი დაწვეს და მხოლოდ გასაქცევად საჭირო ზომალდები დაინარჩუნეს; ჩასხდნენ და კიპროსზე გადავიდნენ. კიპროსიდან ამინტა ანტიოქეს ძემ პელუზიონში გადაიყვანა თანალტოლვილნი. აქედან იგი აპირებდა დაეჭირა ეგვიპტე, რომლის სატრაპი, შაბაკა, ისოსის ბრძოლაში დაიღუპა. მაგრამ შაბაკას ადგილი სპარსელ მაზაკეს დაეჭირა. მაინც არ მოეშვა ამინტა. მას შეეძლო ესარგებლა სპარსელებსადმი ეგვიპტელთა სიძულვილით და ბერძენ-ეგვიპტელთა სამასწლოვანი „ძმობა-სიყვარულით“. მართლაც, მემფისამდე მივიდა იგი ეგვიპტელთა მხარდაჭერით, და მემფისთან ვაანადგურეს კიდევ ბერძნებმა სპარსელნი. მაგრამ მაინც იმძლეურა მოქირავნის მძარცველმა ზულმა და მოედნენ ბერძნები ქვეყანას ძარცვით, რბევით და ოზრებით. აჭანყდნენ უკიდურესობამდე მისული ეგვიპტელები, სპარსელი სატრაპის მოწოდებაზე ჰაომრად შეიყარნენ, ბერძენთა ბანაკს შემოერთებენ და, მათ მთავარსარდალთან ერთად, სულ ერთიანად ამოჟლიტეს!

ისოსიდან გაქცეულმა დარიოსმა კი ჩრდილოეთ სირიამდე ირბინა უკანმოუხედავად. აქ, ქალაქ ონზში\*, გაბედა მცირე ხნით შეჩერება. აქვე თავისი განადგურებული არმიების ნაშთები შემოიყარა, რომელ-

\* ონზი დღემდე მიუკვლეველი ქალაქია.

თა შორის სერიოზულ ძალად ისევ 4000 ბერძენი მოქირავნე თუ ჩაიზ-  
ვლებოდა. შიშმა ონხშიც არ დააყენა დარიოსი და თაქსაკოსში გაიქცა,  
ევერათი გადაირბინა და მხოლოდ მაშინ იგრძნო თავი შეპყრობის  
საფრთხისგან თავდახსნილად. აქ ჩრდილო მესოპოტამიაში ჩაიკეტა  
და შეუდგა იმ კატასტროფის გააზრებას, რაც ამ ორ წელიწადში თავს  
დაატყდა მის სახელმწიფოს და მის ოჯახს.

ხოლო, სანამ სპარსთა მეფე გარბოდა და სადმე ხამუშ-ხამუშად  
მუხლმოკეცილი გონს იკრებდა, მანამ ალექსანდრემ სირია-კილიკიის  
შესაყარში, ზღვის პირას, დააარსა ახალი ქალაქი — ~~ალექსანდრია~~ კი-  
დე, მეორე ქალაქიც — ნიკოპოლისი — იქ დააფუძნა, სანამდეც მან  
ცნებდაცნებ სდია ისოსის ბრძოლიდან გაქცეულ დარიოსს. მაგრამ  
ალექსანდრე თითქოს აღარ ჩქარობდა დარიოსის დევნას აზიის სიღრ-  
მეში. მართებულიც იყო მისი გააზრება. ისოსის შემდეგ მას აზიის  
სიღრმისკენ კი არა, სამხრეთისკენ, ისევ ზღვის გასწვრივ გალაშქრება  
სჭირდებოდა. მხოლოდ სირია-ფინიკიის, პალესტინისა და ეგვიპტის  
დაპყრობას შეეძლო მიეცა მისთვის ცენტრალურ და აღმოსავლეთ  
აზიისკენ მიმავალი გზების კლიტენი. სირია-ფინიკია-პალესტინა-ეგვიპ-  
ტე უნდა გამთლიანებულიყო იონია-ეგვიდია-ბალკანეთთან და ასეთი  
„გამთლიანებით“ ალექსანდრეს უნდა აღემართა ისეთი მტკიცე და  
საიმედო ზურგი, ურომლისოდაც აზიის სიღრმეში შეჭრას, მისი აზრით,  
დიდი წარმატება არ ექნებოდა.

და აიღო კიდეც გეზი სამხრეთისკენ ალექსანდრემ. წინააღმართი პარ-  
მენიონი გაგზავნა სირიაში, მდინარე ორონტზე, ქალაქ დამასკოს და-  
საუფლებლად. პარმენიონის ჯარში უმეტესობა თესალიელები იყვნენ.  
h ალექსანდრემ უკერძა უერთგულეს თესალიელებს მდიდარი დამასკოს  
დაპყრობა. ისედაც, აკი დარიოსმა კილიკიაში გალაშქრებამდე მთელი  
ხაზინა და ძვირფასი ნივთები დამასკოში გახიზნა.

პარმენიონმა ჩრდილოეთი სირია ისე გაიარა, არავითარი წინააღ-  
მდეგობა არ შეხვედრია. სამხრეთ სირიაშიც (კელესირია) მივიდა და  
დამასკოსაც უსისხლოდ დაეუფლა. დიდძალი ოქრო-ვერცხლი, თვალ-  
მარვალიტი და ათასობით ტყვეები ჩაიგდეს ხელში პარმენიონმა და  
მისმა მეომრებმა. ქონებამ გაახელა და გაანადირა ისინი. ყველაფერს  
იტაცებდნენ; ტყვე ქალებს პატივს ხდიდნენ. პარმენიონი ატყობინებდა  
ალექსანდრეს — ტყვეთა შორის აღმოჩნდა დარიოსის 329 მემუსიკე-  
მომღერალიო, 46 გვირგვინის დამწვნილი, 277 მზარეული, 29 ხაბაზი,  
13 მერძვე, 17 მწდე, 70 ღვინის გამთბობი და 40 მენელსაცხებლეო.

ტყვეთა შორის აღმოჩნდნენ სპარტის, ათენისა და თებეს ელჩები, რომლებიც დარიოსს სწვევიან ისოსის ბრძოლის წინ.

პარმენიონის წერილი და ცნობები რომ მიიღო, ალექსანდრემ მას პასუხად ბრძანება გაუგზავნა — ტყვეებიც და ქონებაც მანდვე შეინახეთ, ბერძენი ელჩები კი ჩემთან გამოგზავნეთ. პარმენიონმაც აღასრულა მეფის ბრძანება. ტყვე ელჩებიდან ალექსანდრემ თებელები, თესალიკოსი და დიონისოდოროსი მაშინვე გაათავისუფლა. თესალიკოსი მამამისის, ისმენიოსის პატივისცემით გაუთავისუფლებია მეფეს. დიონისოდოროსი კი ოლიმპიადაზე გამარჯვებული გმირი ყოფილა და ასეთი კაცის დასჯის არც უფლება და არც სურვილი არ ჰქონია ალექსანდრეს. ათენელი ელჩის სახელი ფოკიონი იყო — სახელოვანი სარდლას, ფოკიონის შვილი. აქაც ალექსანდრემ შვილს მამის ხათრით აპატია, თუმცა სამუდამოდ თავისთან დაიტოვა. სპარტელი ელჩი, ევთიკლე, ერთხანს მძევლად იყოლია მეფემ, მერე ისიც გაუშვა სამშობლოში.

პარმენიონისგან დაჭერილი კელესირიის მმართველად დანიშნა მენონ კერდიმეს ძე, ხოლო პარმენიონი ისევ თავისთან გაიწვია ჯერ კიდევ კილიკიაში მყოფმა მეფემ.

კილიკიის მმართველად ალექსანდრემ დანიშნა თავის პირად მცველთაგან — ბალაკროსი. ამის შემდეგ იგი დაეშვა სამხრეთით, ფინიკიონკენ.

გზად მიმავალ მეფეს სპარსელი ელჩები წამოეწივნენ და დარიოსის წერილი მიართვეს.

ხოლო, დარიოსის წერილი ალექსანდრესადმი ასეთი შინაარსისა იყო: მამაშენი ფილიპე სპარსეთის მეფე არტაქსერქსესთან მეგობრულ ურთიერთობასა და კავშირში იყო, მაგრამ მისი სიკვდილისთანავე, მაკედონიის მხრივ სპარსეთისადმი ყოვლად უმიზეზოდ დაიწყო მტრობა; მასუკან, სპარსეთის ტახტზე ახალი ცვლილების კვალობაზე, შენ — ალექსანდრემ, მე — მეფე დარიოსს, არც ელჩები გამომიგზავნე და საერთოდ არც შეეცადე, აღგედგინა ჩვენთან ძველი მეგობრობა და კავშირი; ის კი არა და, აზიაში ჯარებით შემოიჭერ და სპარსელებს ბევრი მძიმე უბედურება შეპყარე; ამიტომ მე, სპარსეთის მეფემ, შემოვიყარე ჩემი ხალხები და წამოვედი შენს წინააღმდეგ; მაგრამ რაკი ბრძოლაში გამარჯვება ბედმა შენ მოგანიჭა, მე — მეფე, მოვიტხოვ შენგან — მეფისგან, დამიბრუნო ცოლი, დედა და შვილები, რომლებიც ტყვედ არიან შენთან; სამაგიეროდ გთავაზობ მეგობრობასა და

კავშირს; ამასთან — ამ წერილის მომტანებს, მენისკეს და არსიმას, გამოაყოლე შენი ელჩები, რათა გავცვალოთ ერთმანეთში აუცილებელი ვალდებულებანი.

როგორც ვხედავთ, წერილი საკმაოდ ქედმაღლური იყო. ყოველ შემთხვევაში, იგი არ ჰგავდა დამარცხებულისგან გამარჯვებულისადმი მიწერილ წერილს.

ალექსანდრეს პასუხი კი ასეთი იყო: სწორედ თქვენი წინაპრები მოვიდნენ პირველად, ყოვლად უშიშეზოდ, მაკედონიასა და საბერძნეთში და მოგვაყენეს ჩვენ ნაირნაირი უბედურებანი; ხოლო მე, — ამირჩიეს რა მთავარსარდლად და სპარსთაგან მოყენებულ ვნებათათვის შურის საძიებლად — აზიაში გადმოველი მხოლოდ მას შემდგომ, რაც თქვენ თვითონ მოგვეცით საბაბი ოქის დაწყებისა; აკი თქვენ ეხმარებოდით მამაჩემის შეურაცხმყოფელ პერინთელებს და არტაქსერქსე ოხოსმა ჯარიც გამოგზავნა თრაკიაში, რომელიც ჩვენი საკუთრება იყო; მამაჩემის მკვლელებიც — როგორც თქვენვე იკონებთ ხოლმე თქვენივე წერილებში — ხომ თქვენგან იყვნენ მოგზავნილნი? მერე, ბავოასთან იღუმალ შეთანხმებით, აკი შენ მოკვალ მეფე არსესი და ასეთი უკანონო გზით მიითვისე სპარსეთის ტახტი და ამრიგად გასთელე შენ თქვენივე სპარსული წმიდათაწმიდა სამართალი; რაც შემეხება მე, აკი შენ აგზავნიდი მტრულ წერილებს ბერძნებთან, რათა აგეჯანყებინა ისინი ჩემ საწინააღმდეგო ომში; შენ უგზავნიდი ფულს სპარტელებსა და სხვა ბერძნებს ჩემს წინააღმდეგ, თუმცა არც ერთ ბერძენს არ აუღია ის ფული, თვინიერ სპარსელებისა; ბოლოს, შენ შენის მსტოვრებით ცდილობდი გზიდან გადაგეცდინა ჩემი მეგობრები და დაგეარღვია მშვიდობიანობა, რომელიც მე მივეც საბერძნეთს; ამ მიზეზთა გამო მე წამოვემართე საომრად, ისიც მას შემდეგ, რაც შენ სამტროდ ამოქმედდი ჩემს წინააღმდეგ. სამართლიან ბრძოლაში მე დავამარცხე ჯერ შენი სარდლები და სატრაპები, მერე შენც, შენი ჯარებიც და, უკვდავ ღმერთთა წყალობით, მე შევიქენი მბრძანებელი იმა ქვეყნისა, რომელსაც შენ ისევ შენსას ეძახი. ისინი, ვინც შენს გვერდით იბრძოდნენ და ჩემს მხარეზე გადმოვიდნენ, ახლა ჩემი დაცვის ქვეშ არიან და მე მათზე ვზრუნავ; ძალით მე არავის ვიჭერ — პირ-ქით, ყველანი ხალისით და ნებითა თვისითა მოდიან ჩემი მეთურობის ქვეშ. ვინაიდან და რადგანაც მე გახლავართ მბრძანებელი და ბატონ-პატრონი აზიისა, შენც მოდი ჩემთან; ხოლო, უკეთუ გაქვს საფუძველი რაიმე შიშისა, მაშინ ჯერ გამოგზავნე რომელიმე დიდკაც-

თავანი, რომელიც მიიღებს შენთვის საჭირო თავებობას. თუკი მოხვალ, შენ აქ შეხვდები ჩემს კეთილგანწყობილებას ყოველი თხოვნისადმი, რაიც კი შეეხება ოჯახს და შენს სურვილებს. ყველაფერს მიიღებ, რასაც კი ჩემგან მოითხოვ. ყოველ შემთხვევაში, თუკი შენ ჩემთან წერილს ისევ გამოგზავნი, შენ იგი უნდა გამოგზავნო ვითარცა აზიის შეფესთან და არა ისე ვითარცა სწორმა სწორთან: შენ ნება გქმლევა შენი სურვილები მხოლოდ ისეთი მორჩილებით შემატყობინო, როგორც ბატონს ყველაფრისას, რასაც შენ აქამდე ფლობდი: წინააღმდეგ შემთხვევაში მე შენ მოგექცევი როგორც ჩემი მეფური დიდების შეურაცხყოფელს. უკეთუ შენ სხვა მოსაზრება გაქვს ძალაუფლების მკურთხელობისა, მაშინ მისი დაუფლების გადასაჭრელად დამიცადე და შემხვიდი სადმე გაშლილ ველზე ბრძოლაში, და ნუ გარბიხარ; სულ ერთია, მაინც მოგძებნი და მოგწვდები, სადაც არ უნდა გაიქცე და დაიმალო შენ“ 2.

ეს არ იყო მხოლოდ წერილი მეტოქისა მეტოქისადმი, არამედ ეს იყო ფართო მოცულობისა და მიზანდასახულობის პოლიტიკური „მანიფესტი“, თუ „მემორანდუმი“, რომელიც მიმართული იყო ჯერ სპარსელებსა და ბერძნებისადმი, მერე, უფრო ფართოდ — აზიისა და ევროპისადმი, ანუ „სრულიად მსოფლიოსადმი“, რომლის „სრულიად დაპყრობას“ თავგამოდებით მიესწრაფოდა ამ „საპროგრამო მანიფესტის“ თავზეხელაღებული ავტორი.

ამ წერილით ალექსანდრე აფრთხილებდა აზიელებს — დადგადრო ჩემი უმაღლესი მეუფება სცნოთო, თორემ... და იმავე დროს აფრთხილებდა ბერძნებსაც — ვიცი თქვენს გულშიც რა შხამი ტრიალებს, მაგრამ მე — თქვენგანვე არჩეულმა მთავარსარდალმა და მტერთა თქვენთა სისხლის მაქცევარმა — მშვიდობა და ბედნიერება რომ გაჩუქეთ, იმას მოუარეთ და შეინახეთ, თორემ...

ალექსანდრეს უკვე ხელთ უნდა ჰქონოდა ცნობები, რა თავდაუქპერელი აღტყინებით ელოდა საბერძნეთი დარბოსისა და ალექსანდრეს დატაკებას ისოსის ბრძოლის წინ. დემოსთენე ათენელი ყოველ შემხვედრს გაცხოველებით უმტკიცებდა, რომ ალექსანდრეს აუცილებლად გასარესს სპარსული მხედრობაო. მაგრამ როგორც კი ისოსის ბრძოლისა და ალექსანდრეს გმირობის ამბავი სივრცეში მეხვიით გავარდა, საბერძნეთს პატრიოტულმა ქრეოლამ მამინვე გაუარა, და მომავალი გაზაფხულის ისთმიაზე (კორინთოს ყელზე, ისთმოსის სა-

ყოველთაო ბერძნული დღესასწაული) შეკრებილმა ბერძნებმა დაადგინეს — თხუთმეტკაციანი ელჩობა და ოქროს გვირგვინი გაეგზავნათ ალექსანდრესთვის, ვინათგან მან ასე ბრწყინვალედ გაიმარჯვა „საბერძნეთის სიკეთისა და თავისუფლებისათვის ბრძოლაში“<sup>3</sup>.

ალექსანდრე კი ფინიკიის დაპყრობას შესდგომოდა. პირველი ჩრდილო-ფინიკიური ქალაქი იყო არადი, დასახლებული მცირე კუნძულზე, რომელსაც კონტინენტზედაც ჰქონდა თავისი სამფლობელო. არადის მმართველმა ალექსანდრეს გამოჩენისთანავე ოქროს გვირგვინი მიართვა და თავისი სამფლობელოც სრულ მორჩილებაში მიუთვალა. არადს მიჰყვა მარათი, მარათს — ბიბლოსი, ბიბლოსს — სიდონი.

სიდონის მმართველი, სტრატონი, დანარჩენ ფინიკიურ მმართველთა მსგავსად, თავის თავს „მეფეს“ უწოდებდა და სპარსეთის მეფეს ემორჩილებოდა. სტრატონმა ალექსანდრესთან საოქრად თავი უძღურად იგრძნო და თავისი ქალაქი, არადისა და ბიბლოსის „მეფეთა“ მიბაძვით, თვითონაც უბრძოლველად ჩააბარა. მაგრამ სტრატონს დათმობამ არ უშველა, რადგან სიდონელებმა იგი უარყვეს და ალექსანდრეს ხელისუფლად სხვა კაცი თხოვეს. ალექსანდრემ სიდონის მმართველს შესარჩევად ჰეფესტიონი გაგზავნა, ვინათგან ჰეფესტიონს სიდონი ადრევეც კარგად სცოდნოდა და იქ ბევრი ნაცნობ-მეგობარიც ჰყოლოდა. მივიდა ჰეფესტიონი და ქალაქის მეფედ „აარჩია“ ისეთი კაცი, რომელსაც მეფობის მოპოვებაზე უფრო დიდ ვაჟკაცობად მეფობაზე უარის თქმა მიაჩნდა! ასეთი კაცი ყოფილა ვინმე აბდალონიმე, წარმომავლობით დიხაც მეფური გვარეულობისა, მაგრამ ხასიათით ისეთი ადამიანი, რომელსაც თურმე მეფის ამაო, ცრუ და ფარისევლურ ცხოვრებას მებაღის წრფელი, სმშვიდი და კრძალული ცხოვრება ერჩია. ჰეფესტიონის ბრძანებით, აბდალონიმეს თითქმის ძალით გახადეს მებაღის ფლასები და ძალით წამოასხნეს მხრებზე მეფის წამოსასხამი. ალექსანდრემ მოისურვა ნახვა ამ უცნაური კაცი-შვილისა, რომელმაც, ალბათ, მას დიოგენესთან შეხვედრა გაახსენა. და როცა აბდალონიმე მოიყვანეს, მეფემ ერთხანს უყურა დაკვირვებით და გაკვირვებით, მერე კი უთხრა: „შენი გარეგნული იერი შენსავე კეთილშობილურ წარმომავლობას არ ეწინააღმდეგება, მაგრამ მ-ნ-და ვიცოდე, მართლა გულწრფელად ითმენდი სიღარიბეს?“

„არასოდეს ჩემი სურვილები ჩემი ზელების მონაპოვართა იქით არ მიდიოდა, მაშასადამე — რაც არ მქონია, არც დაქვისაქიროებია. ამი-



ტომ ღმერთს ვთხოვ, მეფობაც ისე დამათმენინოს, როგორც ვითმენ-  
დი მე სიღარიბეს!“ — უპასუხნია აბდალონიმეს\*.

ალექსანდრე კმაყოფილი დაშორდა აბდალონიმეს — კაცს, რომ-  
ლის სიღარიბის მიზეზი ყოფილა პატიოსნება. ალექსანდრესთვის კი  
ახლა მთავარი ის იყო, რომ სამივე დიდ ფინიკიურ ქალაქში — არად-  
ში, ბიბლოსში და სიდონში — „თავისი კაცები“ ჰყავდა „მეფეებად“.   
ყველა ეს ქალაქი, ძველთაძველნი და ძველთაგანვე მაღალკულტურულ-  
ნი (მარტო ფინიკიური ანბანის გაჩენებაც კმარა!), სპარსული ორას-  
წლოვანი უღლისგან დათრგუნვილნი — მაკედონიის მეფეს შეხვდნენ,  
ვითარცა „გამათავისუფლებელს“.

სიდონის ჩაბარებისას, ალექსანდრეს ეახლნენ კიპროსელი ელ-  
ჩები, რომელთაც კიპროსის ცხრა ქალაქის მორჩილება და „ძმობა-  
ერთობა“ მიაართვეს მეფეს.

ამის შემდგომ ალექსანდრე მიაღდა სამხრეთი ფინიკიის უდიდეს  
ქალაქს — ტიროსს.)

ტიროსსაც თავისი „მეფე“ ჰყავდა, სპარსეთის უღელში შეუღლუ-  
ლი, სახელად ადსემილეკი, რომელმაც კარს მომდგარ ალექსანდრეს  
წარჩინებულთა ელჩობა შემოაგება, თავისი ძის მეთაურობით. სურ-  
სათი მოართვეს მაკედონიის მეფეს და თან ჰკითხეს — კიდევ რას  
ინებებდა ეგზომ „ღიადი ჰტუმარი“ ეგზომ „მოკრძალებული მასპინძ-  
ლებისგან“. ალექსანდრემ მადლი მიუძღვნა ასეთი „თავაზიანი შეხვედ-  
რისათვის“ \*\*, შეაქო მათი ქალაქი და თქვა — მოვედი იმიტომ, რომ  
შევიდე თქვენს ტაძარში და მსხვერპლი შევწირო ტიროსის ჰერაკლე-  
სო (იკულისხმებოდა ფინიკიელთა უმაღლესი ღვთაება — მელკარტი).

ვითომ მოკრძალებული თხოვნა უნდა ყოფილიყო; მოკრძალებუ-  
ლი კი არა, უაღრესად საპატიოც თვით ფინიკიელებისათვის, რაკი

\* კურციუსის ეს მონათხრობი (IV, I, 16—26) ძალიან ჰგავს ძვ. წ. IV საუკუ-  
ნის რომელი მოღვაწის, ლუციუს კინციუს ცინცინატის თავგადასავალს. ტიტე  
ლივიუსის გადმოცემით, ცინცინატი, უბრალო მიწის მუშა-აგრიკოლა რომაელებს  
სახელმწიფოს ერთპიროვნულ გამგებლად — დიქტატორად უნდა აერჩიათ, მაგრამ  
ცინცინატს დიქტატორობას გლეხობა და მიწის თონხა ერჩივნა. რომაელებმა მიი-  
ღის ვაი-ვაგლახით, როგორც იქნა დაითანხმეს და დანიშნეს დიქტატორად ცინ-  
ცინატი, რომელმაც მტრის განადგურებისთანავე ისევ მოიხსნა სახელმწიფოს უმაღ-  
ლესი ხელისუფლების რწმუნებანი და ისევ თავის საყვარელ აგრიკოლობას დაუბ-  
რუნდა.

\*\* ძველ მსოფლიოში განთქმული იყო „ფინიკიური თავაზიანობა და ერთგულებ-  
ა“, რაკი პირიქით — ფლიდობასა და ვერაგობას გულისხმობდა.

ევზომ „დიადი სტუმარი“ ქალაქის სალოცავ ტაძარში ლოცვას ითხოვდა. მაგრამ ასეთი „უწყინარი“ და „საპატიო“ ფანდის გახსნა არ გაუქრდებოდათ ფინიკიელებს — ფანდისა და ხრიკის „კლასიკოსებს“.

ქალაქი ტიროსი და მისი მთავარი ტაძარი კუნძულზე იდგა, კუნძული კი მტრისთვის მიუდგომელი ციხესიმაგრე იყო. ალექსანდრეს თხოვნა — ლოცვისა და ზორებისთვის შემიშვითო და ამ თხოვნის შესრულება — ქალაქში საერთოდ უცხო ძალის დაშვებასა და მისი უმაღლესი მბრძანებლობის აღიარებას ნიშნავდა. ამიტომ ტიროსელმა ელჩებმა, ისევე „დიდი თავაზიანობით“, ალექსანდრეს ასეთი პასუხი მიუცეს: ჩვენ დიდად დავალებულნი და ბედნიერნი დავრჩებით, თუ თქვენს განზრახვას შეასრულებთ არა კუნძულზე, არამედ აქვე, ხმელეთზე. ძველ ტიროსში, სადაც გვაქვს აგრეთვე სალოცავ-საზოროველი ჩვენი ღმერთისაო, და თანვე დასძინეს: კუნძულზე, ანუ მთავარ ქალაქში ჩვენ სპარსელებსაც არ ვუშვებთო. ნათლად იყო ნათქვამი: ქალაქი ტიროსის კარი ყველა უცხოელისთვის დაკეტილიაო, ანუ — არც სპარსელს და არც მაკედონელს, არც ერთს არ ვუშვებთ, და მათ შორის ატეხილ ომშიც არც ერთს არ მივემხრობითო.

ალექსანდრემ მოლაპარაკება მაშინვე შეწყვიტა და საომრად გაემზადა.

ტიროსის მთავარი ხმელეთიდან ჰყოფდა ათასნაბიჯიანი სრუტე, ალექსანდრემ გადაწყვიტა შიწით ამოეცო ეს წყალგამყოფი, რომელიც ასე ათამამებდა ტიროსელებს — „ყველაზე ვერაგ ფინიკიელებს“. ამიტომ მეფემ ხმელეთზე ძველი ტიროსი დაანგრია და მისი მასალით და მახლობელი ლიბანის ხე-ტყით შეუდგა სრუტის ამოვსებას და დაშობის აკვებას. პირველი გაბიონი საკუთარი ხელით აავსო და ჩაუშვა ზღვაში ალექსანდრემ<sup>4</sup>. მაკედონელები აღტაცებული ყიყინით და ენთუზიაზმით მიჰყვნენ „დემოკრატ მეფეს“ (ჯერ ისევე „დემოკრატს!“).

თვითონ ტიროსი, კუნძულზე, ყოველის მხრიდან მძლავრი ციხე-გალავნებით იყო შემოვლებული და შემოშტკიცებული. მაგრამ სრუტე და კონტინენტიდან სხეულებრივი განკვეთილობა მაინც ყველაზე დიდ სიმაგრედ იყო მიჩნეული მტრის შემოტევის უვნებელსაყოფად. ამიტომ ტიროსელები ჯერ განცვიფრებითა და ჭიცილის ფრქვევით უცქერდნენ მაკედონელთა ამ უცნაურ „წყლის ნაყვას“. მაგრამ როცა ზღვაში ნაყარი მიწა ზღვას ზედაპირზე მართლა მიწაყრილად ამოიძარცა და კუნძულისაკენ თანდათან გაიწვართა, მაშინ კი იკადრეს ხე-

ლის გამოღება ტიროსელებმა. აღმოსავლეთ მხარეზე, — საიდანაც პირდაპირი დამიზნებით დამბა „მოცურავდა“, ქალაქის კედლები საგანგებოდ გაამაგრეს, ისრის, სათხედისა და ქვის სასროლი მანქანები გამართეს, წყალში შიშვლად მომუშავე მაკედონელებს „ცეცხლი“ გაუხსნეს და ზღვაზეც სწრაფმარბიელი ტირიემები გაუსიეს.

ალექსანდრემ უკვე კუნძულთან მიახლოებით მაინც მოახერხა სახელდახელო, საბნებითა და ტყავებით შეკრული ორი კოშკის აღმართვა, რომელთა წყალობით იგი ცდილობდა, დამბაზე მომუშავე ზალხი დაეცვა ქალაქიდან მომდინარე „ცეცხლისა“ და ზღვაზე მოთარეშე ხომალდებისგან.

დამბა შიძიმედ, მაგრამ მტკიცედ და ჭიუტად, მიიწევდა ტიროსისაკენ. მაშინ ტიროსელებმა ახალ, „ფეთქებად „სტრატეგემატას“ მიმართეს. დიდი სატვირთო გემი სწრაფ-აგზნებადი მასალებით — ხმელი ფიჩხით, კვართ, გაფისული მორებით და ფისით სავსე ქვაბებით — დატვირთეს და ბუქსირით რამდენიმე ტირიემას\* გამოუბეს. როგორც კი ზღვაზე ქარი ამოვარდა, გემი — ბრანდერი მაკედონელთა დაჰმბისაკენ გაუშვეს და მის ბოლოზე მომუშავე მაკედონელებს მიაყენეს. მისვლისთანავე, გემზე საგანგებოდ მყოფმა ტიროსელებმა გემს ცეცხლი უფეთქეს და თვითონ უმაღლე ზღვაში ივადეშვნენ. ტირიემებმა ცეცხლწაკიდებულნი თავიანთ გემბანებზე აიყვანეს და აფეთქებულ გემს გზა მისცეს. ცეცხლი ერთბაშად მოედო მაკედონელთა ტყავის კოშკებსაც და დამბაზე მომუშავე ბანაკსაც. ხანძრის ჩაქრობა შეუძლებელი შეიქნა, ძლიერი ქარისა და ტირიემებიდან გახშირებული ისრის სროლის წყალობით. დამბის დაუმთავრებელი ნაწილი ცეცხლმა სრულიად შთანთქა და მისი ნამუსრევნი, დაღუპულ მაკედონელებთან ერთად, ზღვის მღვლეარე ტალღებმა გაიტაცეს.

ეს უკვე მარცხი იყო და იმდენად სერიოზულ მარცხადაც მიიჩნიეს, რომ ბევრმა მაშინვე ურჩია ალექსანდრეს, ხელი აეღო აქამდე შეუძლებელსა და განუხორციელებელის განხორციელებაზე — მიწით ზღვის ამოვსებაზე — და მიედო ტიროსის შემოთავაზება ნეიტრალიტეტზე, შეეკრა მასთან ხელშეკრულება და დაძრულიყო ეგვიპტისაკენ.

მაგრამ ასეთი უკანდახევა არ ესადაგებოდა არც ალექსანდრეს პირად ხასიათს, არც მის საერთო საპოლიტიკო განზრახულობას. აქამდე დაუმარცხებლად მომავალ ხელმწიფეს არ შეეძლო რომელიღაც

\* სამბაქნიანი მსუბუქი ხომალდი.

ერთი ფინიკიურ-ვაჭრული ქალაქის „თავხედობა“ დაუსჯელი დაეტო-  
ვებინა და მისგან „დამარცხებულის“ ტიტულით წასულიყო. „ტირო-  
სის კახუსს“ უდიდესი მორალური მნიშვნელობა ენიჭებოდა და მისი  
ღაღადობა ბევრ რაიმეს ფრიად საეჭვოდ ხდიდა ალექსანდრეს მიღ-  
წევათა ორივე კრილში — წარსულშიც და სამომავლოშიც. ამიტომ,  
რადაც უნდა დასჯდომოდა, ტიროსის მიმართ (ისევე როგორც ყოველ-  
თვის და ყოველის მიმართ), თავისი უნდა გაეტანა საისტორიო ბედის  
ნებიერს.

ყველაზე უფრო, რაღა თქმა უნდა, ალექსანდრეს მტრებს აღუდ-  
გენდა ჩანავლებულ იმედებს მისი ამ მოულოდნელი წარუმატებლო-  
ბის ამბავი. დარიოსსაც ალბათ ეს უფიქრია — ახლა დადგა დრო, და-  
მარცხებულ და დამცირებულ მეტოქეს რაიმე დავათმობინოო და სას-  
წრაფოდ ახალი წერილი უფრენია ალექსანდრესთან<sup>5</sup>.

ამ წერილით დარიოსი ოჯახის გამოსასყიდად ალექსანდრეს სთა-  
ვაზობდა 10000 ტალანტს; ამას გარდა, სთავაზობდა ქვეყნებს ევფრა-  
ტისა და ჰალისის დასავლეთით, კიდევ — აძლევდა ცოლად თავის  
ერთ-ერთ ასულს და ამგვარად შერიგებულებს და დამოყვრებულებს  
უნდა შეეკრათ ზავი, კავშირი და მეგობრობა უკუხინთი უკუხინამდე.

ალექსანდრემ თათბირი შეჰყარა, დარიოსის წერილი წაიკითხა და  
პრველად, როგორც ყოველთვის; აზრის გამოთქმა პარმენიონს მი-  
ანდო.

— მე რომ ალექსანდრე ვიყო, დარიოსის ამ პირობებს მივიღებ-  
დიო, — დაბეჯითებით სიტყვა პარმენიონმა.

— მეც მივიღებდი, ვფიცავ მზეს, მაგრამ პარმენიონი რომ ვი-  
ყო, — ფიცხლავ შეანარცხა ალექსანდრემ.

და რადგანაც იგი არ იყო არც პარმენიონი და არც სხვა რომელი-  
მე მისი რჩეული თანამებრძოლი, არამედ მაინცადამაინც იყო „ერ-  
თადერთი ალექსანდრე“ ამ ცისქვეშეთში — ასეთი წერილით უპასუხა  
დარიოსს:

— მე არ ვსაჭიროებ შენს ფულს და არც ის მინდა, მთლიანი  
ქვეყნისგან რომ მხოლოდ ნაწილი ვიკმარო: ქვეყნებიც, ადამიანებიც,  
ოქროც და ქონებაც, — რომელიც შენ გაქვს — ყველაფერი მეკუთვნის  
მე. ამიტომ თუ მე მომესურვება ცოლად შევიერთო შენი ასული, ამას  
შენი მოწყალების გარეშეც შევძლებ; ამიტომ შენ პირადად უნდა  
მეახლო მე, უკეთუ გსურს მართლა რაიმე წყალობის ღირსი შეიქნე;  
გახსოვდეს — ქვეყანაზე არ არსებობს ორი მზე და არც ორი მეფის

არსებობა არ შეიძლება; ისე ვითარცა ცაში არის მხოლოდ ერთი მზე, ასე მიწაზეც უნდა იყოს მხოლოდ ერთი მეფე, და ის ერთი და ერთადერთი მე გახლავარ...

ასე მისწერა და მაშინვე გაუცრუვა იმედი სპარსეთის მეფესაც და ყოველ მის თანამოსაგრესაც, — ვინათგან მას, ვითარცა „უძლეველს“, იმ ვაჭრუქანა ტიროსელთაგან აბა რა ვნება უნდა მისდგომოდა! და მისდგა ხელახლა, გაასკეცებული ენერგიით „ზღვის ამოვსებას“. ტიროსელებმა ახალი „ფეთქებადი გემის“ გამოშვება ველარ გაიმეორეს. მაკედონელებმა ახალი კოშკები და მანქანები გამართეს, ერთდროულად — დამბის მშენებლობის დასაწყისისათვის და თვითონ ქალაქის კედლების საიერიშოდ. ალექსანდრე სიდონში პირადად ჩავიდა ფლოტის შესაყრელად. სულ მალე სიდონში თავი მოიყარა არადის, ბიბლოსის, თვითონ სიდონის, კიპროსის, როდოსის, ლუკიისა და კილაკიის ხომალდებმა. სულ ორასზე მეტმა სამხედრო ხომალდმა მოიყარა თავი ალექსანდრეს ხელქვეით. |

აქვე, სიდონში, — სანამ გემები გროვდებოდნენ — ალექსანდრემ ახალი ძლიერი შეესება მიიღო — 4000 ბერძენი მოჭირავენ, კლევანდროსის სტრატეგოსობით.

ასე გამძლავრებული და საომრად გაწყობილი გამოემართა მაკედონიის მეფე სიდონიიდან ტიროსისაკენ. მარცხენა ფლანგზე კრატეროსი ეყენა, მარჯვენას თვითონ მოუძღოდა.

ტიროსს ორი ნავსადგური ჰქონდა — ჩრდილოეთით „სიდონისა“, სამხრეთით „ეგვიპტისა“. ალექსანდრეს დამბა-მიწაყრილი შუაში იყო ჩაჭრილი ამ ორ ნავსაყუდელს შორის.

ტიროსელებმა ჯერ არ იცოდნენ, რომ დანარჩენი ფინიკიური ქალაქებისა და კიპროსის ფლოტი უკვე ალექსანდრეს უმორჩილებოდა და ზღვაზე გამოსვლას ეპირებოდნენ. მაგრამ ახლა, როცა ზღვაზე საომრად გამწკრივებული სამჯერ უმრავლესი მტრის ხომალდები დაინახეს, მიხვდნენ რომ საკუთარი ძალებით არამცთუ ზღვაზე გაშლილ ბრძოლას, არამედ ქალაქის ორივე ნავსადგურის დაცვასაც ვერ გაუძლებდნენ. ამიტომ ტიროსული ხომალდები მთლიანად ჩრდილოეთით, „სიდონის ნავსადგურის“ ვიწრო ყელში ჩაირაზმნენ, როსტრებით (ცხვირებით) წინგაშვერილნი. დაეძგრა კიდევ ალექსანდრე ტიროსელთა დაცვას, ვერ გაარღვია და მხოლოდ წინ წამოწეული სამი გემი შეუწვრია და ჩაუძირა ტიროსელთა სახომალდო ჯებირს.

ამის შემდეგ ალექსანდრემ თავისი ფლოტი გაჰყო ორ ნაწილად. კიპროსული ხომალდები, ანდრომახოსის სარდლობით, „სიდონის

ნავსადგურის“ საღარაჯოდ დააყენა, დამბისა და კუნძულის შესა-  
ყარში, ხოლო, მეორე ნაწილმა, ფინიკიურ ქალაქთა ფლოტმა, კუნ-  
ძულს შემოუარა და „ეგვიპტის ნავსადგურს“ მიადგა. ნავსადგურთა  
ჩაკეტვისთანავე ალექსანდრემ ბრძანება გასცა, დაეწყოთ საიერიშო  
კოშკების, სააბორდაჟო ხიდების, სასროლი და სანგრევი მანქანების  
მიტანა ქალაქის კედლებზე, მთელი კუნძულის გარშემო. მაგრამ ძალ-  
ზე ძნელი კი აღმოჩნდა აღსრულება ამ ბრძანებისა. დამბის პირის-  
პირ გამორჩეული სიმძლავრის დაცვა აღემართათ ტიროსელებს, ხო-  
ლო საიერიშო მანქანებით დატვირთულ გემებს ნაპირთან მიახლოება  
უჭირდათ, რადგან ტიროსელებს ხმელეთთან მისასვლელები ქვის  
ლოდებით ამოეხერგათ. მაკედონელებმა სცადეს კიდევ იმ ლოდების  
ამოღება, მაგრამ ეს შეუძლებელი შეიქნა. ისევ დამბის ორივე მხრი-  
დან მიიწევდნენ და აღწევდნენ კუნძულის ნაპირებამდე ალექსანდრეს  
გემები, მაგრამ აქ ისრის, სათხედის, ქვისა და მდულარე ფისის სრო-  
ლითა და ნთხევით ეგებებოდნენ შტერს ტიროსელები. რეიდზე მდგარ  
ხომალდებს ტიროსელი მყუინთავეები ბაგირებს უჭირდნენ და ლუზა-  
აწყვეტილებს ქარი და ზღვა თავის ნებაზე მიაქანებდა, ალექსანდრემ  
თოკები ჩაკვებით შეცვალა. დამბის ორივე მხარეს, და კიდევ რამდენ-  
იმე ადგილას, მაკედონელებმა ლოდები უმძიმესი ჯაფით ამოჰყარეს  
და საიერიშო მანქანებით დატვირთული გემები ქალაქის კედლებს  
მჭიდროდ მიაბჯინეს. სასტიკი ბრძოლები გაჩაღდა მოიერიშეთა და  
ნაიერიშეთა შორის. მოწინააღმდეგენი იბრძოდნენ სუკიდურესი ურ-  
თიერთმძულვარებით და დაუნდობლობით. ტიროსელები ტყვედ-  
მოხელთებულ მაკედონელებს კედლებზე დედოშობილად გატიტვლე-  
ბულებს ჰკიდებდნენ, აწამებდნენ, ყელებს სჭირდნენ და ზღვაში ის-  
როდნენ. ამით ისინი უკანდასახევ ხიდებს წვეავდნენ და თანამემამუ-  
ლებსაც, სამომავლოდ, მტერთან რაიმე შერიგების იმედს უშრუტდნენ,  
რათა ყოველ მოქალაქეს არჩევანში მხოლოდ ეს ჰქონოდა — ან გა-  
შარჯება, ან სიკვდილი.

გარედან დახმარების იმედი მხოლოდ (კართაგენისგან) ჰქონდა ტი-  
როსს. კართაგენი, აფრიკის ჩრდილოეთ სანაპიროზე, ტუნისის ყურე-  
ში აღმართული ქალაქი იყო. იგი სწორედ ტიროსელ კოლონისტებს  
დაეარსებინათ, ამ ამბებიდან 582 წლის წინათ (ძვ. წ. 914). კართაგენს  
უკვე დიდი, მძლავრი სახელმწიფოებრიობის ისტორია ჰქონდა გავლი-  
ლი ხმელთაშუა ზღვის აუზში და კიდევ 186 წელიწადი უნდა განე-  
ციფერებინა მსოფლიო თავისი დიადი და ტრაგიკული ისტორიით.

და ჰქონდა მეტროპოლიას კოლონიის იმედი, ანუ — მშობელს შვილის იმედი. უკვე გაგზავნილიც ჰყავდათ შიკრაკი კართაგენში სასწრაფო დახმარების სათხოვრად ტიროსელებს. პასუხიც სასწრაფოდ მოვიდა: კართაგენის „სალეთო ხომალდი“ გამოჩნდა, საზეიმოდ მორთული, ოცდაათკაციანი ელჩობით, რომელმაც „მშობლიურ ტიროსს“ მთართვა მხოლოდ თანაგრძნობა და სიწინაღობა იმის გამო, რომ ამჟამად არავითარი დახმარება არ შეუძლიათ, რადგან კართაგენელებს ახლა თვითონ უჭირთ სირაკუზელთა შემოტევისაგან. არა და, ტიროსის უმთავრესი საომარი ძალა, მისი განთქმული ფლოტი, ორად გათიშული და მტერთაგან ჩაკეტილი, უმოქმედოდ იდგა ორივე ნავსადგურში. და ისევე წავიდნენ ტიროსელნი უქიდურეს თავგანწირვაზე, — როგორც სჩვეოდათ სემიტური სისხლის ჯილაგებს. ერთ დღეს, შუადღისას, როცა ალექსანდრე ჩვეულებრივ თავის კარავში ისვენებდა და მისი მეომრების სიფხიზლაც გარკვეულწილად დუნდებოდა, უეცრად „სიღონის ნავსადგურიდან“ 13 ტიროსული ხომალდი გამოიჭრა და გააფთრებით შეება მათ წინ ჩარახმულ კიბროსელთა ფლოტს. დეტალებისთანავე მტრის ერთი ხომალდი ჩაძირეს ტიროსელებმა, დანარჩენებსაც შეუტყეს ყიყინ-ყივილით.

ალექსანდრე იმ დღეს ადრე გამოსულიყო კარვიდან და დროზე ეგრძნო რაღაც სახიფათო მოძრაობა „სიღონის ნავსადგურში“. ამიტომ სასწრაფოდ სამხრეთით, „ეგვიპტის ნავსადგურის“ საგუშაგოდ დამდგარი ფლოტი ორად გააყო; ერთს უბრძანა ადგილზე მტკიცედ მდგარიყო და იქიდან ტიროსელთა გამოხდომა არასგზით არ დაეშვა; მეორეთი კი თვითონ, სრულის სისწრაფით სკმხრეთიდან და დასავლეთიდან შემოუჭროლა და ჩრდილოეთით, „სიღონის ნავსადგურთან“ სწორედ იმ დროს გაჩნდა, როცა ზღვაზე გამოჭრილი ტიროსელები უკვე ამარცხებდნენ კიბროსელებს. ქალაქის მცხოვრებლები ყვირილით ამცნობდნენ წინ გაჭრილ და ბრძოლაში ვართულ თავისიანებს ალექსანდრეს მოახლოებას, მაგრამ სანამ შეიტყობდნენ, ალექსანდრე უკვე ჩაება ბრძოლაში. მეფის შემოჭრამ მოატრიალა ბრძოლის ბედი. ტიროსელთა ცამეტი ხომალდიდან შვიდი დაიძირა, ორი ტყვედ ჩავარდა და ოთხმა ნავსადგურში შეასწრო, მაგრამ არც ერთი მათგანი საბრძოლველად აღარ ვარგოდა.

ეს დღე საბედისწერო გამოდგა ტიროსისთვის. ორივე ნავსადგურში მისი ფლოტი მკვდარი მასა იყო და სხვა აღარაფერი. ამის შემდგომ მოწინააღმდეგენი ერთმანეთს ეჭიბრებოდნენ საფორტიფიკაციო ზე-

ლოვნების პირველობაში — ტიროსელები დაცვაში, ბერძენ-მაკედონელები იერიშიში. ტიროსელები გრძნობდნენ კატასტროფის სიახლოვეს და ყოველი დღის დაღევასთან ერთად უარესი ფანატიზმით შეპყრობილი ებრძოდნენ გარსმოწოლილ მტერს.

ალექსანდრე დამბის მხრიდან აწარმოებდა გადამწყვეტ შეტევებს, მაგრამ ვერ იქნა და ვერ გადალახეს მაკედონელებმა სწორედ დამბის პირდაპირ საგანგებოდ აღმართული უდიდესი და უმტკიცესი კედლები. მაშინ, ერთბაშად, ალექსანდრემ სამხრეთიდან მიიტანა იერიში ქალაქზე. უფიცხესი ბრძოლა დაიწყო. მაინც იმძლავრეს მაკედონელებმა და ერთგან შეანგრიეს კიდევ კედელი. ჩანგრეულ კედელში ჩამოდგნენ ტიროსელები და ისეთი სიაფთოთ იბრძოდნენ, ალექსანდრე იძულებული შეიქნა უკუ ეზმო თავისიანნი. იმ დამით ის ჩანანგრევი ადგილი ისევ ამოაშენეს და ამოლესეს ტიროსელებმა.

იანვარში დაწყებულმა ბრძოლამ ივლისამდე შემოაღწია. გაჭიანურებული ბრძოლა კი ნერვებს უწეწავს დღენიანაღ სიკვდილის თვალელებში მაცქერალ მეომარს. ალექსანდრემ იცოდა, რომ მისი ჯარსკაცებიც „მოწიერი ნერვისანი“ იყვნენ და თვითონაც ძალიან ჩქარობდა „ტიროსული ომის“ დამთავრებას. უბრალოდ, „სირცხვილი იყო“, — ასე დიდხანს ჯერ არსად არ დაბრკოლებულა ალექსანდრე მაკედონელი.

332 წლის აგვისტოც ჩამოდგა. ალექსანდრემ წყნარი, მზიანი დღე შეარჩია კუნძულზე სრული, ყოველმხრივი იერიშისათვის. ყველაზე დიდი სანგრევი და საიერიშო მანქანები სამხრეთიდან მიაყენა; იმ მანქანათა ორივე მხარეს კიდევ ორი გემი საგანგებო მოიერიშე ეკიბაებით დააყენა, ერთი აღმეტესა და მეორე კენოსის მეთაურობით; ორივე ნავსადგურის პირისპირ ცალ-ცალკე ფლოტილიები განალაგა, რომელთაც საერთო იერიშის დროს მოწინააღმდეგის ჩამკეტი ჯაჭვები უნდა დაემსხვრიათ და ნავსადგურთა შიდა აუზში შექრილიყვნენ. დანარჩენი ხომალდები კუნძულის გარშემო, ქალაქის კედლებთან, რაც შეიძლება ახლოს უნდა მოსულიყვნენ და ბრძანების მიცემისთანავე ყოველი სასროლიდან სროლა აეტეხათ.

ალექსანდრემ ბრძანება გასცა და დაიწყო ყოველმხრივი იერიში, — დაიწყო ისეთი სიმძაფრით, რომ ტიროსელებმა ვეღარ შეიტყვეს, სად და რომელ ადგილზე მოენიშნა მტერს „მთავარი იერიში“.

მაინც ყველაზე მძლავრი აღმოჩნდა მიწოლა სამხრეთიდან, სადაც ალექსანდრეს მემანქანეებმა და „არტილერიისტებმა“ გაარღვიეს ქა-



ლაქის კედელი. მაშინვე სააბორდაჟე ხიდები ჩამოუშვეს თავიანთი გემებიდან ადმეტემ და კენოსმა და გრიგალისებურ იერიშზე გაუძღვნენ ჭარებს. პირველი აიჭრა კედელზე ადმეტე და პირველივე დაეცა მკვდარი. ალექსანდრემ მიუსწრო და ახლა თვითონ გაუძღვა გაფთრებული ხმალთაკვეთებით მოიერიშე მეომრებს. სიკვდილზე გულგრილად მომავალი ტიროსელები ასჩეხეს, ზეღიზედ აღეს ორი გოდოლი და გზა გაიკაფეს მთავარი, „სამეფო კოშკისკენ“. ალექსანდრემ „სამეფო კოშკიც“ აიღო და ქალაქში შეიჭრა. ამასობაში „ეგვიპტის ნავსადგურიც“ გაერღვიათ არადის, ბიბლოსისა და სიდონის გემებს — ფინიკიელებს. ფინიკიელნი (არადელ-ბიბლოსელ-სიდონელთ — ტიროსელნი), მათი ხომალდებიდან ზოგი დაეძირათ, ზოგი მძიმედ დაეზიანებინათ. იმავდროულად კიპროსელებსაც დაელეწათ „სიდონის ნავსადგურის“ ჩამკეტი ჭაჭვები, შიგ ნავსადგურშიც შეჭრილიყვენ და სანაპირო ბასტიონებიც ჩაეგდოთ ხელში.

უკვე ყველგან უკუეჭითათ ალექსანდრეს მეომრებს ტიროსელნი. ქალაქი მაკედონელებითა და ბერძნებით ივსებოდა. გადარჩენილი ტიროსელი მეომარნი ჩრდილო-დასავლეთით, აგენორის მოედანზე შეიყარნენ სიკვდილთან შესახვედრად და აღარც მათთვის დაუყოვნებია სიკვდილს: ალექსანდრემ და კენოსმა შუა მოიქციეს და სავსებით ამოწყვეტეს ტიროსის უკანასკნელი დამკველნი.

შვიდთვიანი „ტიროსული ომი“ დამთავრდა. მაინც დიდი სახელის მომტანი უნდა ყოფილიყო ალექსანდრე მაკედონელისთვის ეს შვიდი თვე, — თუნდაც იმიტომ, რომ მანამდე, 250 წლით ადრე, ტიროსი 13 წელიწადი მარტოდმარტო უმკლავდებოდა აღმოსავლეთის უდიდეს მბრძანებელს, ნაბუქოდონოსორ ბაბილონელს, ალექსანდრეს ხელით კი შვიდ თვეში. დაცემულიყო და დარეცილიყო ათასწლოვანი კულტურული ბრწყინვალებით შემკული ქალაქი, ძველი მსოფლიოს „ზღვათა დედოფალი“. ომის ხანგრძლივობითა და სისასტიკით გამხეცებულმა მაკედონელებმა 8000 ტიროსელი გაწყვეტეს, 2000 ჯვრებზე გალურსმეს. 30000 მონად გაჰყიდეს. ცოცხლები გადარჩნენ მხოლოდ ისინი, ვინც ადრევე გაასწრო ალყას. ალექსანდრემ სიცოცხლე აჩუქა ჰერაკლეს ტაძარში თავშეფარებულებს, მათ შორის ტიროსის მთავარს, ადსემილეს და კართაგენელ ელჩებს. გადარჩნენ ის ტიროსელებიც, რომლებიც „ძმური სისხლის ყვილით“ შეიფარეს სამტროდ მოსულმა „ფინიკიელმა ძმებმა“ — არადელებმა, ბიბლოსელებმა, სიდონელებმა“.

ალექსანდრემ სადღესასწაულოდ დარაზმული ჯარით და ფლო-

ტით ტიროსში დიდი ზეიმი გადაიხადა, პერაკლეს მსხვერპლი შესწირა (აღრე რომ ტიროსელებმა „არ დაანებეს“) და ქალაქს გაშორდა.

იგი შევიდა ჩრდილოეთ პალესტინაში, ძველ ისრაელში, ანუ სამა-რიის სატრაპიაში, სადაც სატრაპმა სანვალატმა უომრად ჩააბარა სა-მარიაც და ისრაელიც „უძლეველ მაკედონელს“. იერუსალიმიც მოყ-ვრულად შეხვდა მაკედონელებს. ალექსანდრემ განთქმულ სოლომო-ნის ტაძარში, ებრაელთა უმაღლეს ღვთაებას, ებრაული რიტუალების სრული დაცვით, მსხვერპლი შესწირა.

მხოლოდ ქალაქმა ლაზამ გადაწყვიტა წინააღმდეგობის გაწევა და დახვდა კიდევაც საომრად მაკედონელებს. ქალაქის მმართველად სუ-ზის სასახლის კარს დაეყენებინა ვინმე საჭურისი ბატისი<sup>7</sup>, რომელ-საც თავისთავად სტრატეგიულად ძნელმისაწვდომი ლაზა კიდევ უფ-რო გაემაგრებინა, და ამას გარდა, დამხმარე ძალად არაბი მომთაბარე-ებიც დაექირავებინა. საჭურისს შეეძლო ეფიქრა, რომ ტიროსზე გა-მარჯვება ალექსანდრემ ფლოტის საშუალებით მოახერხა, ზოლო ლა-ზასთან საომრად ფლოტის გამოყენება შეუძლებელი იყო, ვინათგან ლაზა ზღვიდან ხომალდებისთვის საუკესებით მიუწვდომელ მანძილზე მდებარეობდა. არც სახმელეთო ჯარებს უნდა გაადვილებოდათ ამ ქა-ლაქის აღება, რამდენადაც იგი, ჯერ ერთი — აღმართული იყო მაღალ მთაზე, მეორეც — გარშემორტყმული იყო მაღალი და სქელი გალა-ვან-კოშკებით და მისასვლელებიც ყოვლის მხრიდან ჰქონდა ქვიშიანი და ქვალორიანი.

ალექსანდრე 332 წლის შუა სექტემბერს მიადგა ლაზას. იგი დაბა-ნაკდა ქალაქის სამხრეთით, მისი ფიქრით, ყველაზე ადვილად დასაძ-ლევო კედლის პირდაპირ, და მაშინვე საიერიზო მანქანების აღმართვა ბრძანა. მშენებლები კი არწმუნებდნენ მეფეს, — შეუძლებელია იმ-სიმაღლე მანქანების აგება, მთაზე მდებარე ქალაქის გალაგენებს რომ შეწვდესო. მაგრამ ალექსანდრე „ალექსანდრეობას“ არ იშლიდა. მან ბრძანა, ჯერ აღემართათ იმ მთის სიმაღლე მიწაყრილი, რა სიმაღლე-ზეც ქალაქის კედლები იდგა. ბრძანა და დაიწყო კიდევ ხელოვნური ბორცვის აღმართვა. აღმართეს, ააშენეს და ზედ საიერიზო მანქანებიც დააშენეს. იერიშის დღეც დანიშნა ალექსანდრემ, თავი გვირგვინით შეიძკო, ტანზე საჭურველი აისხა და ბრძოლისწყინარე მსხვერპლშეწირ-ვას შეუდგა საზორველი ცხოველის დაკვლისთანავე, როგორც გად-მოგვცემენ<sup>8</sup>, თითქოს საჭურთხველისთვის რომელიღაც ფრინველს გადმოეფრინოს და კლანჭებით მონატარები ბელტი ალექსანდრეს

თავზე დაეცეს. იქვე მდვარ არისტანდროს მისიანს მაშინვე უწინასწარ-მეტყველებია მეფისთვის: ეს უცნაური ამბავი იმას ნიშნავს, ქალაქს უეჭველად აიღებ, მაგრამ დღევანდელი დღის კი გეშინოდეს და გერიდებოდესო.

ალექსანდრემ თითქოს შეისმინა არისტანდროსის გაფრთხილება და ბრძოლის დაწყებისას, ერთხანს ისრის სასროლი მანძილიდან უკუ-დგა, მაგრამ როცა ბრძოლა გახურდა და მაკედონელებს ლაზელთა მძლავრი კონტრშეტევებით მისჭირდათ, მაშინ კი გავარდა მეფე თავისიანთა საშველად. უცებ მოწინააღმდეგე მხარეს ერთი არაბი მეომარი გამოეყო და ალექსანდრეს წინაშე დაემხო. ალექსანდრემ ის მეომარი მის მხარეზე გადმოსულად ირწმუნა, ხელი მოჰკიდა და ფეხზე წამოაყენა. უმაღვე არაბმა თავში დამიზნებით მოუქნია მახვილი; გადაზნიქა და აიცილინა მეფემ, მეორე დარტყმაც აღარ აცალა, თვითონ შემოჰკრა და მახვილიანი მარჯვენა დაადებინა არაბს. ალბათ, ეს იყო ის საშიშროება, არისტანდროსმა რომ მიმანიშნაო, — იფიქრა მეფემ და უფრო გამძაფრებით მიიტანა იერიში. მაგრამ უარესი საშიშროება თურმე ახლა ელოდა მას: კატაპულტით მძლავრად ნასროლმა ისარმა ფარი და ჯაჭვი გაუგლიჯა და ბეჭიცი განუშპო.

შვივარდა ფილიპე აყარნანიელი და ამოართვა ისარი ბეჭიდან მეფეს. ალექსანდრე ტკივილს კენესით საერთოდ არასოდეს არ პასუხობდა, არც ახლა დაუკენესია, — ჭრილობა შემიკარით და სისხლის-დენა შემიჩერეთო, — მხოლოდ ეს ბრძანა და ისევ გადაეშვა ბრძოლაში.

ბატისმაც ახალის ძალით გააჩაღა კონტრშეტევა. ბრძოლა განივთდა, ალექსანდრეს ჭრილობამ კი იმძლავრა, მეფეს თვალთ დაუბნელდა, დაბარბაცდა და კიდევაც უნდა დაცემულიყო, მაგრამ მისმა „პაუებმა“ იდროზე შეიტყვეს, მეფე აიტაცეს და ბრძოლიდან გაიტაცეს. მაკედონელებმაც იმ დღეს ბრძოლა შეწყვიტეს. საჭურისმა ბატისმა კი ირწმუნა, რომ ალექსანდრე ბრძოლაში დაიღუპა და მისი მეომრებიც დამარცხდნენო; ამიტომ დაარხენიებული ქალაქში შებრუნდა და დიდი საზეიმო სვლა გამართა.

ლაზელთა ზეიმი ნადრევი, უდროო და უდღეური გამოდგა. ალექსანდრე ჭრილობის სიძნელემ კიდევ უფრო აანთო საომრად. რაკი წინასწარმეტყველების პირველი ნაწილი ასრულდა, მეორეც უეჭველად ასრულდებო, — და ღაზის ალებას გულსხმობდა იმ „მეორე ნაწილში“.

ისევ შემოართყა ალყა ღაზას ალექსანდრემ, ისევ აღმართა მანქანები საიერიზოდ. რამდენიმე ადგილზე ბალავრები ჩაუთხარეს, მეფის ბრძანებით, მაკედონელებმა ქალაქის კედლებს. მიწა ძალზე ფხვიერი იყო, მთლიანად ქვიშოვანი და ადვილად ჩამოინდგრა „თიხისფეხებიანი ბუშპერაზი“.

ალექსანდრე თვითონ შეუძღვა ქალაქში მოიერიშეებს. საშინელი ხოცვა-ჟლეტა გაჩაღდა ღაზის ქუჩებში. ალექსანდრემ ფეხიც დაიხიანა, ცალი ხელით შუბს დაებჯინა, ცალითაც მახვილს იქნევდა, თან ჯავრობდა, — ეს ერთი ქალაქი რა ჭირად ღირს, რომ მისთვის ორი ჭრილობის მიღება დამკირდაო.

ღაზისათვის წარმოებული ორთვიანი ბრძოლა დამთავრდა. ყოველი ღაზელი მისთვის მიჩენილ ადგილზე ფეხმოუცვლელი დაეცა. 10000 ღაზელი — არაბი და სპარსელი — დარეცილიყო. მრავალი ტყვე — ქალი და ბავშვი — მონად გაიყიდა. ღაზის მმართველი, საჭურისი ბატონი, რომელიც ბოლომდე მამაცურად იბრძოდა — ალექსანდრემ შეიპყრო, ფეხებით ეტლზე გამოიბა და ქალაქის გარშემო ათრია, — ვითარცა აქილევსმა ჰექტორის გვამი.

ღიდძალი ნადავლი, განსაკუთრებით არაბულ სანელებელთა ძვირფასი მარაგი, მაკედონელებს დარჩათ, ნადავლის დიდი ნაწილი მეფემ დედას — ოლიმპიადას და დას — კლეოპატრას გაუგზავნა მაკედონიაში; არც მეგობრები და აღმზრდელები დაივიწყა; მარტო ლეონიდას, მისი ბავშვობის მკაცრ აღმზრდელს, ალექსანდრემ 600 ტალანტის საფასე მარტო ნელსურნელოვანი გუნდრუკი-საკმეველი გაუგზავნა \*.

ალექსანდრემ ამოწყვეტილ ღაზაში ფილისტიმელთა და არაბთა ახალმოსახლენი ჩაასახლა, მაკედონური ციხიონი შეაყენა და ქალაქი ამ უმნიშვნელოვანეს გზატკეცილზე დიდ სტრატეგიულ და ეკონომიურ პუნქტად აქცია<sup>9</sup>.

ღაზის დაუფლების შემდგომ მაკედონიის მეფეს გზა ხსნილი ჰქონდა ეგვიპტისაკენ.

---

\* ბავშვობისას ალექსანდრეს სამსხვერპლო გუნდრუკი ცეცხლში ჩაუყრია, ამის გამო ლეონიდას უთქვამს თავისი გაუფრთხილებელი მოწაფისათვის — აგრე გულუხვად გუნდრუკი მაშინ აკმე, როცა ნელსურნელებით მდიდარ ქვეყანას დაიპყრობო. ახლა ალექსანდრე უგზავნიდა ამდენ საკმეველს და სწერდა ლეონიდას — აი, გიგზავნი სამყოფ გუნდრუკს და ზმირნს და ღმერთთა წინაშე ძუნწობას ამიერიდან თავი დაანებეო (პლუტ., ალექს., 25).

ალექსანდრე ახლა მიემართებოდა მსოფლიოში ყველაზე ძველი და უმდიდრესი ისტორიის მქონე ქვეყანაში. ნილოსის მიწას მრავალი ამალღება და დაცემა ახსოვდა საკაცობრიო ცივილიზაციისა, მაგრამ უმძიმეს ტრაგედიათა ჯაჭვში ყველაზე მწარედ სანსოვარი ეგვიპტისათვის სპარსეთის უსასტიკესი მბრძანებლობის დრო-ჟამი იყო. განსაკუთრებით, კამბიზისა და არტაქსერქსე ოხოსის შლეგიანი შემოსევების შემდგომ, ყოველი ეგვიპტელის სულში სპარსელი ყველაზე საძულველ კაცთაგანის მორღმად განიცდებოდა და განიხილებოდა. ამიტომ ყოველი სხვა უცხო ძალის მოსვლა ეგვიპტეში სპარსთაგან ვათავისუფლების რადაცნაირ მესიანისტურ მოვლინებად უნდა ყოფილიყო შეფასებული. გამორჩეულად, ასეთ „მესიებად“ ეგვიპტელებს, გარკვეულ დრო-ჟამში, ბერძნები მიაჩნდათ, მაგრამ ბერძნებმაც, მათი კონდოტიერული ბუნებიდან გამომდინარე, ბევრჯერაც გაიტყუეს სახელი „ეგვიპტელი ძმების“ წინაშე.

ახლა კი ალექსანდრე მაკედონელი მიეშურებოდა ეგვიპტეში, ხოლო ალექსანდრეს სახელი ჭეშმარიტი „გამათავისუფლებლის“, „მხსნელისა“ და „მესიის“ სახელად გავრცელებულიყო ეგვიპტეში. უკვე გავრცელებულიყო. უკვე ელოდნენ. ტიტული ტიტულატორს ელოდებოდა.

332 წლის ნოემბრის მიწურულს, ღაზადან გასვლის მეშვიდე დღეს, ალექსანდრე მებრძოლ-მაკედონური მხედრობით, ნილოსის დელტაში, ქალაქ პელუსიონში შევიდა. ზარ-ზეიმით შემოეგება სრულიად ეგვიპტე „გამათავისუფლებელს“, „მხსნელს“, „მესიას“.

ხოლო, თვითონ ალექსანდრეს „მესიანისტური მიზანდასახულობა“ ეგვიპტეში სხვას არაფერს ითვალისწინებდა, თვინიერ სპარსეთის ამ უკიდურესი პროვინციის დაპყრობისა ხმელთაშუა ზღვის სანაპიროზე. მაგრამ ეს წინამდვილე ალექსანდრეს გულში იდუმალ იყო დაკრძალული და დაკუთრებული, ხოლო გარეგნულად — იგი „წამდვილი მესია“ იყო. ამიტომ ეგვიპტე, — რომელსაც დიდი ფარაონების ოდინ-

დელი დამოუკიდებლობა და მსოფლიო მპყრობელობა სავსებით დავიწყებინა და მხოლოდ უცხო ძალთა ურთიერთბრძოლის „პრიზად“ ქცეულიყო — ზემით ხვდებოდა უკეთესთა უკეთეს უცხოს\*.

შეაყენა თუ არა ფლოტი ალექსანდრემ პელუსიონში, სპარსმა სატრაპმა მასაქემ თავისი არსებობა იმიტოლა გაამყლავნა, რომ მაშინვე მთელი ეგვიპტე მაკედონიის მეფის საკუთრებად გამოაცხადა (ვითომ ვინმე რასმეს ეკითხებოდა!).

ალექსანდრემ ფლოტი პელუსიონიდან, დელტის აყოლებით, მემფისისაკენ გაგზავნა, თვითონაც ხმელეთით იქით წარემართა. მთელს გზაზე, პელუსიონიდან მემფისამდე, ყოველი ქალაქი და სოფელი, დიდიან-პატარიანად გამოფენილი, „გამათავისუფლებელს“ აღტაცებული ბლავილით ეგებებოდა. ფიანდახად დაეგო მეფეს ძველთაძველი ქალაქი ჰელიოპოლისი. მასუკან მემფისში შევიდა ალექსანდრე — ეგვიპტის უძველესსა და უდიდეს სატახტომში. მემფისის დაუფლება კი ეგვიპტის სრულ დაუფლებას ნიშნავდა.

ალექსანდრემ თავისი „მისიაც“ და „მესიაც“ თითქოს საჭმით კიდევაც დაუმტკიცა ეგვიპტელებს. მან გამოაცხადა ეგვიპტის „სრული თავისუფლება“, რაც ეგვიპტელთა ტრადიციული, მრავალსაუკუნოვანი წეს-ჩვეულებების, ადათის, ზნეობისა და რელიგიური სინდისის სრულ დაცვასა და მოვლა-პატრონობაში მდგომარეობდა (რა ვუყოთ, რომ პოლიტიკური დამოუკიდებლობა ისევ აღარ ექნებოდა საერთოდ ასეთ ქიშერას გადაჩვეულ ეგვიპტეს!). რა შედარება იყო სპარსელსა და მაკედონელს შორის, როცა ორივე სპარსელმა მეფემ — კამბიზმაც და ოზოსმაც — ეგვიპტეს მისი ღმერთი, ზარი-აბისი მოუკლეს, ხოლო ალექსანდრემ მემფისის ფტას მთავარ ტაძარში აბისს მსხვერპლი შესწირა, მუხლმოყრილმა საკმეველი უკმია და საგალობელნი უღიღინა! აბისს კი არა, — პოლითეისტური სუნთქვით ატანილ ამ საოცარ ქვეყანაში — ალექსანდრემ პატივი მიაგო ყოველ ციურ ღმერთსა და ყოველ მიწიერ ტრტემს — დაწყებული მზე ამონ-რათი და გათავებული „ღვთაებრივი“ ხოქოთი. ბერძნულ კულტურასაც ნაზიარები იყო ეგვიპტე, — ისე, ვითარცა პირუტყოდ, საბერძნეთი თავის დროზე ეზიარა გაცილებით ძველთაძველ ეგვიპტურ ცივილიზაციას. ახლა ალექსანდრემ სრული „სინთეზი“ მოიხურვა ეგვიპტურისა და ელიზურისა. ეგვიპ-

\* ალბათ, მაშინდელ ეგვიპტეში „უცხო ალექსანდრე“ გაიზარებოდა და განიცდებოდა ისევე, როგორც სინონიმური განცდა-გაზარებანი ჩვენებურ ქართულ სიტყვიერებაში — „საუცხოო — საუკეთესო“ და „უცხო — უკეთესი“.

ტეში ბერძნულ თეატრონებს მართავდა, ბერძნულ ოლიმპიადებს, ასპარეზობებს, ფიზიკურსა და სულიერ შეჯიბრებებს აწყობდა და ადგილობრივთა სულს უთვისებდა და უთავისებდა; მეორე მხრივ, — მაკედონელებსა და ბერძნებს ადგილობრივ ეგვიპტურ ტრადიციათა პატივისცემას, ანგარიშგაწევასა და აღიარებას აჩვენებდა.

მემფისიდან ალექსანდრე ისევ ნილოსის შესართავისკენ დაიძრა, მაგრამ ამჯერად დელტის მარცხენა განტოტებით, ქალაქ კანოპისაკენ. მივიდა ალექსანდრე ხმელთაშუა ზღვამდე — სამეფო აკემის, პეტერების, რჩეულ მხედართა და მოისართა თანხლებით — და ერთხელ კიდევ გამქლავნდა მისი გრანდიოზული, ქემშარიტად მსოფლიო მნიშვნელობის კულტურული, ეკონომიური და პოლიტიკური განზრახულობანი. კანოპიდან დასავლეთით, ხმელთაშუა ზღვისა და მარეოტიდის ყურის შუაზედ შეჭრილ ხმელეთზე, კუნძულ ფაროსის პირდაპირ, მან საფუძველი ჩაუყარა ახალ დიდ ქალაქს, თავისი სახელობით — ალექსანდრიას, რომელსაც უსაზღვროდ დიდი როლი უნდა ეთამაშა მსოფლიოს ცივილიზებული ცხოვრების ყოველ სფეროში. საუკუნეების მანძილზე, ეს უნივერსალური წინამორბედი ყველა შემდგომი „ალექსანდრიებისა“, „ალექსანდრეპოლისებისა“, „ნიკეებისა“ და „ნიკიფორიებისა“ — ქემშარიტი მაგალითი, ნიმუში, „პეგემონი“ და „წამყვანი“ იქნება ევროპა-აზია-აფრიკის ეკონომიკური, კულტურული და პოლიტიკური ცხოვრების საყოველთაო, ყოვლისმომცველ წრესაბრუნავსა და ემსაბრუნავში.

დიდხანს იარა და ათვალეირა ალექსანდრემ, თავის ხუროთმოძღვართან, დინოკრატოსთან ერთად, ზღვაში შეჭრილი ეს „ბედნიერი ხმელეთი“. ხელმარცხნივ მარეოტიდის ყურე, მყუდრო და საიმედოდ თავდასაცავი ნავსადგური უნდა ყოფილიყო მომავალი ქალაქისა. პირდაპირ, ხმელთაშუა ზღვა და კუნძული ფაროსი მაერთებელი რგოლი უნდა ყოფილიყო სამ კონტინენტს შორის სავაჭრო და კულტურული მარადისი მიმოქცევისა.

ეს მოასწავებდა ხმელთაშუა ზღვაზე ბატონობას, რაზეც საუკუნით ადრე ოცნებობდა დიდი ბერძენი პოლიტიკოსი და „კულტურტრეგერი“ — პერიკლე ათენელი.

მეფემ საკუთარი ხელით სახელდახელოდ დახაზა მისგანვე არჩეულ „რჩეულ მიწაზე“ თავისი ქალაქის კონტურები — მისი ქუჩები და ბაზრები, ბერძენთა ღმერთებისა და ეგვიპტელი ისიდას ტაძრები. რაკი ხელთ სხვა არაფერი აღმოაჩინდათ, ალექსანდრეს თითის გასწვრივ

მისმა მხლებლებმა ჯარი სკევი პურის ფქვილით დახაზეს მთელი ქალაქი. ივი საერთო მონახზით, მიწაზე დაფენილ თეთრ ქლამიდას (წაშოსასხამს) დაემსგავსა. აუარება ფრინველი წამოიშალა ყოველის მხრიდან და მიუსია ასე მოულოდნელად და უხვად ჩარეგებულ საზრდელს. ფრინველთაგან „ქალაქის აკენკვა“ მისანმა არისტანდროსმა ახლად ჩასახული ალექსანდრიის დიდ სამომავლო ბედნიერებად და სახელგანსპენილობად იწინასწარმეტყველა — ეს იქნება უმდიდრესი, მსოფლიოს ნაირ-ნაირ ხალხთა გამომკვებავი ქალაქიო...<sup>2</sup>.

მეფემ ბრძანება გასცა შესდგომოდნენ ქალაქის საძირკველთა ჩაყრას. თვითონ კი, ამალით და რჩეული ჯარით, დასავლეთისკენ გაეშურა, ზღვის გაყოლებით. მისი ოცნება იყო სწვეოდა ამონის ოაზისს, სუდაც მზის უზენაესი ღვთაების, ამონის ტაძარში, ვითომც „უტყუარი წინასწარმეტყველება“ მიეღოთ მითოლოგიურ გმირებს — პერსეოსსა და ჰერაკლეს (რომელთა შთამომავლად თვლიდა თავის თავს ალექსანდრე).

ათას ექუსასი სტადიონი (დაახ. ზუთასი კმ) გაიარეს ქალაქ პარიტონიამდე; აქედან კი საშხრეთით შემოტრიალდნენ და, ლიბიის სიღრმეში თავი მისცეს აფრიკის მძვინვარე მზის ქვეშ მოვარვარე უკიდევანო უდაბნოებს. ისევ გაუღიმა ბედმა ნებიერს, — სიცხისაგან ქანცგაწყვეტილებს გზაზე მაცოცხლებელმა წვიმამ აწვიმათ (მანამდე რომ ათ წელიწადშიც ცა ამ მიწისთვის ერთ ცვარ წვიმასაც არ გაიმეტებს), არც ქარი გამოუშტათ (მანამდე რომ განუწყვეტელი ქროლოვით სიცოცხლის გამაქრობელ სმერჩებს ჰბადებდა). იმაზედ კი აღარ ღირს ლაპარაკი, რომ ზოგჯერ გზადაქარგულებს და კვალარეულებს ხან გველები და ხან კიდევ ყვავები წარუძღვებოდნენ და მიანიშნებდნენ საომარო მარშრუტებს!<sup>3</sup>

ასე მიატანეს ამონის ოაზისს — სიცოცხლის საოცარ კუნძულს, ძვალ-სახსართა დამადნობელი უდაბნოების ოკეანეში. მაკედონელები მოიხიბლნენ ამ ღვთაებრივი სამოთხით — მიწის გულოდან მომდინარე წყაროებით, მწვანედ მოზიბინე მინდვრებით, ნაყოფმსხმოიარე ბაღებით, ზეთისხილისა და ფინიკიური პალმის ხეივნებით. შუაგულში უბრწყინვალესი ტაძარი იდგა, ამონის სახელობისა.

გამოეგება ალექსანდრეს ამონის ქურუმთა დასი, უმაღლესი ქურუმის წინამძღოლობით, — იმ ქურუმისა, რომლის წინაპრები, ალექსანდრეს გამოცხადებამდე ექვსასი წლით ადრე, „ქურუმთა დინასტი-



ის“ სახელით ფარაონობდნენ და სრულად ეგვიპტეს განუყოფელი მფლობელობით მფლობელობდნენ.

— სალამი შენდა, შვილო! — მიესალმა ქურუმთუხუცესი ალექსანდრეს.

— დე იყოს აგრე, მამაო! მე მინდა ვიყო შვილი შენი და მომანიჭე მბრძანებლობა მთელს მსოფლიოზე! — წამსვე მიუგო ალექსანდრემ.

ამ ამბის დამსწრენი სხვადასხვანაირად ხსნიდნენ და ავრცელებდნენ შემდგომში ქურუმისა და მეფის პირველ გასიტყვებას: ქურუმს უნდოდა ბერძნულად ეთქვა „პაიდიონ“ („შვილო“), მაგრამ შეეშალა და გამოუვიდა „პაი დიონ“, რაიც უკვე ნიშნავს „ძე ღვთისას“. ალექსანდრესაც სხვა რაღა უნდოდა: მისი „ღვთაებრივ-თესლიანობის“ პირველი აგური უკვე ჩაგდებული იყო — იგი ამონის მოციქულმა ღვთის ძედ აღიარა და გამოაცხადა!

ტაძარში შევიდნენ.

წყაროთა<sup>4</sup> ურთიერთშედარებისა და შეჯერების შემდეგ, შესაძლებელი ღდება წარმოვიდგინოთ ასეთი დიალოგი „ღვთის მოციქულსა“ და „ღვთის ძეს“ შორის:

ქურუმი: რაი გსურს და რაისთვის აღძრულხარ, შვილო ჩემო?

ალექსანდრე: მამაჩემის მკვლელებს დავეძებ და მინდა შევიტყო, ყველა დაესაჯე, თუ დამრჩა კიდევ მოსაძებნი და შურისსაგები?

ქურუმი: გონი მოიკრიბე და კარგად დაუკვირდი, რას ლაპარაკობ.

ალექსანდრე: მამაჩემის მკვლელებზე მოგახსენებ-მეთქი.

ქურუმი: ფილიპეს გულისხმობ?

ალექსანდრე: სწორედ, მამაჩემს, ფილიპეს.

ქურუმი: ჰოო, თუ ფილიპეს გულისხმობ, მისი მკვლელები უკვე უკლებლივ დასჯილი გყავს, ხოლო თუ მამაშენზე ლაპარაკობ, მამაშენის მოკვლა არავეითარ ძალას არ ძალუძს; იგი მიულწეველია ბოროტმოქმედის ზელისათვის, რადგან იგი თვითონ არის მარად უკვდავი და მარად უძლეველი.<sup>1</sup>

ალექსანდრე: (გაოგნებული)ჟ!

ქურუმი: ასეა, ვინათგან შენი მამა არის თვითონ ამონი!

თქვა და ზეცილკენ აღაპყრო მზერა „ამონის მოციქულმა“.

და ასე დაადო მეორე აგური ალექსანდრე მაკედონელის გაღმერთების ზეაღმავალ კიბეზე.

იგი უკვე გამოცხადდა ღვთის ძედ.

ამის შემდგომ დიალოგი უფრო გამოკვეთილ სახეს ღებულობს:

ალექსანდრე: განსაზღვრული აქვს თუ არა ჩემს ღვთაებამშობელს, ამონს, ჩემი მბრძანებლობა მთელს ადამიანურ და მიწიერ სამყაროზე?

ქუჩუმი: ეს განსაზღვრულია და კიდევაც იქნები ყოველი ადამიანური და მიწიერი სამყაროს მეუფედ. ამ ქვეყანაზე შენ იქნები კაცთაგან მარად უძლეველი, ხოლო როცა აღესრულები, ღმერთთა გვერდით ზეცაში ღმერთად აღზევდები!..

ახლა ისღა დარჩენილიყო, „გაღმერთებულსაც“ ზელი გამოედო ღმერთის საპატიოდ და სადიდებლად. და ალექსანდრემ უმდიდრესი და უბრწყინვალესი შესაწირავებით აავსო ამონის ტაძარი.

იქვე შესრულდა მთავარი „საკრალური აქტიც“:

ხალხსა და ჯარს გამოუცხადეს, რომ ალექსანდრე ამონის ძე, ანუ ღვთაებრივი თესლისა ყოფილა! სწორედ ეს იყო მთავარი: ღმერთი რა ღმერთი იქნება, თუ ხალხმა არ მიიღო და ღმერთად არ აღიარა.

და ხალხმაც აღიარა „ახალი ღმერთი“, ზოგმა სრული გულწრფელობით აღიარა, ვინათგან საერთოდ სწამდათ ალექსანდრესი — თუნდაც ვითარცა კაცის გამორჩეულობა და „რალაც არაჩვეულებრივი“ (თუნდაც „ღვთაებრივი“) განსაკუთრებულობა. ზოგსაც ისე „სწამდა“, როგორც უნდა ეწამებინა ძალდატანებულს, დაშინებულს, დავალებულსა და დაქვევდრომებულს, ზოგსაც კიდევ ისე, — როგორც თვითონ ალექსანდრეს სწამდა თავისი ღმერთობა. მოვა დრო და მარტო ღვინისა და ქალის ტრფიალების წინაშე უმწეობის გამო როდი შეიტანს ეძვს ალექსანდრე თავის ღვთაებრივ ყოვლისშემძლეობაში, არამედ, რომელიღაც ბრძოლაში იმორიგ ჭრილობას რომ მიიღებს, მაშინ სავსებით მიწიერი უძლეულებით დაიდრიალებს: „ეს სისხლია, მეგობრებო, ჭრილობიდან რომ მოდის და არა მართლა იქორი, რაიცა ღმერთებს მიმოუჩქეფთ სხეულში მხოლოდ“ („ილიადას“ ლექსი მოიშველია) <sup>5</sup>.

ახალი და გაუგონარი კი არაფერი მომხდარა ალექსანდრეს „გაღმერთებით“. ვინ მოთვლის რამდენი „გაღმერთებულა“ ალექსანდრემდე და რამდენი „გაღმერთდება“ ალექსანდრეს შემდეგ. მარტო ძველ აღმოსავლეთში ხომ ყოველი მონარქი-დესპოტი — ბრალიანი თუ უბ-

რალო, ნიჭიერი თუ უნიჭო, მამაცი თუ დიაცი, ღირსეული თუ უღირსი — სწორედ ღმერთად, ღვთის ძედ, „მესიად“, თუ „მხსნელად“ იყო გამოცხადებული, და ამ უთვალავ „ღმერთთა“ შორის თითო-ოროლა რომელიმე რამესი, ნაბუქოდონოსორი, ანუ კიროსი თუ აღმოჩნდებოდა შედარებით უფრო „ღირსეული ღმერთი“.

ალექსანდრე მაკედონელის სპარჯებლოდაც სწორედ ის შეიძლება ითქვას, რომ ვერც ერთი მანამდელი „ღმერთი“, „ძე ღვთისა“, თუ „მესია“ მას სიდიდით და „ღვთაებრივი ღირსებით“ ვერ გაუტოლდებოდა.

აუცილებელი კი ყოფილა, ვინათგან თურმე სამომავლოდ აღარ კმაროდა დროისა და სივრცის ის სიმბოლოები, რაითაც აქამდე მოქმედებდა ალექსანდრე მაკედონელი:

სიმბოლო პირველი — ილიონის ტაძრიდან ჩამოსხნილი საღვთო საჭურველი, რაითაც ალექსანდრე ბერძენთა შორის ბერძენთა გამათავისუფლებელ გმირს თამაშობდა;

სიმბოლო მეორე — გორდიოსის კვანძის განკვეთა, რაითაც ალექსანდრე მცირეაზიელ ხალხთა შორის აზიის მფლობელობის ყველაზე ღირსეულ კავალერს თამაშობდა;

სიმბოლო მესამე — სამსხვერპლო ზორვანი ტიროსისა და შემფისის ტაძრებში, რაითაც ალექსანდრე გამარჯვებულთა და დამარცხებულთა შემრიგებლისა და „სულთა შემრწყმელის“ როლს თამაშობდა.

აქამდე, — მსოფლიოს მხოლოდ ნაწილის დაპყრობამდე — კმაროდა ეს სიმბოლური ტრიადა, მაგრამ ახლა, ნაწილის დაპყრობის შემდეგ, რაკი საკითხი იდგა მთელის, ანუ მთელი მსოფლიოს დაპყრობისა, ანუ აღმოსავლეთ-დასავლეთის „გამთლიანებისა“ და „გაერთიანებისა“, საჭირო იახდა ახალი, შესატყვისად უფრო ვრცელი და ყოვლის მომცველი სიმბოლო ს შექმნა.

და ასეთი უნივერსალური სიმბოლო უნდა ყოფილიყო „ღმერთი“, „ძე ღვთისა“, „ღვთაებრივი“, ანუ „მესია“ და მისთ.

და, ვინათგან ახალ დროსა და სივრცეში „აუცილებელი იყო“, კიდევაც — „იქმენინ ღმერთით, და იქმნა ღმერთი!“

და ღმერთი იგი იყო ალექსანდრე! ალექსანდრე!  
ახლა ყველას თავიდანვე უნდა გაეხსენებინა, როგორი ხმები დადიოდა „თავის დროზე“ მაკედონიაში ალექსანდრეს ჩასახვისა და დაბადების გარშემო: ქორწინების დამეს, საქორწინო სანთიბოში, სა-

ქორწინო ღარეცელზე ფილიპეს თავისი თვალთ უნახავს, როგორ ეხვეოდა შიშველ ტანზე ოლიმპიადას, არც მეტი არც ნაკლები — გველი-დრაკონი! ფილიპეს დელფოს ორაკულისთვის უკითხავს, რა იყო მიზეზი მისთვის, თავმოყვარე სიძისთვის „პირველი ღამის უფლების“ წართმევისა, — და პასუხიც შესაფერისი მიუღია: ის დრაკონი ჩვენებურად — ზევსი, ანუ ეგვიპტურად — ამონი გახლდათო!..

სხვა რაღა იყო საჭირო ამის საჩუქნოდ, რომ ალექსანდრე ღვთაებრივი ძე იყო უზენაესი ღმერთის, ამონისა?!

ხმა ისეთიც ისმოდა, თითქოს აზიასი გალაშქრების წინ თვითონ ოლიმპიადას გაემძილოს შვილისთვის მისი „ღვთაებრივი შთასახვის“ ამბავი.

და არც ერთი ასეთი „უხერხული ხმის“ ცავრცელებას ხელს არ უშლიდა ალექსანდრე. ის კი არა და, დედის შეურაცხმყოფელი ამნაირი ქორების გაგონებისას ალექსანდრე ისეთი პოზით წაუყრუებდა ხოლმე, რომ ადამიანს პირიქით — ეს მართლაც სულელური ქორი წმინდა წყლის სიმართლედ მოსჩვენებოდა:

არისტოტელეს გაზრდილმა ყოველთვის იცოდა, — რა „პრაქტიკული“ ნაბიჯის წინ რა „თეორიულ-იდეოლოგიური“ გააზრება წამემძღვარებია. დიახ, — ამონის ოაზისში იგი საექსკურსიოდ როდი წასულა. ჭიკვილის საფრთხეებით ამ გატენილ გზაზე იგი „დიდი საკითხავებით“ მიდიოდა, ისე ვითარცა სწორედ წინასწარ ღმერთს „ემკითხავენ“ პერსეოსი და ჰერაკლე — ერთი გორგონებთან შეტაკებისა და მეორე ანთეოსთან შერკინების წინ. ალექსანდრეს გორგონა კი დარიოს III იყო და მისი განადგურების გზაზე იგი მსოფლიოს უნდა დაუფლებოდა. ამისთვის კი „ღმერთობა“ იყო საჭირო, „ღმერთობა“ კი ამონის ოაზისში ელოდა პერსეოსისა და ჰერაკლეს „ღვთაებრივ შთამომავალს“.

და მივიდა ალექსანდრე ამონის ოაზისში.

და იქმნა ღმერთი

და ერთხელ კიდევ გავიხსენოთ ჰერაკლიტე ეფესელის საოცარი სენტენცია — ღმერთები უკვდავი ადამიანები არიან, ხოლო ადამიანები მოკვდავი ღმერთებიო.

ალექსანდრე მაკედონელი კი მის თანამედროვეობაში „მოკვდავ ღმერთთაგან“ ყველაზე ღირსეული იყო, რომელსაც დროის შესატყვისი ახალი სიმბოლური მოწოდებით — „ღმერთობით“ — მაშინდელი მსოფლიო უნდა „გაემთლიანებია“.

და იქმნა ღმერთი!

და უკვე მაშინვე, ამონის ოაზისიდანვე აიდგა ფეხი „ღვთაებრივი ალექსანდრეს“ კულტმა. მალე მოიპრება მონეტა, რომელზეც გამოხატული იქნება ალექსანდრე, ამონის რქებით, მალე ჩამოყალიბდება, გაძიდრდება და „გადაყვავილება“ ტიტულატურა — „მისი აღმატებულიება ალექსანდრე, მეფეთა მეფე, მეფე დიადი, ღვთაებრივი ძე ამონისა, დიდი რქოსანი“.

ამონის ოაზისიდან წამოვიდა ალექსანდრე მაკედონელი. ახალი გზით, უდაბნოს პირდაპირი გადაკვეთით მობრუნდა მეგფისში, სადაც მას ბერძნულ ქალაქთა ელჩობანი შეეგება. ყველას მოუსმინა, ყველას სათხოვარი დააკმაყოფილა, ყველას მიუალერსა და ყველასთვის დიდძალი საბოძვარი გასცა „ღვთაებრივმა“.

ბალკანეთიდან ჩამოსული ახალი ჯარებიც დახვდნენ ალექსანდრეს — ანტიპატროსს გამოეგზავნა. მათ შორის, 400 დაქირავებული ბერძენი იყო, მენიდას სარდლობით, 500 მხედარიც თრაკიიდან წამოეყვანა ასკლეპიოდოროსს. დანარჩენი ქვეითი ლაშქარი იყო, რამდენიმე ათასი მეომარი.

ალექსანდრემ განსაკუთრებით იზრუნა ეგვიპტის მართვა-გამგეობის ორგანიზაციაზე. მან ეგვიპტის მმართველობა ორ კაცს ჩააბარა — პევიტას და ბალაკროსს; ერთი პელუსიონს უნდა მდგარიყო, თავისი ციხიონით, მეორე — მეგფისს, სადაც ალექსანდრე აგრეთვე დიდ მაკედონურ გარნიზონს ტოვებდა. ორივე გარნიზონი 4000 მეომარს მოითვლიდა. ნილოსის დელტაშიც ალექსანდრემ ოცდაოთხ-ხომალდიანი ფლოტი ჩააყენა, პალემონის ნავარქოსობით. ადგილობრივ ტრადიციული დაყოფანი — ნომები და მათ სათავეში ნომარქოსები — ალექსანდრემ ხელუხლებლად დატოვა. ნომარქოსებზე, ნომების მართვის გარდა, ევალებოდათ ხარკის აკრეფა. ხოლო, რწმუნებული ყოველი ხარკის თავმოყრისა იყო ნავკრატისელი ბერძენი, კლეომენი, რომელსაც ალექსანდრესგან დაკისრებული ჰქონდა, აგრეთვე, ახალი ქალაქის, ალექსანდრიის მშენებლობის ზედამხედველობა.

ერთი დიდად უსიამოვნო ამბავიც შეემთხვათ მაკედონელებს ეგვიპტეში. პარმენიონის უმცროს ძეს, ჰექტორს, ნილოსზე გაუფრთხილებელი სეირნობის დროს, ნავი გადაუბრუნდა და მდინარეში და-

იხრჩო. ალექსანდრეს ჰექტორი ძალიან უყვარდა, მწარედ დაიტირა და დიდის პატივით დაკრძალა.

ის ზამთარიც განესრულა.

„331 წლის აღრიან გაზაფხულზე ეგვიპტიდან გამოვიდა ალექსანდრე მაკედონელი — „მეფე უზენაესი, ღმერთი უზენაესი, რქოსანი უზენაესი“.

331 წლის ადრიან გაზაფხულზე ალექსანდრე მაკედონელი, „უკვე ღმერთი, ძე ამონისა, ამონის ბადალი დიდი რქოსანი“ — ეგვიპტიდან გამოვიდა, ფინიკია ამოიარა, ისევ ტიროსში მივიდა და ახალი მსხვერპლწირვანი და საზეიმო ასპარეზობანი გამართა, კვლავაც „მისი წინაპრის“, პერაკლეს სადიდებლად. ტიროსიდან სირიაში და სირიიდან მესოპოტამიისკენ მიმავალ გზებს შეუდგნენ მაკედონელები.

დარიოს III ამ დროს ბაბილონთან, დიდ ველზე, ჯარებს უყრიდა თავს. აქვე მაკედონელთა ტყვეობიდან გაქცეულმა მსახურმა საჭურისმა, ტირეოსმა, შეატყობინა მეფეს მისი მეუღლის გარდაცვალება. სპარსეთის დედოფალი, სიმშვენიერით განთქმული სტატირა, მუცლის მოწყვეტის მსხვერპლი გამხდარა. უსაზღვრო წუხილმა შეიპყრო დარიოსი. თავში ხელები წაიშინა და ატირდა — ჯერ იმის მოთქმით, მისმა მეუღლემ და თანამეცხედრემ სიცოცხლე ტყვეობაში რომ დაასრულა და მერე — სიკვდილის შემდეგაც მეფური პატივით დაკრძალვა რომ არ უღირსა. მაგრამ ტირეოსმა დაამშვიდა მეფე: არც შენს მეუღლეს, არც დედას და არც შვილებს, ალექსანდრესგან საკადრისი პატივი არ დაჰკლებიათ; სიკვდილის შემდგომაც ჩვენი დედოფალი ალექსანდრემ დიდი პატივითაც დაკრძალა და, თავის თანამდგომებთან ერთად, ცხარე ცრემლითაც დაიტირაო.

შეცბუნებული დარიოსი ეჭვის ჭიას ბოლომდე ჩაჰყვა და ერთგულ მსახურს მუქარით და მუდარით მოსთხოვა სიმართლე ეთქვა — დარჩა თუ არა მისი მეუღლე ბოლომდე სხეულშეულახავი ალექსანდრესგან ან ალექსანდრეს ზომ არ უცდია გამარჯვებულის უფლებით ტყვე დედოფლის ხელყოფა... ამის გამგონე ტირეოსი მეფეს მუხლებში ჩაუვარდა და მხურვალედ შეჰლადა — უ იქნები უსამართლო და ტყუილუბრალოდ ჩირქს ნუ მოსცხებ ნურც ალექსანდრეს და ნურც ჩვენი დიდებული დედოფლის სპეტაკ ცხოვრებას, რომელიც საფლავშიაც ისეთივე სიწმინდითა და სისპეტაკით ჩავიდა, როგორი ღირსე-

ბიზაც სიცოცხლეში ბრძანდებოდაო. მაშინ, ალექსანდრეს დიდსულოვნებით გაოგნებულმა დარიოსმა ეს შესძახა, თითქოს: „ღმერთებო, დამიფარეთ და აღმიღვინეთ ჩემი სამეფო, რამეთუ სამაგიერო მივეუზღა ალექსანდრეს ჩემი ოჯახის პატივისათვის, ხოლო, უკეთესი თქვენგან მე უკვე აღარ მიწერია აზიის მბრძანებლობა, მაშინ ამას გთხოვთ, დიდი კიროსის გვირგვინი სხვას არავის არგუნოთ, გარდა ალექსანდრესი!“<sup>1</sup>

ამ გულჩვილი რომანტიკის შემდეგ, დარიოსი ისევ განაგრძობდა ჯარების თავმოყრას ბაბილონის ველზე. მისი სამფლობელოები კვლავ უზარმაზარ, ამოუწურავ საომარ ძალთა წყაროებს წარმოადგენენ. მცირე აზიის, სირია-პალესტინისა და ეგვიპტის დაკარგვა დარიოსისთვის სრულებითაც არ ნიშნავდა ყველაფრის დაკარგვას. მისი სახელმწიფო ჯერ კიდევ „მსოფლიო სახელმწიფო“ იყო, ევფრატისა და ინდოეთამდე ვადაქიმული, რომელშიც თავს იყრიდნენ ჯერ ომისაგან ხელუზღებელი დიდი ქვეყნები — მესოპოტამია, ირანი და ცენტრალური აზია — პართიით, ხორასნით, ბაქტრიით, არიანით, დრანგიანით, გედროზიით და არახოზიით.

მეფის დაძახილზე მოვიდა ბაქტრიის სატრაპი ბესა, რომელმაც ბაქტრიულ მხედრობასთან ერთად, მოიყვანა სოვდიანელები და ინდოელები ინდოეთის „კავკასიიდან“ (პინდუსში). სკვითური ტომის, საკების ცხენოსანთა და მოისართა რაზმებს მოუძღვა მათი ბელადი — მავაკოსი. არახოზიის სატრაპი, ბარსაენტი, მოვიდა არახოზიელებით და კიდევ ინდოელებით: არიანის სატრაპი სათიბარზანი — არიელებით; პართიის სატრაპი ფრატაფერნი — პართიელებით, ჰირკანებით და ტაპურებით; მიდიის სატრაპი ატროპატი — მიდიელებით, კადუსებით, ალბანელებით და საკესინებით; ორონტობატი — გედროზიელებით; არიობარზანი — კარმანიელებით; ორქსინი — სპარსელებით; ოქსათრი, სუზიანის სატრაპის აბულიტის ძე — სუზიანელებით და უქსიებით; ბუპალი — ბაბილონელებით; ორონტი და მითრასტი — არმენიელებით; მაზიოსი — აღმოსავლეთ სირიელებით; არიარათე — აღმოსავლეთ კაპადოკიელებით<sup>2</sup>.

სულ დარიოსის საომარი ღროშის ქვეშ ამჯერად იდგა: 100000 ქვეითი, 40000 ცხენოსანი, 200 ცელებიანი ეტლი, 15 საბრძოლო სპილო — ინდოეთიდან ჩამოყვანილნი<sup>3</sup>.

ხოლო, ალექსანდრე მაკედონელი 40000 ქვეითი მეომრით და 7000 მხედრით, აკვისტოს დაჰმდეგს, უახლოვდებოდა ქალაქ თაფსაკს,



მდინარე ევფრატზე, სადაც ჩვეულებრივ ხდებოდა ყოველი სალაშქრო გადასვლა ჩრდილოეთ მესოპოტამიაში, ჯარის საჯანგებო ნაწილი წინ გაეშვა მეფეს, მდინარეზე ხიდების გასაწყობად და გადალახვის მოსამზადებლად.

მაგრამ მდინარის მარცხენა ნაპირზე მაზეიოსი დამდგარიყო 10000 მეომრით. იგი დარიოსს გამოეგზავნა ევფრატზე მაკედონელთა ვადმოსვლის დასაბრკოლებლად და აღსაკვეთად.

მაკედონელმა „ნიჟინრებმა“ ხიდების შენება წამოიწყეს, სპარსელებმა ხელი ვერ შეუშალეს. მალე ალექსანდრემაც მოაღწია სრულის ძალებით. მაზეიოსს მტრის შეკავების იმედი სულ გადაეწურა და თავისი ჯარით უკუიქცა ისევ დარიოსის მთავარ ძალებთან შესაერთებლად.

დარიოსი კი სრულის ძალებით ბაბილონიდან ჩრდილოეთით წამოსულიყო. იგი მოემართებოდა მდინარე ტიგროსის ზემო წელის მარცხენა, აღმოსავლეთის მხრისკენ, ქალაქ არბელას მიმართულებით.

ალექსანდრემ კი ამასობაში დაუბრკოლებლად გააწყო ორი ხიდი, ასევე ხელშეუშლელად გადაიყვანა ჯარები ევფრატზე. დარიოსი მას ბაბილონში ეგულებოდა და, ბუნებრივად, სამხრეთისკენ უნდა მობრუნებულიყო და ევფრატის დასწვრივ ევლო, უმოკლესი გზით, სწორედ ევფრატზე მდებარე ბაბილონისკენ. მაგრამ ალექსანდრე სიცხიან და ნაკლებ მოსავლიან ევფრატის ხეობას არ ენდო და უფრო გრილი და ნაყოფიერი გზა აირჩია — ჩრდილო-აღმოსავლეთის მიმართულებით, ნისიბისის გავლით, ტიგროსისაკენ და შემდეგ სამხრეთით, მისი ხეობით ბაბილონისაკენ.

ასეც მოიქცა მაკედონელი. მან ჯარი გაიყვანა ნისიბისის გზაზე, ნისიბისიც გაიარა და მიადგა ტიგროსს. ჩრდილო მესოპოტამიის ამ ნაწილს მაკედონელებმა ახალი სახელი დაარქვეს — მიგდონია. აქ, ტიგროსის გადალახვამდე, მაკედონელებმა შეიპყრეს და ალექსანდრეს მოჰგვარეს რამდენიმე სპარსელი მხედარი, რომლებიც დარიოსს მტრის დასაზვერად გამოეგზავნა. ტყვეები იოლად გატყდნენ და ალექსანდრეს აცნობეს, რომ დარიოსი უკვე წამოსულია ბაბილონიდან და დაბანაკებულია ტიგროსის მარცხენა მხარეს; დარიოსს გადაწყვეტილი აქვს, მთელს ძალებით დაუხვდეს და არ დაუშვას მაკედონელთა გადასვლა ტიგროსის მარცხენა ნაპირზე; მისი ახლანდელი არმიები გაცილებით მრავალრიცხოვანი და ძლიერია, ვიდრე ისოსთან ბრძოლაში.

ეს ცნობები ფრიად დამაფიქრებელი აღმოჩნდა ალექსანდრესთვის.

ძალზე სახიფათო იყო მრავალრიცხოვანი სპარსული არმიების ისართა „ცეცხლის“ ქვეშ ღრმა, განიერი და სწრაფი ტიგროსის გადალახვა. არა და, საჭირო იყო, რაც შეიძლება სწრაფად დაეძლია წყალგამყოფი და სწრაფადვე მოქცეულიყო მოწინააღმდეგის წრეწირში. რამდენადაც ტყვე სპარსელთა ცნობებიდან ჩანდა, დარიოსი ასურეთის ძველი სატახტო ქალაქის, ნინევიის მიდამოებში უნდა მდგარიყო. ამიტომ სანამ სპარსთა მეფე მტრის გადმოსვლას მდინარეზე ამავე ადგილების პირდაპირ ვარაუდობდა, მანამ ალექსანდრეს მოულოდნელად, მტრისგან იდუმალ, სულ სხვა ადგილზე უნდა გადაელახა მდინარე, ასედაც მოიქცა, — ღამით ჯარი ბანაკიდან უხმაუროდ გამოიყვანა, გეზი ჩრდილო-აღმოსავლეთით აიღო და სწრაფი, მუხლჩაუტკრეფავი სვლით, ქალაქ ბელზაბდის მახლობლად მიაღდა ტიგროსს. აქ თხელი ფონი იყო, მაგრამ მდინარე მაინც სწრაფი და მძლავრი ტალღებით მოედინებოდა. ალექსანდრემ მისვლისთანავე ბრძანა გადალახვა. ძალზე გაჭირდა მდინარეზე გადავლა. წყალი მეომრებს ყელამდე სცემდა, მძლავრად აწევებოდა და კაცს გასატაცებლად ამსუბუქებდა. მეფის ბრძანებით, ჯარისკაცები ერთმანეთს მჭიდროდ გადაებნენ და კაშხალივით განმტკიცებულნი<sup>4</sup>, უმსხვერპლოდ გადავიდნენ და მარცხენა მთიან სანაპიროს შეეფინნენ. ერთი დღე დასვენა ალექსანდრემ დაღლილ-დაქანცული ჯარი.

ეს მოხდა 331 წლის 20 სექტემბერს. იმ ღამეს მთვარის დაბნელება მოხდა. ბერძენ-მაკედონელთა ჯარი ღრმა შიშითა და შეშფოთებით შეხვდა ამ მოულოდნელ „უბედურებას“. უეჭველად, ღმერთები გაგვიჯავრდნენ და ცუდს რასმეს დაგვმართებენო, — ჯაიძახოდნენ ზოგიერთები; ზოგიც სასიკეთოდ ხსნიდა ამ სტიქიონურ მოვლენას — მთვარე სპარსთა მნათობია და მისი დაბნელება სპარსთა „დაბნელება“ ნიშნავსო. ისევე, როგორც 150 წლის წინათ, ქსერქსემ იხილა საბერძნეთის მნათობის, მზის დაბნელება, რასაც მაშინ საბერძნეთის უბედურება მოჰყვაო. მისანი არისტანდროსიც ალექსანდრეს თავშივე ბრძოლასა და გამარჯვებას უწინასწარმეტყველებდა. ალექსანდრემ მსხვერპლი შესწირა კაცთა საცნობიერო სამებას — მთვარეს, მზეს და დედამიწას<sup>5</sup>. გათენდა თუ არა, ჯარიც სალაშქროდ გამოიყვანა.

მაღიოდნენ სამხრეთით, ტიგროსის გასწვრივ. 24 სექტემბერს მტრის კავალერია გამოჩნდა. ჯერ რიცხვი ვერ გაივარაუდეს, მაგრამ ალექსანდრემ მაინც ჯარები საომრად შემართა და გზა ისე განაგრძო. მალე გამოირკვა, რომ ათასზე მეტი სპარსნი ცხენოსანი უნდა ყოფილიყო.

ალექსანდრემ სამეფო აგემა და პეონთა მსუბუქი ცხენოსნობა აიყო-  
ლია და წინ გაქანდა. სპარსელები გაიქცნენ. ალექსანდრე დაედევნა,  
ზოგი გაექცა, ზოგი აჩჩეხა, ზოგი ტყვედ აიყვანა. ტყვეებმა კი აჩვე-  
ნეს, სადაც იდგა დარიოსი საომარ ბანაკად — ქალაქ გავგამელასა და  
ქალაქ არბელას შორის, უფრო გავგამელასთან მოჭრით, ამავე სახელ-  
წოდების ფართო ველზე. დარიოსს დაეჭვებინა თავისიანებობისთვის —  
ისოსის ბრძოლა იმიტომ წავაგეთ, ველი რომ დავტოვეთ და მტერს  
ვიწროებებში შევეჩხებეთო; ამიტომ ახლა მაინც დაეხვდეთ აქ მაკედო-  
ნელებს, გავგამელას ტრიალ ველზე, სადაც ჩვენი მრავალრიცხოვანი  
ჯარებისა და მხედრობის მიმოქცევას უეჭველად ჩვენს სასარგებლოდ  
წარემართავთო. და ასე გადაუწყვეტიათ, გავგამელას სწორი ველი  
კიდევ მიუსწორებო — მოუსწორებიათ და საომარი მზადყოფნით დაბანაკე-  
ბულან<sup>6</sup>.

ალექსანდრემ ჯარი შეაყენა და, იქ სადაც მდინარე გასერი ტიგ-  
როსს ერთვის — ძლიერი ბანაკი დასცა.

განვლო ოთხმა დღემ და სპარსთა მხრიდან ბაიბური არ ისმოდა.  
ალექსანდრე დარწმუნდა, რომ დარიოსს მტკიცედ აერჩია ბრძოლის  
ადგილი, რომელსაც ის უომრად აღარ შეეღოდა.

მაშინ ალექსანდრემ ბანაკში დატოვა დაჭრილი და დაუძღურებუ-  
ლი ჯარისკაცები, ბრძოლაში გამოსადეგარი ბარგი და საომარი ძა-  
ლებით შუალამისას გაემართა სამხრეთისაკენ. გათენდა 30 სექტემბე-  
რი და მაკედონელები გადაადგნენ უკანასკნელ მალლობს, რომლის  
ქვემოთ გადაიშალა გავგამელას ველი და მასზე, ერთი საათის სავალ-  
ზე — სპარსთა ბანაკი.

ალექსანდრემ ჯარი შეაყენა, მეთაურები თათბირზე იხმო და კი-  
თხვა დასვა — ახლავე გადასულიყვნენ შეტევაზე, თუ ჯერ დაბანაკებუ-  
ლიყვნენ, დაესვენათ და ბრძოლისწინარე ზვერვას შესდგომოდნენ.  
სარდალთა უმრავლესობამ ბრძოლის დაუყოვნებლივი გამართვა ურ-  
ჩია მეფეს, — ბარემ დავიწყოთ, სანამ ჯარს საბრძოლო ცეცხლი არ  
განვლებიაო. მაგრამ მეტი სიფრთხილე მოითხოვა პარმენიონმა: ჩვენი  
ჯარი მგზავრობით დაღლილია, მტრისა კი დასვენებული, პოზიციაც  
თავისთვის მომგებიანი უჭირავთ სპარსელებს: ამასთან სავსებით შე-  
საძლებელია, რომ მტერმა თავისი ბანაკი მსადაგომებთან იღუმალი  
ორმოები და შუბებით აჯაგრული მალული მახეებიც გააწყო; ყველა-  
ფერს ამას დაზვერვა და შეტყობა სჭირდება, ამიტომ ჯერ უნდა დავ-  
დგეთ და დავიბანაკოთო, დაასკვნა გამოცდილმა სარდალმა. ასედაც

გადაწყდა. ალექსანდრემ იმავე მაღლობზე ჯარი დააბანაკა. მტრის თვალისგან დაურიდებლად.

ღარიოსი კი მყარად იდგა თავის ბანაკში. საომარი ველი, მისი ბრძანებით, საკუთარი ეზომიდან მოსავით „გაელამაზებიათ“ — ქვიშის ბორცვები სვესწორებინათ, ეკლიანი ბუჩქნარები ამოეძირკვიათ, ყველაფერი მოეშორებინათ, რაიც კი მისი მხედრობისა და ეტლებს მოძრაობას ხელს შეუშლიდა.

მტრის მოახლოებამ და მაზიეოსის უკუქცევამ გვარიანად შეაშფოთა ღარიოსი, მაგრამ უმაღლვე დამშვივდა მისი სატრაპების „ღამარწმუნებელი ჩიჩინით“ გულმოფხვნილი, ისედაც თვითმრწმენი მეფე. ახლა აშკარად ჩვენი სჯობია მტრისასაო, ახლა შეიტყოს ალექსანდრემ ვინ ვართ და რა ვართ სპარსელებიო, — კვებნასა და ქლესაობაში ერთმანეთს ეჯობებოდნენ ღარიოსის სარდლები.

როცა იმ დილით მაღლობთა გრეხილზე მაკედონელთა ჯარებიც გამოჩნდა, ღარიოსმა იფიქრა, რომ მტერი იერიშზე მოდიოდა და თვითონაც ბანაკი საომრად ფეხზე დააყენა.

მაგრამ იერიში არ შედგა. ისე ჩანდა, მაკედონელები ბანაკად დგებოდნენ. მხოლოდ ცხენოსანთა რამდენიმე რაზმი დაეშვა მთიდან დაბლობზე, ერთხანს გაიქვენ-გამოიქვენეს და, ისე რომ სპარსთა ბანაკისკენ თითქოს პირიც არ უქნიათ, უკანვე გაბრუნდნენ.

დაღამდა. ალბათ, მაკედონელი ღამით გვიზადებს თავდასხმასო, და ღარიოსმა მთელი ღამე თავისი ჯარები საომარ მზადყოფნაში, თვალმოუხუჭავად და მუხლჩაუქეცავად, ფეხზე ამყოფა. მეფეს თვითონაც არ უძინია. ჯართა რიგებში დადიოდა, ცხენზე მჯდარი, ყველას ესალმებოდა, ამხნევებდა და აიმეუღებდა.

მთელი ღამის საომარი ფეხზე დგომა სპარსელებისა უქმად განეჩრულა. უძილობით და საჭურვლის სიმძიმით მეტიისმეტად დაიქანცა ღარიოსის ბანაკი.

ის დღეც ისე გაილია — მაკედონელთა სრული სიმშვიდით და სპარსელთა უკიდურესი სულიერი დაძაბულობით.

ღლის დასასრულს მზვერავთავან მოტანილი ცნობების შემდგომ, ალექსანდრემ სარდლები იხმო და გამოუცხადა, რომ ხვალ დილისთვის იწყებდა ბრძოლას. თქვენი ჩველი შაქვსო, — მიმართა მან თანამებრძოლებს — თქვენი პირადი ვაჟაკობისაც მჯერა და თქვენი ჯარებისაცო; ეს არა ერთ და ორ ბრძოლაში დაგიმტკიცებიათო; ჩვენს

მეომრებს საომარი ცეცხლის გაღვივება კი არა, მკონი უფრო განუღებდა სჭირდებათო, ვინათგან საომარი შემჭარბებლობა მათ დაბადებოთვე მოსდევამთო; თქვენ თქვენი მეომრები გააფრთხილეთ, უხმაუროდ, მღუშმარედ წავიდეთ იეროშხე და მხოლოდ დატაკებისას ყიჟინაც დავეცეთ და საომარი სიმღერაც დავაგრილოთო; მეთაურებმა ჩემი ბრძანება და მინიშნება უმაღვე აღიქვეთ და შეასრულეთ, ისეთივე ზისწრაფით ყოველ მეომარს შეატყობინეთ და შეასრულებინეთო; ყველას ახსოვდეს, რომ ერთის შეცდომა ყველას საფრთხეში გვაგდებსო; მთავარია სისწრაფე და სიზუსტე არ მოვშალოთო; ყველამ ირწმუნეთ და ყველა დაარწმუნეთ, რომ ხვალინდელი დიადი დღის ბედი ცალკეულად ყოველ მეომარზეა დამოკიდებულიო; ყველას ახსოვდეს, რომ ხვალინდელი ბრძოლა იმართება არასირიის, ფინიკიის თუ ეგვიპტისათვის, არამედ მთელი აღმოსავლეთისთვისო; ხვალინდელი ბრძოლა გადაწყვეტს, ვინ უნდა იბატონოს მსოფლიოზეო... სარდალთა თათბირმა საომარი აღტყინებით მიიღო მეფის სიტყვა და მოწოდება<sup>7</sup>.

თათბირი დაიშალა. მეფემ დროზე ეახშამი და დროზე დაძინება უბრძანა ბანაკს. თვითონაც შევიდა კარავში დასაძინებლად.

რამდენიმე სარდალი, მათ შორის პარმენიონი და პოლიპერხონტი, მაინც შეპყვენენ კარავში მეფეს. ეტყობოდა, პარმენიონი მაინც შიშობდა ხვალინდელი ბრძოლის ბედზე, — მტრის სიმრავლე და მისი პოზიციის უპირატესობა აფიქრებდა ბრძოლეშში დაბერებულ სარდალს, და უთხრა პირდაპირ ალექსანდრეს — სპარსთა ბანაკში დანთებულ ცეცხლთა სიმრავლეს და იქიდან მოდენილ ხმაურს ეტყობა, მტერი მართლაც ურიცხვი უნდა იყოს, ამიტომ სჯობია, ხვალ, დღის სინათლეზე კი არა, ამღამითვე მოულოდნელად დავეცეთ მტერს თავზეო. ეს თქვა პარმენიონმა და პოლიპერხონტმაც დაუკრა კვერი.

მეფემ პარმენიონს, თითქოს, არ აკადრა და პოლიპერხონტს კი უთხრა მკაცრად: „მე თქვენ მიჩქევთ ისე მოვიქცე, როგრც ქურდი და ყაჩაღი; ნურას უკაცრავად — მე გამარჯვების მოპარვა სირცხვილად მიმაჩნია და მიჩქევნია დამარცხების სინანულით ვნანობდე, ვიდრე გამარჯვების სირცხვილით მრცხვენოდეს“, — ეს თქვა და უფრო მკაცრად დასძინა: წადით და ხვალისთვის საბრძოლველად გაემზადეთო<sup>8</sup>.

მთელი ღამე გასაოცარი სიმშვიდით ეძინა მეფეს. სარდლებმა მეფის გარეშე ასაუზმეს დილით თავიანთი ჭარები. ბოლოს, პარმენიონი შევიდა და სამჭერ სახელის დაძახებით ძლივს გააღვიძა გვირგვინოსა-

ნი, რომელსაც ისე უდარდელი ძილით ეძინა, თითქოს უმანკო ბავშვი ყოფილიყოს და კისრად ერთი ადამიანის სისხლიც არ ჰდებოდა...

და უთქვამს კიდევ პარმენიონს მაშინ: საოცარია, რომ უკვე გამარჯვებული კაცის ძილით გძინავს და არა იმ კაცის ძილით, რომელსაც ხვალინდელ დღეს ბრძოლათა შორის ყველაზე დიდი ბრძოლის გადახდა მოელოსო. ალექსანდრემაც არ დააყოვნა პასუხი: „როგორ, შენ გგონია, რომ გამარჯვებული არა ვართ? ჩვენ ხომ აღარ გვეჭირდება ხეტიალი და დევნა დარიოსისა, რომელიც აქამდე ასე გაუბრბოდა ბრძოლას ამ ვრცელსა და აოხრებულ ქვეყანაში?“<sup>9</sup> თქვა ღიმილით და სასწრაფოდ იარაღის ასხმას შეუდგა.

დარიოსმა კი კვლავ არ იცოდა, ღამით დაეცემოდა თავზე მტერი თუ დღისით. ამიტომ მთელი ბანაკი მეორე ღამითაც კვლავ ფეხზე ჰყავდა საომრად გამზადებული, უძილარი და ნერვებმოშლილი, მთელა ღამე თვითონაც ფეხზე იდგა მეფეთა მეფე, მსხვერპლს სწირავდა აპურამაზდას, მითრას, მზეს და მარადიულ ცეცხლს, ამხნევებდა და აიძულებდა ყოველ შემხვედრს...

მაშ, სახელოვანი ბრძოლა გავვამელას ველზე.

331 წლის 1 ოქტომბერი.

ომის ღმერთმა ისევ აიღო საომარი სასწორი ხელში, — სასწორის ერთ პინაზე — 140000 აზიელი, მეორე პინაზე — 47000 ევროპელი.

სპარსელთა უკიდურეს მარცხენა ფლანგზე იდგა ბესა, ბაქტრიელებითა და სოგდიანელებით. მათ წინ ასი ცელიანი ეტლი იდგა, რომელთაც მარცხნიდან ათასი ბაქტრიელი და სკვითი მხედარი იცავდა. ბესას მარჯვნივ არახოზიელები და მთიელი ინდოელები იდგნენ; შემდეგ, ისევ მარჯვნიდან მიჭრით, მოჰყვებოდნენ თვითონ სპარსელნი ცხენოსანნი და ქვეითნი, შემდეგ — სუზიანელები და კადუზიანელები. აქ ცენტრი იწყებოდა, ხოლო ცენტრი მთლიანად ეჭირა რჩეულ სპარსელ არისტოკრატთას, „მეფის ნათესავენს“, და „უკვდავ ათასეულებს“. მათ ორივე მხრიდან, მარცხნიდან და მარჯვნიდან, ცენტრი იკეტებოდა ბერძენი მოქირავნეებით. აქვე იდგნენ ინდოელნი, მათივე სპილოებით, კიდევ — კარიელნი და მოისარნი მარდები, ხოლო ამათ წინ — ორმოცდაათი ცელიანი ეტლი. ცენტრის გასამაგრებლად, მის უკან ჩარეგებული იყვნენ კიდევ უქსიები, ბაბილონელები და სიტაქენელები ამრიგად, ცენტრი იმდენად ძლიერა იყო, რომ დარიოსს შეეძლო სრულ მიუწევრობობის იმედით მდგარიყო მის შუაგულში. ცენტრიდან მარჯვნივ, მარდების შემდგომ, თანმიყოლებით იდგნენ: ალბანელ-

ნი და საეკესიები, ფრატაფერნი — პართიელებით, ჰირკანელებით, ტაპურებით და საეკებით, ატროპატი — მიდიელებით, შემდეგ — სირიელები და სულ ბოლოს — კაპადოკიელები და სომხები. აქ კიდევ, წინ წამოწევით, იდგა ორმოცდაათი ცელიანი ეტილი.

ალექსანდრემ ცენტრში ფლანგა ჩააყენა, ექვს ტაქსისად დაყოფილი; ფლანგის მარჯვნივ თვითონ დადგა, მაკედონური და თრაკიული მხედრობით. მარჯვენა ფლანგზე, ყველაზე წინ, სამეფო აგემა დააყენა კლიტოსის სარდლობით. აქვე, მცირედი უკანდახევით — ფილოტა და მისი მხედრობა; შემდეგ, ფლანგაზე მიჯრით, მელეაგრე და მათ უკან — ფაროსნები ნიკანორის სარდლობით. მთლიანად მარჯვენა ფრთას თვითონ მეფე მთავარსარდლობდა. მარცხენა ფრთაზე კი კრატეოსისა და სიმეას ჯარები იდგნენ, ხოლო სულ უკიდურეს ფლანგზე — პარმენიონი ბერძნული და მათგან გამორჩეული თესალიური მხედრობით. მარცხენა ფლანგსაც მთლიანად პარმენიონი სარდლობდა. მეფემ გაითვალისწინა მტრის რიცხვმრავალ ცხენოსანთა მოსალოდნელი შემოვლა ფლანგებიდან და ამიტომ თავისი ორივე ფრთის უკან კიდევ მეორე კოლონა ჩააყენა — „მარჯვენა მეორე“ და „მარცხენა მეორე“, — რომელთაც ევალებოდათ მტრის საფლანგო შემოვლის შემთხვევაში შემობრუნებულებიყვნენ და მის საპირისპიროდ მეორე ფრონტი იგაეხსნათ. „მარჯვენა მეორეს“ შეადგენდნენ: დაქირავებულნი (სარდალი კლეანდროსი), მოისარნი (სარდალი ბრიზონი), აგრიანები (სარდალი ატალოსი), სარისოფორები. (სარდალი არეტოსი), პეონიელები (სარდალი არისტონი) და ახალწვეული ბერძენი მეომრები (სარდალი მენიდა), „მარცხენა მეორეს“ კი შეადგენდნენ: თრაკიელი ქვეითნი და ბერძენ „მოკავშირეთა“ ცხენოსანნი (სარდალი კერანოსი), ოდრისები (სარდალი აგათონი) და დაქირავებული ცხენოსანები (სარდალი ანდრომახოსი).

ბრძოლა დაიწყო.

ალექსანდრემ მაკედონური მხედრობა დარიოსის ცენტრს დაუმიზნა და იერიშზე აფრინა. მაგრამ მაშინვე ბაქტრიელთა და სკვითთა მხედრებმა მოიერიშე მაკედონელებს თავის მხრივ მარცხენა ფლანგიდან მძლავრად შემოჰკრეს. ალექსანდრემ ზედოზედ შეაგება მენიდა ახალწვეულებით და არისტონი პეონიელებით. მაშინვე დარიოსმა ეტილების იერიში ბრძანა; ეტილებიც გაქანდნენ, მაგრამ, — როგორც ალექსანდრესვან წინასწარ ებრძანათ — მაკედონელებმა და აგრიანებმა

გზა მისცეს და გვერდებიდან ისრის, სათხედისა და ქვის სეტყვა და-  
აყარეს, ხმლებით ქაპნები დაუწყვიტეს, შუბებით ცხენები და მეეტ-  
ლეები განუგმირეს, ეტლთა ასეულიდან ზოგი სულ დაღეწეს, დანარ-  
ჩენები ხელთ მოიხელთეს. ამასობაში ალექსანდრემ „მარჯვენა მე-  
ორედან“ კიდევ ერთი საომარი ძალა გაუშვა ბრძოლაში — სარისო-  
ფორები, არეტოსის სარდლობით. არეტოსი დაეძგერა ბაქტრიელებს  
და სკვით-საკებს, რომელთა გააფთრებულ კონტრშეტევეებს ღიღის გა-  
ქირვებით აკავებდნენ მენიდა და არისტონი.

დარიოსს ეგონა, რომ წინ გაჭრილი მისი მარცხენა მხედრობა სა-  
დაც არის გამარჯვების ნაღარას დაპკრავდა და ვერ შენიშნა, რომ მის  
მხედრობასა და ქვეითად მდგარ ცენტრალურ კოლონებს მთლიანობა  
მოშლოდათ და მათ შორის ცარიელი სივრცე ჩასჭროდათ.

ალექსანდრე კი თითქოს ამას უცდიდა, — მაშინვე მუშარადი და  
ბუყეფალა მოითხოვა (უკვე სიბერეში შესულ ბუყეფალას სალაშქრო  
გზებზე მარქაფად ატარებდა და მხოლოდ ბრძოლის ველზე მოახტე-  
ბოდა), ეს იმას ნიშნავდა, რომ ალექსანდრე თვითონ ებმებოდა ხმალ-  
თაკვეთებაში. სხვა ყოველი საჭურველი მანამდეც ტანთ ეცვა, ახლა  
მუშარადი დაიხურა, ბუყეფალას მოახტა, კლიტოს შავი და მისი მხედ-  
რობა აიყოლია და მძლავრი ყიჟინით იერიშზე გაქუსლა. იგი მარჯვე-  
ნადან მარცხნივ, ირიბი გეზით, გააფთრებით ეძგერა დარიოსის  
ცენტრალურ კოლონას. ამ სოლისებრმა გაჭრამ ახლა საესებით გაპ-  
კვეთა და გააშორიშორა სპარსთა ცენტრი და მარცხენა ფლანგი. კენ-  
ოსმა და პერდიკამაც მიუსწრეს თავიანთი ტაქსისებით და შეუერთდ-  
ნენ შორეირიშე მეფეს. ზედიზედ ჩაკაფეს და ჩააწვინეს მაკედონელებმა  
სპარსთა რიგები, რომლებიც ამოდ ცდილობდნენ დამცველ კედლე-  
ბად სდგომოდნენ მათ „ღვთაებრივ მეფეთა მეფეს“. ალექსანდრემ  
თვითონ მიაშურა პირდაპირი ჩეხვით დარიოსს. დარიოსმაც მოასწრო  
რამდენიმე ისრის გასროლა ალექსანდრესკენ, მაგრამ ყველა ნასროლი  
დაუცდა. ალექსანდრემ სამაგიერო სტყორცნა, იმნაც დააცილა სპარს-  
თა მეფეს, მაგრამ მის გვერდით მდგარ მეეტლეს კი გაარტყა სასიკვ-  
დილოდ. უახლოეს მცველებს ეგონათ, დარიოსი დაეცა მკედარიო  
და ეს წამიერი გაუგებრობა საკმარისი გახდა, ერთბაშად აშლილიყვნენ  
და გაქეუულიყვნენ. და კიდევ დადგა ის წუთები, როცა დარიოსს,  
ისოსის ბრძოლის მსგავსად, ისევ ორიდან ერთი უნდა აერჩია — ან  
სიკვდილი, ან სირცხვილი. და ისევ ისოსის მსგავსად, სირცხვილი არ-  
ჩია აზიის მპყრობელმა — მან ყველა და ყველაფერი დაჰყარა, მარქაფს



შოახტა და ბრძოლის ველიდან ვაიქცა. მისი მეომრებიც მიჰყვნენ გაქცეულ მეფეს „ზურგის სიმაგრედ“.

ბანიკამ და გაქცევის ლტოლვამ გაიტაცა სპარსელთა უკანა კოლონაც. ამრიგად, დარიოსის ცენტრალური განლაგებანი პირწმინდად აშალა და აიხვეტა ბრძოლის ველიდან. ამასობაში ბაქტრიელი და სკვითი ცხენოსნებიც აეკათათ ალექსანდრეს მარჯვენა ფლანგის მხედრებს. მაშ, სპარსთა მარცხენა ფლანგიც უკვე აღარ არსებობდა.

მაგრამ სულ სხვა შედეგებით მიიმართებოდა ბრძოლა პარმენიონის მარცხენა ფრთაზე. ფლანგის მარცხენა მხარე, კრატეროსისა და სიმეის სარდლობის ქვეშ მყოფი ტაქსისები, გაბმული სრბოლით ველარ მიჰყვნენ ელვასავით წინ გაჭრილ ალექსანდრეს, დიდი მანძილით ჩამორჩნენ და ამასთან, ერთმანეთის კავშირიც მოეშალათ კრატეროსსა და სიმეისს. ეს კარგად გამოიყენეს სპარსთა და ინდოელთა ჯარებმა და ისეთი ვახელებით გამოქანდნენ, რომ შეუჟავებლად გაიჭროლეს კრატეროსისა და სიმეის ტაქსისებს შორის მტრის ზურგში გავიდნენ და მანამ დაუბრკოლებლივ იჭროლეს, სანამ თვით მაკედონელთა ბანაკში არ შეიჭრნენ. ალექსანდრეს ბანაკს საპატრონოდ თრაკიელთა მხოლოდ მცირე რაზმი ჰყავდა დატოვებული და უფრო სერიოზულ დაცვაზე მას არ უზრუნია, რადგან საერთოდ არ უფიქრია, ასეთი რამ თუ მოხდებოდა. თრაკიელები მაინც მეღვრად დაუხვდნენ მოულოდნელად მოვარდნილ მტერს. მაგრამ ადრე, გზაზე დატყვევებულმა სპარსელებმაც აიშვეს და ზურგიდან მიესივნენ თრაკიელებს; სპარსთა და ინდოთ ჯარებმა მაკედონელთა ბანაკი დაიპყრეს და ველური თავაწყვეტით ძარცვას და ხოცვას შეუდგნენ. დარიოსის დედა და შვილები ენაჩავარდნილი და გაოგნებული უცქეროდნენ ბანაკში დატრი-ალებულ ამბებს.

მაინც დროზე შეიტყვეს ბანაკის გარშემო დატრიალებული დრამა ალექსანდრეს სარეზერვო კოლონის, „მარცხენა მეორის“ სარდლებმა — კერანოსმა, აგათონმა და ანდრომახოსმა, — სასწრაფოდ თავისი ჯარებით უკან შემობრუნდნენ და თვითონაც ბანაკისკენ გაქუსლეს. ისინი შეუხდნენ ძარცვა-წყვეტაში გართულ სპარსელებს, დაერივნენ და თითქმის სრულიად ამოხოცეს. მხოლოდ მცირედნა გადარჩნენ და გაიფანტნენ უგზოდ და უკვლოდ.

იმავედროულად უაღრესად მსჭირვებოდა თვითონ პარმენიონს, რომლის უკიდურესი მარცხენა ფლანგი, თესალიური კავალერია, სპარსთა, პართიელთა და კიდევ ინდოელთა თავბრუდამხვევი იერიშების

ქვეშ მოქცეულიყო. მეორე ნაკადად მაზიეოსი მოქროდა მიდიელთა, კაპადოკიელთა და სირიელთა მხედრობით. ასეთი სასოწარკვეთის დღე პარმენიონს არასოდეს დასდგომია. იმიტომაც მეფესთან შიკრი-კი აფრინა და შეუთვალა: ან მაშველი მომაშველე, ან ყველაფერი და-ღუპულიაო. ალექსანდრემაც ფიცხად პასუხი შეუტრიალა: პარმენი-ონი ალბათ ჭკუაზე შეცდა, ახლა რომ შევლას მთხოვს: აკი მახვილთან ერთად არჩევანიც მას ხელთ უპყრია — ან გაიმარჯვოს ანდა მოკვდე-სო“. <sup>10</sup>. ეს კი შეუთვალა, მაგრამ მაინც არ დაეიწყინია გაჭირვება მამის კბილა ერთგული სარდლისა და, — დარიოსი რომ გააქცია — მის ღვენაზე ხელი აიღო, სპარსთა აშლილი და ახვეტილი ზურგი გა-იარა და ზურვიდანვე თავს დაესხა ჯერ კიდევ მკვიდრად ფეხზე მდგარ სპარსთა მარჯვენა ფლანგს. მოუტრიალდნენ და შეებნენ ალექსან-დრეს სპარსელები, ინდოელები და პართიელები. ეს იყო ყველაზე საშინელი ცხენოსნური ხოცვა-ჟლეტა. ორივე მხარე იბრძოდა გა-მარჯვებობისთვის ან სიკვდილისთვის. სამოცამდე უახლოესი და უმამა-ცესი ჰეტერი დაელუბა ალექსანდრეს ამ გამხეცებულ შერკინებაში. ძალიან ბევრი დაიჭრა, მათ შორის — ჰეფესტიონი, პერდიკა, კენოსი და მენიდა. მაინც გაიმარჯვა ალექსანდრემ. სპარსთა უმრავლესობა და-ირეცა: თითო-ოროლამ გაასწრო სიკვდილს.

პარმენიონსაც შეუმსუბუქდა ბრძოლის სიმძიმე, მან უკუაქცია მაზიეოსი და მისი მხედრობა. ალექსანდრემაც შემოაღწია და შემო-უერთდა. რაკი მეფემ ბრძოლას ამ უბანზეც თავისი გამარჯვება ირწ-მუნა, ისევ გატრიალდა, გვამებით დახერგილი ველი გადაჭრა და გა-ქუსლა იქით, საითაც გაქცეული დარიოსი ეგულებოდა.

გვიან ღამემდე სდია აზიის მაძიებელმა ევროპელმა მეფემ აზიის დამკარგველ აზიელ მეფეს. ნაომარი ველიდან ოთხი საათის სავალ-ზე მიადგნენ მდინარე ლიკოსს. ზედ ხიდზე გაქცეულთა საშინელი შეხლა-შემოხლა და შეკვლა-შემოკვლა დამდგარიყო. დარიოსს კი გა-დაესწრო და არბელასკენ გაქცეულიყო.

ოთხი საათით დაასვენა ალექსანდრემ დაქანცული მხედრები და ცხენები. შუალამისას, მთვარე რომ ამოვიდა, ისევ განაგრძო დევ-ნა. მეორე დღეს მივიდნენ არბელას, მაგრამ დარიოსი იქ აღარ დახე-დათ — იქიდანაც გაქცეულიყო სპარსთა მეფე, გაქცეულს კი ისევ და-ეგდო თავისი ეტლი, ფარი, მშვილდი და ძვირად ღირებული საგანძუ-რები. ალექსანდრემ ყველაფერი დაინადავლა და უკან გამობრუნდა.

მეფის დაბრუნებამდე პარმენიონს მთლიანად დაესრულებია გავ-

გამელას ველზე უზარმაზარი ნადავლის აღება — საქურვლის, კარვე-  
ბის, ეტლების, ძვირფასი ნივთების, ცხენების, აქლემების, საქონ-  
ლის მოკრება და დაბინავება, ორივე მხარის მსხვერპლთა დათვლა და  
სრულიად ბატალიის შეჯამება.

ალექსანდრეს მოგებული ჰქონდა უდიდესი ბრძოლა. გავგამელას  
ველს შესწირვოდა დაახლოებით 50000 აზიელის სიცოცხლე. ალექ-  
სანდრემ კი დაკარგა 500-მდე კაცი და 1000-მდე ცხენი <sup>11</sup>.

ეს საშინელი მარცხი დარიოსისთვის სრულ დამბობას ნიშნავდა.  
ალექსანდრე აზიის მეფედ აღიარეს მტრებმაც და მოყვრებმაც. სუ-  
ლით აღზევებულმა ალექსანდრემ დიდი საზეიმო მსხვერპლწირვა გა-  
მართა, ღმერთებს დიდი შესაწირავები მიართვა, მეგობრები უხვად და-  
აჯილღოვა, საბერძნეთში წერილები აფრინა და ყველგან ტირანია  
გაუქმებულად გამოაცხადა, ყველა ქალაქს ავტონომია მიანიჭა, ზოჯ-  
საც დიდძალი საჩუქარი გაუგზავნა <sup>12</sup>.

დარიოსი კი, — გუშინ მსოფლიოში ყველაზე დიდი მონარქიის  
პატრონი, ახლა იყო მისსავე მიწაზე ლტოლვილი და მიუსაფარი. კი-  
დეც 3000 მხედარსა და 600 ქვეით მეომარს მოეყარა თავი მის გარ-  
შემო. ასეთ ჯარს, არამცთუ მსოფლიო მეფეთამეფე, არამედ რო-  
მელიმე აზიელი მეფეცა ამალადაც ძლივს იკადრებდა. და გარბოდა  
დარიოსი ნაყარნუყარა ამალა-ჯარით, გარბოდა არბელიდან აღმო-  
სავლეთით მიმავალ გზაზე, მიდიისკენ, ქალაქ ეკატანასკენ.

გავგამელას სასაკლავოს გადარჩენილ სპარსთაგან, სატრაპმა არი-  
ობარზანმა მაინც მოახერხა სერიოზული მხედრობის მოგროვება —  
დაახლოებით, 32000 მეომრის შემადგენლობით <sup>13</sup>. ამ ძალებით არი-  
ობარზანმა სამხრეთისაკენ დაიხია და მტკიცედ ჩაკეტა მესოპოტამი-  
იდან სპარსეთისაკენ მიმავალი გასასვლელები. ჩვეულებრივი საფიქ-  
რალით, შესაძლებელი უნდა ყოფილიყო ამ ძალებით და ამ ადგილებ-  
ში სპარსეთის გადარჩენისათვის ბრძოლის ვამართვაც და იქნებ  
სპარსეთის გადარჩენაც, უკეთეს სპარსეთის ერთიანობის მორგანი-  
ზებელი სუბიექტი — თვითონ ხელმწიფე — მოვიდოდა და პირადად  
ჩაუდგებოდა სათავეში თავისი სახელმწიფოს გადარჩენისათვის ბრძო-  
ლის ორგანიზაციას. მაგრამ ხელმწიფე სახელმწიფოს გადარჩენისათ-  
ვის კი არა, უკვე მხოლოდ საკუთარი სიცოცხლის გადარჩენისათვის  
გარბოდა საღდაც, საითაც მოუხდებოდა, უგზოუკვლოდ და უანგარი-  
შოდ.

ალექსანდრე კი აღარც დარიოსს გამოსდევნებია და აღარც არი-

ოპორტანს. იგი ჯერ არბელაში შევიდა, დიდძალი ძვირფასეულობა აიღო და იქიდან ბაბილონისაკენ დაეშვა. ფრთხილად, საომარი განწყობებით უახლოვდებოდა ალექსანდრე ამ უძველეს, ლეგენდებით შემოხილ „მსოფლიო დედაქალაქს“. ვინ მოთვლის და ვინ განსაზღვრავს, რამდენი სისხლი დაქცეულა და რამდენი სიცოცხლე დამრწებულა მის კედლებთან — რომელი დიდი დამპყრობელი არ შემოსევია მას — თუ კასიტები, თუ ხეთები, თუ ასირიელები, თუ სპარსელები — შარუკინები, სინაქერიბები, ასარპადონები, კიროსები, დარიოსები. ალექსანდრეც ელოდა ბაბილონის კარიბჭეებთან დიდ სისხლთა თხევას, თუნდაც იმიტომ, რომ ისწორედ ბაბილონში შემოასწრო და აქ გამავრა გავგამელას ველიდან უკუქცეული, დარიოსის სატრაპრთაგან ყველაზე ენერგიული მაზეიოსი, გადარჩენილი სპარსი ჯარებით.

მავრამ კარიბჭენი განახვნა ბაბილონმა და თავის ლეგენდარულ წიაღში, ვითარცა „ღვთაებრივ გამათავისუფლებელი“, ისე მიიღო ალექსანდრე მკედონელი. ხალხი, ქალაქის მესვეურნი, ბაბილონელი და სპარსელი მოხელენი, ქურუმნი, მკითხავნი და წინასწარმეტყველნი — გვირგვინებით, ყვავილთა თაიგულებით, ფიანდაზის ფენით, საკმევლის კმევით, საგალობელთა დილინით, უმდიდრესი ძღვენებით — ეგებებოდნენ „ღვთის ძესა და ღვთაებრივ რქოსანს“. თვითონ მაზეიოსი გამოეგება, თავისი შვილებით, ალექსანდრეს. გამოეგება და მოართვა ქალაქის, მისი ციხესიმაგრეებისა და საჭურჭლეების კლიტენი.

ბაბილონი იყო პირველი ყველაზე უფრო დიდი ჯილდო გავკამელას ველზე გამარჯვებისთვის. აღტაცებული მოიხილავდა ევროპელი გვირგვინოსანი ამ ზღაპრულ ქალაქს, მის მძლავრ გალავნებს, ციხე-კოშკებს, საფეხუროვან ზიკურატებს, განიერ მოკირწყლულ ქუჩებს და მოედნებს, გრანდიოზულ ბელის ტაძარს, მსოფლიოს შეიდეულ საოცრებათაგან სახელგანთქმულ „კიდულ ბაღებს“. ალბათ თავისი პელა, ბაბილონის გრანდიოზულობასთან შედარებისას, საცოდავ სოფლადა და წარმოუდგებოდა გაოგნებულ და გაშეშებულ ალექსანდრეს. იგი იდგა მთელი მსოფლიო სიმდიდრის, დოვლათის, კულტურისა და „ყოველგვარი მოდის“ ყველაზე მთავარ სამიმოქცევე გზაჯვარედინზე. აქ მოედინებოდა და აქედან გაედინებოდა ყოველი „მსოფლიო გზა“.

ალექსანდრემ ოთხი წლის დაუსვენარი და უმძიმესი ლაშქრობებით განაწამები ჯარები ბაბილონში ხანგრძლივი დასვენებით და განსვენებით დააჯილდოვა. ჯარისკაცები თავდავიწყებით გადაეშვნენ

მთელს მსოფლიოში ყბადადებულ „ბაბილონურ ცოდვათა“ მორეკვი. რქროს თასებით, ძვირფასი ჭურჭლებით, უთვალავი ხორაკითა და ნაირნაირი, გონისწამართმეველი სასმელებით დატვირთული სუფ- რები, სურნელოვანი ნელსაცხებლებით დახელილი შიშველი სნეულნი, თავაწყვეტილი როკვა, ფრივოლური არშიყოზა და უსირცხვილო სრუშობაა — აი, ყველაფერი, თურმე რისთვისაც „ღირს ცხოვრება“ ამ ეფემერულ წუთისოფელში. აი, თურმე რა ყოფილა „ბედნიერი აზია“, რაც არ სცოდნია და არ უგემნია ამდენ ხანს „უბედურ ევრო- პას!“

„აი თურმე როგორ ცხოვრობენ აზიელი მეფეებიო“, ისოსში რომ წამოსცდა ალექსანდრეს, აქემენიანთა მდიდრულ აბაზანაში განბანვის ეამს, — მაშინ ალექსანდრე პირველად „გაინათლა აზიურად“. ახლა იგივე შეეძლოთ ეთქვათ მის მეომრებს — აი, თურმე როგორ ცხო- რობენ აზიელებიო, და ისინიც, მათი „სამაგალითო მეფის“ მაგალი- თად, უკვე „ინათლებოდნენ აზიურად“.

მაგრამ მას შემდეგ, რაც ჭარისკაცი ოფლისა და ნივრის სუნს ნელ- საცხებელში გაცვლის, ან საომარ გვირგვინს სანადიმო თასს ანაცვა- ლუბს და წყაროს წყალს ღვინით თუ თრიაქით შეეცვლის ან კიდევ ომით დაღლილი თავის მისაყრდნობად სალაშქრო უნაგირზე უფრო ქალის მკერდს ამჯობინებს — ასეთი ჭარისკაცი ჰკარგავს ჭარისკაცო- ბას. ასეთი ჭარი ძალაგამოცლილ, ჰკუადაკარგულ ჭოგს ემსგავსება. ამაზე აზიელ ხელმწიფეს არ უფიქრია და, — ნაცვლად იმისა, რომ საბრძოლო უნაგირისგან ჯანდაცვილ მტერს მობრუნებოდა — იგი უქანმოუხედავად გარბოდა. ალექსანდრეს კი, — თუ იგი ოდესმე წო- ნასწორობას დაჰკარგავდა — დროულად წონასწორობის აღდგენის აღ- ლოც არ აკლდა. ახლაც, 34 დღე-ღამის თავაწყვეტილ ორგიათა შემდ- გომ, ჭარი მკაცრი ბრძანებით თავდავიწყებას ივამოჰყარა და სრული საბრძოლო განწესრიგებით ისევ საომარ გზაზე შეაყენა.

მაგრამ ყოველივე მაინც წმინდა „ვიტალურ-ბიოლოგიურ“ სფე- როს განეკუთვნებოდა და „აზიელობა“ მარტო კუქთან და სხეულებ- რივ განცხრომასთან გაიგივებას ვერასგზით ვერ დაითმენდა. აზია უწი- ნარეს ყოვლისა უდიდესი და უპირველესი, მრავალფეროვანი და მრავალმორევიანი კულტურის სამშობლო და მთავრე იყო. ბაბილონი კი კორიფევსული ცენტრი იყო აზიის უმაღლესი სულიერი და ნი- თიერი კულტურებისა.

საერთოდ კი უმთავრესი საკითხი აზიაში ალექსანდრეს ბატონობის

„მეთოდოლოგია“ იყო. მაკედონის მეფემ სამ დიდ ბრძოლაში გაანადგურა სპარსთა ჯარები, მაგრამ ახალ „აზიის მეფეს“ ჯერ არც აზიის განუყოფელი ხელმწიფობა ეთქმოდა და არც საკუთრივ სპარსეთის მფლობელობა. ბრძოლაში გამარჯვება ჯერ კიდევ არ უდრის დამარცხებულთა ქვეყნის დაპყრობას. მთავარი გასააზრებელი ეს იყო — თუკი ამდენი გამარჯვებების შემდეგ ალექსანდრე სპარსეთის ტახტზე ასვლას აპირებდა, ვითარცა მხოლოდ მაკედონელი თუ ბერძენი დამპყრობელი — მაშინ მის ბატონობას აზიაში არავითარ შემთხვევაში განხორციელება არ ეწერა; ან სხვანაირად — უცხოური მონობის უღლით ერთი ციციქნა მაკედონიიდან მოსული ეგოისტური დამპყრობელი აზიის კონტინენტზე მკვიდრად ბატონობის ტახტს ვერასგზიოთ ვერ დაიდგამდა. მაშ, — თუკი ალექსანდრეს აზიელ ხალხებზე რეალური ბატონობის მოპოვება სურდა, მისი „უცხოური უღელი“ აზიელებისათვის, და მათ შორის სპარსელებისათვის, გაცილებით უფრო მსუბუქი და მოსათმენი უნდა ყოფილიყო, ვიდრე ამდენი ხნის „შეჩვეული“ და „მორგებული“, „მშობლიური უღელი“. ასეთი „იდეალური ბატონობის“ მიღწევის გზა კი ისევ ადგილობრივ დაპყრობილ ხალხთა ყოფითი და კულტურული მონაპოვრების პატივისცემა, ანგარიშგაწევა და აღიარება იყო, — თანაც ისეთი აღიარება, როცა დაპყრობილი თავს დაპყრობილად აღარ გრძნობს ან აღრინდელ დაპყრობაზე უფრო ნაკლებად გრძნობს. ალექსანდრეს კი აზიაში ფეხის შემოდგმისთანავე დაწყებული ჰქონდა და აქამდე აგრძელებდა ამ „ნაკლებ ბოროტი დაპყრობის“ პოლიტიკას. აქამდე მან ყველა მის მიერ დაპყრობილი ხალხის ტრადიციული წესი, ადათი, კანონი, რელიგია და კულტურა აღიარა და პატივი სცა, ბერძნულთან და მაკედონურთან ყოველი აღმოსავლური და აზიური თანაბარუფლებიანად და თანაბარშემწუნარებლურად გამოაცხადა. როგორც ვნახეთ, ასე მოიქცა ალექსანდრე ტიროსში, იერუსალიმში, მემფისში და ასე იქცეოდა ახლა ბაბილონში. აქ მან ისევ შეამკო და გაამდიდრა ქსერქსესგან გაძარცვული და შერყვნილი ტაძრები, აღადგინა გოდოლი ბელ-მარდუქისა (პირველსახე ბიბლიური „ბაბილონის გოდოლისა“) და ადგილობრივ ქურუმობას მოუწოდა, ამიერიდან წირვა-ლოცვა ბაბილონელი პანთეონის სადიდებლად ყოველთვის ისეთავე წესებითა და დიდებამოსილებით ეწარმოებინათ, როგორც ნაბუქოდონოსორის „ოქროს ხანაში“. ამით ალექსანდრეს სურდა ბაბილონიც მის „მსოფლიო მონარქიაში“ ისეთივე „ორგანულ ნაწილად“ შესულიყო, როგორც აქამდე

„ორგანულად თავმოყრილი“ მაკედონია, საბერძნეთი, მცირე აზია, სირია, ფინიკია, პალესტინა და ეგვიპტე.

ყოველფე ეს იყო გზა ალექსანდრეს განაზრახვის განხორციელები-სა — ბერძნულ და აღმოსავლურ კულტურათა შერწყმისა, ევროპელ და აზიელ ხალხთა „გათანასწორებისა“ და „გაერთიანებისა“, რაიც თავის მხრივ საფუძველი უნდა გამხდარიყო მისი „მსოფლიო მონარქიის“ მარადიული სიმყარისა და მასზე საკუთარი ერთმფლობელობის შეუწყვეელი და განუტევეელი სიმტკიცისა.

მაგრამ აქვე დგებოდა საკითხი ამ „ახალი სახელმწიფოს“ ახალი აღმინისტრაციული მმართველობისა. მართლაცდა, თუ ყოველი ახლად დაპყრობილი (ბოდიში — ახლად შემოერთებული) ქვეყნის სათავეში, ახალ სატრაპებად და მმართველებად ალექსანდრე მხოლოდ მაკედონელს ან ბერძენს დანიშნავდა, მაშინვე მოსულ და დამხვდურ (ანუ — დამპყრობელ და დაპყრობილ) ხალხთა გათანასწორებისა და გაერთიანების გამოცხადება მხოლოდ ლიტონ, ფარისეულურ ლაყბობად რჩებოდა. ალექსანდრე კი აქაც პრინციპული და ბოლომდე თანმიმდევრული ჩანდა. იგი ადგილობრივ სპარსულ დიდკაცობას ითავისებდა, სპარსეთის სატრაპიათა სატრაპებად ისევ სპარსელებს იყენებდა — ან ძველს ტოვებდა, ან ახალს აწინაურებდა. დარიოსსე უკეთესი სპარსული ამალა ახლა ალექსანდრეს ჰყავდა. სპარსელ არისტოკრატებს ასეთი დაფასება, წყალობა, მოალერსება და, რაც მთავარია, თავისუფალი აზროვნების უფლება „მშობლიური მეფისგან“ არა ჰღირსებიათ, როგორც ახლა ამ „ღვთისნიერი უცხოელისგან“ მოიპოვეს.

ასე, აღმოსავლეთის ლაშქრობათა დასაწყის წლებშივე ალექსანდრემ თავის სამსახურში და უახლოეს კარსკაცებში აიყვანა ადრე დარიოსთან ნამსახური სპარსელი პოლიტიკოსები: მითრინი — სარდლდან, მასაკე — ტიროსიდან და ამინაპე — ეგვიპტიდან. გავგამელას ბრძოლის შემდეგ ალექსანდრემ მითრინი სომხეთის სატრაპად გაგზავნა. ახლა კიდევ მაზეიოსი, — რომელიც გავგამელას ველზე მაკედონელებს სპარსთაგან ყველაზე თავგანწირულობით და დაუნდობლობით ებრძოდა, ალექსანდრემ ბაბილონიის სატრაპად დანიშნა.

ასეთი მაგალითების შემხედვარე სპარსული არისტოკრატია უმაღლურ და უძლურ დარიოსს ტოვებდა და ადამიანის პირად ღირსებათა დამფასებლის, „კეთილი ალექსანდრეს“ ბანაკს უერთდებოდა.

მაგრამ, რასაკვირველია, ალექსანდრეს არ ავიწყდებოდა, რომ

„შერწყმა“, „შეერთება“ და „შეერთნაირება“ ადმინისტრაციული მმართველობის სისტემაში იმას არ ნიშნავდა, რომ სპარსულ სატრაპიაში ყველაფერი ძველებურად ისევ სპარსელი სატრაპის ხელში დარჩენილიყო. ალექსანდრეს ახალი ადმინისტრაციული სისტემა სრულად მქლავნდებოდა ისევ ბაბილონიის მაგალითზე. აქ სატრაპი სპარსელი იყო — მაზეიოსი, მაგრამ გარნიზონი — მაკედონურ-ბერძნული და გარნიზონის უფროსიც მაკედონელი — აგათონი (პარმენიონის ძმა), სატრაპის საერთო სტრატეგიულ საქმეთა გამგებელი — ბერძენი — აპოლოდოროს ამფიპოლისელი, და ბოლოს, ხარკის ამკრეფი ისევ მაკედონელი — ასკლეპიოდოროსი.

ასე, ამნაირი „ინტერნაციონალური თაივული“ ჩნდებოდა ალექსანდრეს გვირგვინის ქვეშ მოქცეული ყოველი ახალი ქვეყნის სათავეში...

ხუთკვირიანი დასვენების, „თავდავიწყებისა“ და კვლავ „გონზე მოსვლის“ შემდეგ, ალექსანდრე ბაბილონიდან გამოვიდა და სუზისაკენ წარემართა.

სუზაში, სპარსთა ამ უძველეს სატახტოში, ალექსანდრეს დიდი სამეფო საგანძურები ეგულეებოდა და მათ დასაუფლებლად ჯერ კიდევ არბელადან მსუბუქი ცხენოსნებით გაგზავნა მაკედონელი ფილოქსენოსი, სამეფო ზაზინის გამგებელი. გზაზედ ალექსანდრეს ამბავი შემოაგება კიდევ ფილოქსენოსმა — სუზაც ჩვენს ხელშია და საგანძურებიცო, სატრაპმა აბულითმა ქალაქი თვითონ ჩამაბარაო. ფილოქსენოსის შიკრიკს თან ახლდა თვითონ აბულითის ძე, რომელმაც მამის სახელით მორჩილება გამოუცხადა ევროპიდან მოსულ მბრძანებელს.



ბაბილონიდან წამოსვლის მეოცე დღეს ალექსანდრე უკვე სუზაში იყო. აბულები შემოეგება, ეთაყვანა და უამრავი საჩუქრები შემოაგება, მათ შორის სწრაფმავალი აქლემები და ინდოეთიდან ჩამოყვანილი თორმეტი საბრძოლო სპილო. აქემენიდების მიერ ორასი წლის მანძილზე ნაგროვები უთვალავი სიმდიდრეების მფლობელი შეიქნა მაკედონიის მეფე. მარტო ფულად 50000 ოქროსა და ვერცხლის ტალანტი აიღო მეფემ; ამას გარდა, მის საკუთრებად იქცა დიდი მარაგი ძოწისა, ნელსაცხებლებისა, სანელეზლებისა, კეთილშობილი ქვეებისა, თვალ-მარგალიტისა, დიდი ხელოვნებით ნაჭედი და ძვირფასად მოოჭვილი ნივთებისა; აქვე აღმოჩნდა ქსერქსეს მიერ საბერძნეთიდან გატაცებული სიმდიდრენი, მათ შორის ათენის სახალხო გმირთა — პარმონიოსისა და არისტოკრეიტონის ცნობილი ბრინჯაოს ქანდაკებანი, რომლებიც ალექსანდრემ მაშინვე ათენში დააბრუნა.

აქვე, სუზაში ერთი კუთრიოზიც შეემთხვა ალექსანდრეს. იგი სპარსელი მეფეების სასახლეში შევიდა და ძვირფასად მოოჭვილ და ბრწყინვალედ მანათობელ ტახტს მიაშურა. უნდა დამჯდარიყო, მაგრამ ტანმორჩილმა მაკედონელმა ახოვანი აქემენიდების ტახტის სიმაღლე ვერ გამოთვალა და, დაჯდა კი არა, უფრო შესკუპდა და ფეხები ძირამდე ველარ დააწვდინა; უცებ ვიდაცამ, უხერხულობის გასაქარწყლებლად, ფეხებქვეშ რაღაცა შეუდგა. ალექსანდრეს ძირს არ დაუხედავს — თითქოს არაფერიც არ მომხდარიყოს. უცებ ქვეთინი გაისმა. ეს დარაოსის მსახური საქუთრისი ტიროდა. ალექსანდრემ ახლა დაინახა, რომ ფეხებში მისთვის პატარა სუფრა შეედგათ, ბაჯაღლო ოქროსი და უთხრა იმ საქუთრისმა ალექსანდრეს ტირილით: მაგ სუფრაზე, ახლა შენ რომ ფეხები გიდგას, ჩემი მეფე სადილობდაო ხოლმე. ალექსანდრეს შერცხვა, ფეხები აიღო და სუფრის გატანა ბრძანა. იქვე მდგარმა ფილოტამ კი ეს ამბავი სასიკეთო ღვთაებრივ მინიშნებად მიიჩნია და არ ანებებდა სუფრის გატანას — ნუ იზამ, მეფეო,

რადგან შენ რომ შენი მტრის სასადილო სუფრაზე ფეხები გიდგას, დიდ სასიკეთო რასმეს მოასწავებსო. მაგრამ მეფემ არ ინება დამარცხებული მტრის ეგზომი შეურაცხყოფა და სუფრა გაატანინა.

აქვე, სუზაში, ალექსანდრემ მიიღო მაკედონიიდან ანტიპატროსის მიერ გამოგზავნილი ახალი ჯარები — 6000 ქვეითი და 500 ცხენოსანი მაკედონელი, 3500 ქვეითი და 600 ცხენოსანი თრაკიელი, 4000 ქვეითი და 1000 ცხენოსანი პელოპონესელი ბერძენი, სულ — 13 500 ქვეითი და 2100 ცხენოსანი<sup>1</sup>. ყველა ეს ჯარი ალექსანდრემ მთავარ სამომარ ძალებზე გადაანაწილა, რაიც სამომავლოდ მაკედონელთა ტაქტიკაში მნიშვნელოვანი ცვლილებების მაუწყებელი უნდა ყოფილიყო.

სუზასთან განთქმული მედროვე-საქურძის, ბაგოასის მდიდრული სასახლე იდგა, დიდძალი ძვირფასეულობით ავსებული. პარმენიონს აჩუქა ალექსანდრემ ეს სასახლე<sup>2</sup>.

დიდხანს აღარ დარჩენილა სუზაში ალექსანდრე. მას სპარსეთის სამეფო ქალაქებში შესვლა ეჩქარებოდა, ვინათგან დიდი აქემენიდების — კიროსის, კამბიზის, დარიოს I-ისა და ქსერქსეს სასახლეთა და უფლება, ნივთიერადაც და მორალურადაც, სპარსეთის სრულ დაუფლებასა და აქემენიდების საბოლოოდ დამხობას ნიშნავდა. ამიტომ და აჩქარა ალექსანდრემ სუზის სატრაპიის საქმეთა მოგვარება. სატრაპად ისევ სპარსი აბულითი დატოვა, ქალაქის აკროპოლისიც სპარსელ მახარს ჩააბარა, სუზაში 30000-იანი ბერძნულ-მაკედონური გარნიზონი ჩააყენა, არქელაოსის სარდლობით. მეფემ აქვე დააბინავა დარიოსის ოჯახის წევრები — დედა სიზიგამბისი, ქალიშვილები და ვაჟიშვილი — ბატონიშვილი, — დააბინავა მეფური პარტივისა და ყურადღების ქვეშ, მათთანვე, ბერძნული ენის სასწავლებლად დატოვა ბერძენი მასწავლებლები.

331 წლის შუა დეკემბერში, სუზაში ოთხი დღის ყოფნის შემდეგ, ალექსანდრე წარემართა საკუთრივ სპარსეთისაკენ. მაკედონელებმა გაიარეს სუზიანის დაბლობები და, გზაზე, მთიელი მწყემსი ტომის უქსიების წინააღმდეგობის დაძლევის შემდგომ, მიადგნენ საკუთრივ სპარსეთში შემავალ გზაბოძალს.

აქ არმია ორად გაჰყო ალექსანდრემ. ერთი ნაწილი პარმენიონს ჩააბარა და მთავარ სამხედრო გზაზე გაუშვა, მეორე ნაწილს თვითონ უსარდლა და, უფრო მოკლე, მაგრამ სახიფათო ვიწრობებით „სპარსეთის კარებისაკენ“ წარემართა. მან შეუსვენებელი მგლურით ზუთ დღეში მიაღწია ი. წ. „სუზის კლდეთა“ შორის ვიწრო გასასვ-

ლელს<sup>3</sup>, რომელიც 40 000 ქვეითი და 700 ცხენოსანი მეომრით უკვე მტკიცედ ჩაეკეტა დარიოსის ერთგულ სატრასს, არობარზანს.

ალექსანდრემ, დაბანაკებისა და ერთი ღამის გათევის შემდეგ, დილით ადრე, იერიში მიიტანა კლდოვან გასასვლელზე. სპარსელებმა სამი მხრიდან ხშირ მერეხად დააყარეს ისარი, შუბი, საოხედი, ქვა, კლდეზე ნასხლეტი ლოდები და ზეავები. რამდენიმე მეომრის უსაზმ-ნო დაღუპვისა და დაშავების შემდეგ, ალექსანდრე უკუიქცა ბანაკი-საკენ.

მდგომარეობა გართულდა. ეს ერთადერთი გზა იყო სპარსეთის მთავარი ქალაქის, პერსეპოლისისაკენ მიმავალი და მისი დაქლევის გაქონაურება საეჭვოს ხდიდა მაკედონელი მეფის ამდენ წარმატებათა შემდგომ სიმყარესა და მდგრადობას. სანამ იგი „სუზის კლდეებს“ ასკდებოდა, მანამ შესაძლებელი იყო სპარსთა ამ მოულოდნელ წარ-მატებას დარიოსი გონს მოეყვანა და საომარ ველზე შემოებრუნებინა.

მაშინ სპარსელმა ტყვეებმა აუხსნეს ალექსანდრეს, — მანლობელ მთებზე არსებობს ბილიკები და გზაწვრილები, თუმცა თოვლიან-ყინვიანი და სავალად სახიფათონი, მაგრამ მათი დაძლევით მაინც ხერხ-დება ამ კლდოვან გასასვლელთა და სპარსთა ბანაკის შემოვლა.

ალექსანდრემ უყოყმანოდ გადაწყვიტა, ამ ახალ, ხიფათით სავსე გზასაც შეებოდა. მან ჯარის ერთი ნაწილი კრატეროსის სარდლობით, ბანაკში დატოვა და უბრძანა ღამე იმდენივე ცეცხლი დაენთო, რამდენიც მანამდე ინთებოდა; ამით მტერს უნდა ერწმუნებია, რომ მაკედონელთა ჯარები განუყოფლად ადგილზე იდგნენ. ხოლო, შემდგომ, როცა კრატეროსი მტრის ზურგში მაკედონელთა საყვირების ხმას გა-იგონებდა, თვითონაც მაშინვე შეტევაზე უნდა გადასულიყო. ეს ბრძანა ალექსანდრემ და თანამოლაშქრეებად აიყვანა პერდიკა, ამინ-ტა და კენოსი თავიანთი ტაქსონებით, ამათთან კიდევ — აგრიანები, ფაროსნები და მაკედონური მხედრობა ფილოტას სარდლობით. ყვე-ლა ამათი თანხლებით, ალექსანდრე შეუდამისას იღუწალ ბანაკიდან გავიდა და მთებში მიმოკარგულ ბილიკებს შეუდგა. გზა მართლაც უმძიმესი იყო, კლდოვანი, თოვლიანი და სხლტომადი, მაგრამ მთავა-რი ის იყო, რომ მეგზურები ჯარებს უშეცდომოდ მიატარებდნენ. დი-ლით მტერს თავზე მოექცნენ. აქედან მარჯვნივ მთაგრეხილი მიმართე-ბოდა. ქვემოთ კი მდინარე არაქსი (ბენდ-ემირი) და მისი ხეობა გაშ-ლილიყო, მასზე პერსეპოლისისკენ მიმავალი გზით.

იმ დღის შესვენების შემდგომ, ალექსანდრემ ჯარი ორად გაჰყო.

ამინტა, ფილოტა და კენოსი მათი რაზმებით ხეობაში ჩაგზავნა, მღ-  
ნარეზე ხიდის გასადებად და პერსეპოლისის გზისკენ სპარსთა უკან-  
დახვევის შემთხვევაში, მათზე თავდასასხმელად. თვითონ, პერდიკასა  
და ჭარის თანხლებით, დაეშვა მთაზე, რათა მტრის ბანაკს დასცემოდა.  
დაშვება — სიბნელის, ხშირი ტყეების, თოვლით დაფარული ხევხუვე-  
ბისა და ქარბუქის პირობებში — გაცილებით უფრო მძიმე და ძნელი  
შეიქნა. მაგრამ მიზანი მაინც მიღწეულ იქნა. რიყრაყზე მტრის პირ-  
ველ ფორპოსტს მიატანეს და ყველანი უხმაუროდ ამოწყვიტეს, მეორე  
ხაზიკ სრულად დაიხელთავეს. მესამეზე — ზოგი დაზოცეს, ზოგნიც  
გაექცნენ და მთებს შეეხიზნენ. სპარსთა მთავარი ბანაკი კი არხენად  
განისვენებდა, მათ ექვი არ ეპარებოდათ, რომ მაკედონელები უკლებ-  
ლად თავის ბანაკში იყვნენ ჩაკეტილნი და ზამთრის ასეთ ყინვიან-ქარ-  
ბუქიან უემურ ამინდში მთებში ლაშქრობა ხომ სრულიად წარმოუდ-  
გენელი უნდა ყოფილიყო.

მაგრამ უეტრად, მოწმენდილ ცაზე მებნის გავარდნასავით, დაიგ-  
რიალეს მაკედონელთა საყვირებმა და სპარსთა ბანაკი ორივე მხრი-  
დან გააფთრებული იერიშების მარწყუხებში მოექცა. წინიდან კრატი-  
როსი მოდიოდა, ზურგიდან თვითონ ალექსანდრე. სპარსელები ხან  
ერთ მხარეს მიაწყდნენ და შეაწყდებოდნენ, ხან მეორეს. რაკი  
სხვა გზით ხსნა აღარ იყო, სპარსელები ბანაკის კედლებიდან გადაც-  
ვიდნენ და გვერდითი გზით შეეცადნენ სიკვდილის წრიდან თავის  
დაღწევას. მაგრამ ალექსანდრეს წინააწარ ეს „მესამე გზაც“ გაუთ-  
ვალისწინებია და იქ პტოლემაიოსი ჩაუსაფრებია 3000 მეომრით.  
და გამოუხტა პტოლემაიოს ლაგიდი მისკენ გაქცეულ მტერს და ამო-  
წყვიტა სულ ერთიანად, მაშინ ყოველის მხრიდან გზამოჭრილი სპარ-  
სელები თვით მაკედონელთა ბანაკში შერბოდნენ, პირუტყვეული ში-  
შით ატანილნი და გონწართმეულნი. აქ კი, ბუნებრივია, ან სიკვდილი  
ან ტყვეობა ელოდათ. ბევრი გაქცეული სპარსელი უფსკრულში  
სხლტებოდა და სულხოციკიანად იკარგებოდა. თვითონ არიობარზანმა,  
40 მხედრისა და 5000 ქვეითის თანხლებით, ძლივს გაარღვია მტრის გა-  
რემოცვა და მთებს მისცა თავი<sup>4</sup>.

პერსეპოლისისკენ გზა გახსნილი იყო და ალექსანდრემაც, მცირე  
შესვენების შემდგომ, დაძრა ჯარები სპარსთა უდიდესი და უბრწყინ-  
ვალესი ქალაქისკენ. გზაზე მეფემ პერსეპოლისის სამეფო საგანძურ-  
თა ზაზინაღარის, ტირიდატის წერილი მიიღო — დროზე მობრძანდით  
და საგანძურები ჩაიბარეთ, თორემ მათ გაძარცვა და დატაცება ელო-

დებათო, — სწერდა ტირიდატი ალექსანდრეს. სისწრაფის ფასი ალექსანდრესავით ვინ იცოდა და მაშინვე, — ჭვეით ჯარებს ჩვეულებრივი სალაშქრო სვლა უბრძანა, თვითონ კავალერია აიყოლია და გაფრინდა. ამინტას, ფილოტას და კენოსს, მეფის დავალებისამებრ, ხიდის გადაება დაემთავრებინათ. ალექსანდრემ ისინიც გაიყოლია, ხიდი გადაიქროლა და მალე პერსეპოლისს მიიჭრა.

პირველი, რაიც მაკედონელებმა ქალაქის მისაღვომზე იხილეს, იყო საშინელება — ათასამდე ხეიბარი ბერძენი, ადრე სპარსთაგან დანატყვევარნი, ნაწამებნი და ნადრევად დაბერებულნი; ზოგისთვის ხელი მოეკვეთათ, ზოგისთვის ფეხი, ვისთვის თვალი ამოეგდოთ, ვისთვის ყურები დაეთალათ, ვისთვის ენა მოეჭრათ და ვისთვის კიდევ ცხვირი. მოცივიდნენ და ბღავილით, ტირილით ჩაუცივიდნენ ფეხებში „ბერძენთა მეფეს“ და „თვისონ ბერძენს“, მარტო ბერძენთა კი არა, მთელი კაცობრიობის „მხსნელს“ — ალექსანდრე მაკედონელს. სურათი იყო ფრიად დრამატული და ხელსაყრელი ალექსანდრეს საანტიმენტალობისა და „გულკეთილობის“ სადემონსტრაციოდ<sup>5</sup>.

პერსეპოლისმა კი განაზღვნა კარნი.

უომრად, უქმაუროდ და უყოყმანოდ ჩაბარდა მაკედონელს სპარსთა საამაყო და სათაყვანო ქალაქი, მისი უმდიდრესი საგანძურებით და საჭურჭლეებით, უბრწყინვალესი სრა-სასახლეებით, ტაძრებით, მძლავრი ციხესიმაგრეებით და გალავნებით.

ასევე სწრაფად, უსისხლოდ და უჯაფურად ჩაიბარა ალექსანდრე მაკედონელმა სპარსეთის იმეორე, უძველესი და უმდიდრესი ქალაქი პასარგადი. აქ ინახებოდა სპარსეთის სახელმწიფოს დამაარსებლის — კიროს უფროსის საგანძურები.

ყველაფერი დაისაკუთრა ალექსანდრემ. — მრავალათასეული ოქროსა და ვერცხლის ტალანტი, უთვალავი ძვირფასი ქსოვილი, უთვალავი კეთილშობილი ქვა და თვალმარგალიტი. წყაროები გვარწმუნებენ, რომ ყველა ამ საიმდიდრის გამოსატანად საჭირო გახდა ათი ათასი წყვილი ჯორი და ხუთი ათასი აქლემი<sup>6</sup>.

მარტო სპარსეთის მეფეთაგან ორასი წლის მანძილზე ნაძარცვ-ნაგროვებ ქონებათა დაუფლება როდი იყო მთავარი ალექსანდრესთვის. უდიდესი მორალური მნიშვნელობა ენიჭებოდა თვითონ სპარსეთის, — ვითარცა აქემენიდური მსოფლიო სახელმწიფოს ძირითადი დვრიტის დაპყრობას. სწორედ აქ, პასარგადის ველზე დაამზო სპარსმა კიროსმა მიდიელთა ბატონობა, აქვე საფუძველი ჩაუყარა ახალი სპარსული

სახელმწიფოსა და მისი „მარადიულად მმართველი“ დინასტიის — აქემენიანების სატახტო რეზიდენციას, აქვე აღმართა დიდებული სრასასახლენი და ბოლოს, მისივე ანდერძით — აქვე დაიდგა მცირე, მოკრძალებული აკლდამა — მისი ნეშტის მარადიული სამკვიდრებელი. მერე, დარიოს I-მა, ჰისტასპის ძემ, ბერძენთა და მაკედონელთა დიდმა მოსისხლემ, აქ, პერსეპოლისის ველზე აღმართა ახალი სატახტო, ახალი სრასასახლენი, ახალი ტაძრები და ბოლოს — აქვე დაიდგა მისი აკლდამა. მას უკან, ყველა სპარსელი გვირგვინოსანი თავის სასახლეს, თავის სალოცავს, თავის წალკოტს და თავის აკლდამას აშენებდა პერსეპოლისში. ყოველი კაციშვილისთვის სანახავად საოცნებო და ნახვით გასაოცარი იყო პერსეპოლისის „ორმოცსვეტოვანი სასახლე“, სამ კლდოვან ტერასაზე საარაკო დიდებამოსილებით წამომართული.

ახლა ყოველივე ალექსანდრე მაკედონელის ფერხთა წინაშე გართხმულიყო და დარეცილიყო. ახლა ბერძენთა და მაკედონელთა მეფე თვითონ იჯდა იმ ქსერქსეს ოქროს ტახტზე, რომელსაც ზუსტად 150 წლის წინათ (ძვ. წ. 480) შუაგულ საბერძნეთში, ატოკის მწიანზე, უმდიდრესი კარავი ედგა და მისივე ბრძანებით ცამდე ცეცხლის ალში გახვეულ ათენს უცქერდა.

სწორედ საზეიმო წუთები იდგა ქვეყანაზე: საბერძნეთ-მეკედონიის ყველაზე მოსისხლე მტრების, დარიოსისა და ქსერქსეს ტახტზე ახლა თვითონ ბერძენ-მაკედონელთა მეფე დაბრძანებულიყო!

მიეახლა ალექსანდრეს მამამისის მეგობარი და თანამებრძოლი, მოხუცი დემარატოს კორინთელი და შეჰლაღადა ხმამაღლა ტირილით: ცაი თქვენ, საცოდავო ბერძნებო, ვინც ისე დაიხოცეთ, ამ სასწაულს ვერ მოესწარით და ალექსანდრე დარიოსის ტახტზე დამჯდარი ველარ იხილეთო!..

ალექსანდრემ აზიურ ქალაქთაგან პერსეპოლისი ბერძენ-მაკედონელთათვის ყველაზე მტრულ ქალაქად გამოაცხადა და საძარცვავად მიუვდო თავის ჯარისკაცებს<sup>7</sup>. მიგდება და წაქეზებაც აღარ სჭირდებოდათ, ისე იყვნენ ალექსანდრეს ჯარისკაცები ძარცვა-გლეჯაზე გაწაფულნი და გახარბებულნი. და მოედგნენ მაკედონელები თავაწყვეტილი ძარცვა-რბევით პერსეპოლისის მცხოვრებთა სახლ-კარს. საძარცვავე და სატაცებელი კი აუარებელი იყო — ოქრო, ვერცხლი, ძვირფასი ნივთი, ჭურჭლეული, და ფართლეული. სასიკვდილოდ არ ზოგავდნენ არავის, ვინც ოდნავ ხელს შეუშლიდა მტაცებლობაში. ერთ-

მანეთსაც არ ზოგავდნენ, ხელით ხელიდან ერთმანეთს გლეჯდნენ, ერთუროთის ხელსაც მოსაჩეხხავად აღარ ზოგავდნენ. ქალებს და ბავშვებს მონად იტაცებდნენ და ჩვეულებრივი მონათმფლობელური მორალით საქონლად ისაყუთებდნენ. მსოფლიოში უმდიდრესი ქალაქი ერთბაშად მსოფლიოში ყველაზე უბედურ ქალაქად იქცა<sup>8</sup>.

დარიოსის სასახლის ახლოს ქსერქსეს უზარმაზარი ქანდაკება იდგა. ბერძენმა მეომრებმა კვარცხლბეკიდან გადმოაჯდეს და მიწას დაანარცხეს იგი. როცა ალექსანდრემ საბერძნეთის დამაქცევარის ძეგლი ასეთ დღეში იხილა, მივიდა და უთხრა როგორც სულაერს: „მითხარ, რა გიყოთ ახლა შენ? საბერძნეთის აოხრების სანაცვლოდ ასე დანარცხებული დაგტოვოთ, თუ შენი ყოფილი სიდიადისა და სიმამაცისთვის ისევ ფეხზე წამოგაყენოთ?“<sup>9</sup> უთხრა და კარგა ხნის ფიქრის შემდეგ, მაინც ბერძენების ამჯობინა და ისე მიწაზე დანარცხებული დატოვა მსოფლიო მბრძანებლობის „თავისი წინამორბედი“ ალექსანდრე მაკედონელმა.

ალაფობა და ძარცვა-გლეჯა კი გრძელდებოდა. ალექსანდრემ შეხედა, რომ ერთი მისი ჯარისკაცი ოქრო-ვერცხლით დატვირთულ ვირს მიერკეებოდა. ვირი საპალნეს ველარ მოერია და წაიქცა. ჯარისკაცმა თვითონ წამოიკიდა ტვირთი ჰაპანწყვეტით, უცებ თავზე რომ მეფე წაადგა, ჯარისკაცი დაფრთხა და ნძარცვის დავლება დააპირა, მაგრამ ალექსანდრემ მაშინვე გაამხნევა: ცოტა კიდევ გარსარჭე, ძალა მოიკრიბე და ევ საპალნე შენს კარავში მიიტანე<sup>10</sup>, — ერთი სიტყვით, ღმერთმა შეგარგოსო... დიახ, — ამაზე უფრო „საყვარელი მეფე“ რომელ ჯარისკაცს უნდა ენატრა?!

მთელი ზამთარი ასე გაატარეს პერსეპოლისში მაკედონელებმა — მძარცველობაში, ნებადართულ ყაჩაღობაში, ლოთობაში, მრუშობაში, აღარც ალექსანდრეს შეუკავებია თავი წრეგადასული ნადიმებისა და ორგებისაგან. ბოლოს, ყველაფერი დასრულდა სიმბოლურ-ტრაგეული ფეერვერცხით.

უკვე სრულად მოეცვა სანადიმო ჭეფრა დიონისური ზარხონისა და ტრფიალების სულს. მეძვე ქალთა კაპრიზი მბრძანებლობდა მსოფლიოს მბრძანებლებზე. პირველობდა ათენელი ქალი, თაისი, ადრე პტოლემეაიოსის სიძვის დიაცო, ახლა თვითონ ალექსანდრეს ჯულის მურაზი. და ადგა მთვრალი თაისი, ადგა და თქვა სიტყვა სამუდამოდ სახსოვარი და „სანიშნისვეტო“: „იმ წვალებისთვის რაც მე აზიამი ხეტალოს ეამს გადავიტანე, სწორედ დღეს მივიღე ჭილდოდ ის,

რომ მე შემძლია დავცინო სპარსთა ქედმაღალ სეფედარბაზებს; მაგრამ ამ ლხინის დროს კიდევ უფრო მეტი სიამოვნებით დავწვავდი მე ქსერქსეს სასახლეს; ქსერქსემ ხომ ათენი გადაწვა! ზოლო, მე ახლა შევეუბნებდი ცეცხლს ამ სასახლეს ჩემი მეფის თვალწინ, რათა ყველაზე თქვას მერე, რომ ალექსანდრეს ლაშქარში მყოფმა დიაცებმა უფრო მეტად იძიეს შური სპარსელებზე ელადისათვის, ვიდრე იმ სტრატეგოსებმა, რომლებიც ბერძენთ მხედრობას წინამძღოლობდნენ ზღვასა და ხმელზე გამართული ბრძოლების უამს“<sup>11</sup>.

არაეინ იცის, ალექსანდრეს წაქეზებით თუ თავისი ნებით გაბედა როსკიპმა ქალმა ასეთი მასშტაბის „მანიფესტის“ წამოძახება, მწარე სიტყვა მწარე საქმედ კი იქცა: ფლეიტების, კითარების, საყვირების ვრიალით, სიმღერითა და ღრიანცელით, ანთებული ჩირაღდნებით გარს შემოერთყნენ მონადიმენი სასახლეს და პირველმა ალექსანდრემ სტყორცნა მაშხალა, მერე მისმა სიძვის დიაცმა თაისმა, მათ შემდგომ კი ყველამ ერთად<sup>12</sup> და მოედო ხანძარი ბრწყინვალე სასახლეს. იწვოდა აქემენიდთა საცხოვრისი და იძახდა ალექსანდრე: მე ამით სამაგიეროს ვუხდი სპარსელებს, ქსერქსეს მეთაურობით ათენი რომ გადასწვესო. ამით, თითქოს, ერთხელ კიდევ „აამებდა“ ათენელებს ალექსანდრე — ისევ თქვენს სასიკეთოდ ვაკეთებ ყველაფერსო. მაგრამ არც ერთ ათენელს და არც ერთ სხვა ბერძენს, — ვისაც ჭერ კიდევ უმადლესი ხელოვნებისადმი პატივისცემის უნარი ამ უთვალავი აცაცობის გზაზე საყვებით არ დაჰკარგოდა — არ მოსწონებია ამ დიდებული ხელოვნების ძეგლის ასე განუკითხავად განადგურება. განსაკუთრებით პარმენიონმა დაიწუნა მეფის ასეთი „ბარბაროსობა“. — რატომ წევ ავ დიდებულ სასახლეს, ყველაფერს რომ თავი დავანებოთ, იგი ახლა ხომ შენი საკუთრებააო. ალექსანდრემ ცეცხლის ჩაქრობა ბრძანა, მაგრამ სასახლის უდიდესი ნაწილი უკვე დამწვარი იყო.

პერსეპოლისის სასახლის დაწვას იმთავითვე სხვადასხვა ნიშანსვეტებით განიხილავდნენ. ზოგი, სრული გულბრყვილობით, ამოდენა მოკლენას მართლა ქალის უგუნური კაპრიზის ნაყოფად მიიჩნევდა: ზოგიც მასში მხოლოდ ბერძენთა შურისგების განსახებას ჰხედავდა, ბერძენთა მთხარე სპარსულ ლაშქრობათა გამო. სხვები ძველი სპარსული მონარქიის მზის ჩასვენებისა და ახალი, ბერძნულ-მაკედონური მსოფლიო მბრძანებლობის მზის ამობრწყინებას გულისხმობდნენ. ზოგი რას ამბობდა და ზოგი რას — ქვეშაირების სიმალლიდან დაწყებული, უკიდურეს და უმდაბლეს კორამდე დასრულებული...



ერთი რამ კი უეჭველად ცხადზე ცხადი იყო: ალექსანდრე მაკედონელი ბალკანეთიდან ცენტრალურ აზიამდე უკვე ფლობდა უზარმაზარ ახალ „მსოფლიო მონარქიას“, რომლის დაბადება და ჩამოყალიბება სიმბოლურად მართლაც პერსეპოლისის ძველი სასახლის ხანძარში განსახიერდა. მაგრამ იმავდროულად ეს იყო აკრეთვე ზენიშანი ახლად-შექმნილი მონარქიის „აბსოლუტური გაფართოებისა“, ახალი უთავჯამო ლაშქრობებისა, სისხლათხვევის სერიებისა, ომებისა... ომებისა „ქეყნის დასასრულამდე“, „მზის აღმოსავლთან მისვლამდე“.

ალექსანდრეს კი უსაშველოდ სწყუროდა და ესწრაფებოდა „მწესთან მისვლა“. იგი შეშფოთებული იყო დემოკრიტეს ერთი ნათქვამით — სამყაროში უთვალავი უცნობი „მსოფლიოები“ არსებობენო; — მე კი ჯერ ერთი ცნობილი მსოფლიოც ვერ დამიპყრია ბოლომდეო, — შფოთავდა და „ბოლომდე დასაპყრობად“ მიილტვოდა მაკედონელი...<sup>13</sup>.

პერსეპოლისიდან გასვლამდე კიდევ მრავალი საბოძიარი გასცა ალექსანდრემ. საერთოდ გულუხვი იყო იგი საჩუქრების დარიგებაში. ოლიმპიიდან ხშირად წერილით საყვედურობდა კიდევ შვილს: ყველა ქვეშევრდომს რომ ასე ასაჩუქრებ და მეფის ტოლობით იტოლებ, შენ რაღა მეფობით უნდა გამოირჩეო. ალექსანდრე ამ წერილებს ინახავდა და მანაც თავისას არ იშლიდა. ერთხელ ჰეფესტიონმა მოისურვა ოლიმპიიდან ერთი წერილის წაკითხვა. ალექსანდრემ ნება დართო, ოღონდ თითიდან ბეჭედი წაიძრო და ტუჩებზე მიადო—მხოლოდ შენთვის ჩუმაღ წაიკითხეო.

პატივმოყვარე და ქედმაღალი ოლიმპიიდან სახელმწიფო საქმეებში ჩარევას ცდილობდა თავგამოდებით. იგი ანტიპატროსს მტრობდა და შვილთან წერილობით ასმენდა. არც ანტიპატროსი აკლებდა ხელს და ისიც ატყობინებდა მეფეს — დედათქვენი ხელს მიშლის მაკედონიაში შენი დავალებების სრულქმნილად შესრულებაშიო. — ანტიპატროსმა არ იცის, რომ დედის ერთი ცრემლიც კი ათი ათას სხვის წერილს გადაშლისო, — უთქვამს ალექსანდრეს და ამით გაუთავებია დედასა და თანამებრძოლს შორის ატეხილ დავაზე ფიქრი...<sup>14</sup>

მაგრამ ალექსანდრე უკვე თვითონაც კარგად გრძნობდა, როგორ რყვნიდა და ამდაბლებდა ადამიანის სულს წრეგადასული პატივმოყვარეობა და ანგარებისადმი სიხარბე. არისტოტელეს „პირველ მოწაფეს“ აღიზიანებდა: ჰაგნონ ტოლელს რომ ფესხაცემელები ვერცხლის ლურსმნებით ჰქონდა მოქედილი; ლეონატოსს რომ სავარჯიშო ქვიშა ეგვიპტიდან ქარავნებით მოჰქონდა; ფილოტას რომ გამორჩეულად ძვირ-

ფასი, ოქრომკერდით ნაქარგო სათევზაო ბადე ჰქონდა; წინათ უბრალო ზეთის უქონელი ახლა რომ ტანს საგანგებო ფარეშებს და მექისეებს ძვირფასი ნელსაცხებლებით ახელინებდნენ და საკუთარი სხეულის მოვლას საკუთარი ხელითაც აღარ კადრულობდნენ. მიყვიროსო, — იძახდა მეფე — ამდენი სახელოვანი ბრძოლის გამოვლის შემდგომ, აღარ გავონდებათ, გამარჯვებულნი რომ უფრო მეტი სიამოვნებით იძინებენ, ვიდრე დამარცხებულნი; თქვენ კი ახლა სპარსთა ცხოვრების წესს საკუთარით ედრებით და ველარ ჰხედავთ, რომ არაფერი არ არის ფუფუნებაზე უფრო მონური და შრომაზე უფრო მეფურიო; განა, როგორ მოუვლის თვითონ თავის ცხენს კაცი ან როგორ გაიწმენდს მუბსა და მუზარადს, უკეთუ იგი გადაეჩვია მისთვის ყველაზე ძვირფასი სხეულის საკუთარი ხელით შეხებასო? <sup>15</sup>

ჯავრობდა მეფე თანამებრძოლთა „სპარსულ გააზიზებას“ და საკუთარი სხეულებრივი სპარტანიზმით ცდილობდა მათ „გამობრუნებას“. იგი ადრინდელზე მეტად ეტანებოდა ფიზიკურ შრომას, ჯაფას, გაჭირვებას, სალაშქრო და საომარ დატვირთვის. ნადირობისას ყველაზე საშიშ ნადირსაც არ ერიდებოდა და კრატეროსმა კიდევაც ჩამოასმევეინა და დელფოს ტაძარს შესწირა ბრინჯაოს ქანდაკება — თუ როგორ ამარცხებს ლომს ალექსანდრე ნადირობის ყამს <sup>16</sup>.

ზშირად, მარტო სიტყვით და პირადი მაგალითით კი არა, გააზიზებულთა პირდაპირი დასჯითაც აღარ კმაყოფილდებოდა მეფე. ამიტომ სამაგიეროდ ბევრჯერ სააუგო სიტყვაც მოსდიოდა, რაზედაც მწარე სიცილით იტყოდა ხოლმე: რა გაეწყობა — მეფის ხვედრია, კარჯის ქმნისთვის ავი მოისმინოსო... <sup>17</sup>

ოთხი თვე დაჰყვეს სპარსეთში მაკედონელებმა. მაგრამ ეს არ იყო მხოლოდ დასვენების, განსვენებისა და განცხრომის თვეები. იმ ზამთრის თვეებში ალექსანდრემ რამდენიმე მძიმე ლაშქრობაც მოაწყო მთიელ ტომებზე, განსაკუთრებით — შარდებზე, რომლებიც მთებიდან მოულოდნელად ეშვებოდნენ და თავს ესხმოდნენ მაკედონელებსაც და სპარსელებსაც. ალექსანდრემ სასტიკი „სამთო ლაშქრობებით“ გასტეხა და ერთგულების ფიცით შემოიფიცა გულფიცხელი მთიელი ტომები. აქედანვე კარმანიის სატრაპიაში გადავიდა ალექსანდრე, კარმანიაც უსისხლოდ დაიმორჩილა და აქვე მმართველად მანამდელი სპარსი სატრაპი დატოვა, სახელად — ასპატი.

თვითონ სპარსეთის სატრაპად ალექსანდრემ დანიშნა ფრასაორტი, ძე იმ რეომითრისა, რომელიც სხვა სპარსელ ჯარდლებთან ერთად

დარიოსის დაცვას შეეწირა ისოსის ბრძოლაში. პერსეპოლისში ალექსანდრემ 3000 მკედონელი მეომარი დატოვა, საგარნიზონო სამსახურად, ნიკარქიდეს სარდლობით.

330 წლის აპრილში ალექსანდრემ ჯარები სამხრეთიდან ჩრდილოეთისკენ დაძრა — სპარსეთიდან მიდიისაკენ. ალექსანდრეს დარიოსი შიდიის მთავარ ქალაქში, ეკბატანაში ეგულებოდა.

დარიოსი, გავგამელას ველზე განცდილი კატასტროფის შემდეგ, მართლაც ეკბატანაში მივიდა. აქ იგი უკვე აღარ აპირებდა რაშე სერიოზული საომარი ძალების შეყრას და ახალი ბრძოლის გამართვას იგი მხოლოდ იმას უცდიდა, რას მოიმოქმედებდა ალექსანდრე. რათა ამისდა შესაბამისად ეზრუნა მხოლოდ ჭიციოცხლის გადარჩენის გზებზე. მთავარი მისთვის მაინც „მოხერხებული გაქცევა“ იყო. მონიშნულიც ჰქონდა გაქცევის გეზი — ეკბატანიდან აღმოსავლეთისკენ, კასპიის კარებით პართიისა და შუა აზიისკენ. თავისი ჰარამხანა და საგანძურები მას უკვე წინასწარ გაეგზავნა ქალაქი რავაში\*, რომელიც სწორედ კასპიის უღელტეხილთან — „კასპიის კარებთან“ მდებარეობდა.

ოთხი თვე იცადა დარიოსმა და ბოლოს მოვიდა ამბავი ალექსანდრეს მოახლოებისა. მას გამოევლო სპარსეთსა და მიდიას შორის მდებარე პარეტაკენა, აქ სატრაპად დაენიშნა ოქსათრი, ძე სუზიანის სატრაპის აბულითისა, და უკვე მიდიის მიწაზე მოილტეოდა გამგელეზული.

ალექსანდრეს ცნობები ჰქონდა, რომ დარიოსს გავგამელას ბრძოლის შემდეგ მაინც ახლდა რამდენიმე ათასი აზიელი და ბერძენი მეომარი. დარიოსს ახლდნენ და ჯერ კიდევ არ ღალატობდნენ სარდალი ნაბარზანი, ბაქტრიელი ბესა, მიდიელი ატროპიტი, არეიოსი სათიბარზანი, პართიელი ფრატაფერნი, ტაპურიელი ავტოფრადატი, არახოზიელი ბარსაენტი, მეფის ძმა ოქსათრი, დარიოსის ერთგული მეგობარი მოხუცი არტაბაზი, მეფე არტაქსერქსე ოხოზის ძე ბისტანი და „სპარსეთის კართა“ ბრძოლის გმირი არიობარზანი. ამიტომ ალექსანდრე მტერს ისევ სერიოზულ ძალად თვლიდა და საომარი მზადყოფნით, სწრაფად უახლოვდებოდა ეკბატანას.

ეკბატანადან სამი დღის სავალზე იქნებოდა ალექსანდრე, ბისტან

---

\* რავას ნანგრევები ნაპონია თიერანიდან სამხრეთ-აღმოსავლეთით, ორი საათის სავალზე.

ოქსის ძე რომ შემოეგება და მოახსენა, — დარიოსი უკვე ხუთი დღეა, რაც ეკატანაიდან გაიქცა, თან წაიღო მდიის საგანძურები, შედი-  
ათას ტალანტად ღირებულნი, თან ახლავს ჯარი — ექვსასი ათასი ქვე-  
ითი და სამი ათასი ცხენოსანი მეომარიო<sup>18</sup>.

ალექსანდრე მაინც მივიდა ეკატანას.

მაშ, ეკატანაც უკვე მაკედონელთა ხელში იყო — ირანის მეოთხე უღიდესი და უძველესი ქალაქი (სუზის, პერსეპოლისისა და პასარგადის შემდეგ). მთელი მაშინდელი მსოფლიო შეარყია ამ ამბავმა. განსაკუთ-  
რებით საბერძნეთში ლაპარაკობდნენ ბევრს. ესქინემ საგანგებო სი-  
ტყვა უთხრა ათენელებს: „ჩვენ საოცრად არაჩვეულებრივ დროებაში გვიხდება ცხოვრება; ჩვენი დღეების ისტორია მომავალ თაობებს ზღაპ-  
რად მოეჩვენებათ; სპარსეთის მეფეს — ათონი რომ გადათხარა, ჰე-  
ლესპონტზე ხიდი გასდო, ბერძენთაგან მიწასა და წყალს მოითხოვდა და თავის თავს წერილებში აღმოსავლიდან დასავლამდე ყოველ ხალხ-  
თა მბრძანებელს ეძახდა — ახლა ბრძოლა უხდება საკუთარი სიცოცხ-  
ლის გადასარჩენად“.

ეკატანაში ალექსანდრემ რამდენიმე გადაუდებელი საქმე გადაწყ-  
ვიტა. მთავარი ამთგან თესალიელების საკითხი იყო. თესალიელებს უკვე აღარ სურდათ ლაშქრად ყოფნა და სამშობლოში დაბრუნებას მოითხოვდნენ. ალექსანდრემ ყველას ჭამაგირი დაურიგა და, ამას გარდა კიდევ ყოველი მათგანი დააჯილდოვა ორი ათასი ტალანტით, მერე მათი ცხენები დაიტოვა და ყველანი სამშობლოში გაუშვა. მაგ-  
რამ თესალიელთაგან მაინც ბევრი დარჩა ალექსანდრესთან თანამო-  
ლაშქრედ.

მიდიის სატრაპად ალექსანდრემ, დარიოსთან ერთად გაქცეული ატროპატის ნაცვლად, დანიშნა სპარსელი ოქსიდატი, რომელსაც და-  
რიოსისაგან სამუდამო პატიმრობა ჰქონდა მისჯილი. მეფემ პარმენი-  
ონს უბრძანა, სპარსეთიდან წამოღებული საგანძურები ეკატანაში დაებინავებინა და მათ დასაცავად და საერთოდ საგარნიზონო სამსახუ-  
რად დაეტოვებინა პარპალოსი 6000 ქვეითი და 2000 ცხენოსანი მა-  
კედონელით. თვითონ პარმენიონი კასპიის სამხრეთით, პირკანიისაკენ უნდა დაბრუნდებოდა. კლიტოს შავი სუზაში დარჩენილიყო, ავადმყოფო-  
ბის გამო, და იმასაც ბრძანება გაუგზავნა ალექსანდრემ, — როგორც კი გამომჯობინდები, წამოდი, ეკატანაში პარპალოსს გამოუარე, მისი ჯარიც აიყოლიე და პართიაში შემოგვიერთდით.

ეს ბრძანებები დაარქვა და მაშინვე დანარჩენი ჯარებით დაიძრა დარიოსის კვალდაკვალ. რაგას რომ მივიდა, შეიტყო, დარიოსს უკვე გაუსწორია „კასპიის კარებში“. ალექსანდრემ რაგაში რამდენიმე დღით დაასვენა დაქანცული ჯარები.

დარიოსიც ბანაკად მდგარიყო, ალექსანდრეს ბანაკიდან ხუთი დღის სავალზე. აქ დარიოსმა თავისი სარდლების თათბირი შეჰყარა და ყველასათვის სავესებით მოულოდნელად გამოაცხადა, რომ იგი აპირებს ერთხელ კიდევ ბრძოლა გაუმართოს მასზე გამოდევნებულ მტერს. მეფის ამ განცხადებამ ყველა დამსწრეზე ღრმა შთაბეჭდილება მოახდინა. არტაბაზმა და კიდევ რამდენიმემ მაშინვე მხარი დაუჭირეს მეფეს, მაგრამ სრულიად მოულოდნელად სიტყვა ისროლა სარდალმა ნაბარზანმა. მდგომარეობა მაიძულებს მწარედ ვილაპარაკო — დაიწყო მან — მაგრამ რა გაეწყო, აკი ექიმიც მწარე წამალს აძლევს გასაკურნებლად ავადმყოფსო; ახლა მაკედონელებთან შეტაკება ჩვენს უეჭველ დაღუპვას უდრისო, ამიტომ საჭიროა აღმოვაველეთ ისევე გაქცევა და ახალი ჯარების შეგროვებამო; მაგრამ, რაც მთავარია, ხალხებს უკვე აღარ სწამთ დარიოსის ბედის ვარსკვლავისა; და არის მხოლოდ ერთი გზა ხსნისა; ეს არის ბესა, რომელიც სარგებლობს უდიდესი პატივისცემით აღმოსავლეთის ხალხებში, სკვითები და ინდოელები მისი მოკავშირეები არიან, მისი სატრაპიაც — ბაქტრია — სავსებით ხელუხლებელია და დიდძალი ჯარის გამოყვანა შეუძლია; მეფესთან მოყვრობა აკავშირებს ბაქტრიის სატრაპს; ამიტომ დაე დაუთმოს დარიოსმა მეფის გვირგვინი ბესას, მანამ, სანამ მისი მეთაურობით მტერი არ განადგურდებამო<sup>19</sup>.

ღრიალით წამოიჭრა გაცოფებული დარიოსი, აკინაკი ვაიძრო და გაიწია ნაბარზანის შემოსაყრავად, მაგრამ ბაქტრეები შემოესივნენ და არ გაუშვეს მეფე. ნაბარზანი და ბესა გაიქცნენ. ძნელი გასამყლავნებელი აღარ იყო, რომ ისინი შეთქმულნი ყოფილან. ერთმაც და მეორემაც გაიყოლიეს თავისი ჯარები. შეთქმულებს 'შიემბრო არახოზისა და დრანგიანის სატრაპი ბარსაენტი და იმანაც თავისი ჯარით დატოვა დარიოსის ბანაკი. დანარჩენი აღმოსავლელი სატრაპებიც, თუმცა შეთქმულთა მხარეზე აშკარად არ გადასულან, მაგრამ ისინიც დარიოსისთვის უკვე ნაკლებ მისანდობლად ჩანდნენ.

მეფის ბანაკი უარესად დასუსტდა და დამცირდა. ამიტომ დაარწმუნა 'მოხუცმა არტაბაზმა დარიოსი, — რისხვას ნუ აჰყვები და ქვეშევრდომებთან ურთიერთობას ნუ გაამწვავებო. მეფემ რისხვა და-

იზმო, კარავში ჩაიკეტა, საქმელ-სასმელზე უარი თქვა და სევდით აღსავაე მღუმარებაში ჩაიძირა.

ამასობაში ბესამ სცადა, დარიოსისთვის სპარსელთა ჯარიც ჩამოემორებინა და ბაქტრიაში თან წაეყვანა. სპარსთაგან მეფეს ლალატი ზოგმა არ ისურვა, ზოგმაც ვერ გაბედა და ბესას ეს ჩანაფიქრი არ გამოუვიდა. არტაბაზიც ყოველ სპარსელს ხედებოდა და არწმუნებდა შეფისთვის არ ელაღატნათ. შეთქმულებს უკვე ეპვიც ეპარებოდათ წარმატებაში.

ერთ დღეს არტაბაზი შეთქმულთა ბანაკში მივიდა და ნაბარზანსა და ბესას გამოუცხადა, მეფემ ორივეს შეგინდოთ დაუფიქრებელი ნაბიჯო. დარიოსიც უკვე გამოეყვანა არტაბაზს უსაზმნო წუხილისაგან. მეფე უკვე საქმელსაც ჭამდა და მეფურ იერსაც იბრუნებდა. ორივე მხარისთვის „სასურველი შეხვედრაც“ შედგა: შეთქმულები სინანულის ცრემლთა ლაპალუპით მეფეს მუხლებში ჩაუცვივდნენ და აპარადუამო ერთგულება შეჰლაღადეს. სამაგიეროდ დარიოსმაც შეუდო და დიდსულოვნების ცრემლები აკურთხა თავზე „მონანიებულ“ ქვეშევრდომთ.

მეორე დღეს, — ისე რომ ალექსანდრესთან ბრძოლის განახლება აღარავის გახსენებია — დარიოსის ბანაკი დაიძრა ისევე აღმოსავლეთისკენ, ქალაქ თარას მიმართულებით. მიდიოდნენ ჩემად, რაღაც უარესისა და უადრესის მოლოდინში. უკვე აღარავინ აღარ ენდობოდა ერთმანეთს ამ მღუმარე ბანაკში. ბერძენ შოჭირავნეთა საარდალმა, პატრონოსმა, იარალი აისხა და თავის ჯარისკაცებსაც უბრძანა, ისინიც აღკურვილიყვნენ და ყოველი მისი ბრძანების მოლოდინში ფხიზლად მდგარიყვნენ. იგი მეფის ეტლს არ შორდებოდა, რაღაცის სათქმელად დროს ეძებდა. მაგრამ მეფის ეტლს არც ბესა შორდებოდა თავისი მხედრობით, — „მეფის ახლობელს“ უფლებაც ჰქონდა და მოვალეობაც ეკისრებოდა მეფეს ხლებოდა განუშორებლად.

დარიოსმა შეატყო, ბერძენს რაღაც რომ უნდა ეთქვა, და თვითონ მიიხმო იგი. დარიოსმა ბერძნული ენა ცუდად არ იცოდა<sup>20</sup> და პატრონოსმაც ბერძნულად უთხრა მას: მეფეო, ჩვენ, ბერძნები, — ვინც კი აქამდე შემოვრჩენილვართ აზიაში გადმოსვლის შემდეგ — შენთან ერთად სრულის თავდადებით ყოველ ჭირსაც ისევე ვინაწილებთ, როგორც ლხინს ვინაწილებდით; რომელი მიწაც არ უნდა აირჩიო შენ საცხოვრებლად, ჩვენც იქ წამოვალთ და იმავე მიწას ვიწამებთ სამშობლო ქვეყნად და ოჯახურ საკურთხევლად; შენმა ბედმაც და

უბედობაჲც სამუდამოდ დაგვაკავშირა ერთმანეთთან; ახლა გემუდარები, მეფეო, ჩვენი ურყევი ერთგულების სახელით, შენი კარაკი ჩვენს ბანაკში, ბერძენთა ბანაკში დადგი, და ნება მოგვეცი ჩვენ ვიქნებით შენი მცველნი და შემნახვენი; ჩვენ დაგკარგეთ საბერძნეთი და არ გვსურს არავითარი ბაქტრია, ვინათგან ყოველი ჩვენი იმედი და სასოება მხოლოდ შენშია; მეტის თქმა მე არ შემიძლია. მე უცხოელი ვარ და ამიტომ ვერ გავბედავდი შენი დაცვის თხოვნას დაჩუმუნებულნი რომ ვიყო იმათ ერთგულებაში, ვინც ახლა გიცაფსო 21.

ბესამ ბერძნული არ იცოდა და სიტყვა ვერ გაიგო, მაგრამ ბერძნის სახის მიმიკით თითქოს მიხვდა, რასაც ელაპარაკებოდა იგი დარიოსს. დაგვიანება უკვე დაღუპვის ტოლი იყო. ერთნაირად — შეთქმულთათვის და შეთქმულთა მსხვერპლისათვის. დარიოსი კი ისევ უნებო, უნიათო, და უძლური აღმოჩნდა — გააზრებაშიც და გააზრებულის ჩისწრაფით განხორციელებაში. სანამ იგი „უცხოელ ბერძნებსა“ და „მშობლიურ აზიელებს“ შორის მერყეობდა, „მშობლიურებმა“ დაასწრეს...

მიმწუხრისას მივიდნენ თარას. დაიბანაკეს. ბაქტრიელები, ვითარცა „უერთგულესი მცველები“ გარს ერტყნენ მეფის კარავს. ბერძნები და სპარსელები მოშორებით იდგნენ. შუაღამისას, როცა ყველას ეძინა და ყოველივე მღუმარებას მოეცვა, მეფის კარავში ფეხაკრეფით შევიდნენ — ბესა, ნაბარზანი, ბარსაენტი და კიდევ რამდენიმე მათი თანადასელი. შევიდნენ, მეფე შეიპყრეს, ოქროს ბორკილები გაუყარეს, ოთხთვალა ფორანზე დააგდეს და ბაქტრიისკენ მიმავალ გზას გაუყვნენ.

მეფის დატყვევების ამბავი ერთბაშად გამჟღავნდა, ბანაკი აიშალა და აინგრა. მეფე აღარავის ახსოვდა. ბაქტრები მათ ბატონს, ბესას მისდევდნენ; სპარსელები ზოგნი ბაქტრებს აედევნენ, ზოგნი სულ მიიფანტ-მოიფანტნენ. არტაბაზმა, თავისი შვილებით და პატრონოსმა თავისი ბერძნებით ჩრდილოეთით პირკანია-ტაპურის მთებს მიაშურეს; სპარსი სარდლები, არტაბელი და ბაგისთანი, თავიანთი რაზმებით, უკან შემობრუნდნენ და ალექსანდრეს ჩაბარდნენ.

ალექსანდრე რავადან მეხუთე დღის დამდეგს გამოვიდა, ორ დღეში კასპიის კართა უღელტეხილები დასძლია და გავიდა ზოარენის (ხუარის) ნაყოფიერ ველზე. აქვე დაიბანაკა. აქედანვე გზა მიდიოდა პართიის მთავარი ქალაქის, ჰეკატომპილისისკენ, სადაც იყრებოდა სამი გზა — პირკაანისა, ბაქტრიისა და არიანისა.

სწორედ ცენტრალური აზიისაკენ მიმავალ ამ დიდ გზაზე, ალექსანდრეს ბანაკში მოვიდნენ სპარსელი სარდლები, არტაბელი და ბაგისტანი, რომელთაც პირველად აცნობეს ევროპელ მეფეს მისი აზიელი მეტოქის მოულოდნელი უბედურება — იგი ბორკილდადებული მიჰყავთო მისსავე ქვეშევრდომებს ბაქტრიისაკენ მიმავალ გზაზე.

ალექსანდრემ არმიის უდიდესი ნაწილი კრატეროსს დაუტოვა და ზომიერი ნაბიჯით სვლა უბრძანა, თვითონ კი კავალერია აიყოლია, მასთან — მზვერავნი და მსუბუქი ქვეითნი, და სრულის სისწრაფით გამოედევნა გაქცეულებს.

მთელი დღე-ღამის პირველი ნახევარი მიქროდნენ, მუხლჩაუკრეფავად და თვალმოუზუჭავად. შუადღისას მცირედ შეასვენა მეფემ ჯარი. ისევ გაქანდნენ, ის დღე და ის ღამე ისევ შეუსვენებლად იქროლეს და მზის ამოსვლისას მივიდნენ თარას, საიდანაც ოთხი დღის წინათ გაეტაცებინათ შეთქმულებს შეპყრობილი და დაბორკილი დარიოს მეფე. ალექსანდრემ ყოველივე მოისმინა დარიოსის თარჯიმნა, მელონისგან, რომელიც თარაში დარჩენილიყო ავადმყოფობის ვაჟი. მელონმა აცნობა, რომ არტაბაზი და პატრონოსი ბერძნებით ტაპურის მთებში წასულან, ხოლო მეფის ხელისუფლება დარიოსის ნაცვლად ბესას უტვირთავს; შეთქმულების განაზრახი ასეთი ყოფილა; დარიოსი აღმოსავლეთ პროვინციებში მიიყვანონ და იქიდან ალექსანდრესთან მოლაპარაკება გამართონ, დარიოსი ცოცხლად მიართვან და სამაგიეროდ ალექსანდრემ აღმოსავლეთი პროვინციები ბესას დამოუკიდებელ სამეფოდ ცნოს; ხოლო, უკეთუ ალექსანდრე დევნას არ დაიშლის, მაშინ შეთქმულებმა ჯერ კიდევ მათ ხელში შყოფ აღმოსავლეთის პროვინციებში ჯარები უნდა შეჰყარონ და მტერს საომრად დაუხვდნენ.

მაკედონელებს ისევ დიდი სისწრაფე სჭირდებოდათ. მხოლოდ ერთი საშინელი ცხელი დღე გაათიეს თარაში და როგორც კი მზე ჩავიდა, ისევ გაქუსლეს თავდაუზოგავად. ისევ მთელი ღამე იქროლეს, კიდევ ნახევარი დღე, და მივიდნენ რომელიღაც სოფელში, სადაც ერთი დღის წინათ მდგარან გაქცეულები — მდგარან ღამის მოლოდინში და დაღამებისთანავე გაქცეულან. მანძილი მდევრებსა და დევნილებს შორის გვარიანად დამოკლებულიყო, მაგრამ შესვენების გარეშე მაინც აღარ შეეძლოთ წინსვლა მაკედონელებს — სიცხისა და დაქანცულობისაგან ფეხზე ვეღარ დგებოდა ვეღარც კაცი და ვეღარც ცხენი. ალექსანდრემ უფრო მოკლე გზა მოიკითხა. უთხრეს — არის უფრო მოკლე გზა, მაგრამ გზა იგი მიდის სავსებით უწყლო უდაბნოზეო.



მეფემ აღარც აცია, აღარც აცხელა — ხუთასი ცხენი და ხუთასი მხედარი გადაარჩია, ყველაზე ძლიერნი, გაბედულნი და გამძლენი — დანარჩენები ჩააბარა ნიკანორს, ფაროსანთა სარდალს, და ატალოსს, ავრიანთა სარდალს, და უბრძანა, ისევ სწრაფი სვლა განეგრძოთ მთავარი სამხედრო გზით. თვითონ კი იმ ხუთასი ნარჩევი მხედრით მეფემ უდაბნოს მისცა თავი.

მთელი ღამე ისევ შეუსვენებლივ აჭენეს ცხენები. ზოგმა ველარ გაუძლო და უდაბნოშივე პოვა სიკვდილი. დილით გააღწია ალექსანდრემ უდაბნოს ბოლოს, გააღწია და გამოჩნდა კიდევ ქარავანი გაქცეულებისა. უკანასკნელი ძალის დაძაბვით დააოთხეს ცხენები მაკედონელებმა. გაქცეულებმაც დაინახეს მღევარი და მის ფერხთა ქვეშე ავარდნილი მტერის კორიანტელი.

შიშით მოცული, დამფრთხალი ხმაურითა და ყარყაშით აიშალა დევნილთა ქარავანი; ვინ სად გარბოდა და ვინ საით. მხოლოდ ზოგიერთებმა გაბედეს უკვე შოვარდნილი მტრის წინააღმდეგ ხელის გამოღება და ისინიც უმაღვე ასჩეხეს მაკედონელებმა.

ფორანი, რომელზეც დარიოსი ეგდო, ქარავნის შუაში მოექციათ ბესას ბრძანებით. ახლა, როცა ალექსანდრე წუთი წუთზე უნდა გაჩენილიყო, შეთქმულებმა უბრძანეს დარიოსს მარქაფ ცხენზე გადამჯდარიყო და მათთან ერთად გაქცეულიყო. დარიოსმა უარი თქვა. მაშინ სატევრები გაიძრეს ბესამ, ნაბარზანმა და ბარსაენტმა და ბორკილებით შეკრულ მეფეს მკერდი დაუნდობელი დარტყმებით დაუგმირეს, მსახურებიც ზედ დააკლეს, ფორანში შებმული ცხენებიც შუბებით დაჭრეს — მოშაკვდავი რომ მოხრს არ გაეტაცნათ — და თვითონ გადაიხვეწნენ, ჯარის ნაფლეთთა თანასრბოლით.

ერთმანეთში არეულა კაცსა და ცხენში, აქლემსა და ალაღ-ფორანში ჯერ შეუძლებელი იყო გარკვევა, სად, რომელ საზიდარზე უნდა ყოფილიყო დარიოსი. ალექსანდრე გამოედევნა გაქცეულებს, რომელთა შორის მისი ვარაუდით უნდა ყოფილიყო დარიოსიც.

დარიოსის ფორანი კი დაჭრილ-დაკოდილ ცხენებს მთავარი გზიდან გადაეცდინათ, ერთხანს ევლოთ და შემდგარიყვნენ ძალადაკარგულნი.

დარიოსი უკანასკნელ წამებს ითვლიდა. მის აღსასრულს მაკედონელი ჯარისკაცი ესწრებოდა, სახელად პოლისტრატოსი, შემთხვევით რომ გადაჰყროდა სასიკვდილოდ დაცხრილულ გვირგვინოსანს. მოჰაკვდავმა წყალი ითხოვა და მიაწოდა წყალი მაკედონელმა. უკანასკნელ სიტყვას ამბობდა სიკვდილის წინ დარწყნებული შეფეთა მეფე:

„აი, მეგობარო, ეს წამი აღსასრულისა ყოველ ჩემს ბედუკუდმართობაზე უფრო მწვავეა იმიტომ, რომ სიკეთისათვის სამაგიერო სიკეთის მიგება აღარ შემძლია; მაგრამ შენ ალექსანდრე მოგიგებს სამაგიეროს, თვითონ ალექსანდრეს კი ღმერთები მიუგებენ იმ კეთილმოწყალებისათვის, რომელიც მან დედაჩემსა და ჩემს ცოლ-შვილს გაუწია: მომეც შენი ხელი და შენი მეშვეობით ჩემს მარჯვენას ვართმევ ალექსანდრეს“ 22.

იღვა 330 წლის ივლისი და ცოცხალთა შორის აღარ იყო დარიოს III ყოლომანი, მეფეთა მეფე, მბრძანებელი უღირესი და უვრცესი მსოფლიო შონარქიისა. მისი სიკვდილით დასრულდა ზეობა სახელოვანი აქემენიდების დინასტიისა, რომელსაც 220 წლის წინათ საფუძველი დაუდო დიდმა კიროსმა. იგი მოკვდა, გვირგვინოსანი — გვირგვინმონდილი და ბორკილოსანი. მოკვდა ისე, რომ სამეფო გვირგვინი ნაწილობრივ სიცოცხლეში არ გაცვალა და დამნაშვეთა საკუთრებად არ აღიარა.

გაქცეულთა ამო დევნის შემდეგ მობრუნდა ალექსანდრე და იხილა მოკლული დარიოსი; მღუშარე თავდგომით პატივი სცა მის ხსოვნას, ძოწეული ქლაშიდი მოიხსნა და გადააფარა მის გვემულ ცხედარს. მისივე ბრძანებით, დარიოსი საპატიო ესკორტით გაგზავნეს პერსეპოლისს, აქემენიდთა სამეფო საძვალეში დიდის პატივით დასაკრძალავად. სიზიგამბისი შეეგება მირონცხებული შვილის ცხედარს, და იტირა და დაკრძალა იგი...

დარიოსის სიკვდილმა ყოველგვარი „უხერხულობისაგან“ იხსნა სვებედნიერი ალექსანდრე. უწინარესად ყოვლისა, მან აიცილია სახელი „მეფის მკვლელისა“, ამას გარდა, დარიოსის მხოლოდ დევნილი სიცოცხლეც მუდმივ საეკვოდ ხდიდა მის ერთმფლობელობას სპარსეთის ტახტზე. ახლა, პრაქტიკულადაც და მორალურადაც, იგი ნამდვილი მეფე იყო აზიისა, უმეტოქეოდ და ურაცყოფოდ. უკვე ასე უნდა ყოფილიყო იგი „ბარბაროს აზიელთა“ თვალშიც და „მშობლიურ ევროპელთა“ თვალშიც. მარტო ბრძოლის ველზე როდი დაიგდო ალექსანდრემ გმირის სახელი. ყველა გააოცა და აღაფრთოვანა მისმა გასაოცარმა გამძლეობამ და შემართებამ გაქცეული დარიოსისა და მისი მოღალატე ქვეშევრდომების დევნის ყაშს. ბევრი თანამებრძოლის სიცოცხლე შეიწირა და პირსისხლიანი „დემობორის“ \* სახელსაც ვერ

\* დემობორი — „ხალხის მკამელი“. ამ სახელწოდებას ჰომეროსი ხმარობდა მეფე ზასილევსთა მიმართ.

აიციდენდა ალექსანდრე, მაგრამ მისმა საარაკო თავგანწირვამ და თვით-  
შეწირვამ, ყოველი კაციშვილისთვის დაუძლეველი დაბრკოლების  
მძლეველობამ, იგი მართლაც ზებუნებრივი ძალის მქონე ღვთაებად  
აღამაღლა მისგანვე დატანჯულ თანამოლაშქრეთა გულში. სწორედ მა-  
შინ გათამაშდა ეს ნიშანდობლივი სცენა, როცა ალექსანდრე ისე თავ-  
დავიწყებით, აქილევსური სისხლის აზარტით მისდევდა დარიოსს:  
გარშემო უდაბნო თაზთახებდა, უსაშველო სიციხით ატანილი, მეომრე-  
ბი წყურვილით იხრჩობოდნენ. აუტანელი წყურვილი სტანჯავდა  
თვითონ მეფეს. და აი, წყლით სავსე მუზარადი მოართვეს მას. ალექ-  
სანდრემ მუზარადი ჩამოართვა და ის იყო უნდა დაწაფებოდა, რომ  
დაინახა როგორი ტანჯვით უცქერდნენ მის ხელებში დასალევად მომარ-  
ჯებულ წყლით სავსე მუზარადს ჯარისკაცები. ალექსანდრემ დალე-  
ვაზე გადაჭრით უარი თქვა და მუზარადი პირქვე გადააბრუნა — წყა-  
ლი დაიღვარა — „მე რომ მარტო დავლიო, ჩემი მეომრები სულით და-  
ეცემიანო“, — ამოიგმინა მან. ჯარი აღტაცებული ყიჟინით შეხვდა მე-  
ფის ამნაირ ვაჟკაცობას; „წაგვიყვანე, საითაც გინდა! არც დავიღლე-  
ბით, არც მოგვწყურდება, არც მოგვკვდებით, სანამ ასეთი მეფე გვყავ-  
ხარ! — ბლაოდნენ, ცხენებს მათრახებს უტკაცუნებდნენ და ისევ სა-  
ლაშქროდ მიიწევდნენ, მეფის გმირობით გაოცებულნი და გაოგნე-  
ბულნი 23.

დარიოსის მკვლელები კი ისევ გარბოდნენ, ყველანი თავიანთ სატ-  
რაპიებში: ბესა — ბაქტრიაში, ნაბარზანი — პირკანიში, ფრატაფერ-  
ნი — პართიაში, სატიბარზანი — არეიაში, ბარსაენტი — დრანგიანაში.

ალექსანდრემ კი ჯერჯერობით დევნაზე ხელი აიღო და პართიის  
მთავარ ქალაქში, ჰეკატომპოლისში შეჩერდა. აქ ჯარიც დაასვენა, და-  
ნარჩენ ჯარებსაც დაელოდა და პართიის საქმეებიც მოაგვარა. პართი-  
ის სატრაპია მან სამმართველოდ გადასცა პართიელ ამინაპეს, რომე-  
ლიც ადრე, ეგვიპტეში ლაშქრობის დროს, სპარსელ მასაკესთან ერ-  
თად, ერთგულებით ეყმო ალექსანდრეს. ამინაპეს გვერდით, „ზედა-  
მხედველად“ („ეპისკოპოს“) 24 დასვა ტლეოპოლემოსი, უახლოესი  
ჰეტერთაგანი.

პართიასა და კასპიის სამხრეთ-აღმოსავლეთ სანაპიროთა შორის იყო  
პირკანია, რომლის დაპყრობის გარეშე ალექსანდრეს არ შეეძლო გზა  
განეგრძო ცენტრალური აზიისაკენ. ისედაც იცოდა ალექსანდრემ,  
რომ პირკანიისკენ, ტაპურიის მთებით გადასული იყვნენ დარიოსის

ერთგული ქარების უკანასკნელი ნაფლეთები, სპარსი არტაბაზისა და ბერძენი პატრონოსის მეთაურობით.

ალექსანდრემაც სასწრაფოდ გადაწყვიტა ტაპურია-პირკანიის დამორჩილება. ჯარი სამ ნაკადად ააწყო და სამივესთვის ლაშქრობის საბოლოო შესაკრებ პუნქტად პირკანიის მთავარი ქალაქი, ზადრაკარტა დანიშნა. ერთი ნაკადი ერიგიოსს ჩააბარა და ყველაზე გრძელი და ნაკლებ ხიფათიანი გზით გაგზავნა ზადრაკარტასკენ. მეორე ნაწილი, კრატეროსის სარდლობით, ტაპურიის მთებში წარგზავნა, ხოლო მესამეს მეფემ თვითონ უსარდლა და ყველაზე მოკლე, მაგრამ ყველაზე სახიფათო გზას დაადგა. არც ერთ გზაზე რაიმე სერიოზული დაბრკოლება არ შეხვედრიათ, ისე მივიდნენ სამივენი ზადრაკარტაში.

აქვე ალექსანდრემ და მისმა თანამებრძოლებმა პირველად იხილეს კასპიის ზღვა.

აქ, გზაზედ, ალექსანდრესთან გამოცხადდა სპარსი სარდალი ნაბარზანი, დარიოსის ერთ-ერთი დამლუპველი. გამოცხადდა, მორჩილება და ერთგული სამსახური შესთავაზა ალექსანდრეს. მალე ნაბარზანს მოჰყვნენ და ალექსანდრეს ჩაბარდნენ ფრატაფერნი და კიდევ სხვა წარჩინებული სპარსელნი დარიოსის ამალიდან<sup>25</sup>. ნაბარზანს, ვითარცა თავისი ხელისუფლის ერთ-ერთ უპირველეს მესაფლავეს, ალექსანდრემ სიცოცხლის შენარჩუნება აკმარა, ხოლო ფრატაფერნი და მისი შვილები — ფარისმანი და სისინი — კიდევაც შეიწყალა, კიდევაც დააწინაურა და დაიახლოვა. ფრატაფერნს ისევ დაუბრუნა სამმართველოდ პართიისა და პირკანიის სატრაპიები, ფარისმანი და სისინი კი შემდგომში ბევრჯერ გამოიჩინენ თავს ალექსანდრეს ხიფათით სავსე სალაშქრო გზებზე. ალექსანდრესთან მოვიდა არტაბაზიც, რომელმაც თან მოიყოლა სამი ვაჟიშვილი — არსამი, კოფენი და არიობარზანი. არტაბაზი ალექსანდრეს მისი უფლისწულობის ჟამსაც ენახა მაკედონიაში, როცა ეს სპარსელი დიდგვარი, არტაქსერქსე ოზოსისაგან დევნილი, თავს აფარებდა პელას სასახლეში. ახლა ეს „ვერობამოვლილი“ 95 წლის აზიელი მისი სამივე ვაჟით თავის უახლოესთა ამაღაში ჩარიცხა მაკედონელმა. ალექსანდრეს ჩაბარდა ავტოფრადატიც, ტაპურიის ყოფილი სატრაპი. ისიც შეიწყალა მეფემ, ისიც დააბრუნა მისი ტაპურიის ბატონად და პატრონად. არტაბაზს მალე მოჰყვა მასთან ერთად ტაპურიის მთებში გადახვეწილ ბერძენთა დელეგაცია, რომელიც მზად იყო კაპიტულაციაზე, უკეთუ ალექსანდრე მათ აპატიებდა „მშობლიური ელადის“ წინააღმდეგ ბრძოლას და სანდო აღამიანებს გაგზავნიდა მათთან შეწყალების აღთქმით. ისევ გამოიჩინა მეფემ

„უდიდესლოცვება“ და გავზავნა ბერძნებთან არტაბაზი და ანდრონიკოსი, ქმარი თავისი დედამამუძისა და სიძე კლიტოს შავისა (ანდრონიკოსის ცოლი, ლანიკა, იყო დაი კლიტოსისა და გადია ალექსანდრესი).

აქვე, კასპიის ზღვის სანაპიროებზე, ალექსანდრე ბევრს ფიქრობდა იმ „მსოფლიო საურთიერთობო გზაზე“, რომელსაც უდიდესი მნიშვნელობა ენიჭებოდა აღმოსავლეთ აზიასა და ევროპას შორის სავაჭრო და კულტურული ურთიერთობისათვის. ამ გზის „შუაგულზე“, კასპიის ზღვაზე იდგა ახლა მაკედონიის მეფე. აქ უნდა მოსულიყო საქონელი ინდოეთიდან, სამი დიდი მდინარის — ინდის, იაქსარტის (სირ-დარია) და ოქსის (ამუ-დარია) გამოვლით: მერე კასპიიდან — მტკვრით, ძირულათი, ყვირილათი, ფასისით და შავ ზღვით ევროპისკენ. ამიტომ ალექსანდრე დიდ მნიშვნელობას ანიჭებდა სწორედ კასპიის ზღვაზე მიკრულ ჰირკანიას, მისი გეოგრაფიული მდებარეობით და მდიდარი, გემთმშენებლობისათვის საუკეთესო ხე-ტყით.

საჭირო იყო კიდევ უფრო გაეცრცელებინა და განემტკიცებინა თავისი ძალაუფლება ალექსანდრეს კასპიის ზღვის სანაპიროებზე. სწორედ ამიტომ მან პარმენიონი ჯარით გავზავნა ჩრდილოეთ მიდიასა და კასპიის დასავლეთ სანაპიროთა შორის მთიელი ტომების — კადუსიელების დასამორჩილებლად, ხოლო თვითონ ალექსანდრე კადუსიელთა მეზობლების, მამაცი შვილდ-მოისარი მარდების დასაპყრობად წარემართა\*. არასოდეს მარდების მთაგორიან და უსიერი ტყეებით მოცულ მიწაზე აქამდე არავის ფეხი არ დაედგა. ახლა კი მაკედონელები მიიკვლევდნენ მანამდე უკვლეველ გზებს მთებში, თავისუფლების მოყვარე ხალხის თავშესაფრებისა და სახიზარების დასაკავებლად. გვირანად გაუჭირდათ „ყოვლისმძღველეებს“. ისედაც მოხდა, რომ ერთი მოულოდნელი თავდასხმით მარდებმა ალექსანდრეს მისი საყვარელი საომარი ცხენი, ბუქეფალაც კი წაპკვარეს. — ცხენი დამიბრუნეთ, თორემ, იცოდეთ, დედა-ბუდიანად ამოგვლეტო, — შეუთვალა გაჭავრებულმა მეფემ მარდებს<sup>26</sup>. მარდები დაფრთხნენ და უკანვე მოპკვარეს ცხენი პატრონს.

\* სხვათაშორის ეს ის „მოისარი მარდები“ არიან, რომლებიც „შუბოსან იბერიელებთან“ ერთად, ამ ამბებიდან 162 წლის შემდგომ (ძვ. წ. 68), როგორც „ყველაზე მამაცი და საიმედო მოკაეშირენი“, ტიგრან II სომეხთა მეფეს ეხმარებოდნენ რომაელების წინააღმდეგ ბრძოლაში (იხ. ლ. სანიკიძე, პონტოს სამეფო, 1956, გვ. 155).

მანამდეც მრავალჯერ დაჭრილი და სისხლდაქცეული მეფე. მარდებთან ბრძოლისას ორჯერ მძიმედ დაშავდა. ერთჯერ შორიდან ნატყორცნი ისრით მარდებმა მარცხენა ფეხის წვევი გაუპეს, მეორედ შურდულით კისერში ქვა გაატყეს და კარგა ხანს თვალებზე ბინდგადაკრულს მხედველობა ძლივს დაუბრუნდა. მაგრამ სიკვდილთან შეუპოვარმა მეფემ მაინც თავისი ივაიტანა და მარდებიც აიძულა მის წინაშე მორჩილებით მუხლი მოეყარათ. მეფემ მძევლები აიყვანა და მარდთა მიწა-წყალი ტაპურიას მიათვალა და აქაურ სატრასს, ავტოფრადატს ჩააბარა სამმართველოდ.

მარდების დამორჩილების შემდეგ, ალექსანდრე ისევ დაბრუნდა ზადრააკრატაში, სადაც მას არტაბაზმა და ანდრონიკოსმა უკვე დაახვედრეს ტაპურიის მთებიდან ჩამოყვანილი ბერძნები, სულ — 1500 მეომარი. მათ შორის აღმოჩნდნენ ისეთებიც, რომლებიც დარიოსთან მოსალაპრაკებლად ყოფილან საბერძნეთიდან წამოსულნი. ამათგან ოთხი სპარტელი იყო და თითო-თითო ათენიდან, ქალკედონიდან და სინოპიდან. ათენელმა, სახელად დემოკრატემ, შეწყალება არ ითხოვა და საკუთარ მახვილს გულით წამოეგო<sup>27</sup>. ალექსანდრემ სამშობლოში დაბრუნების ნება მისცა იმ ბერძნებს, რომლებიც სპარსთა სამსახურში 334 წლამდე, ანუ კორინთოს კონგრესამდე შესულიყვნენ. დანარჩენი ბერძნები თავის სამსახურში ჩააყენა და ანდრონიკოსის სამხედრო ნაწილს მიათვალა. მუდამ გამდგარი და განრისხებული სპარტის ელჩები კი — პატიმრობაში აიყვანა.

სპარტას ალექსანდრეს აზიაში გადასვლის დღიდანვე არ შეუწყვეტია მტრობა მაკედონიის წინააღმდეგ: ბალკანეთზე ჯერ კიდევ სავსებით ჩაუმცხრალ ანტიმაკედონურ მოძრაობას სათავეში ედგა სპარტის ნიჭიერი და მამაცი მეფე აგისი. სპარტელები გაფაციცებით ელოდებოდნენ, როდის მოვიდოდა აზიიდან საოცნებო ამბავი მაკედონელი მეფის „უეჭველი განადგურებისა“. მაგრამ არ გაამართლა არც გრანიკოსმა, არც ისოსმა, არც ტიროსმა; ძალიან დიდ იმედებს ამყარებდნენ გავგაშლავზე, მაგრამ გავგაშლამ ხომ ყველაზე ბრწყინვალე გამარჯვება არგუნა „ბედის ნებიერას!“

ჯერ კიდევ 333 წელს, ისოსის საბედისწერო ბრძოლის წინ, სირიაში მყოფ დარიოსს სპარტელი ელჩები ეწვივნენ მაკედონიის წინააღმდეგ ერთიანი ბრძოლის წინადადებით. სამი წელიწადი დასდევდნენ ის ელჩები ალექსანდრესაგან დევნილ, აღმადღმა მორბენალ სპარსთა მეფეს და ბოლოს დარიოსიც აღესრულა და აგისის ელჩიონი მაინც

ალექსანდრეს ხელში ჩაეპარდა. ბალკანეთზე კი, იმ სამი წლის გასწვრივ, სპარტა მაინც თავგამოდებით ებრძოდა მაკედონიას. 333 წელს აგისმა თავისი ძმა აგესილაოსი კრეტაზე გავზავნა, ამ დიდმნიშვნელოვანი კუმძულის დასაჭერად. იმავე დროს სპარტელთა ფლოტი შეუერთდა ჯერ კიდევ ეგეოსის ზღვაზე მოდრეიფე სპარსელთა საომარ ხომალდებს. პირველში მაშინ ათენელებს ასი გემი ედგათ, მაგრამ სპარტელებთან შეერთება ვერ გაბედეს და ამით ალექსანდრეს „იღბალი გაუძლიერეს“. აგესილაოსმა კრეტის უმთავრესი ქალაქები დაიმორჩილა, მაგრამ 331 წელს მაკედონელთა ფლოტმა, ამფოტეროსის სარდლობით, მაინც მოახერხა სპარტელთა გაძევება კრეტადან<sup>73</sup>. სპარტა სპარსეთის ფლოტი სავსებით დაიშალა. ეგეოსზე მაკედონელები საბოლოოდ გაბატონდნენ.

მაგრამ აგისი მაინც არ ცხრებოდა. ახლა მან ხმელეთზე გახსნა საომარი ოპერაციები; გაანადგურა მაკედონელთა ჯარი, რომელსაც კორაგოსი სარდლობდა; ამ წარმატების შემდეგ სპარტას მიემხრნენ ელიდა, არკადია და აქეია. პელოპონესში ალექსანდრეს ერთგულებას არ ღალატობდნენ მხოლოდ სპარტის მარადიული მტრები — მესენა, მეგალოპოლისი და არგოსი. კორინთოშიც მტკიცედ იღვა მაკედონელთა გარნიზონი.

მაკედონური უღლისაგან თავის დახსნის მისწრაფებანი პელოპონესის გარეთაც გამოჩნდა, — თუნდაც მაკედონიის ერთგულ თესალიაში. მაგრამ მთავარი მაინც, — როგორც ყოველთვის — იყო ათენი, ხოლო ათენი იარაღის ხელში აღებას ვერა ბედავდა და მხოლოდ მაკედონური და ანტიმაკედონური ენის ფხანით ეძლეოდა თავდავიწყებას.

ანტიპატროსმა ოპის დასაწყისში ვერ მოახერხა ხელი შეეშალა აგისის წინსვლისათვის პელოპონესში. ამის მიზეზი ის იყო, რომ თრაკიის მმართველად დანიშნული მემნონი აუჯანყდა ანტიპატროსს. აჯანყება მართლაც სერიოზული იყო — თრაკია ხელიდან ეცლებოდა მაკედონიას. ანტიპატროსი იძულებული გახდა მთელი საომარი ძალებით გადასულიყო თრაკიაში. აგისმა ამით ისარგებლა და მეგალოპოლისს ალყა შემოარტყა; მაგრამ მალე გამოიჩვენა, რომ მემნონის გამოსვლა არ ყოფილა საერთოდ „ანტიმაკედონური“, ანუ „ანტიალექსანდრული“ ხასიათის „მოძრაობა“. მისი საფუძველი უფრო მემნონისა და ანტიპატროსის პირადი უთანხმოებანი ყოფილა და მალე კიდევაც შერიგდნენ წაკიდებული სარდლები. მემნონი თრაკიის მმართველად

დარჩა და ანტიპატროსაც საშუალება მიეცა მთელის ძალებით საბერძნეთისკენ დაძრულიყო<sup>29</sup>. მან იოლად ჩააქრო ანტიმაკედონური გამოხდომა თესალიაში და ამის შემდგომ, 331 წლის შემოდგომაზე, 40 000-ანი არმიით დაიძრა პელოპონესისკენ, და დროზედაც მიუსწრო — ალყით განაწამები მეგალოპოლისი უკვე უნდა დანებებოდა სპარტელებს. აგისს 20000 მეომარი ჰყავდა, მტრის ორმაგ ძალებს განერიდა და მეგალოპოლისს ალყა მოხსნა. ანტიპატროსმა ქალაქიც ჩაიბარა და მოწინააღმდეგესაც კვალდაკვალ მიჰყვა.

გაიმართა სასტიკი ბრძოლა სპარტელთა და მაკედონელთა შორის. სპარტელები იბრძოდნენ ძველთაგანვე განთქმული სპარტანული სიმაყით, არაჩვეულებრივი იყო შემმართებლობა თვითონ აგისისა, მაგრამ რიცხობრივმა უპირატესობამ მაინც თავისი გაიტანა. უკვე მოახლოებული მარცხის მხილველი აგისი სიკვდილს ეძიებდა და დაიღუპა კიდევც იგმირის სიკვდილით. მასთან ერთად დაეცა 5300 თანამებრძოლი. 3500 მებრძოლი დაკარგა ანტიპატროსმა და გაიმარჯვა<sup>30</sup>.

სპარტელებმა ზავი ითხოვეს, ანტიპატროსმა 50 სპარტელი ბიჭი მძევლად აიყვანა და საქმის საბოლოოდ გადაწყვეტა ბერძენთა სამოკავშირეო სინედრიონს გადასცა. სინედრიონმა, თავის მხრივ, სპარტელთა ბედის განჩინება „უმალლეს ინსტანციას“ — ალექსანდრეს მიანდო.

ალექსანდრე ისევ „გულმოწყალე“ და „დიდსულოვანი“ იყო. მან ყველას ყველაფერი აპატია, ოღონდ აქეელებს მეგალოპოლისის სასარგებლოდ 120 ტალანტის გადახდა დააკისრა.

ეს იყო და ეს. ამის შემდგომ საბერძნეთი „ენის ფხანის“ იქით აღარ წასულა და ალექსანდრეს სიკვდილამდე მაკედონიის წინააღმდეგ ქარქაშიდან მახვილის დაძვრა აღარავის გაუბედნია.



ალექსანდრემ საბერძნეთში დატრიალებული ამბები სწორედ კასპიის ზღვის სანაპიროებთან, პირკანიაში ყოფნის დროს შეიტყო. აქვე ყოველივე ბალკანური საქმენი განიკითხა, განაგო, განჩინება განაჩინა, საბერძნეთში მდგომარეობის სტაბილურობა ირწმუნა და ჯარები ახალ სალაშქრო გზებზე შეაყენა.

გზები ისევ აღმოსავლეთისაკენ მიდიოდა — ბაქტრიისა და ინდოეთისკენ. ალექსანდრეს ამ გზებზე გადაუდებელ საქმედ მიაჩნდა დარიონის მკვლელობა შეპყრობა და დასჯა. მაგრამ ეს მხოლოდ საბაბი იყო აღმოსავლური ლაშქრობების ეგზომი განვრცობისა და გაღრმავებისა. სინამდვილეში ალექსანდრეს დაუოკებელი წყურვილით სწყუროდა თვითონ აღმოსავლეთის სრული დამორჩილება — ჯერ ცენტრალური აზიისა, მერე ინდოეთისა, მერე ციღევ, და მერე კიღევ... სადღაც იქ, ზღვასთან, თუ „მზის აღმოსავალთან“ — დასრულდებოდა და დაჯერდებოდა ყოველივე ვნებანი დამპყრობელურნი.

გალაშქრების წინ ბერძნული ასპარეზობანი და მსხვერპლზოროვანი გამართა პირკანიის მთავარ ქალაქში, ზადრაკარტაში. ამის შემდეგ ისევ დასძრა ჯარები ალექსანდრემ. ამჯერად მისი საომარი ძალები შედგებოდა 20000 ქვეითისა და 3000 მხედრისაგან<sup>1</sup>.

პარმენიონი ეკატანაში გაგზავნა ალექსანდრემ. ეკატანადან სახელმწიფოში „მეორე კაცს“ უმაღლესი მეთვალყურეობა და მმართველობა უნდა განეხორციელებინა აქამდე დაპყრობილ აზიურ ქვეყნებზე.

ხოლო, ალექსანდრეს თანამოლაშქრე სარდალთაგან — სამეფო კავალერიას ისევ სარდლობდა ფილოტა პარმენიონის ძე, ფარონებს — ნიკანორ პარმენიონის ძე, ფალანგურ ტაქსისებს — კრატეროსი, ამინტა, ცენოსი და პერდიკა, 600 ფალანგიტი კიღევ ეკატანადან უნდა წამოეყვანა კლიტოს შავს.

ალექსანდრე ბაქტრიის მთავარი ქალაქის, ბაქტრასაკენ მიეშურებოდა. იქ მას დარიონის მკვლეელი და სპარსეთის სამეფო გვირგვინის

მიმტაცებელი ეგულებოდა. გზად პართია უნდა გაეელო და მდინარე ორქესარტე გადაეღახა. პართიაში მისვლისას ალექსანდრე უქეიფოდ შეიქნა, — მუცლის საღმობა აწუხებდა; მაგრამ ტკივილი არაფრად ჩააგლო და მდინარე ავადმყოფმა გადასცურა, მოპირდაპირე მხარეზე სკვითები დაუბუნდნენ იარაღით ხელში, მაგრამ ის სკვითებიც დაიფრინა მეფემ<sup>2</sup>.

აქ ალექსანდრემ კიდევ ერთი თავისი სახელობის ქალაქი — ალექსანდროპოლისი დააარსა და გზა განაგრძო.

გზაზედ, მოულოდნელად ნიკანორი ვარდაიცვალა, პარმენიონის შუათანა ძე. მეფის ბრძანებით, ფილოტამ დიდი ზეიმური პატივით დაკრძალა ძმა. წუხილი რომ გაინელეს, მაკედონელები პართიიდან მეზობელ სატრაპიას — არეიას მიუახლოვდნენ და ქალაქ სუზიაში შევიდნენ. უმაღვე აქაური სატრაპი, სატიბარზანი გამოეგება ალექსანდრეს, სრული მორჩილებისა და „კუბოს ფიცრამდე“ ერთგული სამსახურის აღთქმით. „მადლიერმა“ ალექსანდრემ სატიბარზანი არეიის სატრაპად დატოვა, თუმცა გვერდით, „როგორც წესი“, მაკედონური „ეპისკოპოსებიც“ („ზედამხედველები“) დაუდგინა — 60 მაკედონელი მხედარი, თავის ჰეტერის, ანაქსიპუს მეთაურობით.

სატიბარზანმა ესეც შეატყობინა ალექსანდრეს: ბესამ უკვე თავზე დაიდგა სპარსეთის მეფის გვირგვინი და არტაქსერქსეს სახელით შეუდგა მბრძანებლობას და ჯარების შეყრას თქვენთან საომრადო.

ალექსანდრემ სრულის სისწრაფით გაქუსლა ბაქტრიისაკენ, მაგრამ ზურგიდან სავსებით მოულოდნელად ამბავი წამოეწია და იმ ამბავმა უმაღვე უკან შემოაბრუნა. არეის სატრაპი, ალექსანდრესგან ახლახან შეწყნარებული და აღზევებული სატიბარზანი აჯანყებულა, მასთან დატოვებული ის 60 მაკედონელი, ჯარდალ ანაქსიპუსთან ერთად, ამოუქლეთია და ჯარების შეყრასაც შესდგომია ბესა-არტაქსერქსესთან შესაერთებლად და მაკედონელთა გასანადგურებლად.

ალექსანდრემ უცებ გადაზომა გზები და მარშრუტები. არეიადან გამოსულსა და ბაქტრიისაკენ მიმავალს კიდევ ორი მტრული სატრაპია უნდა გაეელო — დრანგიანა და არახოზია, რომელთაც დარიოსის კიდევ ერთი მკვლელი განაგებდა — ბარსაენტი. უგუნურება უნდა ყოფილიყო ზურგში აჯანყებულთა დატოვება და კიდევ უმეტესი მტრებით დასახლებულ გზებზე ცხენის ჭენება. ამიტომ ალექსანდრე მყისვე შედგა, ჯარები ორად გაჰყო, ერთ ნაწილს უფროსად კრატეროსი უჩინა და ადგილზე დგომა უბრძანა, მეორე ნაწილი — ორი ფალანგა და

სამეფო მხედრობა — თვითონ აიყოლია და უკანვე, აჯანყებული არე-  
იასაკენ გაფრინდა. ორი დღის შეუსვენებელი სრბოლით უკვე არეის  
სატახტოში — არტაკონანაში იყო.

მტრის ასე მოულოდნელი მოხდომის პასუხად სატიბარხანმა ისლა  
შეძლო, მაშინვე მთებში გაქცეულიყო, ბესასთან მისასვლელი გზების  
ძიებით. მისი ჯარებიც გაიქცნენ და დაიფანტნენ. მაკედონელები გა-  
მოედევნენ, და ვისაც კი წამოეწივნენ, მუსრი გააღლეს, ბევრი ტყვედ  
აიყვანეს და მონობის ბორცილი გაუყარეს. ჩალის ცეცხლივით ანთე-  
ბული აჯანყება ჩალის ფერფლივით ჩაქრა. ხელახლა დაჩოქილი არმიის  
სატრაპად ალექსანდრემ სპარსი არსამი დასვა, არტაბაზის უფროსი ძე.

არეია ცენტრალური აზიის დიდ საკვანძო გზასაყარს წარმოადგენ-  
და. ალექსანდრემ სცნო ამ ოლქის უდიდესი ეკონომიკური და სტრატე-  
გიული მნიშვნელობა და აქ კიდევ ერთი ახალი „ალექსანდრია“ დაა-  
არსა — ალექსანდრია-არიანა (ახლ. პერთი).

ისევ წამოვიდა მგლურით ალექსანდრე არეიდან, შეიერთა კრატე-  
როსის ჯარები, და გზა განაგრძო სამხრეთისაკენ. მაკედონელები შეიქ-  
რნენ დრანგიანა-არახოზიის მიწა-წყალზე. სატრაპი ბარსაენტი მტრის-  
კენ პირმიუქცევლად გაიქცა ინდოეთში. სატრაპიის მთავარი ქალაქი,  
მდიდარი პროფთაზია, მაშინვე ჩაბარდა ალექსანდრეს. ინდოელებმა  
ბარსაენტი შეიპყრეს და ალექსანდრეს გამოუგზავნეს. ალექსანდრემ  
იგი სიკვდილით დასაჯა — „დარიოსის ღალატისათვის“ (!)

დრანგიანიდან მცირედ სამხრეთით, ნაყოფიერ და მშვენიერ ოაზი-  
სებში ცხოვრობდნენ არიასპები, მშვიდი, შრომისმოყვარე, სოფლის  
მეურნე ხალხი. დიდის სტუმართმოყვარეობით შეხვდნენ ალექსანდრეს  
არიასპები. ალექსანდრემ მათი გულწრფელი ერთგულება იწამა და  
თავისუფლება და „ხელშეუხებლობა“ გამოუცხადა ამ „აზიელ ფე-  
აყებს“.

მშვიდობიანად შეხვდნენ მაკედონელებს, აგრეთვე, გედროზიელები  
და არახოზიელები. მეფემ არახოზიის სატრაპიაში მოაქცია გედრო-  
ზიელებიც, დრანგიანელებიც და ყველას მმართველად დანიშნა მაკე-  
დონელი მენონი, 4000 ქვეითი და 600 ცხენოსანი მეომრის თანხლე-  
ბით. ალექსანდრეს ბრძანებითვე, მენონმა თავის სატრაპიაში დააარსა  
მეფის სახელობის კიდევ ერთი ქალაქი — ალექსანდრია (ახლ. ყანდა-  
პარი).

იდგა 330 წლის შუა ნოემბერი; არახოზიიდან დაძრულ ალექსანდ-  
რეს ჯარს ბაქტრიისაკენ მიმავალ გზაზე მაღალი, ღრმა თოვლით და-

ფარული წაები უნდა გადაელახა. მძიმე და შეუპოვარი სვლით კიდევაც გადალახეს და გადავიდნენ პირველი ინდური ტომის, პარაპამისადების მიწაზე, ჩრდილოეთიდან ჰინდუყუში აზილულიყო — „ინდოეთ-ს კავკასიონი“, რომლის შემდგომ იწყებოდა ბაქტრია, უზურ-პატორ ბესა-არტაქსერქსეს სამფლობელო ქვეყანა.

იწურებოდა 330 წელი და ალექსანდრე, ოთხწლოვანი სისხლთათხევისა და ჭირთათმენის შემდგომ, ინდოეთის კარიბჭეებთან მოსულიყო.

და უეცრად გაშიორკვა სავესებით მოულოდნელი „პარადოქსი“ — ყოველი ამ „ზეადამიანურ გმირობათა“ ჯილდოდ ალექსანდრეს უნდა მიეღო... სიკვდილი! დიახ, სიკვდილი და ისიც იმნაირი სიკვდილი, როგორითაც მოისრა მისი მეტოქე დარიოსი — მისებრ შეთქმულთაგან და მისებრ თანამებრძოლთა და თანასისხლიერთა ხელით!

ერთბაშად რაღაც უძირო უფსკრული ჩაჭრილიყო მეფესა და მის „მოყვარულ“ ჯარებს შორის. ლაშქრობის უკიდურესი სიმძიმენი და სიღუხჭირენი დიახაც შეიძლებოდა საფუძველი გამხდარიყო ჯარისკაცთა ჯერ „გაბუტვისა“, მერე „ბუზღუნისა“, შემდეგ, „დრტინვისა“ და ბოლოს „მამაუფლის“ მოსაყლაგად ხელის გამოღებისა.

მაგრამ მთავარი მაინც უფრო სხვა რამ ყოფილა — მეფის ახალი, სავსებით უბრეცედედნტო პოლიტიკური, საზოგადოებრივი, მორალური და ყოფაცხოვრებითი „ახირებულობანი“.

ალექსანდრე მაკედონელი მისგანვე დამხობილი სპარსული მონარქიის ნანგრევებზე ახალ სახელმწიფოს აშენებდა, სავსებით ახალს — ახალი იდეოლოგიური, საზოგადოებრივი და „საერთაშორისი“ პრინციპებით.

ნიშანდობლივი იყო ამ მხრივ არისტოტელეს შეგონებანი ალექსანდრესადმი. — ბერძნებს ისე მოექცე, როგორც ჰეგემონი, ხოლო ბარბაროსებს — როგორც მბრძანებელი, ანუ — ბერძნებს ისე უნდა მოექცე, როგორც შეგობრებსა და თანამემამულეებს, ხოლო ბარბაროსებს როგორც ცხოველებსა და მცენარეებსო, — შეაგონებდა მასწავლებელი მოწაფეს<sup>3</sup>. ბერძენთა და ბარბაროსთა განსხვავება თვითონ ბუნებამ დააღვინაო, — განაგრძობდა არისტოტელე — „ევროპის ცივ ქვეყანათა შვილები სიმამაცით აღსავსენი, მაგრამ გონებრივად უვიცნი და ხელოვნებაში გაუგებარნი არიან, ამიტომ მათგან უმეტესნი დამოუკიდებლად ცხოვრობენ, მაგრამ სახელმწიფოებრივ ცხოვრებისა და სხვებზე ბატონობის უნარი არ გააჩნიათ; აზიის ხალხები კი დაჯილდოებულნი არიან ცოცხალი გონებით და ხელოვნებისადმი მიდრეკი-

ლებებით, მაგრამ მოკლებულნი არიან სიმამაცეს, ამიტომ ჰყავთ მბრძანებლები და თვითონ კი არიან მონები. ხოლო, ბერძენი ხალხი, რომელიც ცხოვრობს ამ ორი მოდემის ხალხთა შუაში, ფლობს ორივე ამ ხალხის კეთილ თვისებებს. ამიტომ ბერძნებს აქვთ თავისუფლება და საუკეთესო სახელმწიფოებრივი ცხოვრება და, უკეთესიანი ერთ სახელმწიფოებრივ სხეულს შექმნიან, მათ შეუძლიათ ყველა დანარჩენ ხალხებზე გაბატონდნენ<sup>4</sup>.

მაგრამ ალექსანდრე არ გამოდგა მისი გენიალური მასწავლებლის დოქტრინის ბრმა მიმდევარი-დოქტრინიორი. მასწავლებლისა და აღმზრდელის ამ ურჩმა „პოლოსმა“ (კვიცმა), ვითარცა მისი თანადროული ისტორიის „მთავარმა გმირმა“, თავისი საკუთარი, ცხოვრებისაგან ნაკარნახევი „დოქტრინა“ შექმნა: თუ გინდა დაიპყრო, დაპყრობილი შეინარჩუნო და მასზე ძირბტკიცედ და გულმყარად იბატონო, არ შეიძლება დაპყრობილ ხალხებს ისე უყურებდე და ექცეოდა, ვითარცა ცხოველებსა და მცენარეებს. შეუძლებელია „მაკედონელობა“ რაიმე მნრით „სპარსელობაზე“ უპირატესობას განიჭებდეს და სჯობს ისევე „ბერძნობას“ ჩავეჭიდოთ, მაგრამ აქაც — შეიძლება შენ, ბერძენს, შენი თავი შინაგანად „უკეთესად“ მიგაჩნდეს და სპარსელი „უარესად“, მაგრამ რამდენადაც სპარსელსაც შეუძლია პირუტყვოდ წარმოიდგინოს — თავისი თავი „უკეთესად“ და შენ კი „უარესად“ — ამიტომ არ შეიძლება ამის საგანგებოდ გამოჩინება და ადამიანთა მოდემის ასე აშკარად („ოფიციალურად!“) დაყოფა — „უკეთესებად“ და „უარესებად“, „ჰეგემონებად“ და „მაჩანჩალებად“, ნამდვილ „ხალხად“ („დემოს“) და ნამდვილ „ბრბოდ“ („ობლოს“) მთავარი ესაა: თუ ასეთი „დაყოფა“ დაუშვი, ვერ დაიპყრობ და კიდევაც რომ დაიპყრო, ვერ იბატონებ, ვერ იბატონებ-მეთქი!

არისტოტელე ალექსანდრეს საქმიანობაში მხოლოდ მანამდელი ისტორიული გამოცდილების შეჯამებას და ბერძენთა სასარგებლოდ მის „გადაჯამებას“ ახდენდა, ხოლო ალექსანდრე, მისი „კონსერვატორი“ მასწავლებლისაგან განსხვავებით, თავისი ახალი სახელმწიფოს „მარადიული არსებობისათვის“, ახალ სახელმწიფოებრივ და იდეოლოგიურ საფუძვლებს ეძიებდა.

უქველად, ალექსანდრეს ეცოდინებოდა თავისი მასწავლებლის შეგონება იმის შესახებ, რომ — არსი საუკეთესო სახელმწიფოებრივი წყობილებისა ემყარება სახელმწიფოს წევრთა შორის უფლებათა და მოვალეობათა თანასწორობას, „მაგრამ უკეთეს მათ შორის ვინმე გა-

მოერჩევა ისეთი ნიჭით და უნარით, როცა სხვების ნიჭი და ძლიერება იმ ცალკე პიროვნების უნარს ვერ გაუტოლდება, მაშინ იმ გამორჩეულს ისე არ უნდა ვხედავდეთ, როგორც ნაწილს მთელისას. ჩვენ რომ დვი — ნიჭით და ძლიერებით სხვათაგან ეგზომ უსწორო — სხვებისთვის გაგვეთანასწორობინა, მაშინ მის მიმართ სწორედ უსამართლოდ მოვიქცეოდით. ასეთი ადამიანი ხომ ღმერთს ჰგავს ადამიანთა შორის; აქედან კი გამომდინარეობს დასკვნა, რომ კანონმდებლობა უნდა შემოიფარგლოს მხოლოდ იმ ადამიანებით, ვინც დაბადებით და უნარით თანასწორნი არიან; ხოლო გამორჩეულთათვის კანონი არ არსებობს, — ისინი თვითონ არიან კანონი; სასაცილო იქნებოდა ის, ვინც მათ (რჩეულებს) კანონებს მოახვევდა; მაშინ ისინი (რჩეულნი) ალბათ ისევე უპასუხებდნენ, როგორც უპასუხეს ანტისტენეს ლომებმა, როცა ნადირთა კრებაზე კურდღლები ლაპარაკობდნენ და ნანადირევის თანაბრად განაწილებას მოითხოვდნენ“ 5.

არისტოტელეს ეს თეორია, რასაკვირველია, რომელიმე ცალკე, სახელდებით ნაგულისხმევი პიროვნების გააზრებით როდი დაუწერია, მაგრამ სავსებით დასაშვებია, რომ ამ ზოგადი თეორიული მოძღვრების წაკითხვისას იგულისხმება ალექსანდრე, მართლაც „გამორჩეული პიროვნება“, რომლის „გონება აჭარბებდა ყოველ ადამიანურ გონებას“ 6. მაგრამ თვითონ ალექსანდრე, — როგორც მისი საწუთისოფლო პრაქტიკა გვიჩვენებს — თავის „გამორჩეულობას“ და ადამიანთა შორის „ღრმობას“ არისტოტელეს თეორიის ფილოსოფიურ დასაბუთებად როდი იყენებდა. ალექსანდრეს პოლიტიკური ზნეობისათვის მიუღებელი იყო ყოველი არაბერძნისა და არამაკედონელის ცხოველთან და მცენარესთან გაიგივება; იგი ვერც იმას გაიზიარებდა, რომ მაკედონელებსა და ბერძნებს ბატონობა „ამშვენებთ“, ხოლო ბარბაროსებს — მონობა 7.

ალექსანდრე მაკედონელი სულ სხვა, ახალ, „ნოვატორულ“ გზას ადგა. მან სპარსული სახელმწიფო დაამხო — აქ იგულისხმება ძველი, სპარსული სახელმწიფოებრივი სისტემის მოსპობა და არა საკუთრივ სპარსეთის დამხობა. დარიოსის სიკვდილისთანავე ალექსანდრე აზიის უთვალავ ხალხებზე მბრძანებლობის მემკვიდრედ იქცა, — იმ ხალხებისა, რომელთაც აქამდე ისე ექცეოდნენ, როგორც მონებს და არა როგორც სახელმწიფოს მოქალაქე-წევრებს. და აი, ალექსანდრე აღმოჩნდა პირველი, რომელმაც გამოაცხადა, რომ ყოველი აზიელიც ისეთივე თავისუფალი სულის ადამიანია, როგორც ყოველი ბერძენი თუ მაკედონ-

ნელი. სპარსელისა და ეგვიპტელის წესა და ადათს, ენასა და კულტურას, რელიგიასა და სინდრს ისეთივე პატივი უნდა სცე, როგორც საკუთარ ბერძნულსა და მაკედონურს. ალექსანდრე პირდაპირ ასწავლიდა აზიის ხალხებს აქემენიანთა ბოროტი დესპოტიზმისგან გადავიწყებულ თავისუფლებას (რამდენადაც ეს შესაძლებელი იყო მის თანადროულ სინამდვილეში). ორივე მხარე უნდა შეჩვეოდა და შეგუებოდა ამ „სინთეზს“ — ამიერიდან ამ ახალ, „ალექსანდრიულ სახელმწიფოში“, ყველა ერთუფლებრივი წევრია — ბერძენიც, მაკედონელიც, ეგვიპტელიც, სპარსელიც და საერთოდ ყოველი აზიელიც. მთავარი ის არის, რომ მათ შორის არავინაა „დამპყრობელი“ და „დაპყრობილი“; აქ დავიწყების ხავსი უნდა დაედოს განსხვავებას „ელინსა“ და „ბარბაროსს“ შორის. სწორედ აღმოსავლეთ-დასავლეთის ასეთი „გამთლიანებით“ და „გაერთიანებით“ ფიქრობდა იგი არისტოტელეს „იდეალური“ სახელმწიფოებრივი სხეულის შექმნას, სადაც ერთმანეთს პარმონიულად შეერწყმოდა „ხელოვნება დასვენებისა“ და „წრთობა რკინისა“<sup>8</sup>.

ალბათ, ამ აღმოსავლურ-დასავლურ „სინთეზში“ ალექსანდრეს სწამდა, რომ ელინური კულტურა მაინც „თავისას გაიტანდა“, მაგრამ იგივე ბერძნული აღმოსავლურსაც გვარიანად შეირწყვავდა. სიმბოლურადაც გამოჩანს, რომ ალექსანდრემ 30000 სპარსელი ყრმა ბერძნულ ენასა და მაკედონური იარაღის ხმარებაში გააწვრთნევინა<sup>9</sup>.

ალექსანდრე ყოველნაირად ცდილობდა „ერთი“, ანუ „საერთო“ მეფის როლი ეთამაშნა ორივე მხარის თვალში, და ამ მხრივ მისი ტვირთი სწორედ განუზომლად მძიმე იყო, ვინათგან იგი ერთადერთი საწყისი დვრიტა იყო იმ ერთიანობისა, რომელიც, მისი აზრით, ისევ და ისევ, მხოლოდ და მხოლოდ მის გარშემო უნდა განივთებულიყო და გამკვირვებულიყო. განსაკუთრებით კი აზიელები უნდა დაერწმუნებია, რომ იგი „მთავი მეფე“ იყო, და თანაც გაცილებით უფრო ახლობელიც, ვიდრე რომელიმე „მშობლიური“ დარიოსი, ქსერქსე თუ კიროსი. უკვე ვიცით, როგორ პატივს სცემდა და რა აქტიურად ემართებოდა ალექსანდრე ადგილობრივ კულტურას, ენას, რელიგიას, ზნესა და ჩვევას, ან კიდევ — როგორ იწყნარებდა, აწინაურებდა და იახლოებდა იგი ისევ ადგილობრივ აზიელ პოლიტიკოსებს. მაგრამ დარიოსის შემდეგ მაინც სულ „გასპარსელდა“ ალექსანდრე. აზიელების მიღებისას აზიურ ცერემონიალებს მართავდა, თვითონაც აზიური ტანსაცმლითა და აღმოსავლური ბრწყინვალეობით მორთულ-მო-

კახშული და აზიელ კარისკაცთა ამალით გამოდიოდა. მეორე დღეს კი მას ისევ უბრალო მაკედონურ სამოსსა და საჭურველში ჰხედავდნენ და სხვათაგან მხოლოდ ისევ მისი საოცარი სიმაჰაყით, გამძლეობით და ქირთათჰენით თუ გამოიცნობდნენ.

აზიელთა სამყაროში ალექსანდრეს ნათესი უეჭველად ნაყოფს იმკიდა, მაგრამ რამდენად მისაღები, შესასმინარი და შესაგონებელი იყო ეს მისიანებისათვის, თვითონ მაკედონელებისა და ბერძნებისათვის?

და „საკითხავიც“ სწორედ ეს არის!

ჰეფესტიონი, თითქოს, ერთადერთი უნდა ყოფილიყო, რომელსაც ალექსანდრეს „პოლიტიკური იდეოლოგიისა“ სჯეროდა<sup>10</sup>, ან, იქნებ, არც ესმოდა, მაგრამ მაინც სჯეროდა, სწამდა და მიჰყვებოდა კიდეც. მეორე ხასიათი კი კრატეროსი იყო, რომელსაც სპარსული წესწყობილებისა არაფერი სწამდა და მხოლოდ მამაპაპეული ტრადიციების წმინდად შენახვაზე და მათ გავრცელებაზე იღვწოდა. ალექსანდრეც ამბობდა: ჰეფესტონს ჩემში ალექსანდრე უყვარს, კრატეროსს კი მეფეო<sup>11</sup>. სხვადასხვა „მსოფლმხედველობის“ მქონე ორ ჰეტერს ერთიმეორე კიდეც სძულდათ, ზოგჯერ ერთმანეთს სასიკვდილოდაც არ ინდობდნენ და მხოლოდ ალექსანდრე ახერხებდა ხმალდახმალ წაყიდებულთა გაშველებას<sup>12</sup>.

მაგრამ, თურმე მთელი ჰეტერთა წრე, სრულიად მაკედონური და ბერძნული არისტოკრატია, კრატეროსის მსგავსად, ალექსანდრეს „ახირებული ნოვატორობის“ წინააღმდეგ ყოფილა. მათი ფსიქოლოგია დამპყრობელის ეგოისტურ ინსტინქტებს ოდნავადაც არ გაშორებია. ისინი დამპყრობლებად წამოვიდნენ, დაიპყრეს და დამპყრობლებად რჩებოდნენ. ყველა ისინი არისტოტელეს ერთგული მიმდევარი „პერიპატეტიკოსები“ ყოფილან: ბარბაროსები იმიტომ არიან ბარბაროსები, რომ მონად ემსახურონ ადამიანთა უმაღლეს მოდგმას — ბერძენ-მაკედონელთა მოდგმას, მორჩა და გათავდა! (თურმე ვის ასწავლიდა არისტოტელე და ვინ გამხდარა ერთგული მისი სწავლებისა!).

ყოველ მაკედონელს და ბერძენს თურმე ბოღმა და ბრაზი ახრიობდა, რომ მათი „საყვარელი მეფე“ სპარსელთა სალოცავებში სპარსულად გუნდრუქს აკმევდა, სპარსელებს რომ იწყნარებდა, იწყალებდა და იახლოებდა, სპარსულ ამაღას რომ იმრავლებდა, სპარსული ტანსაცმლის ჩაცმას რომ კადრულობდა და სპარსული სამეფო ინსიგნიებით იკაზმებოდა.



თვითონ აზიურ ფუფუნებას, ღიახაც, თავდავიწყებით დაეწაფნენ და დაეხარბნენ დამპყრობელნი, მაგრამ ქონების დაგროვებაზე დახარბებული ამდროინდელი მეომარი, — კლასობრივი კატეგორიით მონათმფლობელი — ქონების ყველაზე სასურველ ნაწილად სწორედ დაპყრობილ, მონადქცეულ ტყვეს გულისხმობდა — მონას, ყველაზე ძვირფას საქონელს!

და ვინ იყო ეს მეტიჩარა ალექსანდრე, ისეთი „რევოლუცია“ გამოეტყრო, რომ მონა მონად აღარ დარჩენილიყო და მონათმფლობელი კიდევ მონათმფლობელადღე!

განსაკუთრებით უფროსი თაობა, ფილიპეს ღროინდელი დიდკაცობა ვერ შერიგებოდა ახალგაზრდა მეფის „უცნაურ ახირებულობას!“. ისე გამოდიოდა, მთელი მათი სიცოცხლის ნამამაგარი და ნასისხლარი თვითონ, გამარჯვებულებს კი არა, მათგანვე დამარცხებულებს უნდა მოემკოთ და იმკიდნენ კიდეს! მარადიულად ყბადაღებული უთანხმოება „მამებსა“ და „შვილებს“ შორის ამ შემთხვევაშიც „თავისას“ მოითხოვდა. მამები შვილთა „ნოვატორობაში“ მამაპაპეულ ტრადიციათა შელახვას ხედავდნენ და ამ შემთხვევაშიც ალექსანდრეს „პრობარბაროსული პოლიტიკა“ მაკედონურ ტრადიციათა დასამარებად მიაჩნდათ ფილიპეს კბილა „მამებს“.

სამხედრო ბანაკში მცირეოდენი სულიერი რბევაც კი საშიში, ძალზე საშიშია მეფისთვის და მთავარსარდლისთვის. ამიტომ დროზე უნდა „მოეგო გონს“ ალექსანდრე, თორემ...

ალექსანდრემ იცოდა, რაც ხდებოდა მის ბანაკში, იცოდა ვის მოსწონდა და ვის არ მოსწონდა მისი „საპოლიტიკო ნოვატორობა“. იცოდა, რისთვისაც ემტერებოდნენ ერთმანეთს ჰეფესტიონი და კრატეროსი. იცოდა, რომ „ბარბაროსთა ამყავებელი“ მისი პოლიტიკით უკმაყოფილო იყო პარმენიონი, მეფის შემდგომ „მეორე კაცო“ პარმენიონის ვაჟიც, ფილოტა, ბუნებით ფიცხელი და შეუპოვარი, აშკარად, ჯარისკაცთა შორისაც არ ერიდებოდა მეფის აუგად მოხსენიებას. — ეგზომ დიდი სახელი ალექსანდრემ — მამაჩემის და ჩემის წყალობით მოიხვეჭაო, — ამასაც ამბობდა ფილოტა, თუ ჯარისკაცებში, თუ მეძავ ქალებში. ძალზე ახლობელი შავი კლიტოსიც კი — ძმა ალექსანდრეს ძუძუსმკმეველისა და სარდალი სამეფო აგემისა — უკვე გაუბრბოდა მეფესთან შეხვედრას.

სამხედრო საბჭო აქ, ინდოეთის მისაქციელთან, აღარ ჰგავდა სამხედრო საბჭოს გაევამელას ბრძოლის წინანდელს. ახლა სარდალთა

თათბირზე ზომავადასული ხმაური იდგა, წამდაუწყებლად გაგულისებულთა ნერვიული შეძახილები და კბილთა ღრქენა ისმოდა. ისეთებიც გამოჩენილან, ომის დასრულებას, ომით მონაპოვრების განაწილებას, ჯარების დაშლას და სამშობლოში დაბრუნებას რომ მოითხოვდნენ.

რალა თქმა უნდა, ეს განწყობილება მეთაურებიდან ჯარისკაცებზე უნდა გადასულიყო. ჯარიც ომის გათავებას და სახლში დაბრუნებას ითხოვდა და მოითხოვდა. ჯარს ბუზლუნისა და დრტვინვის „საფეხურები“ უკვე გაეგლო და ახლა უკვე იმუქრებოდა.

ალექსანდრეს საერთოდ დაუთმობელი ხასიათი ჰქონდა და მით უფრო ვერ დათმობდა ყველაზე მთავარს, რაც მას თავისი ახალი სახელმწიფოს ერთადერთ მაარსებელ ქვაკუთხედად მიაჩნდა. ვერც ხელქვეითთა თავაშვებულობას და დაუშორჩილებლობას დაუშვებდა, ვინათგან ალექსანდრესავეთ არავინ იცოდა, რომ სამხედრო დისციპლინის ოდნავი შესუსტებაც კი სულ მალე ჯარს უწყესრიგო, უთავბოლო და საშიში ინსტინქტებით აღძრულ ბრბოდ აქცევდა.

მაშ, არც ერთი მხარე დათმობას არ აპირებდა.

მაკედონელთა ბანაკში ხისხლის სუნი ჩამოწვდა.

და... პატროკლებმა აქილევსს მოკვლა დაუპირეს.

მეთაურთა წრეში იყო ვინმე დიმნოსი, მაკედონიის ქალესტრადან, კაცი ფრიად ექსცენტრიული, ნერვიული, მამათმავალი. ერთ დღეს იგი გამოუტყდა თავის საყვარელ ყმაწვილს, — ნიკომაქეს. — ჩვენ ვართ შეთქმულნი, დღეიდან მესამე დღეს უნდა მოვკლათ მეფე და შეთქმულებაში შენც უნდა მიიღო მონაწილეობაო. ნიკომაქემ გადაჭრით უარი თქვა. მაშინ დიმნოსმა ფიცი ჩამოართვა, შეთქმულებაზე სიტყვა არ დაგცდესო. ნიკომაქემ ფიცი კი მიცა, მაგრამ იმ დღესვე ყველაფერი მაინც აუწყა თავის ძმას, კებალინეს. კებალინე სასახლეში წავიდა და მის შესასვლელთან დადგა, მეფის რომელიმე ახლობელი კარისკაცის მოლოდინში. გამოჩნდა ფილოტა. ფილოტაზე ახლობელი მეფეს ვინდა ჰყავსო, — და ლწორედ მას აუწყა კებალინემ შეთქმულების ამბავი. ფილოტა მაშინვე შევიდა მეფესთან, შევიდა, ბევრ რამეზე ელაპარაკა, მაგრამ ბოლს ისე დაშორდა, რომ შეთქმულებაზე არაფერიც არ უხსენებია. სალამოს კებალინემ ფილოტას მიაკითხა და ამბავი მოიკითხა. დღეს თქმა ვერ მოვახერხებ და ხვალ აუცილებლად ვეტყვი მეფეს მაგ საშფოთარ ამბავსო, — უბასუხა ფილოტამ. მაგრამ არც მეორე დღის ხანგრძლივ საუბარში უხსენებია შეთქმულება მეფესთან ფილოტას. კებალინე ფილოტას უკვე აღარ

ენდო და ახლა მეტრონს, მეფის მესაქურველს აუწყა და თან ალექსანდრესთან პირადი შეხვედრის მოწყობა სთხოვა. მეტრონმა კებალინე იღუმალ მეფის საქურველთა სათაესო ოთახში შეიყვანა, თვითონ კი აბაზანაში შევარდა, სადაც იმ წუთში ალექსანდრე ბანაობდა და განისვენებდა. როგორც იქნა, მეფე და დამსმენი ერთმანეთს შეხვდნენ. კებალინემ ყველაფერი დაწვრილებით აუწყა. ალექსანდრე საშინლად აღელდა და აზვავდა. ჭერ თვითონ კებალინეზე აღძრა ეჭვი — ასე გვიან რატომ შემატყობინეო. მერე კი, — როცა შეიტყო, ფილოტამ ეს ამბავი ორი დღით ათრია უთქმელადო — სულ შეიშალა მეფე. ახლავე დიმნოსი შეიპყარით და აქ მომკვარეთო, — დაიღრიალა. ბრძანების შესასრულებლად გაქანდნენ, მაგრამ ხელყარიელნი მობრუნდნენ — დიმნოსმა თავი მოიკლაო. მაშინ ფილოტა მოიკითხა ალექსანდრემ. ფილოტაც მოვიდა და კითხვაზე, თუ რატომ არ აუწყა მეფეს მან უთქმულების შესახებ, უპასუხა, — აბა, რა საჭირო იყო გარყენილთა ტრაბახი სერიოზულ განაზრახვად ჩამეთვალა და მეფე სასაცილო მდგომარეობაში ჩამეგდოო, მაგრამ ახლა, რაკი დიმნოსმა თავი მოიკლა, საქმე მართლა სერიოზული ყოფილა და გამოძიებას ბოლომდე მივყევითო; მე კი გთხოვ: ისევ ძველებურად გიყვარდე და ეჭვებს გულში ნუღარ გაიტარებო, — უთხრა და მოეხვია ფილოტა მეფეს. ალექსანდრემ, ვითომ ფილოტას უტოლველობაში დარწმუნებულმა, იგი გაუშვა და ჩვეულებრივ სანადიმო ტრაპეზზე დაიბარა. მაგრამ ფილოტას მობრუნებამდე მან საიდუმლო საბჭო შეკყარა და საქმის ვითარება შეატყობინა. მოთათბირებებმა კიდევ უფრო ვაამძაფრეს უთქმულების სერიოზულობა და საშიშროება. გულუბრყვილობა იქნება იმის ფიქრი, თითქოს ვიღაც ქალესტრელ ღიმიოსს გაებედნოს ამოდენა საქმეო; იგი უფრო იარადი ჩანს ვინმე უფრო მძლავრის ხელშიო, ალექსანდრემ საბჭო დაშალა და საგანგებო სუფრაზე შემოიყარა ჰეფესტიონი, კრატეროსი, კენოსი, ერიგონაი, პერდიკა და ლეონატოსი. ფილოტაც უნდა მოსულიყო და ისიც მოვიდა.

ოპერაცია იწყება, სანამ თანამესუფრენი სუფრას ულხენენ, მეფის ერთგული ჯარები იპერენ ყოველ შესასველ-განოსასველეს, ყველა კარბიქეს; გზას, განსაკუთრებით ეკატანასკენ მიმავალ გზას, ვნათგან ეკატანაში არის პარმენიონი, მამა ფილოტასი... იმ სუფრაზე არაფერიც არ ხდება — ფილოტა აინუნშიც არ არის, ისე მიდის სახლში და იძინებს ღრმა, არხეინი ძილით. მაგრამ მისი სახლი უკვე გარშემორტყმულია მეფის ერთგული სამასი რჩეული მეომრით. ისინი

ერთბაშად იჭრებიან სახლში, თავს ესხმიან ფილოტას, ბორკილებს უყრიან და მიჰყავთ მეფის კარავში.

ასე განესრულა ღამე. მეორე დღეს კი მეფემ, ძველი მაკედონური წესით, ჯარი შეჰყარა, ვითარცა სასამართლო, და გამოუცხადა: მზილებულ არიან შეთქმულნი — პარმენიონი, ფილოტა, დიმნოსი, პევკოლაოსი, დემეტრიოსი, — რომელთაც განზრახული ჰქონდათ ჩემი მოკვლაო. გამოვიდნენ და ილაპარაკეს — ნიკომაქემ, კებალინემ და მეტრონმა; დიმნოსის თვითმკვლელობაც ღალატის საბუთად დაიდეს, მისი ვვამიც გამოიტანეს და ჯარის წინ დაავდეს. მეფემ ფილოტას ბრალი დასდო — ჩემი მოკვლის განზრახვა რომ შეატყობინეს, ორი დღე უთქმელად ათრია და მესამე დღეს, — რომ არ დამესწრო — განზრახვა უნდა შეესრულებიათო. ეს თქვა და მეფემ წერილი ამოიღო და წაუკითხა ხალხს, — აი, რას სწერს პარმენიონი შვილებს, ფილოტას და ნიკანორს: „ჯერ თქვენს თავზე იზრუნეთ, მერე თქვენიანებზე და ასე წარმატებით მივალწევთ ჩვენს მიზანსო“. მიზანი კი თურმე ჩემი მოკვლა ჰქონიათ მამა-შვილებსო, — განაგრძობდა ალექსანდრე ბრალდების სიტყვას — სხვა რამეც ბევრი მესმოდა ფილოტას ორგულობისა და ღალატისაო, მამაჩემი რომ მოკვლეს, ფილოტას სხვა ცნამეს აყვანა უნდოდა ტახტზეო; მაგის დის ქმარი, ატალოსი ხომ დედაჩემს და მე გვებრძოდა ისე თავგამოდებით; ეგვიპტეშიც რამდენჯერმე მომახსენეს, რა კადნიერი და მუქარით გატენილი სიტყვები დაუხარჯავს მავ ვაჟბატონს ჩემზედ. რაიც შემდგომაც გაუმეორებია მის როსკობ ანტიგონასთან; ახლა მისი თავგასულობა, ტრაბახი, უზომო ფუფუნება, თავაწყვეტილი ფუქსაეატობა იხილეთ, მამამისსაც რომ ათქმევინა — ნამეტანს ნუ იზამ, ნაადრევად ნუ გამომქლავნდებო; კარგა ხანია, მამა-შვილმა ხელი აიღო ერთგულ სამსახურზე; გავგამელანეც ბრძოლა კინალამ წავაგეთ პარმენიონის წყალობით; დარიოსის სიკვდილის შემდეგ კი მამამ და შვილმა მდგომარეობა მომწიფებულად ჩათვალეს და მოქმედებაზე გადავიდნენ, მკვლელები დაიქირავეს და ჩემი მოკვლის დღეც დანიშნესო.

მეფის სიტყვამ ააღელვა და შეთქმულთა წინააღმდეგ განაწყო ხალხი. მაგრამ, როცა მეფის ბრძანებით ფილოტაც გამოიყვანეს, ახლაც ის შეიცოდა ხალხმა — გუშინ დიადი, კავალერიის მეთაური, ამპარტავანი და ბედნიერი, დღეს დაცემული, ბორკილგაყრილი და თავზე ჯვარლოჩაპოცმული, დამცირებული და სიკვდილმდევნი.

მაშინ სიტყვით გამოვიდა სარდალი ამინტა, რომელმაც ფილოტას

ბრალი დასდო და ხალხი დაარწმუნა, — უკეთეს ფილოტა თავისას ვა-  
იტიანდა და მეფეს სიკვდილს შეჰყრიდა, მაშინ ყველას, ყოველ ჭარ-ს-  
კაცს სამშობლოში დაბრუნების იმედიც ეკარგებოდა.

მერე, მწვავე სიტყვა წარმოთქვა კენოსმა, ფილოტას დის ქმარმა,  
რომელმაც ბრალდება დაასრულა თუ არა, ქვას ხელი წამოაელო და  
ფილოტასთვის პირველს უნდა დაერტყა და ამით ყველასთვის ნიშანი  
მიეცა, მაკედონური წესით, განწირულის ჩაქვავებისა. მაგრამ ალექ-  
სანდრემ არ დაანება ქვიზ დარტყმა კენოსს. დაე, ფილოტამ ჭერ თა-  
ვი იმართლოსო, და თვითონ მეფემ დატოვა საკრებულო, რათა დაცვის  
თავსუფლება არ დაეაბრკოლო.

სანტერესო ისაა, რომ გასვლის წინ მეფემ ხალხის გასაკონად  
უთხრა ფილოტას — სიტყვა თქვი და მაკედონელებს ელაპარაკე მაკე-  
დონურ ენაზე, უკეთეს მშობლიური ენა არ დაგვიწყნია და კიდევ სცემ  
მას პატივსო.

ფილოტამაც თქვა თავისი სიტყვა, — მაინც ბერძნულად თქვა და  
თავი ასე იმართლა: დიდი ხანია, ჩემი მშობლიური მაკედონური ენა  
ხპარებიდან გამოვიდა და ახლა ყველას — გამარჯვებულებსაც (მაკე-  
დონელებს) და დამარცხებულებსაც (აზიელებს) უცხო (ბერძნული)  
ენის შესწავლა გვიხდებოდა; მერე ბრალდება უარპყო თავგამოდებით  
ფილოტამ. მამაჩემიც და მისი შვილებიც ყოველთვის უერთგულესი  
მსახურნი ვიყავით ალექსანდრესიო; მე მხოლოდ იმიტომ არ მოვასხე-  
ნე მეფეს შეთქმულების ამბავი, რომ იგი არ მჭეროდა და არ მინდო-  
და ისეთივე გაცრუებული დამსმენი ვყოფილიყავი, როგორც მამაჩე-  
მი აღმოჩნდა მაშინ, როცა ტარსოსში ფილიპე აკარანნიელი ასმევდა  
წამალს ავადმყოფ მეფესო.

დიდი მღელვარების პირობებში მაკედონელთა საკრებულომ სა-  
ჭიროდ სცნო შეთქმულთა სიკვდილით დასჯა. მაგრამ ალექსანდრემ  
ერთი დღით კიდევ გადასდო სასამართლო. მას აუცილებელ საჭირო-  
ებად მიიჩნდა ფილოტას აღიარება დანაშაულში, რაიც ნათელს მოჰ-  
ფენდა პარმენიონისა და დანარჩენების წილხვედრს შეთქმულებაში.

ალექსანდრემ კიდევ შეჰყარა საიდუმლო საბჭო. უმრავლესობამ  
მაშინვე მოითხოვა ფილოტას მოკვლა. მაგრამ ჰეფესტიონი, კრატერო-  
სი და კენოსი მეფეს ურჩევდნენ მაინც სიკვდილამდე აიძულონ ფი-  
ლოტა აღიარებაზე. ასედაც გადაწყვიტეს.

ჰეფესტიონის, კრატეროსისა და კენოსის დასწრებით, დაიწყო  
ფილოტას დაკითხვა. დაკითხვა წამებაში გადავიდა. წამება ფილო-

ტასთვის აუტანელი გახდა და განწირულმა ჰეფესტიონს ვედრება დაუწყო, შემიბრალე, წამება შემიმსუბუქეო. ალექსანდრე ფარდის იქით ყოფილა ჩასაფრებული, ვეღარ მოითმინა და დაუღრიალა: „ნუაუ, ფილოტავ, ანეთმა სულმდაბალმა და ლაჩარმა გაბედე ამოდენა საქმისთვის ხელის გამოღება?!“

ბოლოს და ბოლოს, ესე სცნო წამებით განაწამებმა: დიახ, მე და მამაჩემი ვლაპარაკობდით ალექსანდრეს მოკვლანე, მაგრამ ეს არ გვინდოდა გვექნა, სანამ დარიოსი იყო ცოცხალი, რადგან ალექსანდრეს მოკვლით მაშინ მოვკვებდით არა ჩვენ, არამედ სპარსელები, ხოლო ახლა თვითონ, ფილოტამ, — ისე რომ მამამისმა პარმენიონმა არაფერი იცოდა — გადაწყვიტა და შეკრა შეთქმულება ალექსანდრეს მოსაკვდინებლად...

მეორე დღეს მეფე გამოვიდა და აცნობა ხალხს ფილოტას აღიარებას. მაკედონელები ფილოტას მიცვიდნენ და შუბებით დაცხრილეს<sup>13</sup>.

მაშინვე უნდა გადაწყვეტილიყო პარმენონის მოკვლის საკითხიც. თუ ფილოტა მოლაღატე იყო, მოლაღატე იქნებოდა პარმენიონიც, ვინათგან მამა და შვილი, არამცთუ მეფის მოკვლას, უერთმანეთოდ უბრალოდ წყალსაც არ გადააქცევდნენ. ხოლო, უკეთუ ეს გამონაკლისი მოხდა და მამამ შვილის განზრახვისა ამჯერად არაფერი იცოდა, სულ ერთია — ფილოტას მკვლელობის შემდგომ მაინც პარმენიონი მტერი იქნებოდა ალექსანდრესი. ორი შვილი შესწირა პარმენიონმა ალექსანდრეს კეთილდღეობას, ახლა კი ეს ერთადერთიც ალექსანდრემ შეიწირა. რასაკვირველია, შვილებამოწყვეტილი, მარტოდ შთენილი ბებერი სარდალი შურისსაძიებლად თავს აღარ დაიზოგავდა. იგი დიდ ჯარებს სარდლობდა მიდიამში; მას ეზარა მრავალათას ტალანტად ღირებული საგანძურები ეკბატანაში. იგი ყველაფერს შურისსაძიებლად დახარჯავდა.

დიახ, უნდა მოეკლათ პარმენიონიც. უნდა დაესწროთ და მოეკლათ. ეკბატანაში პარმენიონს თანაშემწე სარდლებად უდგნენ შენიდა, კლევანდროსი და სიტალკი — თრაკიელთა ბელადი, და ამათი ხელით უნდა მოეღოთ ბოლო პარმენიონისთვის, სასწრაფოდ, მანამ, სანამ პარმენიონი რამეს იაზრებდა მისი უბედურებისას. ალექსანდრემ უახლოესთაგან პოლიდამანტი აარჩია, ჰეტერთა რაზმი და წერილები მისცა და ეკბატანასკენ აფრინა. სწრაფ, დრომადერ აქლემებზე ისხდნენ. მეთერთმეტე ღამეს მიიჭრნენ ეკბატანს. იმ ღამით პოლიდამანტი მანახულა სიტალკი, კლევანდროსი და შენიდა, მეფის წერილობითი

ბრძანება გააცნო სამივეს. გადაწყვიტეს, როდის და როგორ მოეკლათ პარმენიონი. მეორე ღღესვე, დილით უნდა შეხვედროდნენ და მოეკლათ. პარმენიონს აცნობა თავის ჩამოსვლა და მეფის წერილის ჩამოტანა, პოლიდამანტმა. დათქვეს, დილით შეხვედროდნენ ყველანი ერთმანეთს, სასახლის ბაღში.

დილით ადრე, ბაღში მოსეირნე დახვდა პარმენიონი თავის სარდლებს — სიტალკს, მენიდას, კლავდროსს. პოლიდამანტაც მოვიდა. ყმაწვილური სიმარლით შეეგება სამოცდაათი წლის სარდალი მეფის წარგზავნილს. ერთმანეთს გადაეხვივნენ. სტუმარმა მასპინძელს მეფის წერილი გადასცა. პარმენიონმა ღიმილით გასტეხა ბეჭედი, წერილი წაიკითხა და გამოაცხადა: არახოზიელთა დალაშქვრას ამზადებს თურმე ჩვენი სათაყვანო მეფე; საოცარია მისი საქმენი, დიადნი და მარად დაუსვენარნი; მაგრამ, ოდეს მან მიაღწია ეგზომ დიდუბას, ჩვენ მეტი უნდა ვიზრუნოთ მისი სიცოცხლის დასაცავად და მოსაველეადო.

და, ამას რომ ამბობდა, პირველმა სიტალკ თრავიელმა აძეკრა მახვილი, გულზე გაუპო და ძირს დაცემულს გამოსჭრა ყელი. დანარჩენებმაც წამოუშინეს მახვილები, ისედაც უკვე სიკვდილში ჩაძირულს...

გრძელდებოდა დანარჩენ შეთქმულთა გასამართლება. ბორცილები ედო და საპყრობილეში თავის წილხვედრს ელოდებოდა დემეტრიოსი — მეფის შვიდ მცველთაგან ერთ-ერთი (ახლა მისი აფვილი პტოლემეაიოს ლავიდს დაეჭირა). შეთქმულთა ჯგუფს აკუთვნებდნენ ფილოტას მეგობრებსა და თანამებრძოლებს, ანდრომენეს ოთხ ვაჟს — ამინტას, სიმიას, ატალოსსა და პოლემონს. პოლემონმა, ფილოტას შეპყრობა რომ შეიტყო, გაქცევა მოასწრო. ამან დანარჩენი ძმებს მიმართ მეფის ეჭვები გააძლიერა. მაგრამ მედგრად იცავდა თავსაც და ძმებსაც ამინტა. მაკედონელებს ეჭვი აღარ ეპარებოდათ ანდრომენიდების სიმართლეში. ბოლოს ამინტამ მეფეს თხოვა გაეშვა იგი გაქცეული ძმის მოსაყვანად. ალექსანდრემ დართო ნება. მართლაც, წავიდა ამინტა და მოიყვანა ძმა, პოლემონი. ძმები გაათავისუფლეს. მალე ამინტამ ერთი რომელიღაც სოფლისათვის გამართულ ბრძოლაში ყველაზე მეტად თავი გამოიჩინა და იქვე მიღებული ჭრილობისაგან გარდაიცვალა. ამის შემდეგ, დანარჩენი ძმებისათვის ალექსანდრეს აღარაფერი ვნება აღარ მიუყენებია.

აქვე მეფემ გაიხსენა ალექსანდრე ლინკესტიდი, რომელმაც ოთხი წლის წინათ, მცირე აზიაში, მისი მოკვლა დააპირა. მას მერე დატყ-

ვევებულს მოათრევდნენ ლინკესტიდს. მეფე ამდენხანს მის მოსახლეს მხოლოდ იმიტომ აცოცხლებდა, რომ იგი ანტიპატროსის ცოლისძმა იყო. ახლა კი, — როცა მეფის მოკვლის იდეა აქვ „პრაქტიკულად“ გაიხდარა და იქვე მეფობის ახალი კანდიდატის ძიებაც ჩვეულებრივ საკითხად დაისმებოდა — ალექსანდრე ლინკესტიდი აუცილებლად უნდა მოეკლათ, რადგან იგი ხომ თავიდანვე, თავისი „ღინასტიური შთაშობავლობით“ მაკედონიის ტახტის პრეტენდენტად ითვლებოდა. ალექსანდრეს შემდეგ მაკედონიის მეფობა ყველაზე კანონიერად ფილიპეს მეორე ვაჟსა და ალექსანდრეს ნახევარძმას, არიდაიოსს ეკუთვნოდა, მაგრამ, უკეთუ ალექსანდრეს ვინმე მოკლავდა (!), უფრო რეალურად საფიქრებელი ის იყო, რომ მის ნაცვლად ტახტზე არიდაიოსს, ამ „კანონიერ იდიოტს“ კი არ დასვაძდნენ, არამედ „ნაკლებ კანონიერს“, მაგრამ შაინც ნორმალურ ალექსანდრე ლინკესტიდს.

შეიძლება თვითონ ალექსანდრე ლინკესტიდს, ოთხი წლის პატიმრობით განაწამებს, ტახტი კი არა, იქნებ თავიც დავიწყებული ჰქონდა, მაგრამ შაინც გაახსენეს, გამოიყვანეს და სიცოცხლეს გამოასალმეს.

ასე დამთავრდა ეს პირველი შეტაკება პატროკლებსა და მათ „საყვარელ აქილევსს“ შორის. მეფემ გაიმარჯვა, მაგრამ ვაი იმისთანა გამარჯვებას! იქნებ, ყველას ეწამებინა მეფის სამართლიანობა ფილოტასა და პარმენიონის მიმართ, მაგრამ ძნელი და თითქმის შეუძლებელი იყო შევსება ამ უმძიმესი დანაკლისისა. „ღიადი მამა-შვილის“ განადგურებამ გლოვისა და ზაფრის ზარი დაარისხა მაკედონელთა ბანაჟის თავზე. ბევრი ჯარისკაცი აშკარად გამოხატავდა უკმაყოფილებას „საყვარელ სარდალთა“ დახოცვის გამო. მაკედონიაში გავსავნილ ჯარისკაცულ წერილებში იკითხებოდა მეფის „უსამართლობის“ მამხილებელი აზრები.

ალექსანდრემ უკმაყოფილო ჯარისკაცები ერთ საჯარისო ნაწილში შეპყარა, სახელად „უწესრიგოთა რაზმი“ („ტაგმა ატაკტონ“) დაარქვა და მკაცრი ზედამხედველობის ქვეშ მოაქცია, — ვინძლო ამ „ანარქისტებს“ სხვა, ჯანსაღი საომარი ძალებიც არ აეყოლიებინათ და მორალურად „გაზრწნილებს“ სხვებიც არ გაეზრწნათ.

იმ ზამთარს ალექსანდრემ საერთოდ მოახდინა ჯარების რეორგანიზაცია. მხედართა რვა-რვა ილა თითო ჰიპარქიაში მოაქცია. და ასე შექმნილ ორ ჰიპარქიას მეთაურებად — ჰიპაროქსებად — ერთს კლიტოს შავი დაუნიშნა, მეორეს ჰეფესტიონი. ამათ გარდა, იყო კიდევ



რვა ჰიპარქია. ცალკე საჯარისო ნაწილად რჩებოდა სამეფო მხედრობა — აგემა. ცხენოსნური ნაწილების გარდა, მთავარ საომარ ძალად რჩებოდა, რასაკვირველია. ისევ ტაქსისებად დაყოფილი ქვეითთა ფალანგა.

ჩვენ უკვე ვთქვით, რომ ალექსანდრეს ბრძანებით 30000 სპარსელ ყმაწვილს ზრდიდნენ და წვრთნიდნენ ბერძნულ ენაში და მაკედონურ საომარ ხელოვნებაში. ამათ ალექსანდრემ „ეპიგონები“ („შთამომავალნი“, „მიმდევარნი“) დაარქვა და ივულისხმა, რომ ისინი ახალ ცვლად დადგებოდნენ მაკედონიის საომარი დროშების ქვეშ<sup>14</sup>. მაგრამ მარტო სპარსელები კი არა, მალე აზიის სხვა ტომებიც მრავალ ნაკადად შეერთდებიან მაკედონიის სამხედრო ბანაკს — ბაქტრები, სოგდიანელები, პაროპამისადები, სკვოთები, ინდოელები.

ამ მხრივაც, როგორც ჩანდა, დროისა და სივრცის დინებით, ყველაფერი ისე მიდიოდა, როგორც თვითონ ალექსანდრე ვარაუდობდა: მისი არმიები, — რომლებიც აქამდე მხოლოდ მაკედონელთა ბერძენთა და ევროპელ ბარბაროსთაგან შედგებოდა — ამიერიდან ისეთივე „ნაერთი“ უნდა ყოფილიყო, როგორც მისი სახელმწიფო — ევროპულ-აზიური, აღმოსავლურ-დასავლური, „მრავალ-ნაკადური“.

აზიის ყოველ სატრაპიასა და ყოველ კუთხეში ალექსანდრესგან ჩამკვიდრებული ბერძნულ-მაკედონური გარნიზონები დროთა განმავლობაში, წმინდა სამხედრო ორგანიზაციის გარდა, სამოქალაქო თემებადაც ყალიბდებოდნენ და მათში ჩარიცხული აზიელებიც „ელინიზებულ“ მეომრებად და მოქალაქეებად „გვარდებოდნენ“.

ალექსანდრეს ახალი, ევროპულ-აზიური ჯარები თვითონ ატარებდნენ ახალ სახელმწიფოებრივ ატრიბუტებს. სამხედრო ბანაკი იმავდროულად სამოქალაქო ხელისუფლების რეზიდენციაც იყო. აქ წყდებოდა სახელმწიფოს მართვა-კამეგობა, სახაზინო ფინანსური საქმენი, საინტენდანტო მმართველობა, არმიის შეიარაღება, შემოსვა, სურსათი, ფურაჟი, სალახარეთო სამსახური. ბანაკის შიგნით და გარეთ განუშორებლად ირეოდნენ ყოველი რჯულის სამხედრონი და სამოქალაქონი, საერონი და სასულიერონი — ვაჰრები, სპეკულანტები, ფილოსოფოსები, პედაგოგები, ექიმები, ექიმბაშები, ვარსკვლავთმრიცხველნი, მკითხავნი, ქურუმნი, ფათერაქებისა და თავგადასაულების მაძიებელი ავანტიურისტები, მეძავე ქალები... სამხედრო ბანაკი, თითქოს, მოძრავი სახელმწიფო იყო, ახალშობილი სახელმწიფო, სამშობიარო ტკივილებით, სიახლის სიხარულით, მომავლის რწმენით,

ეჭვით, დაცემით, ამალღებით, ისევ დაცემით, ისევ იმედით, ისევ და ისევ...

329 წლის გაზაფხულისათვის ალექსანდრე გულსრულად ემზადებოდა სალაშქროდ. მთებს გადაღმა, ბაქტრიაში, მდინარე ოქსის (ამუ-დარია) ხეობაში უზურპატორი, ბესა-არტაქსერქსე მაკედონელთა დასახვედრად იკრებდა ძალებს. მასთან იდგნენ და მხარს უმაგრებდნენ — დატაფერნი და ოქსიარტი ბაქტრიელი, სპიტამენ სოგდიანელი და კატანი პარტაკენელი. სატიბარანიც ბესას შეერთებოდა, არეიდან გამოქცეული.

ბესას ბრძანებით, ბაქტრიაში შესასვლელი გზების გასწვრივ ყველაფერი გადააწვეს და გადაბუგეს, — მტერს რომ ფეხი ვერ მოეკიდა და საკმელად ლუკმაც ვერ მოეძია. სატიბარზანს ბესამ ორი ათასი მხედარი მისცა და იქვე არეიაში გაგზავნა, — არეელები იქნებ ისევ აჯანყო და აქეთ წამოსულ ალექსანდრესაც ზურგში მოექცე და მოეკიდო. პართიაშიც გაგზავნა ბესამ ერთგული კაცი, სახელად ბრასანი, რომელსაც უნდა აეჯანყებინა პართიელები მაკედონელი მეფისა და მისგან დაყენებული სატრაპის, ფრატაფერნის წინააღმდეგ. ბრასანი პართიაში ვერაფერს გახდა, მაგრამ სატიბარზანმა კი მართლაც ისევ აიყოლია და აჯანყა არეიელები მაკედონელთა წინააღმდეგ. ეტყობოდა, ალექსანდრესგან დაყენებული არსამიც თანაუგრძობდა აჯანყებულებს.

ალექსანდრემ ისევ აფრინა ჯარი არეიაში, სპარსი არტაბაზისა და ახლო მეგობრების, ერიგიოსისა და კარანოსის სარდლობით. პართიაში ფრატაფერნსაც შეუთვალა მეფემ, ზურგიდან დაარტყი აჯანყებულ არეელებსო. სატიბარზანი ამჯერად თავგამეტებით შეეგება მეფის ჯარს. შუა ბრძოლისას იგი წინ გამოიჭრა, მუზარადი მოიძრო და მტრის სარდალი ორთა ბრძოლაში გაიწვია. გავიდა ერიგიოსი. ორივე იბრძოდა ვაეკაცურად. ბოლოს ერიგიოსმა სატიბარზანს შიგ სახეში შუბი ჩაარჭო და უსულოდ დააგორა. მოკლული სპარსელი სარდლის ჯარი მაშინვე გაიქცა და უგზო-უკვლოდ გაიფანტა. არეია ისევ შეურიგდა მაკედონელთა ბატონობას<sup>15</sup>.

ალექსანდრემ იმ ადგილზე, სადაც ახლა თვითონ ბანაკად იდგა — „ინდოეთის კავკასიონის“ ძირში — კიდევ ერთ „ალექსანდრიას“ დაუდო საძირკველი. აქვე ამ ოლქის სატრაპად მან დასვა სპარსელი პროექსი, ხოლო მის „ეპისკოპოსად“, ძლიერი გარნიზონით, პეტერი ნილოქსენოსი.

დგას 329 წლას აღრიანი გაზაფხული და ალექსანდრე მაკედონელი თავისი ნაზამთრალი, სულით და ხორციით ნანჭორვეი ჭარებით, ბაქტრიისაკენ მიეშურება. თოთხმეტი დღე იარეს თოვლით და ყინვით დათრგუნვილ მთებსა და ღრეებში. გზაზე და ზევში, სადაც კი სულიერს სულიერობა შეეძლო, ყველაფერი დაცარიელებული ხედებოდათ — სოფლები გაქცეული, სახლ-კარი დაქცეული, საქონელი გარეკილი, ნათესები აოხრებული. მეომრებმა ბალახისა და ფესვების კამა ისწავლეს, ხორცად ხანდახან საქაპანე საქონელს თუ გაურეკდნენ.

ეს იყო თავისებური წინამორბედი სამთო ლაშქრობა 110 წლის შემდგომ მომხდარი სახელოვანი ჰანიბალის ალპური ლაშქრობისა.

~~მეთექვსმეტე დღეს, როგორც იქნა, მიატანეს პირველ ბაქტრიულ ქალაქს, დრაპსაკას. ბაქტრიელები, როგორც ჩანს, არ მოელოდნენ ანეთი სისწრაფით მტრის გამოჩენას და ხელგაუწმრევლად დაანებეს დრაპსაკა ალექსანდრეს. ქალაქი ჩაიბარა, აღარ შეჩერებულა და ისევ სწრაფი სვლით განაგრძო გზა მაკედონელმა. ისევ დაუბრკოლებლად გავიდნენ ბაქტრიის ნაყოფიერ ველებზე, მიატანეს მთავარ ქალაქსაც — ბაქტრას.~~

ბესა უზურბატორმა, როგორც კი ალექსანდრეს მოახლოება შეიტყო, ისღა მოახერხა, თავის ჯარით ქალაქიდან გაიქცა, ოქსზე ხომალდებით გადავიდა, ის ხომალდები დასწვა (მტერს რომ ხელთ არ ჩავარდნოდა) და სოგდიანაში ქალაქ ნავტაკამდე უკანმოუხედავად ირბინა. იგი არ აღმოჩნდა ისეთი პიროვნება, რამდენსაც ბაქტიუქობდა. ბაქტრიელებმა სულ მიატოვეს თავისი დაბნეული „მეფე“ და თავიანთ საცხოვრებლებსა და სახიზარებში გაიხიზნენ.

ალექსანდრემ სისხლდაუქცევლად დაიჭირა მთელი ბაქტრია.

ამასობაში ალექსანდრესთან მობრუნდნენ არეიაში აჯანყების ჩასაჭმობად გაგზავნილი არტაბაზი, ერიგიოსი და კარანოსი და ყოველივე დაწვრილებით აუწყეს — აჯანყების ჩაწმობა, სატიბარხანის მოკვლა, მისი ჯარების განადგურება და არსამ სატრაპის თვალთმაქცობა. ალექსანდრემ არეიაში ახალი სატრაპი გაგზავნა — ჰეტერი სტასანორი, რომელსაც ებრძანა არეიის მმართველობაც მიეღო და არსამიც პატიმრობაში აეყვანა <sup>16</sup>.

ბაქტრიის მდიდარი სატრაპიის მმართველობა ალექსანდრემ ჩააბარა მხკოვან არტაბაზს და ამით მან სპარსელებსა და აზიელებს, „მისი სიყვარულით“, ერთხელ კიდევ მოაფხანინა გული.

ბაქტრიაში ალექსანდრემ ერთად დაასახლა საომარი მწყობრიდან გამოსული ვეტერანები და ამით საძირკველი ჩაუდგო კიდევ ერთ თანამოსახელე ქალაქს — ალექსანდრია-ბაქტრიანას.

ალექსანდრე მზად იყო გადაეღებინა ოქსი და შესულიყო სოგდიანაში, მარაყენდას (სამარყენდი) სქლადდასახლებულ, მდიდარ ველზე. ქვეყანა, რომელიც დასავლეთიდან დაცული იყო თვალმიუწვდომი უდაბნოებით და დანარჩენი სამი მხრიდან მთებით და ვიწროვებით, ყოველ საშუალო სარდალსაც იოლად შეეძლო გამოეყენებინა არამცთუ მტრის მოსაგერიებლად, არამედ ხანგრძლივი, წარმატებული ომების საწარმოებლად. მაგრამ ბესა, თურმე, არც საშუალო ყოფილა, არც ქვესაშუალო. ალექსანდრეს ისევ არ აღმოაჩნდა სერიოზული, მისი ღირსსაფერი მოპირდაპირე \*.

ალექსანდრე მაინც უნდა აჩქარებულყო, ვინათგან სანამ უზურპატორს პირადად არ შეიპყრობდა, მანამ სპარსეთის გვირგვინისათვის ბრძოლა დასრულებულად არ ჩაითვლებოდა. ჯარები ბაქტრიიდან გაიყვანა, უდაბნო ერთის ამოსუნთქვით გაიარა და ოქსს მიაღდა<sup>1</sup>.

მდინარე ფართო იყო, ღრმა, უფრო, ქვიშიან-ნაპირიანი და ქვიშიან-ძირიანი. ნავეები აღარსად იყო. ახალი ნავეების და ტივების შესაკრავად თვალსაწიერზე ერთი ზეც არ მოიხილვებოდა.

მაშინ დუნაის გადალახვა გაიხსენა ალექსანდრემ. კარვებს ტყავები ახსნა, ხმელი ბალახით გაატენინა და ტიკებად ისე მჭიდროდ შეაკერინა, წვეთი წყალი რომ არ გაეტარებინა. ასეთი ნავტიკები ხის კოჭებით პონტონებად შეკრა, ზედ ჯარები რაზმეულებად „მიკაავშირა“ და მდინარეში მიუშვა. ხუთ დღეში მთელი არმია ასე გადაატარა და გაიყვანა მდინარის ჩრდილო ნაპირზე ალექსანდრემ<sup>17</sup>.

ამასობაში ბესას ბედი სულ გაუკუღმართდა. დაბნეულობით, მუდმივი გაქცევითა და მხოლოდ თავშესაფრების ძებნით და ლოთობით გართულ უზურპატორს საესებით დაჰკარგვოდა ავტორიტეტი თავისი-ანთა შორის. აღარავინ პატივს აღარ სცემდა, აღარავინ ანგარიშს აღარ უწევდა საკუთარი მეფის მკვლელისა და სამეფო გვირგვინის მიმტაცებელს.

ალექსანდრე კი უკვე გადასულიყო მდინარეზე და სოგდიანას შუაგულიაკენ მიემუტრებოდა შეუჩერებლივ.

\* რა შესაძარბელია ალექსანდრესთან ჰანიბალის მდგომარეობა, როცა ამ გენიალურ მთავარსარდალს პირისპირ უდგნენ დიდი, უნიჭიერესი და უმამაცესი რომაელი სარდლები.

მაშინ უზუტუპატორის ბანაკიდან ყველაზე აღრე „ქვეა რსმარა“ სპიტამენ სოგდიანელმა, რომელმაც გადაწყვიტა მოლაღატე დალატითვე შეეპყრო, ალექსანდრესთვის მიერთშია და მისი „ღვთაებრივი გული“ დასაწყისშივე მოეპო და მოეხვეჭა. სპიტამენი შეეთქვა დანარჩენ ბელადებს — დატაფერს, კატანს, ოქსიაროს — სამივენი დაითანსმა და სამივემ ალექსანდრეს შეუთვალეს: თუ ერთ მცირე რაზმს გამოგვგზავნი, ბესას — რომელიც ახლა ჩვენს ხელთაა, იმ რაზმს ჩავაბარებთ და გაახლებთო.

ალექსანდრემ რომ ეს ამბავი შეიტყო, არმია მცირე ხნით დაასვენა, 6000 მხედარი გამოჰყო, სარდლად პტოლემეაიოს ლაგოსის ძე უჩინა და სპიტამენისა და მისიანების ბანაკისაკენ აფრინა. თვითონ მეფე ზომიერი სკლით და სვენებ-სვენებით მიჰყვა, დანარჩენი ჭარებით, ლაგიდის წინგაქრილი მხედრობის კვალს.

პტოლემეაიოს ლაგიდმა კი ათი დღის გზა ოთხ დღეში დაითოქა და მიაღვა სპიტამენისაგან დანიშნულ ადგილს — მცირე ქალაქს. მაგრამ თვითონ სპიტამენი და მისი თანაშეთქმულნი იქ აღარ იყვნენ. მათ ვერ გაუბეღიათ, თუ ვერ უნამუსებიათ ბესას მუხანათური შეპყრობა, მიუტოვებიათ იგი და თვითონ კი გადახვეწილან.

პტოლემეაიოსმა კი არც აცივა და არც აცხელა, — ქალაქს ალყა შემოარტყა და, მაცნეს ძახილით, მოსახლეობას გამოუცხადა — უკეთეს შეწყალება გსურთ და თავი თქვენი გენანებთ, კარი გააღეთ, შემოგვიშვით, და ბესა ჩავგაბარეთო. ქალაქის კარი მაშინვე გაიღო. მაკედონელები შეცვივდნენ, ბესა შეიპყრეს და მტყიცედ დარაზმულ მეომართა შუაში მოქცეული გამოიყვანეს. პტოლემეაიოსმა უკანვე, ალექსანდრესთან შესახვედრად გამოუყენა ძვირფასი ნადავლი.

თან, წინასწრობილად, მალემსრობოლი აფრინა პტოლემეაიოსმა ალექსანდრესთან შეკითხვით — მომყავს დარიოსის მკვლელი და მიბრძანე რა სახით შეგახვედროო. მაშინვე პასუხი შეუბრუნა ალექსანდრემ: გააშვიშვლე, ყელზე ბორკილი დაჰკიდე და გზაზე ჩემგან მარჯვნივ დააყენეო.

ჭარები შეხვდნენ ერთმანეთს. ალექსანდრემ ხელმარჯვენე, შიშველ ბესასთან ეტლი შეაჩერა და ჰკითხა: რად უღალატე დარიოსს, შენს მეფეს, მბრძანებელს, ნათესავსა და კეთილისმყოფელსო: რად შეიპყარ, ბორკილები რად დაადე და ბოლოს რად მოჰკალიო?

— მე მარტო როდი გადამიწყვეტია დარიოსის ბედიო, — პასუხობდა ბესა — ყველა მისი ახლობელი ამავე აზრისა იყოო; თანაც, ყველა

დარწმუნებული ვიყავით, თუ დარიოსს მოვკლავდით, ამით შენს წყალობას მოვიპოვებდითო.

ალექსანდრემ ბესა შოლტებით აცემინა და მისი ნათქვამი მაცნეს სახალხოდ ცამოაცხადებინა. 'შასტუკან, მეფის ბრძანებით, ბესა გაუყენეს ბაქტრასაკენ, სადაც მას სიკვდილი ელოდა'<sup>18</sup>.

ალექსანდრეს ეახლნენ და მორჩილება შეჰფიცეს სპიტამენმა, დატაფერნმა, კატანმა და ოქსიათრმა. მეფემ ყველანი თავ-ს ძველ პატივსა და თანამდებობაზე დატოვა და თვითონ სოგდიანის სატახტო ქალაქში, მარაყანდაში გაეშურა. მარაყანდაში ძლიერი გარნიზონი ჩაყენა და იქვე ბრძანა — ჰინდუყუშის მთებში დაღუპული ან შეჭმული ცხენების სანაცვლოდ სოგდიანური საუკეთესო ჯიშის ცხენები აყვანათ მის ჯარისკაცებს.

მარყანდადან ჩრდილოეთისკენ დაიძრა მეფე, მეორე დიდი მდინარისკენ, იაქსართისკენ (სირ-დარია). გზაზე მაკედონელებმა გაიარეს კიროპოლისი (კირესხატა), უკანასკნელი ქალაქი სპარსთა მხოფლიო მონარქიის უკიდურეს ჩრდილო-აღმოსავლურ კუთხეში. იქიდან გზა ვანაგრძო. მაგრამ სანამ იაქსართს მიაღებოდნენ, მოულოდნელ ხიფათს გადაეყარნენ აქამდე მტრისგან სავსებით შეუწუხებლად მომავალი „მხოფლიო მპყრობელნი“.

რამდენიმე მაკედონელი მემომარი მთიან სოფლებში გასულა სურსათისა და ფურაჟის მოსაგროვებლად, მაგრამ უეცრად მთიელი ბარბაროსები თავს დასხმიან და ზოგი დაუხოცავთ, ზოგიც ტყვედ წაუყვანიათ.

გაჯავრებულმა ალექსანდრემ მსუბუქი ჯარი აიყოლია და სისხლის საძიებლად მთას შეესია. მთიელები მიუვალ კლდე-ღრეებში ჩაუსაფრდნენ მტერს, ისრისა და შურღულის სროლით, ლოდთა გორებით და ზვავების სხლეტით. მაკედონელთა ყოველი იერიში ამაო გამოდგა. ალექსანდრეს ბევრი მემომარი დაეჭრა და დაუშავდა. თვითონაც შორიდან მძლავრად ნატყორცნმა ისარმა ბარძაყი გაუპო, გამჭოლი გავლით. გაცოფებულმა მეფემ სრულის ძალებით ბრძანა იერიში. მაკედონელებმა მთები აიღეს მძიმე სისხლად. 20000 ბარბაროსიდან მხოლოდ 8000 ჩაპარდა ცოცხლად, დანარჩენები კი ან მაკედონელთა მახვილებს შეაკვდნენ, ან კლდეებსა და უფსკრულებზე გადაიჩეხნენ<sup>19</sup>.

ჩრდილოეთისკენ გზა ვანაგრძეს მაკედონელებმა. შვიდი ციხე-ქალაქი გაიარეს ზედიზედ. ამთგან ყველაზე დიდი და მძლავრად გამაჯრებული იყო ქალაქი კირა — კიროპოლისი. ყველა მათგანში ალექსან-

დრემ საკუთარი ციხიონები შეაყენა და ისევ განაგრძო სვლა ჩრდილოეთით. იგი მივიდა შუა აზიის მეორე უდიდეს მდინარესთან, იაქსართან, და ბანაკი დასცა.

დედამიწის კიდევ ერთ დიდმნიშვნელოვან წერტილზე იღგა ალექსანდრე მაკედონელი. აქ ერთმანეთს ერთვოდა და ერთმანეთისგან იყრებოდა გზები „ყოველი აზიისა“. აქვე ხერხდებოდა მძლავრი ბარიერების აგება ჩრდილოეთიდან მოწოლილი მრავალრიცხოვანი და მრავალშტოიანი სკვითური ტომების შესაკავებლად. სტრატეგიულ განაზრახთა გარდა, აქ სამომავლოდ საუკეთესო გზაკვანძი ჩანდა ხალხთა შორის მშვიდობიანი, კულტურული, სამეურნეო და საბაზრო ურთიერთობისათვის.

და აქ, იაქსართის მარცხენა მხარეს, მაკედონელმა საძირკველი ჩაუგდო თავის თანამოსახელე ქალაქს — ალექსანდრია-ესხატას (ალექსანდრია — „უკიდურესი“, ახლა ლენინაბადი).

აქ ალექსანდრე მაკედონელთან მშვიდობიანი ურთიერთობის ჩამოსაგდებად პირველნი მოვიდნენ სკვითური ტომის, აბიების წარმომადგენელნი. ალექსანდრემ, თავის მხრივ რომელიღაც უახლოესი ჰეტერთაგანი გააყოლა სკვით ელჩებს, მათ ზელისუფალთან ურთიერთობის გასამტკიცებლად. ამას გარდა, ალექსანდრეს წარმომადგენელს უნდა შეეტყო და შეესწავლა სკვითთა ქვეყანა, მისი ბუნებრივი პირობები, ხალხთა სიმრავლე თუ სიმცირე, მათი ზნე-ჩვევანი და საომარ აღჭურვილობათა სახეობანი<sup>20</sup>.

იმეყამს ფრიად საშფოთარი ამბავი მოიჭრა ზურგიდან. სოგდიანაში აჯანყება დაწყებულყო, აჯანყების მოთავე ყოფილა ის სპიტამენი, რომელიც ზან დარიოსს ემხრობოდა, ხან ბესას, ხან ერთს ღალატობდა და ხან მეორეს. რაკი ეს „ხან-ხან“ მისთვის ჩვეულებრივი ბუნება იყო, აღარც ალექსანდრეს მორიდებია და, გუშინ რომ უერთგულეს ყმობას და მორჩილებას ეფიცებოდა, დღეს აჯანყება აღუძრავს მის წინააღმდეგ.

სოგდიანას „შვილ-ქალაქოვანში“ აჯანყებულები, ერთსა და იმავე დროს, მოულოდნელად თავს დასხმიან მაკედონურ გარნიზონებს და ერთიანად ამოუწყვეტიათ ისინი.

სოგდიანას სატახტოში, მარაყანდაში ჩამდგარ მაკედონელთა მცირე ციხიონს თვითონ სპიტამენი შემოსდგომოდა ალყად.

სპიტამენის მოწოდებაზე, მაკედონელთა წინააღმდეგ საომრად სოგდიანელებს აპყოლიან სკვითური ტომები — მასაგეტები და საკები.

ბაქტრიაშიც ხმა გავრცელებულა, — ალექსანდრე ქალაქ ზარიასპაში აზიელი ბელადების ყრილობას იწვევს და ყველა ბელადის ერთად ამოწყვეტას აპირებსო. ამ ხმასაც ბევრი ბაქტრიელი აპყოლია და მაკედონელთა დასაჯლავად იარალი აულია ხელში.

სპიტამენს მხარში ამოსდგომიან სხვა ბელადებიც — ოქსიართი, კატანი, ხორიენი და გავსტანი.

ერთი სიტყვით, — აჯანყებას რაც შეეხება — ჯერ ასეთი მასშტაბის აჯანყება ალექსანდრეს მთელს აზიაში აქამდე არ შეხვედრია. ეს აჯანყება ალექსანდრესთვის, ამდენ ხანს უძლეველი, „ბრავალნაცადი გმირისათვის“, სწორედ ყველაზე დიდი გამოცდა უნდა ყოფილიყო.

და ამოქმედდა ალექსანდრე. კიროპოლისში, სადაც აჯანყებულთა ყველაზე დიდი ძალები იდგნენ, კრატეროსი გაგზავნა და დაუბარა — ქალაქი ალყაში მოექცია, გარშემო თხრილებითა და მიწაყრილებით ჩაეკეტა და საიერიშო მანქანები მიეგორებინა. ამით კრატეროსი აჯანყებულთა მთავარ ძალებს დაიჭერდა და ამასობაში ალექსანდრე ყველა დანარჩენ უბანზე უფრო შედეგიანად იმოქმედებდა<sup>21</sup>.

თვითონ ალექსანდრემ პირველი იერიში მიიტანა შვიდ ქალაქთაგან უახლოესზე — გაზაზე. ჯერ შურდულის და ისრის მერეხში მოაქცია აჯანყებული კიხესიმაგრე. მასუკან ფალანგა დაძრა საიერიშო კიბეებით. მალე კედლებიც გადალახეს, შიგ ჩაიჭრნენ მაკედონელები გაზაში. მეფის ბრძანება სრული სისასტიკის უფლებას აძლევდა მებრძოლებს. და დაერივნენ მოსახლეობას უწყალო ჩეხვით მაკედონელები, მამაკაცებს ყველას ყელეები დაჭრეს, ქალები, ბავშვები და ქონება დაიტაცეს და ბოლოს, ასე აკლებული ქალაქი ცეცხლს მისცეს.

კიდევ ერთი ციხესიმაგრე აიღო ალექსანდრემ — იმავე დღეს, იმავე საომარი ტაქტიკით, იმავე სისასტიკით, დედა-ბუდიანად ჟლეტით, ძვლებამდე ძარცვით და ფერფლადქცევით.

შეორე დღის დამდეგს მესამე ქალაქიც აიღო, გაწყვიტა და გააცამტვერა ალექსანდრემ.

ჯერ კიდევ გადარჩენილი ორი ქალაქიდან მოსახლეობა ხედავდა, როგორ ნთქავდა ხანძარი წინარე სამ ქალაქს. დამფრთხალი ხალხი ორივე ქალაქიდან აიყარა და მთებს მისცა თავი. მაგრამ არც ეს გამოჰპარვია ალექსანდრეს. წინასწარ ჯარები გაეგზავნა, მთებში გასაქცევი გზები შეეკრა და შეეხუთა. გაქცეულები თითქმის მთლიანად შეაწყდნენ ჩასაფრებული მტრის ხმლებსა და შუბებს. დაცარიელებული ქალაქები კი გაძარცვეს და გადასწვეს მაკედონელებმა.



ასე — ორ დღეში ალექსანდრემ ხუთი ციხე-ქალაქი აიღო და დაიძრა კიროპოლისისაკენ, სადაც მისგანვე გაგზავნილი კრატეროსი იღგა ალყად. მისვლისთანავე ბრძანა მეფემ — ყოველი საიერიშო მანქანით, კიბით, თოკით, ქვითა და ისრით, ირგვლივი იერიში მიეტანათ ქალაქს კედლებზე. მეფემ ისიც შენიშნა, რომ ქალაქში შემავალი მდინარე დამშრალიყო და კედლის ძირში ხერელი დაეტოვებინა. როცა გარშემო, კედლების გასწვრივ იერიშო გახურდა და ქალაქის დამცველთა ყურადღება მთლიანად კედლებს მიეჯაჭვა, თვითონ ალექსანდრე რამდენიმე არჩეული მეომართ იმ ხერელში წოლელად შეძვრა, შიგნიდან უახლოეს კარებს დაეტაკა, გასტეხა და იმ კარებთან წინასწარ გამზადებულ ჯარს გზა მისცა. მაკედონელები შეცვივდნენ თავაწყვეტილი ჩეხვით. უკვე კედლებიც გაერღვიათ და გადმოელახათ დანარჩენებს. აჯანყებულები თავგანწირვით შეეგებნენ ქალაქში ყოველის მხრით შემოჭრილ მტერს. ალექსანდრე საგულდაგულო სამიზნედ აირჩიეს და მძიმე ნიშანიც დააჭედეს — შურდულით ქვა გაარტყეს კისერში და თვალთა სინათლეც კარგა ხნით ჩაუბნელეს. ისრით დაიჭრა კრატეროსი, დაიჭრნენ სხვა მეთაურებიც, მაგრამ ყოველი წინააღმდეგობა ამო იყო. 15000 აჯანყებულისა და 8000 მკვდრად დაირეცა. დანარჩენები აკროპოლისში ჩაიკეტნენ, მაგრამ მიმწუხრისას, წყურვილით შეწუხებულნი, მტერს დანებდნენ<sup>22</sup>.

კიროპოლისის დაცემის შემდეგ კიდევ ერთი, მეშვიდე ქალაქი დარჩენილიყო და ისიც უბრალოდ, „გავლით“ აიღო ალექსანდრემ, აიღო ისეთივე აკლებით და დაქცევით, როგორც წინარე ექვსი ქალაქი.

იმ გაცამტვერებულ შვიდ ქალაქთაგან, ვინც კი სიკვდილს გადაურჩა, ალექსანდრემ მის ახალ ქალაქში — ალექსანდრია-ესხატაში დაასახლა.

ალექსანდრეს მარაყანდაში დაბრუნება და სპიტამენისგან ალყაში მოქცეული მაკედონური ციხიონის გადაარჩენა ეჩქარებოდა. მაგრამ მდინარე იაქსართს ჩრდილოეთიდან სკვითთა ურდოები მოადგნენ საომარი მუქარით.

ალექსანდრემ რამდენიმე ასეული გამოჰყო და მარაყანდას გაგზავნა მაკედონური ციხიონის მისაშველებლად. თვითონ კი სკვითთა პირისპირ დადგა.

ოცი დღის განმავლობაში ალექსანდრია-ესხატას მშენებლობით იყო მეფე გართული, — თითქოს, გაღმა მხრიდან მომდგარ სკვითებს აინუნშიაც არ აგდებდა. ქალაქის გარშემო გალავანი შენდებოდა, ყო-

ველ მეომარს სამუშაო წილი ჰქონდა მიჩენლი და სწრაფი შეჯიბრით მიდიოდა აღმშენებლობა — სახლისაც, კარისაც, ქუჩისაც და ციხე-კოშკისაც. მეფე ახალ მოქალაქეებად ასახლებდა ძველ ვეტერანებს, ბერძენ მოქირავნეებს, ადგილობრივ ბარბაროსებს, ტყვეებს, ლარიბებს, უქონელთა და უპოვართ. მეოცე დღეს ქალაქი დიდი საზეიმო ასპარეზობით და მსხვერპლშეწირვით აკურთხა და მისი სახელიც აუწყა მსოფლიოს.

სკვითები კი ისევ იდგნენ მდინარის მოპირდაპირე მხარეს, იმუქრებოდნენ, ისარს ისროდნენ, მაკედონელებს ლაჩრობას სწამებდნენ, ახლებდნენ და ბრძოლაში იწვევდნენ. სკვითების „მეფეს“ ებრძანებია თავის მეომრებისათვის — ის ახალი ქალაქი დაანგრეით, ვინათგან იგი უღელღვით შედგმება კისრადო<sup>23</sup>. და მოსულიყვენ სკვითები „ახალი ალექსანდრიის“ დასანგრევად.

ალექსანდრე კი ისევ თავს იკავებდა. სამკითხავო „მასალებიც“ სამომავლო ბრძოლაში სასიკეთო ნიშნებს არ იძლეოდა. კიროპოლისის ბრძოლაში მიღებული ჭრილობაც საშუალებას არ აძლევდა მეფეს, პირადად რომ წასძლოლოდა ლაშქარს; არა და, სკვითების „ასე გათამამებაც“ უკვე აღარ შეიძლებოდა.

ალექსანდრე, მის დროის-და შესაფერისად, ფატალისტი იყო, მაგრამ მკითხაობისა მას მაინც უფრო ნაკლებად სჯეროდა, ვიდრე მის ჯარისკაცებს. მან მეორედ უბრძანა მკითხავ არისტანდროსს, ღმერთებისთვის მსხვერპლი შეეწირა და ნამსხვერპლზე ისევ ემკითხავა. ისევ „ცუდი ნიშანი“ აჩვენა ნამისნევემა — თითქოს, ომის შემთხვევაში თვითონ ალექსანდრეს ემუქრებოდა რაღაც მძიმე ხიფათი.

მაშინ თქვა ალექსანდრემ: მე მიჩვენია უსაშინელეს საფრთხეს მივეცე, ვიდრე იმ ბარბაროსთა სასაცილო გავხდეო, — და საომრად გასვლა ბრძანა.

ჯარები მდინარის პირას დააწყო, მტრისკენ პირმიქცევით, წინ სატყორცნი მანქანები ჩაუმწყრივა და წყალშიც ისევ ტყავის ნავტიკები ჩაალაგა, პონტონურ ტივებზედ შეკრულნი.

ამასობაში სკვითები მოპირდაპირე ნაპირზე ისევ გამაყრუებელი ხმაურით მიმოქროდნენ, ისარს ისროდნენ და იმუქრებოდნენ.

სამზადისი რომ ჩაათავა, ალექსანდრემ ბრძანება გასცა და მისმა სატყორცნმა მანქანებმა, ქვითა და ისრით, გაბმული სროლა აუტეხეს გაღმა ნაპირზე მოჭენავე მტერს.

ასეთი რაიმე ველურ ტომებს არც ენახათ, არც გაეგონათ და არც

მოელოდნენ. როცა მათგან რამდენიმე მეომარი ცხენიდან ძირს დაქრილი გადმოვარდა, დანარჩენები მაშინვე უკუიქცნენ დამფრთხალნი და აშლილ-დაშლილნი. მაკედონელებმაც, საომარი ბუკების ვრიალის ქვეშ, დაიწყეს მდინარის გადალახვა. პირველნი გადავიდნენ მარჯვენა ნაპირზე მოისარნი და მოშურდულენი, ისევ და ისევ განუწყვეტელი „ცეცხლის“ ნთხევით, რათა მათ შემდგომ უმსხვერპლოდ გადასულყვენ და დანარჩენი ჯარები.

მეორე წყებად სამეფო აქემა და სხვა ცხენოსანთა ილევი გადავიდნენ, თვითონ ხელმწიფის მეთაურობით. გადასვლისთანავე შეუტია ალექსანდრემ. თითქოს გონს მოეგნენ სკვითები, მოუტრიალდნენ და წამოემართნენ ყოველის მხრიდან, ისრის სროლით, გამაყრუებელი ყიფინით და ბლავილით. თითქოს, ალყაშიც მოექცნენ მაკედონელები, თუმცა მათ მჭიდრო წყობასთან ხელჩართულ ჩხვას გაუბოდნენ სკვითები. იანა შორიდან, არეგ-დარევით, „მიხდომ-მოხდომით“ არჩევდნენ ბრძოლას.

ფლანგამაც მდინარე გადმოათავა და ხმელეთზე გადმოვიდა. ალექსანდრემ შუაგულზე მიუშვა ქვეითნი, ფლანგებზე ისევ კავალერია მიუსია და მოწინააღმდეგე ისე მოსწურა და დაიყოლია — „მიხდომ-მოხდომაზე“ ხელი აეღო და „მართლა ბრძოლა“ მიეღო.

ამას კი სკვითებმა ველარ გაუძლეს და უკუიქცნენ.

გაათრებით დაადევნა ჯარები ალექსანდრემ.

საშინელი სიცხის, წყურვილისა და ბულის ქვეშ მიერეკებოდნენ მაკედონელები გაქცეულ მტერს. თვითონ მეფემ, წყურვილით განაწამებმა, რალაც მყაყე წყალი დალია. დევნაში თავდავიწყებული ერთბაშად მოისხლიტა, ჭირის ოფლმა დაასხა და ბოლოს და ბოლოს, ცხენზე ჯდომაც ველარ შეიძლო. ალბათ, ჯერ კიდევ მოუშუშებელმა ჭრილობამაც თავისი ჰქნა.

მეფის ავადმყოფობამ გაქცეული სკვითები გადაარჩინა სრულ ამოწყვეტას. მაინც რამდენიმე ათასეული სკვითი დარჩა მკედრად დარეცილი ბრძოლის ველზე, მათ შორის მათივე ბელადი — სატრაკე. 1500-მდე სკვითი ტყვედ აიყვანეს მაკედონელებმა, 1800 ცხენიც გამოირეკეს. გამარჯვებულთაგან დაეცა 100 ქვეითი და 60 მხედარი, დაიჭრა 1000-მდე კაცი<sup>24</sup>.

ალექსანდრე ერთხელ კიდევ გამოეხსნა სიკვდილს. „უძლეველ სკვითებზე“ გამარჯვებას დიდი წონა ეძლეოდა მტრებისა თუ მოყვრების თვალში. სკვითთა მეფემაც ელჩები გამოუგზავნა და ბოდრიში

მოუხადა ალექსანდრეს — ხალხისა და მეფის დაუკითხავად, მხოლოდ ცალკე მოთარეშე ბრბოების ბრალით მოხდა თქვენთან შეტაკებაო, ამიერიდან ჩვენ მზად ვართ დავემორჩილოთ დიდი ხელმწიფის ყოველ ბრძანებასო, — ითვლევინებოდა სკვითების მეფე.<sup>25</sup>

ალექსანდრეც თავაზიანად გაეპასუხა სკვითთა მბრძანებელს, ბრძოლაში ტყვედ აყვანილი მეომრებიც უსასყიდლოდ გაათავისუფლა. დიდი შთაბეჭდილება მოახდინა ჯერ კიდევ „ცივილიზაციით გაურყვნელ“ ტომებზე „დიდი მაკედონელის“ დიდსულოვნებამ და შემწყნარებლობამ.

ახლად დაარსებული „უკიდურესი ალექსანდრიის“ გარშემო მშვიდობიანობამ დაისადგურა. ყოველ შემთხვევაში, ეს ჯერჯერობით მაინც ასე იყო და ახლა ალექსანდრეს საშუალება ეძლეოდა ისევ სოგდიანაში, მარაყანდის გარშემო დატრიალებული ამბებისათვის მიეხედნა.

სოგდიანაში კი მდგომარეობა მართლაც ალექსანდრეს საზიანოდ ვითარდებოდა. დაიწყო იმით, რომ სპიტამენმა ალყა შემოარტყა მარაყანდაში ჩასაგრებულ მაკედონურ გარნიზონს. მაკედონელებს რომ გაუჭირდათ, აკროპოლისიდან გამოიჭრნენ. სპიტამენის მეწინავენი დახოცეს და ისევ აკროპოლისში შეიკეტნენ. ამასობაში ალექსანდრეს მაშველმა ასეულებმაც მოაღწიეს. სპიტამენი დაფრთხა, ქალაქს ალყა მოხსნა და დასავლეთით სტეპს მისცა თავი.

ალექსანდრემ კიდევ ახალი ძალები გაგზავნა მარაყანდასკენ — 600 მაკედონელი მხედარი, 800 ბერძენი მხედარი და 1500 მძიმედ შეიარაღებული ქვეითი მოჭირავნე. სარდლებად მეფემ უჩინა — ანდრომანოსი, კარანოსი და მენედემოსი. თარჯიმნად კიდევ მიჰყვებოდათ ადგილობრივ მცხოვრებთ ენის მცოდნე ლიკიელი ფარნუხი.

მარაყანდას რომ მივიდნენ და ქალაქი ისევ მაკედონური ციხიონის ხელში დახვდათ, ხოლო სპიტამენი გაქცეული და გადახვეწილი — ალექსანდრეს სარდლებმა ეს საკმარისად არ მიიჩნიეს და აჯანყებულების საქმებრად და ამოსაწყვეტად ჭარით სტეპისაკენ გაუტიეს. სპიტამენმა ადევნებული მტერი რომ დაინახა, უფრო შორს, უკიდევანო უდაბნოში ჩაიკარგა. მაკედონელებიც მიჰყვნენ თავდავიწყებით. მათ გადაეწყვიტათ, მარტო სპიტამენი კი არა, მისი მოკავშირე სკვითებიც კი დაესაჯათ მწარედ. კიდევაც შეესივნენ სკვითი მომთაბარეების საცხოვრებლებს და ააწიოკეს ისინი. მაკედონელთა უგუნურებამ სპიტამენი გააძლიერა. მის ბანაკს 600 სკვითი მხედარი შეუ-

ერთდა გადამთიელებთან სამკედრო-სასიცოცხლო ბრძოლის საწარ-  
მოებლად.

აქამდე შეუფერხებლად მიმავალი მაკედონელები მალე მტრის  
უცნაური საომარი ტაქტიკის პარტნიორები შეიქნენ. სოგდიანელები  
და სკვითები მათ შორიდან ურბენდნენ და უშენდნენ ისარს. როცა  
მაკედონური მხედრობა მწყობრი განწყესრივებით იერიშზე გადავი-  
დოდა, სპიტამენელები უმალვე გარბოდნენ, ვითომ დამარცხებულნი  
და აწლილდამლილნი. მაკედონელებიც მისდევდნენ გახელებით და  
თავდავიწყებით. ჩამორჩებოდნენ მაკედონელები და ისევ მოუბრუნ-  
დებოდნენ და დაუშენდნენ სპიტამენელები, ისევ გამოედევნებოდ-  
ნენ მაკედონელები, ისევ თავიდან ყოველივე, ისევ უქაქცევა,  
გაქცევა, დევნა... და ბოლოს გამოირკვა, რომ მაკედონელები, „გა-  
მარჯვების“ მიუხედავად, თურმე კატასტროფას უახლოვდებოდნენ.  
მკვინვარე მზის ქვეშ, ცხელი ქვიშის ოკეანეში სრბოლით, უქმელო-  
ბით და უწყლობით, ცხენები ექანცებოდათ, ეხოცებოდათ და თვი-  
თონაც იქანცებოდნენ და იხოცებოდნენ. მაშინ ფარნუხ ლიკიელმა  
მომართა მაკედონელ სარდლებს — ანდრომახოსს, კარანოსს, მენედე-  
მოსს — მე თარჯიმნობის მეტი არცრა გამეგება და არცრა მეკითხება.  
ამიტომ თქვენგან ერთ-ერთმა იკისროს მთავარსარდლობა და თავისი  
შეუვალი ნებით ჯარი საფრთხიდან გაიყვანოს და დაღუპვას გადაარ-  
ჩინოსო. მაგრამ არც ერთმა სტრატეგოსმა არ იკისრა მთავარსარდ-  
ლობა და პასუხისმგებლობა თითქმის წაგებული საომარი კამპანიისა.  
ბოლოს, სამივე სარდალმა თავთავისი ჯარებით მახლობელი ტყისა და  
მდინარისაკენ დაიწყო დახევა. სამივე ცალ-ცალკე, თავისი ქკუითა და  
ერთმანეთთან შეუთანხმებლად იხევდა უკან. კარანოსმა პირველმა  
შეყარა მდინარეში თავისი ცხენოსნები, მეორე ნაპირზე გასასვლე-  
ლად. ამის მხილველმა ანდრომახოსის ქვეითმა ჯარმაც ტყე მიატოვა  
და წყალს მიაშურა. გამოუდგნენ სოგდიანელები და სკვითები. მდი-  
ნარეში ჩაუხტნენ, ზემოდანაც და ქვემოდანაც წყალზე სამოდრო  
გზები ჩაუჭრეს და დაუშინეს ყოველის მხრიდან — თუ ისარი, თუ  
შუბი, თუ ქვა. ყოველგვარი წინააღმდეგობის გარეშე იღუპებოდნენ  
მაკედონელნი. გადარჩენილები კი მდინარეში მოქცეულ კუნძულზე  
შერეკეს სპიტამენის რაზმებმა და სულ ერთიანად ამოწყვიტეს. მცი-  
რედნი დანებდნენ ტყვედ. მაგრამ გამარჯვებულებმა ტყვეებიც არ  
დაიტოვეს და ისინიც ჩახოცეს. დაიღუპა ყველა სარდალი. მხოლოდ  
40 მხედარი და 300 ქვეითი მაკედონელი გადაურჩა, რაღაც მანქანე-  
ბით, სიკვდილს<sup>26</sup>.

გამარჯვებით ფრთაშესხმულმა სპიტამენმა მაშინვე ისევ მარაყანდას მიაშურა და მის აკროპოლისში გამაგრებულ მაკედონელებს ისევ შემოარტყა ალყა.

მარცხის ამბავმა უდიდესი წუხილი მიაყენა ალექსანდრე მაკედონელს. ამდენ ხანსა და ამდენ სალაშქრო გზათა მანძილზე მის ჯარს ჯერ ასეთი მარცხი არ უგემნია. გამხელა კი არ ინდომა ამ საგლოველი ამბისა ჯერჯერობით — ვაი, თუ ჯარი დამიფრთხეს და მტერი გამითავხედდესო, ამიტომ სანამ მტრის სისხლს არ ამოვიღებ, ეს ამბავი არ უნდა გამჟღავნდესო და სიკვდილის მუქარით აუკრძალა მაცნეებს კრინტის დაძვრა<sup>27</sup>.

სასწრაფოდ დააყენა ფეხზე მეფემ ჯარი და ორად გაჰყო. უფრო სწრაფი მხედრობა და მსუბუქი ქვეითი რაზმები თვითონ აიყვანა, მეორე ნაწილს სარდლად კრატეროსი უჩინა და უკან გაყოლა უბრძანა.

თვითონ მგლურით დაიძრა მეფე და შვიდი დღის სავალი გზა სამ დღეში დაფარა. როგორც კი მისი მოახლოების ამბავი შეიტყო, სპიტამენი მარაყანდას ისევ მოეხსნა და გადაიხვეწა. ალექსანდრე გამოედევნა და ის ადგილი გზად გაიარა, სადაც საბედისწერო შეტაკებაში მისი ჯარი დაღუპულიყო. დახოცილები დააკრძალვინა და, მოჭრილი დროით, მათი სულის სარგებად მსხვერპლიც აწირვინა. ისევ მისდია გაქცეულებს. ისევ უზღვრო უდაბნოს შეერივნენ მაკედონელნი. აზრი აღარ ჰქონდა შემდგომ დევნას. სპიტამენი სავსებით გადაკარგულიყო და გადაქარებულიყო მისი ქვეყნიდან („მისი ქვეყანა“ აღარ იყო მისი). შემოაბრუნა ჯარი მეფემ. შემოაბრუნა და ცეცხლითა და მახვილით მოედო სოგდიანის სოფლებს და ქალაქებს. აქამდე არავის მოსწრებია ალექსანდრე მაკედონელის ასეთი სისასტიკე და დაუნდობლობა. არბევდა, ძარცვავდა, ელეტდა, აწიოკებდა, ანგრევდა, წვავდა. 12000-მდე კაცი თუ ქალი, ბავშვი თუ მოხუცი ემსხვერპლა მაშინ მაკედონელის მძვინვარე მახვილს<sup>28</sup>.

„განმათავისუფლებელმა“ ნილაბი ჩამოიხსნა, — დროებით მაინც ჩამოიხსნა. „ერთიანობის“, „თანასწორუფლებიანობის“, „ერთხმეობისა“ და „ერთსახოვანების“ დოქტრინიორჰა თავისი „დოქტრინა“ საკუთარი ხელითვე დაასამარა.

ალექსანდრემ სოგდიანაში საბატონოდ დატოვა თავისი სტრატეგოსი, პეკოლაროსი, 3000 მეომრით<sup>29</sup>. თვითონ მეფე ბაქტრიაში გაემართა, ქალაქ ზარიასპაში, სადაც მას ადგილობრივ ბელადებთან

შეხვედრა ჰქონდა დანიშნული. სოგდიანის მწარე ბედით დამფრთხილი ბაქტრიელი მეთაურები ალექსანდრეს ადგილზე დახვდნენ, სრულის მორჩილებით და თაყვანისცემით.

329 წელი იწურებოდა. ზამთარი იდგა. გამოზამთრებაც აქვე, ზარიასპაში გადაეწყვიტა მეფეს. სოგდიანის „სისხლის წვიმების“ შემდეგ, ბაქტრიული დღეები მისთვის ფრიად სასიკეთოდ მიიმართებოდა. ბაქტრიელ დიდებულთა ყრილობამ ერთხელ კიდევ „დიდის ალტაცებით“ სცნო „დიადი“ ალექსანდრეს უზენაესად „სამართლიანი ხელმწიფობა“, მართო ბაქტრიაში კი არა, სრულიად ქვეყანასა ზედა.

აქვე, ზარიასპაში, ალექსანდრეს ახალი საომარი ძალები მოუვიდა დასავლეთიდან.

აქვე „ვერაზიის ხელმწიფეს“ ეახლა მრავალრიცხოვანი ელჩობანი ევროპისა და აზიის ქვეყნებიდან.

„მსოფლიოს ცენტრი“ ხომ თან დასდევდა ალექსანდრე მაკედონელს, ანუ — სადაც ის იყო, იქვე ბრუნავდა მსოფლიოს ცენტრაც და იმ წელს ზარიასპა — მანამდე უჩინო ბაქტრიული ქალაქი — ქვეულიყო მსოფლიოს „ცენტრად“, „ჭიპად“ თუ „თვალად“. აქ ერთსხეულად ჩამოსხმულიყო აზიური ფუფუნება, მაკედონური სალდათურობა და ელინური განათლებულობა<sup>30</sup>.

აქ ალექსანდრემ ძველი სპარსული ადათით და ყაიდით გაასამართლა დარიოსის მკვლეელი და მისი გვირგვინის მიმტაცებელი — ბესა. იგი ბორკილებით დატვირთული შემოიყვანეს სპარსელ დიდებულთა სამსჯავროზე. საბრალოდებო სიტყვა წარმოსთქვა თვითონ ალექსანდრემ. მას უკან სპარსელებმა დასდეს ბრალი ბრალდებულს. ბოლოს, ალექსანდრეს ბრძანებით, ისევ სპარსული სამოსამართლო ტრადიციით, ბესას მოაჭრეს ცხვირი და ყურები და გაგზავნეს ეკატანაში, სადაც ის სპარსელებისა და მიდიელების წინაშე უნდა გაეკრათ ჯვარზე. ასედაც მოხდა — ეკატანაში მიიყვანეს და ჯვარს აცვეს ბესა. მაგრამ ესეც არ აკმარეს — მისი გვამი სპარსელებმა დაანაკუწეს და ნაკუწები შურდულებით მიმოტყორცნეს<sup>31</sup>.

ზარიასპაში ალექსანდრესთან არეიდან მობრუნდნენ მისგან გაგზავნილი ფრატაფერნი და სტასანორი და მოიყვანეს არეიის ყოფილი ნატრაპი, მაკედონელი მეფის მოღალატე არსამი, აჯანყებული სატიბარზანის იღუმალი ხელშემწე. მოიყვანეს, აგრეთვე, ბარსანი, ბესასგან პართიის სატრაპად დაყენებული, და კიდევ რამდენიმე სპარსელი

დიდებული — ბესას მომხრენი და ღარიოსის თანამკვლენი. ყველანი ამოწყვიტეს, ალექსანდრეს ბრძანებით.

ზარიასპაში ევროპელ სკვითთა ელჩები ეწვივნენ ალექსანდრეს. წინა წელს წარგზავნილ მაკედონელ ელჩებს ჩამოჰყენენ ისინი. სკვითთა ახალი მეფე (ძველი მომკვდარიყო) კავშირს, მეგობრობასა და მოყვრობას სთავაზობდა ალექსანდრეს. ჩემი ასული ცოლად შეირთო, ხოლო უკეთუ ამას არ ინებებ, შენი დიდებულები დააქორწინე ჩვენებურ ქალებზეო. ალექსანდრემ ქორწინებრივ მოყვრობაზე უარი თქვა და სამაგიეროდ მდიდარი საჩუქრებით და მეგობრობის აღთქმით გაისტუმრა სკვითი ელჩები.

კიდევ — ზარიასპაში ალექსანდრეს ეწვია ხორეზმელთა მეფე ფარასმანი, 1500 მხედრის თანხლებით; მოვიდა, რათა პირადად გამოეცხადებინა ევროპელი ხელმწიფის წინაშე მორჩილება და ერთგული სამსახური.

მე კოლხებისა და ამადონების დაპყრობაში მოგეხმარებო და ევქსინის პონტოს სანაპიროებს დაეპყრობინებო, — შესთავაზა ფარასმანმა ალექსანდრეს.

მადლი მოუგო სპასუხოდ ალექსანდრემ, „სამეგობრო კავშირიც“ მაშინვე შეკრა ფარასმანთან, მაგრამ ესეც დასძინა: პონტოსკენ გალაშქრება ახლა არ შემიძლია, რადგან ახლა მთლიანად ინდოეთზე ფიქრით ვარ შეპყრობილი; ხოლო, როცა ინდოეთს დავიპყრობ და ამით აზიის დაპყრობასაც დავასრულებ, მაშინ მოვბრუნდები ელადას მთელი ჩემი სახმელეთო და საზღვაო ძალებით, პელესპონტისა და პროპონტიდის გავლით, შევიჭრები პონტოს ქვეყნებშიო და შენც შენის ძალებით მაშინ გამოჩნდი ჩემს მოსაშველებლადო.

ასე შეთანხმდნენ მაშინ ალექსანდრე მაკედონელი და ფარასმან ხორეზმელი მომავალი „ქართული ლაშქრობისათვის“ (!)...\*

ალექსანდრე ზარიასპაში გამოზამთრების შემდეგ ინდოეთისკენ აპირებდა ჯარების დაძვრას, მაგრამ ისევ იფეთქა აჯანყებამ სოგდიანაში. იქ დატოვებულ პეკოლაოსს თავისი სამი ათასი მეომრით არ შეეძლო თავი გაერთმია აჯანყების დათრგუნვისათვის. აჯანყებულები მოქმედებდნენ ცალკე ჯგუფებად, ქვეყნის სხვადასხვა კუთხეში, დაფანტულად და ერთიანობის უქონლად. არც ერთიანი მეთაური და

\* არიანოსის ამ მონათხრობს (ანაბასისი. IV, 15. 4—6) ქვემოთ ისევ მივუბრუნდებით.



სარდალი ჰყავდათ. არ ჩანდა თვითონ სპიტამენი, რომელიც, ალექსანდრეს რომ გაექცა, მას შემდეგ მასაგეტებთან აფარებდა თავს.

სწორედ იმ დროს მიიღო ალექსანდრემ ახალი საომარი ძალები, რომელთაც მოუძღვნენ — ლიკიის სატრაპი ნეარქოსი, კარიის სატრაპი ასანდროსი და სირიის სატრაპი ასკლეპიოდოროსი. ამათ კიდევ თავიანთი ჯარებით მოჰყვნენ სტრატეგოსები — მენიტე, ეპოკილე, მენიდა და თრაკიელი პტოლემაიოსი. სულ ახლადმოსული ჯარები შედგებოდა 17000 ქვეითი და 2600 ცხენოსანი მეომრისაგან<sup>32</sup>.

328 წლის გაზაფხულზე ალექსანდრემ ფალანგის ერთი ნაწილი — მელეავრეს, პოლიპერხონტის, ატალოსისა და გორგიას სარდლობით — ბაქტრაში გაგზავნა, საერთოდ ბაქტრიის სამეთვალყურეოდ („საეპისკოპოსოდ“), ხოლო თვითონ დანარჩენი ჯარები ხუთ კოლონად დაჰყო. სარდლებად უჩინა ჰეფესტიონი, პტოლემაიოს ლაგიდი, პერდიკა, არტაბაზი, კენოსი და ყველანი სოგდიანას შუუსია, ერთდროულად, სხვადასხვა კუთხით და მიმართულებით. ყოველმა სარდალმა თავისი ამოცანა „პირნათლად“ შეასრულა. აჯანყებული ოლქები აიღეს, ააწიოკეს, გააცამტვერეს და ბოლოს, ალექსანდრეს დათქმისამებრ, მარაყანდაში მოიყარეს თავი. მხოლოდ მიუვალ მთებში თავშეფარებული სოგდიანელები დარჩათ მაკედონელებს ხელმიუწვდომი.

ახლა, როცა აჯანყება ჩაქრობილი და ქვეყანა დაქვეითი იყო, ალექსანდრემ საჭიროდ ჩათვალა, სოგდიანის ხელახალი აღორძინებისათვის ეზრუნა. ამ საქმეს მან სათავეში ჩაუყენა ჰეფესტიონი, რომელსაც ხალხი უნდა დაეშოშმინებინა და დაეწყნარებინა, ახალი დაბები და ქალაქები აეშენებინა და დაფანტულ-დამფრთხალი ხალხი შიგ ჩაესახლებინა.

ალექსანდრემ მაინც ვერ დაითმინა მთებში გამავრებულ აჯანყებულთა „დამოუკიდებლობა“, ჯარს წარუძღვა, მთებს მიაწვა, იქაც აჯანყებულთა ყოველი ციხე და ბუდე მოშალა და გამარჯვებული ისევ მარაყანდაში მობრუნდა.

აქ კი ისევ ახალი ტრაგედია ელოდა მაკედონელთა ბანაკს. მცოვანმა არტაბაზმა ალექსანდრეს სამსახურიდან — ბაქტრიის სატრაპობიდან გათავისუფლება სთხოვა. მეფემ ერთგული სპარსელი კარისკაცის თხოვნა აღასრულა და მის ადგილზე ბაქტრიის სატრაპად დანიშნა ჰიპარქოსი კლიტოს შავი. ნადიმობა და ნადირობა ერთმანეთს გადაება მარაყანდაში. საზეიმო დღეებში დიონისეს სადიდებე-

ლი დღეც გამოერია, მაგრამ ალექსანდრემ დიონისეს ნაცვლად დიოსკურების საპატიო დღესასწაული გადაიხადა.

სუფრას ერთად და „ერთნაირად“ უსხდნენ მაკედონელებიც და სპარსელებიც. აკი ასეთი იყო „უნიანი ნება“ ალექსანდრესი. ღრეობა გვიან ღამემდე გაგრძელდა. ალექსანდრე თავიდანვე უგუნებოდ მისჯდომოდა სუფრას; მას ცუდი სიზმარი ენახა იმ ღამით: ვითომც კლიტოსი შავ წამოსასხამში გახვეულიყო და აქეთ-იქით პარმენიონის გასისხლიანებული შვილები უსხდნენ.

ღვინო უკვე მძლავრობდა სუფრაზე. მოქეიფეთა ერთმა ჯგუფმა, გამორჩევით ახალგაზრდებმა, ალექსანდრეს წრეგადასული ქება დაუწყეს. ალექსანდრე უფრო დიდია, ვიდრე დიოსკურები და თვით დიადი ჰერაკლეო, — გაიძახოდნენ ისინი.

უკვე ყველა მთვრალი იყო, მათ შორის მეფეც.

და მთვრალი იყო კლიტოს შავიც, რომელიც თავიდანვე ვერასგზით ვერ შერიგებოდა, რა განცხრომით ისმენდა მეფე ახალგაზრდების მლიქვნელურ დითირამბებს, რიტორულ ქლესაობას და, რაც მთავარია, სპარსელთა კადნიერ „სუფრულ თანასწორობას“. ახლა კი, როცა მთვრალმა „ლაწირაკებმა“ ჰერაკლე და დიოსკურები ასე „შეურაცხყვეს“, თავი ველარ შეიკავა და ჩაილაპარაკა: საკადრისი არ არის მეფის ამნაირი ქება-დიდება და არც კიდევ მას ისეთი სადიდებელი არა ჩაუდენია, რაც ჯერ ყოველი მაკედონელის სიქველესთან არ იყოს დაკავშირებული; არც ის არის ღამაში, რომ მაინცა და მაინც ამ ბარბაროსი სპარსელების თანდასწრებით ამცირებენ მაკედონელებს; ანდა, ის გარდასული მაკედონელები, — რომლებიც უბედურების მსხვერპლნი გამხდარან, — განა, გაცილებით უკეთესები არ იყვნენ, ვიდრე ისინი, ვინც ახლა მათ დასცინისო?

ალექსანდრემ გაიგონა და რისხვიანად უყვირა კლიტოსს: შენ რომ უბედურებას ეძახი, ის სილაჩრეა და შენც, ვითარცა სილაჩრის დამცველი, ლაჩარი ყოფილხარო.

კლიტოსმა არც მეფეს შეარჩინა სიტყვა, ფეხზე წამოიჭრა და ცოფების ყრით მიიძახა: ჩემმა სილაჩრემ გადაგარჩინა შენ გრანიკოსის ბრძოლაში; მაკედონელთა სისხლისა და ჭრილობების წყალობით აღზევდი შენ იმ ზომამდე, რომ ფილიპეს მამად აღარ ცნობ და თავს ღმერთი ამონის შვილად ასალებო.

არამზადავ, — უყვირა ალექსანდრემ — ნუთუ გგონია, მუდამ გაიხარებ, ყოველთვის რომ ასე მღანძღავ და მაკედონელებს მიჯანყებ?

კლიტოსმა ისევ შეაგება პასუხი: რა გვაქვს სასიხარულო, როცა ესოდენი ღვაწლისთვის ამნაირ სამაგიეროს ვღებულობთ, — მაგ სპარსელ ბარბაროსებში გვცვლი და მაგათ თვალსასეიროდ გვამცირებო.

ატყდა ხმაური და აურზაური. ახალგაზრდები თავგამოდებით შეეპაექრნენ უფროსი თაობის რჩეულს. კლიტოსი აპყვა, მისი ტოლებიც აპყვნენ და გაიმართა შეხლა-შემოხლა „მამებსა“ და „შვილებს“ შორის. სიტყვა, ბუნებრივია, ისევ ფილიპეზე უნდა ჩამოვარდნილიყო და, როცა „შვილებმა“ ისე გადააჭარბეს, რომ ფილიპეს, გარდა ალექსანდრეს მამობისა, არავითარი ღვაწლი არ მიუძღვისო და ყოველივეს შემოკმედი მხოლოდ ალექსანდრე არისო; — კლიტოსი ისევ აღრიალდა: თავი და თავი ალექსანდრე კი არა, ფილიპე გახლავთო, ფილიპემ და მისმა თანამდგომმა სარდლებმა დაასაძირკვლეს და ააშენეს მაკედონიის სახელმწიფო და სახელ-ღიდებაო, ალექსანდრემ კი ფასი არ დასდო ფილიპეს თაობის დამსახურებასო, ალექსანდრეს უსამართლო სისასტიკეს უძართებულოდ შეეწირა დიდი პარმენიონი და მისი შვილებიო და ნეტავ იმ მაკედონელებს, რომლებიც მანამ დაიხოცნენ, სანამ იხილავდნენ, როგორ სცემენ ალექსანდრესგან გათავხედებული მიდიელები შოლტებით მაკედონელებს და როგორ ემუდარებიან ისინი ალექსანდრეს კარავში შეშვებას სპარსელ გუშაგებსო.

ხანდაზმულ სტრატეგოსებს გულს მოეფონათ, მათმა ტოლმა რომ მათი გულის ბუხარი ამოიყარა, მაგრამ მაინც მისცივიდნენ კლიტოსს და ცდილობდნენ მის დაშოშმინებას.

მაშინ, ცოფით სახემოშლილმა მეფემ ხმამალა გადასახა გვერდით მჯდომ ბერძნებს, ქსენოდოქე კარდიელს და არტემიოს კოლოფონელს:

„ხომ მართალია, რომ თქვენ, ბერძნები, ისე გრძნობთ თავს მაკედონელთა შორის, როგორც ნახევრადღმერთები მხეცთა შორის?“

ეს კი სწორედ მეტისმეტი იყო, და არც ჰგავდა ალექსანდრეს ნათქვამს — იმ ალექსანდრესი, რომელიც ქვეყნად ხალხთა შორის თანასწორობას ქადაგებდა, — იმ ალექსანდრესი, რომელიც თანასწორთა შორის ყველაზე „თანაბარ ძმებად“ სწორედ ბერძნებსა და მაკედონელებს აცხადებდა და, გულში რომ „მტრულ ჭეჭკად“ არაფერი დარჩენოდათ, აქამდე ბერძენსა და მაკედონელს ჭიდაობაში შეჯიბრების უფლებასაც რომ არ აძლევდა.

თქვა ეს ალექსანდრემ, წაიცდუნა პირიდან ასეთი მკრეხელობა

მისივე „დოქტრინის“ მიმართ, და კლიტოსმაც მარჯვენა ხელი აღმართა და გაუმეორა მეფეს:

„სწორედ ამ ხელმა გიხსნა შენ სიკვდილისგან გრანიკოსის ბრძოლაში; ახლა მიდი და ილაპარაკე რაც მოგესურვოს, ოღონდ გახსოვდეს, ამიერიდან სუფრასზე ჩვენებრ თავისუფალი ადამიანები კი არ მოიწვიო, არამედ მხოლოდ ბარბაროსები და მონები, რომლებიც ტანსაცმლის კალთებს გიკონიან და მაგ სპარსულ წელსაკრავზე ილოცებიან!“

სულ გაშლევდა ალექსანდრე. წინ დახვევებული ხილიდან ერთი ვაშლი აიღო და სახეში სთხლიშა კლიტოსს და მახვილიც მოითხოვა, მაგრამ აღრევე მოეშორებინათ მისი საქურველი ლისიმახოსს და ლეონატოსს — სიმთვრალის ქამს მეფის სიფიცხის მცოდნეებს. მაშინ, მეფემ მაკედონურად მაკედონელ მცველებს მოუწოდა, შური ეძიათ „მათი მეფის“ შეურაცხყოფისათვის. ისევე არავინ გამოეხმაურა. ახლა, მესაყვირეს უბრძანა მეფემ, საგანგაშო დაჰკაროო, მაგრამ როცა არც იმან გაუგონა, სახეში მუშტი შემოჰკრა, ცხვირიდან სისხლი წაახეთქინა და აღრიალდა: მე ახლა ისე შექცევიან, როგორც დარიოსს, როცა მას ბესა და მისი ამხანაგები მიათრევდნენ, როგორც უნდოდათ, საითაც უნდოდათ და იმ საცოდავს, მეფის საცოდავი სახელის მეტი, აღარაფერიც აღარ შერჩენოდაო.

შუკვე ერთმანეთის მოსაკლავად იჭაჩებოდა ორივე. ალექსანდრეს ძლივს აჯაებდნენ პერდიკა და პტოლემაიოსი. კლიტოსი მეგობრებმა ძლივს გაათრიეს სანადიმოდან, მაგრამ გამოექცათ, სხვა კარიდან შემოვარდა და მეფის დასაცინლად მოჰყვა ლექსის კითხვას ევრიბიდეს „ანდრომაქედან“: „მტერზე გამარჯვება მოპოვებულია მეომართა სისხლით, მაგრამ პატივი მიითვალა მხოლოდ სარდალმა, რომელიც ახლა ზის განცხრომით თავის ტახტზე და დასცინის ხალხს, რომელიც მისთვის აღარა ფასობს“<sup>33</sup>.

მაშინ კი გაუსხლტათ ალექსანდრე ხელიდან, რომელიცა შუბოსან მეომარს შუბი გამოსტაცა, ელვის სისწრაფით კლიტოსს შიგ გულში აძგერა და მიადახა: „წადი ახლა შენს ფილიპესთან, პარმენიონთან და ატალოსთან!“

კლიტოსი ბლავილით დაენარცხა და წამსვე გათავდა.

ალექსანდრეც წამსვე გამოფხიზლდა და გამოერკვა, მკვდარს შუბი ამოაძრო და ახლა თვითონ დააპირა ყელით ზედ ჩამოგება; მაგრამ სისხლიანი იარაღი წაართვეს, შებოქეს, სამეფო კარავში გააქა-

ნეს და სარეცელზე დააწვინეს. მთელი ღამე იტირა და იბღავლა; მის-  
ძახოდა კლიტოსს — გრანიკოსთან რომ სიკვდილს გადამარჩინე. ახლა  
მე როგორ გადავიხადეო; მისძახოდა კლიტოსის დას, ლანიკას, თავის  
დედამძუძუს — შენი ძვირფასი ორნი ძენი, ჩემი ძუძუმტენი, მ-ლე-  
ტის კედლებთან დაიხოცნენ ჩემი გულისთვისო; ახლა კიდევ შენი  
საყვარელი ძმა, შენი ერთადერთი ნუგეში, ჩემი ხელით რომ მოგკა-  
ლი, კარგად კი გადაგიხადე შენგან მოწოდებული ძუძუს მადლო;  
მობხუცი პარმენიონი და მისი შვილებიც გაიხსენა — იმათაც ერთგუ-  
ლი სამსახურისთვის უმართებულო სიკვდილით გადაეუხადეო, სი-  
ცოცხლის ღირსი აღარ ვარ და რაღად მაყოცხლებთ, მომკალით და  
გაათავეთო. წინ დაისვენა კლიტოსის გვაში და სამი დღელამე ისე  
იბღავლა, იტირა, ითავცემა, ვითარცა მისმა „წინაპარმა“ აქილევსმა  
პატროკლეს ცხედარზე — უძილრად, უჭმელად, უსმელად...

ბოლოს, როგორც იქნა, დაარწმუნეს, რომ ყველაფრის მიზეზი  
დიონისეს რისხვა არისო — დიოსკურებს რომ დიონისეს მაგივრად  
შესწირა მსხვერპლი მეფემ. დაარწმუნეს და დააჭერეს, სანამ სხვა  
უარესი უბედურება რაიმე დატრიალებულა, გლოვა შეწყვიტე, კარ-  
ვიდან გამოდი და დიონისეს საბოდიშო მსხვერპლი შესწირეო. იმასაც  
ეუბნებოდნენ, — კლიტოსი შენ სამართლიანად მოკალი და ამდენი  
სინანულისა და გლოვა-გოდებისა კი არა, ის დამარხვის ღირსიც არ  
არისო.

როგორც იქნა, გამოვიდა ალექსანდრე, კლიტოსი დიდის პატივით  
დაასაფლავა, დიონისეს საბოდიშო მსხვერპლი შესწირა და „სინდისი  
დაიწყნარა“<sup>34</sup>.

კლიტოსის დრამა სრულებითაც არ ყოფილა. მხოლოდ ალექსანდ-  
რეს „ლოთობასთან“ დაკავშირებული შემთხვევითი ამბავი \*. კლიტო-  
სის „გამოხდომა“ იყო მკვეთრი გამოხატულება ისევ და ისევ იმ სა-  
ყოველთაო პროტესტანტული განწყობილებისა, რაიც სუფევდა მაკე-  
დონელთა ბანაკში მეფის „პროსპარსული“ და „პროაზიური“ პოლი-  
ტიკის გამო. უფსკრული აქილევსსა და მის პატროკლეებს შორის გაღ-

\* ალექსანდრეს „ლოთობა“ ფრიალ ყბაღაღებული იყო მისსავე დროში. იყო  
შემთხვევები, როცა მეფე ლეინის სმაში შეჭიბრს აწყობდა და გამარჯვებულის-  
თვის ჭილდოს აწესებდა. ერთ ასეთ ლოთურ პაექრობაზე ორმოცდაერთი კაცი  
მომკვდარა უგონო სიმთვრალისგან. გამარჯვებულს, ვილაც პრომაქოსს, მეფის  
ხელით ჭილდოდ ოქროს ვეირგვინი მიუღია, მაგრამ სამი დღის მეტი აღარც ამ  
„პრიზიორს“ (თუ „ჩემპიონს“) უცოცხლია იმ საბედისწერო დათრობის შემდეგ.

რამევებულიყო. იქნებ ალექსანდრემ გულწრფელად ინანა კლიტოსის მოკვლა, მაგრამ „კლიტოსობის“ წინააღმდეგ ბრძოლაში იგი სიკვდილამდე პრინციპულად უცვლელი და შეურიგებელი დარჩა. ამაში კიდევ, დაგვარწმუნებს რამდენიმე ადგილი ამ წიგნისა.

ამასობაში სპიტამენ სოგდიანელს სოგდიანელებში სკვითი მასაგეტები შეურევნია და ისევ განუახლებია თარეში მაკედონურ გარნიზონებზე. ბევრი სისხლიც ადინა მტერს, ბევრი სისხლი თვითონაც აქეციინეს, მაგრამ გადამქრელი შედეგი მაინც არ ჩანდა — ვერც სპიტამენმა მოახერხა მაკედონელთა სერიოზული დამარცხება, ვერც მაკედონელებმა შეძლეს უდაბნოელი მხედრის მოხელთება.

ალექსანდრემ კლიტოსის ადგილზე, ბაქტრიის სატრაპად დანიშნა ამინტა ნიკოლაოსის ძე და თვითონ ისევ აღჭდა სალაშქრო უნაგირზე. სპიტამენი უნდა მოესპო ბოლოს და ბოლოს. რამდენიმე შეტაკება სპიტამენის მარცხით და უკუქცევით გათავდა. აჯანყებულთა მხორე ბელადი, სისიმიტრი, მიუვალ კლდეებში გამაგრებულიყო და მასთან ბრძოლა უფრო მისჭირდათ მაკედონელებს. ხოლო, როცა ალექსანდრე პირადად წარუძღვა ჯარებს, სისიმიტრიც თვითონ ჩამოეშვა მთიდან, მეფის წინაშე მუხლი მოიყარა და „კუბოს ფიცრამდე“ ერთგული სამსახური გამოუცხადა.

ამის შემდეგ კიდევ ერთხელ გამოჩნდა სპიტამენი, 3000 სკვითის თანხლებით, სოგდიანის უკიდურეს ჩრდილო-დასავლეთ კუთხეში, ქალაქ ბაგას მახლობლად. სასწრაფოდ კენოსი გაემართა მასთან შესახვედრად, თავისი მხედრობით. სასტიკი ბრძოლა ისევ მაკედონელთა გამარჯვებით გათავდა. 800 სკვითი დარჩა მკვდრად დარეცილი სიციხით და სისხლით აღულებულ მიწაზე. სკვითთა განადგურების შემდეგ, სოგდიანელმა და ბაქტრიელმა აჯანყებულებმა, დატაფერნის მეთაურობით, სპიტამენი მიატოვეს და კენოსს ჩაბარდნენ. სკვითმა მასაგეტებმა მოკავშირეების კარგები გაძარცვეს და სპიტამენთან ერთად უდაბნოში გადაიხვეწნენ. მალე ლტოლვილთა ბანაკში ხმა გავრცელდა, რომ თვითონ ალექსანდრე მოეშურება უდაბნოს დასალაშქრავადო. სკვითები კარავში შეუფარდნენ სპიტამენს, შეიპყრეს, შებოჭეს. თავი მოკვეთეს და ალექსანდრეს გამოუგზავნეს (სხვა ცნობით.<sup>35</sup> მძინარე სპიტამენს თავი ცოლმა მოსჭრა და ალექსანდრეს მიართვა).

სპიტამენის სიკვდილთან ერთად ზღვარი დაედო ფართო აჯანყებათა სერიას შუა აზიის მაშინდელ ხალხებში. დარჩა კიდევ რამდენიმე

განრინებული და შეურიგებელი გუნდი, რომელთაც ისევ მიუვალ მთებსა და კლდე-ლრეებში დაედოთ ბინა და სახიზარი.

328 წელიც მიიწურა, ახალი წელიც დადგა. ზამთარიც გავიდა და გაზაფხულის შემოსვლისთანავე ალექსანდრემ სამთო ლაშქრობა ბრძანა.

ეგრეთ წოდებულ „სოგდიანის კლდეზე“ გამაგრებულნი იყვნენ აჯანყებულნი, რომელთაც ბაქტრიელი ოქსიართი მეთაურობდა. მიუვალ კლდე-ქვაბულებში ჩასაფრებულებს სურსათიც უხვად მოემარაგებინათ და, მარადიული თოვლის წყალობით, წყალიც მუდმივად ეპოვებოდათ. ამიტომ თამამად იყვნენ და, როცა ალექსანდრემ შეუთვალა, დაგვნებდით და სიცოცხლეს გაჩუქებთო, პასუხად ეს ჩამოუგდეს: საჩუქებელი რა გვჭირს; თუ შენ და შენს ჯარისკაცებს ფრთები გაქვთ, ამოფრინდით და დაგვხედებითო.

ალექსანდრემ თავის ბანაკს გამოუცხადა: მტრით გამაგრებული ის მწვერვალი, რადაც უნდა დაგვიჯდეს, უნდა ავიდოთო, საამისოდ თორმეტ ჯილდოს ვაწესებო — ვინც მტრის სიმაგრეზე პირველი გადავა, თორმეტ ტალანტს მიიღებს და ასე, რიგით, თითო ტალანტის მოკლებით, მეთორმეტე ერთ ტალანტს მიიღებსო. სამასი მსურველი აღმოჩნდა მწვერვალზე იერიშისა. ალექსანდრემ ისინი დამოძღვრა, ჯაჭურვლით, კარეებით, თიკებით, პალოებით დატვირთა და მთაზე მიუშვა. შუაღამისას მოიერიშეებმა კლდის ყველაზე ციცაბო და პიტალო კედელს მიაღწიეს. საიდანაც, კლდის მიუდგომლობის გამო, ოქსიართი არავითარ საფრთხეს არ მოელოდა და იმ მხარეს არც რაიმე დაცვა არ დაუყენებია. დილამდე იცოცეს მაკედონელმა „ალპინისტებმა“ თოვლითა და ყინვით შემოსილ და შერკინულ კლდეზე. ოცდაათი კაცი მოწყდა და გადაიჩეხა, დანარჩენებმა დილით მწვერვალზე ააღწიეს, ოქსიართის არხეინად ჩაძინებულ ბანაკს ზემოდან მოექცნენ და, დათქმისამებრ, ალექსანდრეს იქიდან თეთრი თავსაფრები დაუფრიალეს. მაშინ ალექსანდრემ ერთხელ კიდევ ბუკით შესძახა აჯანყებულთა ბანაკს: ფრთოსანი მემორები უკვე თავზე გადგანან და იმედია, ახლა მაინც მიხვდებით, რომ ყოველგვარი წინააღმდეგობა უნაყოფოა და იარაღს დაყრიეთო.

გაოცებულმა და თავზარდაცემულმა აჯანყებულებმა მართლაც წინააღმდეგობის გაგრძელება უაზრობად ჩათვალეს და იარაღი დაყარეს. ალექსანდრე თვითონ ავიდა კლდოვან ბანაკში, სადაც მას მდიდარი ნადავლი ჩაუვარდა ხელთ<sup>6</sup>.

აქვე, მრავალ ბაქტერიულ და სოგდიაწულ წარჩინებულ ქალთა შორის, ალექსანდრემ იხილა აჯანყებულთა ბელადის, ოქსიართის უმწვენიერესი ასული, როქსანა. დარიოსის ცოლ-ის შემდეგ ასეთი ლამაზი ქალი აღარ გვინახავსო. — იძახდნენ გაოცებული მაკედონელები <sup>37</sup>.

ალექსანდრემ პირველი დიდი სიყვარულით შეიყვარა როქსანა. საგანგებო ნადიმზე შეყვარებულმა მეფემ პური მახვილით შუაზე გაჭრა და ნახევარი თვითონ შეჭამა, ნახევარიც როქსანას აჭამა; ეს ძველ-მაკედონური საქორწინო სიმბოლიკა იყო — კანონიერი ცოლ-ქმრობისა და ახალი ოჯახის დასაწყისისა <sup>38</sup>.

მაშინვე როქსანას ახლობლები უხვი საბოძვართ აავსო ალექსანდრემ. სიმამრი, ოქსიართი, ბაქტრიის სატრაპად დანიშნა, სამი ცოლისძმა სამეფო მეგობართა აგემაში ჩარიცხა.

მაშ, 29 წლის ალექსანდრემ ცოლად შეირთო აზიელი, სოგდიაწული ქალი როქსანა. ალექსანდრე თავისი „დოქტრინის“ სიმბოლიკას ამ ქორწინებაშიც ხედავდა: „ვერაზიულ სახელმწიფოს“ მეფედ ევროპელი ესვა, დედოფლად — აზიელი, ერთი, ანუ „ერთიანი“ პური შუაზე, თანაბრად გაეყოთ ევროპელსა და აზიელს...

ამის შემდგომ, მდინარე ოქსის ზემო წელზე, კიდევ ერთი მთის სიმაგრე ელოდებოდა ალექსანდრეს იერიშებს. იქაც აჯანყებულები ჩასაგრებელიყვნენ, ფეხშეუდგამ კლდეებსა და უსიერი ტყეებით დაბურულ გამოქვაბულებსა და წყვარამებში. აჯანყებულთა ბანაკს სათავეში ედგა ხორიენი.

გაუძღვა ალექსანდრე ჯარს და შეუდგნენ მთებს.

უმძიმეს გზებზე კიდევ საშინელი წვიმები წამოეწიათ, სიცივე და ყინვა დააწვა დედამიწას. ბევრი მეომარი გაიყინა და გაათავდა. მეფის გასაოცარი მხნეობა და დაუღლელობა მაინც სულსა და ხორცს განუმტკიცებდა ჯარისკაცებს. ერთი შესვენების ჟამს, — როცა ალექსანდრე ბანაკში ცეცხლს უჭდა, თბებოდა და ისვენებდა — ერთი მოხუცი მეომარი შემობოროძიკდა, ყინვისგან გათოშილი და დაღლილობისგან ჯანდაშრეტილი. ალექსანდრე ფეხზე წამოვარდა, ჯარისკაცს იარაღი მოჰხადა და ცეცხლთან თავის სკამზე დასვა. როცა გათბა და თვალში გამოიხედა, მხოლოდ მაშინ იცნო მეფე იმ ჯარისკაცმა, — იცნო და ფეხზე წამოვარდა დაფეთებული. ალექსანდრემ სიცილით დაამშვიდა ჯარისკაცი: „ჰნედავ, მეგობარო, მეფის სკამზე ჯდომას სპარსელებთან სიკვდილი მოაქვს, შენ კი ჩემს სკამზე ჯდომამ სი-



ცოცხლე დაგიბრუნა“... გზა განაგრძეს და სიმაგრის ძირსაც მიად-  
წიეს ვაივაგლახით. იქ კიდეც ახალი დაბრკოლება გამოჩნდა — უძირო  
უფსკრული. არც აქ შედრკა ალექსანდრე. მაშინვე ჯარი ტყეებს  
მიუღია, უზარმაზარი ნაძვები წამოაქცევინა, უფსკრული გადაბეჭა,  
გადახიდა და ზედ ჯარიანად გადაიარა. მაშინვე სატყორცნი მანქანე-  
ბიც მიაგორეს კედლებთან მაკედონელებმა და დაუშინეს ქვა და ისა-  
რი. ხორიენიც მიხვდა, რომ წინააღმდეგობა მას და მის ბანაკს სრუ-  
ლი დაღუპვის მეტს არათერს არგუნებდა. ამიტომ ალექსანდრეს მო-  
ლაპარაკების თხოვნა გაუგზავნა და შუამავლად და თავდებად ოქსი-  
ართი ითხოვა. ალექსანდრემაც გაგზავნა სიმამრი ხორიენთან. მივიდა  
ოქსიართი ყოფილ თანამებრძოლთან და დაარწმუნა იგი, თავისი თავ-  
დებობით, ალექსანდრეს მხრივ სრულს უვნებლობაში. ხორიენიც  
ადგა და ეახლა ალექსანდრეს თავისი თანამებრძოლებით. ალექსანდ-  
რემაც პატივით მიიღო და თან მიულოცა, რომ მან ბოლოს და ბო-  
ლოს თავისი სიცოცხლე ანდო არა კლდეს, არამედ კეთილშობილ  
ვაჟაკს. ხორიენმა ციხესიმაგრეში დაგროვილი მთელი სურსათ-სა-  
ნოვაგე გამოიტანა და შიმშილითა და სიცივით შევიწროებულ მაკე-  
დონელებს დაურიგა.

ის ციხესიმაგრე და მისი მიმოსახედი ოლქი ალექსანდრემ ისევ  
ხორიენს მისცა საბატონოდ, თვითონ კი ქალაქ ბაქტრაში ჩავიდა,  
აქედან მან კრატეროსი ოთხი ფლანგური ტაქსისით და 600 ცხენოს-  
ნით გაგზავნა უკანასკნელ აჯანყებულებთან — კატანთან და გავსტან-  
თან საომრად. საშინელ ბრძოლაში კრატეროსმა გაანადგურა აჯან-  
ყებულნი. კატანი ბრძოლაში დაიღუპა, გავსტანი კი ტყვექმნილი  
და ბორკილდადებული მოჰგვარა კრატეროსმა მეფეს.

მცირე ხნით მიწყდა და მიჩუმდა საომარი ნალარების ცემა და სა-  
ქურვლის ზათქი-ზრიალი.

და სანამ სისხლით გაღეშილი ომის ღმერთი თვალს ატყუებდა,  
ისევ აიძვრა რყევადი სულის სამყარო მაკედონური სამხედრო ბა-  
ნაკისა.

ბრძოლის ველიდან ბანაკში მობრუნებისა და „სულის მობრუნე-  
ბის“ ეამს ისევ მკვეთრი გახდა „იდეოლოგიური მეხთატეხა“ ჯერ კი-  
დევ ფილოტასა და კლიტოსის სისხლის ოხშივრისგან დაუწმენდელ  
ბანაკში. ახალ-სახელმწიფოებრიობისა და მისი ახალ-იდეოლოგიური

საფუძვლების სარკვევ მორევში ისევ მძლავრობდა ბერძნული ინდივიდუალიზმი. თანაც— ყველა ეს ინდივიდუუმი, ნებით თუ უნებლიეთ, მაინც იმ წუთისოფლის მთავარ გმირთან განუყოფელ ურთიერთობაში ირჩევდა თავის „ინდივიდუალისტურ გზას“ ცხოვრებისას. ეს კი თავისთავად სწორედ იმ „მთავარ გმირთან“ კონფლიქტს, ანუ იმ „მთავარი გმირის“ ბრძოლაში გამოწვევას ნიშნავდა — საბედისწერო ბრძოლაში გამოწვევას.

ალექსანდრეს ახლობელ თანამებრძოლთა წრეში ყველა თავისი „ინდივიდუალური ბუნებისა“ იყო, ყველა თავისი საკუთარი თითის ანაბეჭდით. მაგრამ მათგან მაინც გამორჩეული მდგომარეობა ეჭირა ორ ახალგაზრდა ბერძენ ფილოსოფოსს.

ერთი — კალისტენე იყო, ქალაქ ოლინთოსიდან, დიდი არისტოტელეს დისწული და უსაყვარლესი მოწაფე. აქედანვე, თითქოს, თავისთავად იგულისხმებოდა მისი სულიერი ნათესაობა ალექსანდრესთან. იყო იგი ბრწყინვალე მწერალი, ისტორიკოსი, რიტორი, ფილოსოფოსი და გეოგრაფოსი. და წაჰყვა იგი აღმოსავლეთში მიმავალ „თანაევროპიულ“ ლაშქარს, — წაჰყვა, რამეთუ როგორც საკუთარ თვალთმხილველსა და მონაწილეს, მომავალი თაობებისთვის მართლად მოეთხრო ალექსანდრე მაკედონელისა და მის თანამებრძოლთა საქმენი საგმირონი.

ერთხელ კიდევ გავიხსენოთ ალექსანდრეს შეძახილი აქილევსის სულისადმი: ნეტავ შენ, ბედნიერო ჭაბუკო, რომ სიცოცხლეში მოიპოვე უერთგულესი მეგობარი, ხოლო სიკვდილის შემდეგ უდიდესი მეხოტბეო. მაშ — ნამდვილი, „კლასიკური მეგობარი“ — პატროკლე, და „კლასიკური მეხოტბე“ — ჰომეროსი. ეს, თითქოს, სიმბოლურ საპროგრამო სიტყვად ისროლა მაშინ ალექსანდრემ. მის შემდგომ ექვსი წელიწადი გავიდა, ბევრმა წყალმა ჩაიარა, ბევრი სისხლიც დაიქცა და „პროგრამის“ პირველმა ნაწილმა — პატროკლეობამ — ბოლო ხანს „თავი შეირცხვინა“ — პატროკლეებმა აქილევსზე ხელი აღმართეს! ხოლო, მეორე ნაწილი — „ჰომეროსობა“ — აქამდე დიდებულად ამართლებდა მთავარი გმირის „საპროგრამო მოწოდებას“ — იწერებოდა ალექსანდრე მაკედონელის საგმირო საქმეთა „ისტორიანი“ და „ზმანი“ („ქებანი“), რომელთა ავტორები იყვნენ: არისტობულე, კლიტარქოსი, ტიმაგენე, პოლიკლეტოსი, ონესიკრიტოსი, ასკლეპიადე, არისტოსი.

მაგრამ ყველა ამ ისტორიკოსსა და მწერალს შორის ყველაზე გა-

მორჩეული, ჰომერული ძალისხმევის კალმოსანი მაინც კალისტენე იყო. თვითონ ამბობდა კალისტენე, — მე ლაშქრად მოვდივარ არა საკუთარი დიდების მოსახვეჭავად, არამედ ალექსანდრეს საქმეთა განსადიდებლადო. ძლიერი, შთამბეჭდავი და დამაჯერებელი ლოგოსის მეუფე იყო კალისტენე, თვითონაც იცოდა ფასი თავისი ლოგოსისა და თვითონვე მიანიშნებდა ხაზგასმით: მომავალი თაობები სწორედ ჩემი თხზულებებით იწამებენ სიმართლეს და არა ოლიმპიადას ღვთაებრივი მუცლადლების ზღაპრების მიხედვითო.<sup>39</sup> ჩვენამდე მოღწეული ნაფლეთები მისი ისტორიული თხზულებებისა ნათლად მეტყველებენ მათი ავტორის თანმიმდევრულ მეხოტბეობას ალექსანდრეს პიროვნებისა და საქმეებისადმი. ალექსანდრემ ჰამფილიის პირზე რომ გაიარა, მის წინ ზღვის ტალღები ჩაიკეცნენ და თაყვანი სცესო, — წერს ერთგან კალისტენე. გავგამელას ბრძოლის წინ ალექსანდრემ ზეცისკენ ხელები შემართა და შესძახა, — თუ მე მართლა ზევსის ძე ვარ, მაშინ, ღმერთებო, მოჰხედეთ და ბრძოლა მოაგებინეთ ელინებსო, — წერს მეორეგან, და აკი შეისმინეს მისი თხოვნა თავისმა „ნათესავმა ღმერთებმა“?!.. დიდი ძიყვარულით, პატივისცემითა და მოწიწებით ეპყრობოდნენ ჯარისკაცები ამ ახალგაზრდა კაცს. მოსწონდათ მისი მაღალგანათლებულობა, შთამაგონებელი საუბარი, გონება-მახვილობა, თავაზიანობა და სამართლიანობა.

მეორე, სავსებით სხვა ხასიათის პიროვნება იყო ანაქსარქოს აბდერელი, სახელოვანი დემოკრიტეს თანამემამულე, ელეატური ფილოსოფიის მიმდევარი. მისი ცხოვრების ამოსავალი წერტილი წმინდა ევდემონიზმი — სხეულებრივი ბედნიერებისთვის ყველაფრის გაწირვა იყო. იგი ამცირებდა და დასცინოდა ყველას, ვინც კი სახელის მოხვეჭისათვის ათასგვარ ხიფათზე მიდიოდა და ცხოვრებისგან სხვაზე მეტ სიამოვნებას მაინც ვერ ღებულობდა.<sup>40</sup> იგი ქედმაღლურად და ზიზლით ეპყრობოდა ადამიანებს. განსაკუთრებით ახლობლებსა და ნათესავებს, ხალხს „ოხლოსს“ (ბრბოს) ეძახდა და საერთოდ პატივისცემის ღირსად მაინცა და მაინც არც მიიჩნევდა. ვერავინ არკვევდა საზღვარს მის გულწრფელობასა და ფარისევლობას შორის, ხუმრობასა და სერიოზულობას შორის, მამამელობასა და ცინიზმს შორის. მეფისადმი დიდი სიყვარული და პატივისცემა ჰქონდა, მაგრამ მწარე სარკაზმის უფლებასაც აძლევდა ხოლმე თავს მეფის დიდსულოვნებით გათამამებული ახალგაზრდა ფილოსოფოსი. იგი, ერთი მხრივ ამტკიცებდა, რომ ალექსანდრე დიონისეზე და ჰერაკლეზე დი-

დი გმირია და მასზე მეტადაც უნდა ვაღმერთებდეთო, მაგრამ ხშირად თვითონვე დასცინოდა ალექსანდრეს „ღმერთობას!“ ერთხელ, ავდარში, ცაზე რომ საშინელი ქუხილი ატყდა, ანაქსარქოსმა ასე მიმართა ალექსანდრეს: „იქნებ, შენც დააქვექო, ზევსის ძევე, მეხი ზეცაში?“ ალექსანდრე მიხვდა, როგორ დასცინა ენაკვიმატმა მის „ღვთისძეობას“, მაგრამ პასუხად ეს გადაჰკრა: „მე არ მინდა დაგიჯერო და მეგობრები შევაშინო: შენ კი ჩემი სადილითაც უკმაყოფილო ხარ, ვინათგან სუფრაზე მართო თევზს ჰხედავ და არა სატრაპთა თავებს“.41 მერე კიდევ, — როცა ალექსანდრეს კლიტოსი შემოაკვდა და მეფე გაუთავებელ გლოვასა და აპათიას მიეცა. მასთან ანაქსარქოსი შევიარდა და შესძახა დამტუქსავი ხმით: „განა, ეს არის ალექსანდრე, რომლისკენაც ახლა მიპყრობილია თვალი მთელი სამყაროსია?! ეს ხომ ისე წევს და ტირის, ვითარცა მონა და ეშინია კაცთა კანონისა და ძრახვისა, — იმ კაცთა, ვისთვისაც თვითონ უნდა იყოს კანონიც და სამართლიანობაც! მან ხომ იმიტომ გაიმარჯვა, მბრძანებლობდეს და სხვები ჰყავდეს მორჩილებაში და არა იმიტომ, რომ ფუჭი აზრისგან დაძლეული სხვას დაემონოს! გონს მოდი, ხელმწიფეო, განა, შენ არ იცი, ზევსს გვერდით დიკე და თემიდა (მართლმსაჯულების ქალღმერთები) უსხედან, რათა რასაც მბრძანებელი ჩაიდენს, ყველაფერი განგებინშიერად და სამართლიანად ჩათვალონ?“42.

მეფეს სჭირდებოდა ასეთი კაცი, — კაცი, რომელიც მისი გულის ნადებს მიხვდებდა და, სიწრფოებით თუ ფარისევლობით, „გულის მოსაფხან“ სიმართლეს ეტყვის. ამიტომ ალექსანდრემ ანაქსარქოსი კიდევაც დაითმინა და კიდევაც დაისაჭიროვა.

ხოლო, კალისტენესა და ალექსანდრეს შორის წყალი მოულოდნელად აიშლრა. მიზეზი კი ისევ და ისევ ალექსანდრეს ახალ-სახელმწიფოებრივი „საპოლიტიკო ნოვატორიზმი“ იყო. ალექსანდრეს ყურს მიწვდა, რომ კალისტენე აშკარად, ხალხსა და ჯარში ხმამაღლა გაცხადებით, არ იწონებდა ბერძენთა და ბარბაროსთა გაწონასწორების მოძღვრებას. ერთი სიტყვით, კალისტენე, ალექსანდრესგან განსხვავებით და მის საპირისპიროდ, აქაც არისტოტელეს ერთგული მოწაფე და მისი გეზგაუხრელი მიმდევარი დარჩენილა.

დაიწყო თითქოს უბრალო და უწყინარი კინკლაობით და განვითარდა ავისმაუწყებელი ჭიდილითა და შეხლა-შემოხლით.

კალისტენემ მოუკლო მეფისგან მიწვეულ სუფრაზე სიარულს; ან თუ მივიდოდა, იჭდა უტყვი და პირჩაქუფრული — ეს ენამტყვერი და

ლამაზი კაცი. ალექსანდრეს კი არ გამოჩენია მისი „მეგობრის“ ეს ყრუ პროტესტანტობა და განაცხადა კიდეც ერთხელ, ევრიპიდეს ლექსით:

მძულს მე ისეთი ბრძენი, რომელიც  
თავის თავისთვის არ არის ბრძენი.

მუქარით იყო ეს ლექსი ნათქვამი, მაგრამ კალისტენეს ისევ არ გაუცია პასუხი.

მეორედ, — ისევ მეფის გამართულ მრავალსტუმრიან სუფრაზე, კალისტენეს ღვინით საესე თასი მიაწოდეს და ჩააცივდნენ, ადექი და ერთი შენებურად შაკედონელები შეაქეო. ადგა კალისტენე და თქვა სადღეგრძელო, — თქვა ისე ძლიერად, რომ მთელი სუფრა წამოიშალა ტაშის გრიალით, აღტაცებული შეძახილებითა და ყვავილთა ფრქვევით. მაგრამ ალექსანდრემ სცადა არაფრად ჩაეგდო კალისტენეს სიტყვა და ისევ ევრიპიდეს ლექსი ისროლა:

როს საუცხოო ამბავზეა სალაპარაკო,  
ენაშვეერობა სრულებითაც არ არის ძნელი.

ეს თქვა მეფემ და დასძინა: აბა, თუ ბიჭი ხარ, შენი მკვერმეტყველება, ქებით კი არა, მაკედონელთა გაკიცხვით გვიჩვენე, რათა თავიანთი შეცდომანი შეიგნონ და უკეთესები გახდნენო.

კეთილი და პატიოსანიო, — და ხელახლა წამოდგა კალისტენე, ხელახლა წარმოთქვა სიტყვა, მაგრამ სიტყვა მაკედონელთა ნაკლთა და სისუსტეთა მამხილებელი, რომლის მთავარი აზრი ეს იყო — ფილიპესა და მისი მაკედონელების ამაღლება და გაძლიერება მხოლოდ ბერძენთა შინაგანი უთანხმოებისა და შინამტერობის შედეგი იყო, და ლექსით დაასრულა:

უკეთუ ხალხში დამკვიდრდება უთანხმოება,  
არამზადები იდროვებენ, აღზევდებიან.

ახლა კი საშინლად ააღელვა და აახმაურა სუფრა ამ სიტყვამ. კალისტენემ მკვერმეტყველება კი არა, ჩვენდამი მტრობა და სიძულვილი გაამჟღავნაო, — ყარყაშობდნენ მაკედონელნი. ალექსანდრე კი ბოროტად ილიმებოდა — აი, თქვენი საყვარელი ოლინთოელი ზრძე-

ნო. კალისტენემაც საფრთხე იგრძნო და სუფრიდან წასვლისას სამჯერ თავის თავს ხმამაღლა უთხრა ლექსი „ილიადადან“:

პატროლევ მოკლეს — აჲ შენზე ბევრად უმაღლეს!

ამ ამბავს გვიან ეტყვიან არისტოტელეს და ისიც იტყვის: მკვევრ-მეტყველებით მართლაც დიდი და მძლავრი იყო კალისტენე, მაგრამ ჭკუა დიხააც აკლდაო. ასე იყო: პირდაპირობა და გულახდილობა უჭკუობად იყო შეფასებული.

ალექსანდრესა და კალისტენეს „ზოგადიდეოლოგიური“ უთანხმოებანი კიდევ ერთ ცალკე „საკითხში“ გამჟღავნდა მკვეთრად. საქმე ეხებოდა მეფის სააუდიენციო ცერემონიალსა და განრიგებას. როცა ალექსანდრესთან სპარსელები და საერთოდ აზიელები შედიოდნენ, ჩვეულებრივი აღმოსავლური წესით, მუხლებზე ეცემოდნენ, მიწას განერთხმოდნენ, მეფეს ფერხთა მტვერს უკოცნიდნენ. მაკედონელები კი ისევ ძველებურად, „დემოკრატიულად“, ჩვეულებრივი სწორფრული მისალმებით ხვდებოდნენ მეფეს. ალექსანდრეს კი, თავისი „პოლიტიკური ფილოსოფიის“ მიხედვით, არ შეეძლო ასე დაეშვა ბოლომდე. ნიველირება აუცილებელი იყო, მაგრამ ვის სასარგებლოდ? სპარსული ყაიდის თუ ევროპული „დემოკრატიზმის“ სასარგებლოდ?.. და ალექსანდრემ ისევ სპარსული ყაიდის სასარგებლოდ გადაწყვიტა: ამიერიდან მაკედონელებიც ისევე უნდა დამხობილიყვნენ მეფის წინაშე, როგორც სპარსელები ემხობოდნენ საუკუნეების მანძილზე კიროსების, კამბიზების, ქსერქსეების, არტაქსერქსეების, დარიოსების, და ახლა კიდევ, „ახალი კიროსის“ — ალექსანდრე მაკედონელის წინაშე. მაკედონელები და ბერძნები უკიდურესად აღაშფოთა ალექსანდრეს ამ გადაწყვეტილებამ, მაგრამ პირდაპირ თქმა ვერავინ გაუბედა. ერთადერთი აღმოჩნდა ისევ კალისტენე, რომელმაც „გადაჭრით და ფილოსოფოსის სიმტკიცით“ გაილაშქრა ალექსანდრეს წინაშე აღმოსავლური წესით თაყვანისცემის წინააღმდეგ. იგი ისეთი დაუნდობლობით და შეურიგებლობით გამოდიოდა, რომ ალექსანდრე იძულებული გახდა ხელი აეღო თავის გადაწყვეტილებაზე. იძულება კი სიძულვილს კბადებს. მეფის სიძულვილი კი ის ძალაა, რომელსაც შეძლებული ბოლოს და ბოლოს შეეწირება.

წყაროები ერთ ნიშნულს ამბავსაც გადმოგვცემენ ამასთან დაკავშირებით, ალექსანდრემ ერთ სუფრაზე ოქროს თასი ჩამოატარა სად-

ლეგრძელებელ სასმურად. ეტყობოდა, ვისთანაც იმ თასით მეფე პირველად მივიდა, ის კაცი გაფრთხილებული იყო: უნდა დაეღია, დაცლილი სასმურით ალექსანდრეს ხლებოდა და აღმოსავლური წესით თაყვანი ეცა, რისთვისაც იგი სამაგიეროდ მეფისგან კოცნას მიიღებდა. ასე, პირველმა დაიწყო და სხვებიც მიჰყვნენ: თასს გამოსცლიდნენ, ალექსანდრესთან მიდიოდნენ, ეთაყვანებოდნენ და მეფის კოცნით „გაბედნიერებულნი“ უკან ბრუნდებოდნენ. კალისტენეს რიგი რომ დადგა, მეფემ თასი მიაწოდა და თვითონ.—ვითომ ყურადღებას არ ვაქცევო — გვერდით მჯდარ ჰეფესტიონთან გააბა ლაპარაკი. კალისტენემ ამით ისარგებლა, თასი სულმოუთქმელად გამოსცალა, მაგრამ თაყვანისცემა გამოტოვა და მეფეს მხოლოდ კოცნისთვის მიუახლოვდა. უცებ ჰეტერმა დემეტრიოსმა იყვირა: არ აკოცო მაგას, მეფეო, მაგან ერთადერთმა არ გცა თაყვანიო. მეფემაც აღარ აკოცა კალისტენეს. მაგრამ კალისტენემაც მსრები აიჩეჩა და მწარე დაცრნვით წამოიძახა: რა გაეწყობა, — წავალ ასე, ერთ კოცნას მოკლებულიო<sup>44</sup>.

კიდევ გავიხსენოთ ადრე ნათქვამი: ფილიპეს დროიდანვე მაკედონიაში წესად იყო წარჩინებულ მაკედონელთა ვაჟიშვილების სასახლის კარზე აყვანა და აღზრდა, ვითარცა „მეფის ყმაწვილებისა“ და მისი „მცველებისა“, ანუ — გვიანდელი სახელდებით — „პაეებისა“. ომის დროს ისინი წარმოადგენდნენ მეფის სამხედრო ამაღას, ყარაულობით ღამეს უთევდნენ მის სახლს. მოართმევდნენ ცხენსა და იარაღს, ახლდნენ ნადიმობისას და ნადირობისას. მეფე იყო მათი მფარველი და მათზე მზრუნველი. მეფე იწვევდა თავისი „პაეებისთვის“ მასწავლებლებს, აღმზრდელებს, პოეტებს, ფილოსოფოსებს, რიტორებს.

იყო ამ „პაეთა“ შორის ერთი ახალგაზრდა კაცი, სახელად ჰერმოლოსი, დიდი მოყვარული და თაყვანისმცემელი კალისტენეს პიროვნებისა, მისი ფილოსოფიისა და სიტყვათხელოვნებისა. იგი, კალისტენეს კვალდაკვალ, მტრულად უცქერდა ალექსანდრესეულ სპარსულ-მაკედონურ ზნე-ჩვევათა აღრევას, ნიველირებასა და „წმინდა მაკედონურის“ უარყოფასა და დამცირებას. ჰერმოლოსს დაჰკარგოვდა პატივისცემა და კრძალულობა ერთ დროს მისი სათაყვანო მეფისა. და ერთხელ, ნადირობისას, ჰერმოლოსმა მეფეს დაასწრო და ანაზღად შემოფეთებულ გარეულ ტახს შუბი სტყორცნა და დააგორა. რაკი მან წესი დაარღვია და მეფის „პირველობის უფლება“ მი-

ითვისა, ალექსანდრემ ამ „კადნიერ ბიჭუნას“ ცხენი ჩამოართვა და ყველას თვალწინ ჯოხებით საშინლად აცემინა.

ჰერმოლოსმა გადაწყვიტა შური ეძია და თავისი განზრახვა პირველად გაანდო უახლოეს მეგობარს — სოსტრატოსს, რომელიც იყო შვილი ამინტასი — იმ ამინტასი, რომელსაც, მის ძმებთან ერთად, ბრალი ედებოდა ფილოტას თანამზრახველობაში, თუმცაღა ამინტამ ის ბრალდება გააქარწყლა და ერთ ბრძოლაში ალექსანდრესთვის თავიც გასწირა. სოსტრატოსსაც თურმე ალექსანდრეს სისხლი სწყუროდა მამამისის უსამართლოდ გაწირვის გამო და მაშინვე აუბა მხარი ჰერმოლოსს ალექსანდრეს მოკვლის განზრახვაში. შეითქმენენ და შეთქმულებმა კიდევ ოთხი თანამზრახველი გაიჩინეს: ანტიპატროსი — ძე ასკლეპიოდოროს ჰირიის სატრაპისა, ეპიმენე — ძე არსეოსისა, ანტიკლეოსი — ძე თეოკრიტოსისა და ფილოტა — ძე თრაკიელი კარხიდოსისა. იღუმალ ითათბირეს და ასე გადაწყვიტეს: იმ ღამით, როცა მეფის კარავის გუშაგობა რიგით ანტიპატროსს უწევდა, კარავში უნდა შესულიყვნენ და მძინარე ალექსანდრე მოეკლათ.

ღადგა ის ღამეც. ანტიპატროსი გუშაგად დგას. შეთქმულებიც მზად არიან და ნიშანს ელიან. მეფე ვახშმად ზის მეგობრებთან და ქალებთან, რომელთა შორის არის ერთი ვინმე სირიელი მისანი ქალი. ადრე ამ ქალის მისნობას ალექსანდრე და მისიანები დასცინოდნენ, მაგრამ ბოლოს და ბოლოს მისი „ზეციური ხილვის“ უნარი დაუჭერებიათ და მეფე აღარც იზორებდა ამ ქალს... გვიან ღამემდე შეჰყვამეფე სმასა და ზმას. ხოლო, როცა წამოიწია და დასაძინებლად წასვლა დააპირა, იმ სირიელმა ქალმა არ დაანება და ურჩია, ამ ღამით არ დაეძინებია და დილამდე გაჰყოლოდა ნადიმობას. ალექსანდრემ დაუჭერა და ტრაპეზთან დღის შემოსვლამდე დარჩა. შეთქმულება ჩაიშალა.

შეთქმულებმა კი თავისი არ დაიშალეს და ალექსანდრეს მოკვლა იმ ღამისთვის გადაიტანეს, რა დღესაც რომელიმე მათგანს საგუშაგოდ დაუძახებდნენ. მაგრამ, საერთო ჭეშმარიტებით, რამდენადაც დიდია საიდუმლო, იმდენადვე უჭირს ენის მქონებელ ადამიანიშვილს მისი შენახვა, გულში უთქმელად დამარხვა და დაკუბოვება. და აი, ერთმა შეთქმულთაგანმა, ეპიმენე არსეოსის ძემ, ყველაფერი, რაც ალექსანდრეს მკვლელობის განზრახვას შეეხებოდა, დაწერილებით გაანდო თავის ძმას — ევრილოზოსს. ევრილოზოსი კი, არც აცივა, არც აცხელა, მეფესთან გაიქცა; გაიქცა და — პირველი ვინც შეეყარა — პტოლემეაიოს ლაგიდს აუწყა, არიქა, მეფეს მოკვლას უპირე-



ბენო. პტოლემეოსი მეფესთან შევარდა და... და ყველაფერი გათავ-  
და — შეთქმულები შეიპყრეს და გაასამართლეს. საშინელი წამების  
შემდეგ, ჰერმოლოასმა და მისმა თანამზრახველებმა დაასახელეს კი-  
დევ რამდენიმე შეთქმული. ითქვა ისიც, რომ შეთქმულების შესა-  
ხებ იცოდა კალისტენემ. ეს კი საკმარისზე მეტიც იყო, რომ ეს „აუ-  
ტანელი სოფისტიც“ სხვებთან ერთად შეეპყრა და ბორკილები და-  
ეღოთ.

ალექსანდრემ სასამართლოზე, რომელსაც თვითონ თავმჯდომე-  
რობდა, კალისტენე საერთოდ არ გამოაჩინა, ხოლო შეთქმულების  
მეთაურს, ჰერმოლოასს, ამნაირ „პროვოკაციულ კითხვას“ აძლევდა:  
აბა, მოგვითხრე ყოველივე, რას გირჩევდა და როგორ ჩაგვაგონებდა  
კალისტენე ჩემს მოკვლასო.

ჰერმოლოასის სიტყვა კი ასეთი იყო მეფე ალექსანდრე მაკედონე-  
ლისადმი:

— ჩვენ კალისტენემ კი არ ჩაგვაგონა და გვასწავლა, არამედ ჩვე-  
ნი ცხოვრების უბედობამ გვასწავლა; ჩვენ შენი მოკვლა იმიტომ გა-  
დავწყვიტეთ, რომ შენ ჩვენ გვეპყრობოდი არა ვითარცა თავისუფალ  
ადამიანს, არამედ ვითარცა მონებს; რამდენი კეთილშობილი მაკედო-  
ნელი გადაურჩა კიდევ შენს სისხლიან სისასტიკეს? როგორ გადაუ-  
ხადე შენ ატალოსს, ფილოტას, პარმენიონს, ალექსანდრე ლინკეს-  
ტიდსა და კლიტოსს მათი ერთგულებისთვის, შენთვის დაღვრილი  
სისხლისთვის, შენი განდიდებისა და ამალღებისთვის! კლიტოსის  
სისხლით შენივე სუფრა შეთხვარე, ფილოტა საშინელი წამებით მოჰ-  
კალ! შენი სარდლები, შენთვის მუდამ წიკიზე შემდგარნი, მათგანვე  
დამარცხებული ბარბაროსი სპარსელების გასართობ და აბუჩად ასაგ-  
დებ სანახაობად გახადე; პარმენიონი, — რომლის დახმარებით შენ თა-  
ვის დროზე ატალოსი მოჰკალი — შენ თვითონ მოჰკალ გაუსამართ-  
ლებლად. შენ მაკედონელებს ჰხოცავ მაკედონელთა ხელით და მერე,  
შენგანვე მკვლელებად ქცეულებს კიდევ სხვათა ხელით სპობ. ჩვენ,  
ყმაწვილებს, იქნებ გვიპირდეს ყოველივე სრულიად გამოეთქვათ, ერ-  
თადერთი, ვისაც ძალუძს ყოველივე ძლიერად თქვას, თავისი ძლი-  
ერის ლოგოსით, — არის კალისტენე; შენ კი, ახლა მაინც რად არ  
მოიყვან კალისტენეს, როცა ჩვენ თვითონ გულწრფელად ვალიარებთ  
ჩვენს გულისნადებს? მაშასადამე, შენ მისი გეშინია, დიახ — გეშინ-  
ია უდანაშაულო ადამიანის მძლავრი სიტყვისა: მე ვამტკიცებ, რომ

კალისტენეს არავითარი ბრალი არ მიუძღვის. აქ არის ყველა, ვინაც ჩემთან ერთად გადაწყვიტა განსრულება ამ მშვენიერ განზრახვისა (მეფის მოკვლისა) და ვერც ერთი მათგანი ვერ იტყვის, რომ კალისტენე ჩვენი თანამზრახველი ყოფილიყოს და მაინც, მიუხედავად ამისა, იგი, ჩვენი უალრესად სამართლიანი და დიდსულოვანი მეფისგან, უკვე განწირულია სასიკვდილოდ. აი ჯილდო მაკედონელებისა: შენ ისე აქცევ მათ სისხლს, როგორც უვარგის, ჭუჭყიან ნარეცხს! ოცდაათი ათასი ჯორი ეზიდება ნადავლად ალებულ შენს ოქროს, ხოლო შენს მეომრებს სახლში მისატანად არაფერიც არ გააჩნიათ, შენთვის მიღებულ ნაჭრილობევეთა გარდა. მაგრამ ყველაფერ ამას ავიტანდით და მოვითმენდით, სანამ შენ ბარბაროსთა გულისთვის ჩვენ არ დაგვივიწყე და მათი წეს-ჩვევანი ულლად არ დაგვადე. შენ მოგწონს სპარსული ტანსაცმელი და სპარსული ცხოვრების წესი. გამოდის, რომ ჩვენ გვინდოდა მოგვეკლა სპარსთა მეფე და არა მაკედონელთა მეფე. ჩვენ გდევნით შენ ომის კანონით, როგორც მოღალატეს და მტრის მხარზე გადასულს. შენ გინდოდა, რომ მაკედონელები შენს წინაშე მუხლებზე დაცემულიყვნენ და მოგსალმებოდნენ ვითარცა ღმერთს; შენ უარი უთხარ მამაშენის, ფილიპეს მამობას და თავი ზევსის ძელ გამოაცხადე; მაგრამ ზევსზე დიდი თუ ვინმე გამოჩნდა, მაშინ შენ ზევსის შვილობაზეც უარს იტყოდი; შენ გიკვირს, რომ ჩვენ, თავისუფალ ადამიანებს, არ შეგვიძლია მოვითმინოთ შენი ტირანია. და ახლა, რას უნდა ველოდეთ შენგან ჩვენ, რომელთაც არ შეგვიძლია ვიცხოვროთ როგორც მონებმა? ჩვენ დავიხოცებით, მაგრამ თუკი შენ ოდესმე გამოსწორდები, ბევრით ჩემგან აღმოჩნდები დავალებული, — აკი შენ ჩემგან შეიტყვე, რაის მოთმენაც არ შეუძლიათ თავისუფალ ადამიანებად შობილთ! ჩვენ მხოლოდ ამას გთხოვთ სიკვდილის წინ, — დაინდე ჩვენი მამები წამებისგან და სიკვდილისგან — ეს უბედურნი, მათ სიბერესთან მარტო შთენილნი და ამიერიდან უშვილძირონი. ახლა კი უბრძანე დაგვხოცონ, რამეთუ ჩვენ ჩვენი სიკვდილით მოვიპოვოთ ის, რაის მოპოვებასაც ვაპირებდით შენი სიკვდილით, — დაასრულა ჰერმოლოსმა<sup>45</sup>.

ალექსანდრემ საპასუხო სიტყვა წარმოსთქვა, რისხვით და ბრაზით — სიტყვა კინი და უმწუო. შეთქმულები გაიყვანეს და, ძველი მაკედონური წესით, ქვის დაკრებით ჩახოცეს<sup>46</sup>.

კალისტენეს გარშემო კი მითქმა-მოთქმა აღარ წყდებოდა. ზოგი შეთქმულებაში მის მონაწილეობას გაიძახოდა, ზოგი შეთქმულთა წა-

ქეზებას აბრალებდა, ზოგი მხოლოდ შეთქმულების პასიურ ცოდნას, ზოგიც სულ უცოდნელობას.

ხმა დადიოდა ქარში: ერთხელ ჰერმოლოსმა კეითხა კალისტენეს — როგორ შეიძლება, ადამიანმა დიდი სახელი მოიხვეჭოსო; როგორ და, ფრიად სახელგანთქმული ადამიანის მოკვლითო, — უპასუხნია კალისტენეს. მერე კიდევ, ასე წააქეზა კალისტენემ ჰერმოლოსიო: შენ იმან არ შეგაშინოს, მეფე რომ ოქროს ტახტზე წევს, — სულ ერთია, მეფის სხეულიც ისეთივე უმწეოა ქრილობისა და სენის ქვეშ, როგორც ყველა სხვა მიწიერი ადამიანისო, — და სხვა მისთანანი, ქორნი თუ სწორნი.

ალექსანდრეს მტკიცედ გადაეწყვიტა კალისტენეს დალუპვა. შვიდი თვე ბორკილდადებული და გალიად ჩაგდებული მიჰყავდა სალაშქრო გზებზე. თითქოს, გვიან უნდა გაესამართლებინა, ომის დამთავრების უამს, მისი ბიძისა და მასწავლებლის, არისტოტელეს თანდასწრებით. მაგრამ პატიმრობიდან შვიდი თვის თავზე, ინდოეთში ალექსანდრეს ლაშქრობის უამს, აღესრულა კალისტენე. დღემდე მოღწეულ ცნობათაგან, ამ საინტერესო ადამიანის დალუპვის გარემოებათა გარშემო ერთხმივი აზრი არც კი არსებობს. ზოგი (არისტობულე) ფიქრობს, რომ იგი ტყვეობაში დაავადდა და ტანჯვით გარდაიცვალა, დასივებული და ტილებდახვეული; მეორე ავტორის (პტოლემეაიოს ლაგიდი) ცნობით, კალისტენე ალექსანდრემ აწამა და ჩამოახრჩო; ან კიდევ (დიოგენე ლაერტის ცნობით) — კალისტენე ლომს ჩაუგდეს და დააგლეჯინესო; კიდევ სხვისი (იუსტინე) გადმოცემით — კალისტენეს ცხვირი და ყურები დააჭრეს და ისე აჩვენებდნენ ყველას, ბოლოს ლისიმახოსს შეეცოდა, ჩუმად საწამლავი მისცა და იმ საწამლავით იხსნა თავი კალისტენემ ეგზომ ტანჯული სიცოცხლისგანო.

ასე იყო თუ ისე, ფილოტასა და კლიტოსის შემდგომ, ასე შეუბრალებლად მოისრა მესამე დიდი ყვავილი ალექსანდრე მაკედონელის ცოდვიან წალკოტში.

327 წლის გაზაფხულზე ალექსანდრე მაკედონელი თავისი საომარი ძალებით უკვე ინდოეთისკენ მიმავალ სალაშქრო გზაზე იდგა.

ევროპელები პირველად მიდიოდნენ უცხო, მანამდე თვალით უხილავ და მხოლოდ ზღაპრით, ლეგენდით და სასწაულით გაცნობიერებულ ქვეყანაში.

ინდოეთად წოდებული ეს კუთხე პლანეტისა მართლაც გასაოცრად გამორჩეული ქვეყანა იყო — თავისი გეოგრაფიული განკერძოებულობით, ბუნებრივი პირობების მრავალსახოვანებით, ცისა და მიწის საოცრებებით, ნივთიერი და სუთიერი კულტურის სიმდიდრითა და ნაირგვარობით, საზოგადოებრივი იერარქიების მრავალსართულიანობითა და სირთულეებით; ქვეყანა, რომელიც ალექსანდრე მაკედონელის მისვლამდე ორი ათასი წლის მაღალცივილიზებულ კულტურას ატარებდა და მაინც აქამდე ერთსახელმწიფოებრიობისა არაფერი გაეგებოდა. ინდოეთის პოლიტიკური ისტორია გულისხმობდა მუდამ მრავალნაჭრიან პარტიკულარიზმს, მრავალნაკვეთიანობას, მრავალსახელმწიფოებრიობას. ქვეყანა, რომელიც სამი მხრით შემორტყმულია ოკეანეებით, ხოლო დანარჩენი მხრით კი — მსოფლიოში უმაღლესი და უფართოესი მთებით, მანამდე სრულიად მოწყვეტილი და შეუღწეველი იყო რაიმე სერიოზული ურთიერთობისათვის, რასაც შეიძლებოდა „საერთაშორისო“ დაქმეოდა. ინდოელები არავითარ მონაწილეობას არ ღებულობდნენ ათასხუთასწლოვან მსოფლიო ორომტრიალში, სადაც „მსოფლიოში პირველობის“ კვერთხს ერთმანეთს ხელიდან გლეჯდნენ — ეგვიპტელები, ხეთები, ბაბილონელები, ასირიელები და მდიელები. მხოლოდ ძვ. წ. VI საუკუნის შუა ხანებში, კიროსისა და მისი სპარსული მონარქიის აღზევების ეამს ჩნდება ინდური ტომების დანარჩენ მსოფლიოსთან პოლიტიკური „მი-მო-დგომის“ ასე თუ ისე ხელშესახები ნიშნეულობანი. კიროსის სახელმწიფოს უკიდურეს ჩრდილო-აღმოსავლეთ კუთხეში მოხსენიე-

ბულია სატრაპია განდარა. შემდეგ, დარიოს I-ის დროინდელ სპარსეთის მეოცე სატრაპიას ინდოელები შეადგენდნენ; ბოლოს, საბერძნეთს მოლაშქრე ქსერქსეს ლაშქარშიც იხსენიებოდნენ განდარიელები<sup>1</sup>.

დარიოს III-ის სახელმწიფოში კი ქვეშევრდომებად გვევლინებიან ინდოეთის უკიდურეს დასავლეთში მცხოვრები პაროპამისადები. ამათ მოიყვანეს გვეგამელას ველზე სპილოები, რომლებიც პირველად იხილეს და უსაზღვროდ გაიოცეს ევროპელებმა.

ალექსანდრეს უკვე ჰქონდა ცნობები ინდოეთის შესახებ. იცოდა, რომ დიდი „ხუმდინარეთის“ — ფენჯაბის, ინდისა და განგის ხეობებში მრავალი დიდი და მცირე სახელმწიფოებრივი გაერთიანებანი ჯაჰვის რგოლებად ასხმოდნენ ერთმანეთს. ალექსანდრე უკვე იყენებდა კიდევაც ინდურ სამეფოთა შორის ქიშპსა და მტრობას. ყველაზე მეტად მას ფენჯაბში დატრიალებული შინაური ამბები აინტერესებდა, ვინათგან პირველი დიდი ინდური ქვეყანა, რომელზეც ევროპელ ხელმწიფეს პირველი ნაბიჯი უნდა დაედგა, სწორედ ინდის ზემო წელი და ფენჯაბი იყო. ალექსანდრემ იცოდა, რომ აქ ორი ინდური სამეფო ებრძოდა ერთმანეთს — სამეფო ტაქსილესი და სამეფო პოროსისა. პირველი ინდსა და ჰიდასპესს (ახლ. ჯელუმ) შორის მდებარეობდა, მეორე — ჰიდასპესსა და აკესინესს (ახლ. ჩინაბ) შორის. ჯერ კიდევ სოგდიანაში ყოფნისას მოხელოდა ალექსანდრეს ელჩები ტაქსილესაგან. მორჩილებას, კავშირსა და სრულ დახმარებას აღუთქვამდა ინდოელი რაჯა, უკეთუ მაკედონელი გვირგვინოსანი ინდოეთს მისვლას „ინებებდა“ და „იკადრებდა“.

ალექსანდრეს ბანაკში იყო ამ დროს, აგრეთვე, ინდის დასავლეთ მხარის ბატონი, სისიკოტე, რომელიც ადრე ბესას ეხმარებოდა, მაგრამ იგი დროზე მიატოვა და ალექსანდრეს ეახლა, ერთგული სამსახურისა და სრული მორჩილების ფიცით...

მაშ, 327 წლის გაზაფხულზე ალექსანდრემ ბაქტრია-სოგდიანის საპატრონოდ დატოვა 10000 ქვეითი და 3500 ცხენოსანი მეომარი, თვითონ კი, ახლად ორგანიზებული საომარი ძალებით, არა მარტო ბერძნულ-მაკედონურით, არამედ უფრო მეტი აზიურით — სულ 120000 მეომრით,<sup>2</sup> — დაიძრა ინდოეთისაკენ.

ვინც კი ინდოეთში ყოფილა, ყველა არწმუნებდა ალექსანდრეს, — ინდოეთი ის ქვეყანაა, რომელიც გატენილი და გაბრწყინებულია ოქროთი და თვალმარგალიტით, კეთილშობილი ქვეით და სპილოს ძვლით. ვითომ არც ეს გაიკვირვა ალექსანდრემ — არც ჩვენ გახლავართ

სხვებზე ნაკლები და გალაშქრების წინ, სამეფო მხედრობის ყოველ მეთმარს ფარი ვერცხლის ფურცლებით მოაქედვინა, ცხენები ოქროს საკაზმავებით მოაკაზმინა, ჯავშნებიც ოქროთი ან ვერცხლით მოასევალებინა<sup>3</sup>.

და მიემართებოდა ალექსანდრე მაკედონელი ინდოეთს ევრაზიული მხედრობით, მოაქროვილ-მოვერცხლილი საჭურვლის ბრჭყვიალით და საომარი ნაღარების გრიალით. ჭეშმარიტად — სანიშანსვეტო დღეები დგებოდა ქვეყანასა ზედა!

ბაქტრიიდან წამოსული მაკედონელები ათ დღეში მივიდნენ ალექსანდრიაში. ორი წლის წინათ დაარსებული ეს ქალაქი, რომელსაც „ინდოეთის კარების“ როლი უნდა შეესრულებინა, არც ისეთი დახვედა, როგორსაც მოელოდა მეფე, ამიტომ მან აქაური მმართველი, ნილოქსენოსი, მაშინვე მოხსნა. აგრეთვე გადააყენა ამ ოლქის, პაროპამისადების სატრაპი, სპარსელი პროექსი. ქალაქის მოსახლეობა ალექსანდრემ გაზარდა ახლომახლო მცხოვრებლებით და იმ მეომრებით, რომელთაც ინდოეთის მძიმე ლაშქრობის დაძლევა უნდა გასჭირვებოდათ. ქალაქისა და ციხიონის ახალ მეთაურად ალექსანდრემ დანიშნა ჰეტერი ნიკანორი, მამა კილიკიის მმართველის ბალაკროსისა, ხოლო პაროპამისადების სატრაპად მეფემ დასვა სპარსი ტირიასპი.

ალექსანდრიიდან ნიკეაში მივიდნენ მაკედონელები. აქედან ალექსანდრემ ინდოეთს, ინდის მხარეში, მაცნეები აფრინა და ყველა იქაურ რაჯას (მეფეს) მოუწოდა მისულოყვნენ და მორჩილება გამოეცხადებინათ მის წინაშე. ბევრი მართლაც მივიდა, მათ შორის ტაქსილე ხომ ადრევე დაექვევრდომა ევროპელ მბრძანებელს. და მივიდნენ ინდოელი რაჯები, უცხოდ მორთულ-მოკაზმულნი, უცხოდ მორთულ-მოკაზმულ სპილოებზე ამხედრებულნი, ბრწყინვალე ამაღებით დამშვენებულნი. ეახლნენ ალექსანდრეს მდიდარი ძღვენით დატვირთულნი, აღმოსავლური თაყვანებით და სრული სამსახურის შეთავაზებით. მაშინვე აჩუქეს 25 საბრძოლო სპილო — იმდროინდელი ტანკები, ინდური მიღწევა მსოფლიო საომარ „ტექნიკაში“.

ალექსანდრემ უცხო სტუმრებს აცნობა, რომ ამ ზაფხულს ინდის ხეობაში შევიდოდა და ყველას თავისას მიუზღავდა — მეგობრებს უკეთილშობილესი მეგობრობით და მტრებს უსასტიკესი მტრობით; ზამთარსაც იქ გავატარებ, ინდის ხეობაში და მომავალ წელს კიდევ იმათ დავსჯი, ვისაც ჩემი მოკავშირე ტაქსილე თაჯ მტრად მიიჩნევსო.

ინდოეთში შესასვლელად მონიშნული იყო მდინარე კოფენის (ქაბულის) ხეობა, რომელიც მარჯვენა მხრიდან ერთვოდა მდინარე ინდს...

ალექსანდრემ მთელი არმია გაჰყო ორ ნაწილად. ერთი ნაწილი ჩააბარა ჰეფესტიონსა და პედრიკას და გაუშვა მდინარე კოფენის მარჯვენა (სამხრეთ) ნაპირის გასწვრივ. მეორე ნაწილს კი თვითონ უსარდლა და გაუყვა კოფენის მარცხენა ნაპირს. ეს გზა მეტად სახიფათო იყო — მთიელი, მეომრული ტომებით სქლად დასახლებული.

ჰეფესტიონსა და პედრიკას, — რომელთაც მიჰყევბოდნენ ინდოელი ჰევშევრდომებიც — ევალეზოდათ მოსალოდნელ მტერთაგან გაეწმინდათ კოფენის სამხრეთი სანაპირო, გასულიყვენ შესართავამდე და, ალექსანდრეს მოსვლამდე, გაედოთ ხილი მდინარე ინდზე.

ალექსანდრე კი კოფენის ჩრდილოეთ ნაპირის გასწვრივ მძიმე ბრძოლებით მიიკაფავდა გზას. აქ ძლიერი ინდური ტომი, ასპაზიები დაუხვდნენ მტრულად. პირველსავე ციხე-ქალაქზე გაიმართა სასტიკი ბრძოლა. ასპაზიელებმა ველარ გაუძლეს და ქალაქში შეიკეტნენ. ალექსანდრემ იერიში მიიტანა, მაგრამ იმ დღეს ვერაფერს გახდა, მეფე ბეკში დაიჭრა ისრით. დაიჭრნენ პტოლემაიოსიც და ლეონატოსიც. მეორე დღეს მაკედონელებმა იერიში განახლეს, კედლები გადალახეს და ქალაქში ჩაიჭრნენ. მოსახლეობამ, ნაწილმა, მთებში გაასწრო; დანარჩენები, ტყვედ აყვანილნი, მაკედონელებმა, მეფის სისხლის დაქვევის გამო, ყველა დაუნდობლად ანოწყვიტეს. თვითონ ქალაქი, ალექსანდრეს ბრძანებით, საძირკვლამდე დაანგრიეს. მიადგნენ მეორე ქალაქს, ანდაკას, რომელიც უომრად დანებდა მტერს. აქ ალექსანდრემ დატოვა კრატეროსი, რომელსაც დაევალა განეგრძო ბრძოლა სხვა ახლომახლო ქალაქებთან, დაეპყრო ისინი, დაექცია წინააღმდეგობის გამწეენი და განეგრძო გზა აღმოსავლეთისკენ, მეფესთან შესაერთებლად.

თვითონ ალექსანდრემ ჩრდილო-აღმოსავლეთით გადაუხვია და მიაშურა მთავარ ქალაქს, ევასილას, სადაც მას ეგულეზობდა ასპაზიების ხელმწიფე. მაგრამ ევასილა ხალხისგან დაცლილი და ხანძარში გახვეული დახვდა დამპყრობელს. ხალხი კი მთაში გარბოდა. მაკედონელები დაედევნენ და, ვისაც წამოეწიენენ, უწყალოდ ანოწყვიტეს.

პტოლემაიოსმა შენიშნა, მახლობელ მალლობზე ინდოელ მეომართა რაზმი დამდგარიყო იარაღშემართული. მაშინვე მიაშურა ლაგიდმა თავისი მეომრებით. ციცაბოზე ცხენს სიარული გაუჭირდა, დაქვეით-

და და ისე შეუდგა აღმართს პტოლემეიოსი. ჩამოეგება ინდოელთა ბელადი. შეიბნენ. შუბი შიგ მკერდში აძგერა ინდოელმა, მაგრამ ჭავ-შანმა იხსნა მაკედონელი. ამანაც საპასუხო აძგერა და ფერდში გაუყარა შუბი. დაცემულ ინდოელს იარაღის ასაყრელად მიჰყო ხელი პტოლემეიოსმა. ინდოელები წამოეშველნენ დაჰრილ მეთაურს. ალექსანდრემაც მოუსწრო და შეიქნა ბრძოლა ინდოთ ბელადის გარშემო, — თითქოს, პატროკლეს გვამისთვის აქაველები და ტროელები ებრძოდნენ ერთმანეთს. როგორც იქნა დაადებინეს ბელადის გვამი და გააქციეს ინდოელები მაკედონელებმა.

ამის შემდგომ ალექსანდრე კიდევ მიადგა ერთ მთის ქალაქს, არიგეას, მაგრამ არიგეაც მის მცხოვრებლებს ცეცხლისთვის მიეცათ და თვითონ მთებში გაქცეულიყვნენ. კრატეროსმაც მოატანა მას შემდგომ, რაც მეფის ბრძანება შეესრულებინა და გამოვლილ გზაზე ყველა ციხესიმაგრე მაკედონელებისთვის დაემორჩილებინა. ახლა ალექსანდრემ კრატეროსი გადამწვარ არიგეაში დატოვა და დაავალა ხელ-ახლა აღედგინა შესანიშნავი მდებრეობის ეს ქალაქი — დაესახლებინა იგი ახლომახლო მცხოვრებლებით, დაჰრილ-დაუძღურებულა ჯარისკაცებით და სხვა ყოველი მსურველით.

თვითონ ალექსანდრემ უფრო ჩრდილოეთით გაიწია, მთებში, სადაც თავს აფარებდნენ ინდოელთა მრავალრიცხოვანი საომარი ძალები. მეფემ იმ მთის ძირში თავისი არმიის ერთი ნაწილი დატოვა და დააბანაკა. თვითონ ღამით დანარჩენი ჯარები აიყოლია და მრავალი კოცონით გაჩირაღდნებულ მტრის ბანაკს მიუახლოვდა. აქ მან ჯარი სამ ნაწილად გაჰყო, ერთს სარდლად უჩინა ლეონატოსი, მეორეს — პტოლემეიოსი, მესამეს თვითონ უსარდლა და საიერიშოდ ის მხარე აირჩია, საითაც მტრის მეტი სიმრავლე იგრძნობოდა.

ინდოელებმა სამი მხრიდან წამოსული მტერი დროზე შენიშნეს და თვითონაც ჩამოეგებნენ სამ ნაკადად. გაიმართა ფიცხელი ბრძოლა. ყველაზე ადრე ალექსანდრემ მილენა და გააქცია „თავისი წილი“ მტერი. მერე, ლეონატოსმაც და პტოლემეიოსმაც გაიმარჯვეს და აოტეს მოპირდაპირე, 40000 ინდოელი ტყვედ აიყვანეს მაკედონელებმა, 230000 სული რქოსანი საქონელიც გამოირეკეს. ალექსანდრე მოიხიბლა ინდური პირუტყვის სილამაზით. მათგან ყველაზე ლამაზი და დიდტანოვანი ხარ-ძროხა აარჩია და მაკედონიას ვაგზავნა, იქ მოსაშენებლად და სახნავ-სათესში გამოსაყენებლად.

აქვე ალექსანდრემ მიიღო ცნობა, რომ მის წინააღმდეგ საომრად



ემზადებოდა კიდევ ერთი ინდური ტომი — ასაკენები, რომელთაც 30000 ქვეითი მეომარი, 2000 მხედარი და 30 სპილო დაუყენებიათ საომარი დროშების ქვეშ.

ალექსანდრეც დაიძრა ჯარით ასაკენტა წინააღმდეგ, მძიმე, უაღრესად ძნელად სავალი გზაწვრილებით და ხევხუეებით. თანაშემწეებად კენოსი და პოლიპერხონტი მიჰყვებოდნენ. კრატეროსსაც დაესრულებინა არიგეის აღდგენა და თვითონაც წამოსულიყო ჯარით და მანქანებით მეფესთან შესაერთებლად.

სანამ ასაკენტა მიწა-წყალს შალწევდნენ, მდინარე გურეას ხეობაში, მშვენიერსა და მდიდარ ველზე, მიადგნენ ქალაქ ნისას. ალექსანდრემ ბანაკი დასა. ვიღრე იგი ადგილობრივთა დამოკიდებულებას გაარკვევდა, ნისელთა ბელადი თვითონ ეწვია, სახელად — აკუფისი, ოცდაათი თანაშემწის თანსლებით. ისინი განაცვიფრა შორეული ქვეყნიდან მოსული მეფის ხილვამ, რომელიც ჯერ კიდევ იარალში იჯდა, ნაომარი და ნალაშქრალი, თავზე მაღალი მუზარადით და ხელში გრძელი შუბით. მაშინვე მის წინაშე დაემხნენ ნისელნი. ალექსანდრემ ნება დართო ფეხზე დამდგარიყვნენ. აკუფისის ბალიშიც მიართვა, დაბრძანდით, უთხრა და თქვი შენი სათქმელიო. და უამბო საკვირველი ამბავი აკუფისმა ალექსანდრე მაკედონელს: ჩვენი წრმომავლობა თქვენსას ენათესაებაო; ჩვენი წინაპრები აქ თქვენებურ დიონისეს მოუყვანიაო; ჩვენი ქალაქიც, ნისა, დიონისეს დაუარსებია და მასვე მოუნათლია ამ სახელითო, რაკი დიონისეს გამდელი ხომ ნისა იყოო; მას შემდგომ ჩვენ და ჩვენი ქალაქი მარად თავისუფალნი ვყოფილვართ და ახლა გთხოვთ თქვენც დაგვინარჩუნოთ თავისუფლებაო.

ვის შეეძლო ოდნავი სინათლით მაინც გაერკვია, რა იყო აკუფისის ნათქვამში ნამდვილი და რა კიდევ ზღაპარი. მაგრამ თვითონ ალექსანდრე ფრიად კმაყოფილი დარჩა ამ შეხვედრით. სათხოვარიც აღუსრულა მთხოვნელებს — თავისუფლება აჩუქა ნისას, მისი 30 მმართველიც, აკუფისის წინამძღოლობით, დამოუკიდებელ ხელისუფლებად აღიარა. მხოლოდ ნისელთაგან 300 მხედრისა და 100 საუკეთესო მოქალაქის მიცემა მოითხოვა ალექსანდრემ. სამას მხედარს, დიახაც მოგართმევთო — მოახსენა აკუფისმა მეფეს, — მაგრამ ასი საუკეთესო მოქალაქე თუ წამართვი, საუკეთესო მმართველობა როგორღა გვექნებაო; ამიტომ ასი რჩეულის ნაცვლად, თუ არ გაგვიწყრები, ორმაგს და სამმაგს სხვას გაგატანთო.

ესეც შეიწყნარა ალექსანდრემ და მხოლოდ 300 მხედრის აყვანა იკმარა ამ „უცნაური ხალხისაგან“. იქვე დიონისობაც იდღესასწაულეს მაკედონელებმა, ინდოელ „დიონისეს შთამომავლებთან“ ერთად<sup>1</sup>.

ნისადან ალექსანდრე ისევ შეუდგა მძიმე გზებს აჩანყებულ ასაკენ-თა მიმართულებით. ასაკენებმა, უცხო მტერი რომ მოახლოვდა, პირდაპირი დახვედრა ველარ შეუბედეს. რაზმეულებად დაიშალნენ და თავიანთ ციხე-ქალაქებში ჩაიკეტნენ.

მაკედონელები მიაღგნენ აჩანყებულთა ყველაზე დიდ ქალაქს, მასაგას, და დაიბანაკეს. მასაგელებმა არ დააყოვნეს, ქალაქიდან გამოიქრნენ და მტერს შემოუტყეს. ალექსანდრემ უცებ ბანაკი აპყარა და უკუიქცა. მასაგელებმა მისი უკუქცევა გაქცევად ირწმუნეს და მთელის ძალებით გამოედევნენ. ალექსანდრემ ქალაქიდან ნახევარი საათის სარბენზე გამოიტყუა მტერი, უცებ ჭარი შემოაბრუნა და თვითონ შეუტია გაალმასებით. მასაგელები ამას არ მოელოდნენ, დაიბნენ. დაფრთხნენ და დაიფანტნენ. მაკედონელებმა, ვისაც კი წაეწივნენ, ყველა ამოწყვიტეს; მასაგელთაგან ნაწილმა მაინც მოასწრო ქალაქში შებრუნება და კარიბჭეთა ჩაკეტვა. ალექსანდრემ ქალაქს შემოურბინა, საიერიშო წერტილების დასანიშნავად, და სწორედ მაშინ ქალაქის კოშკიდან ნასროლი ისრით დაიჭრა კოშკში. მეორე დღეს საიერიშო ტარანებით რამდენიმე ადგილზე გაარღვიეს მაკედონელებმა ქალაქის კედლები, მაგრამ მასაგელები იბრძოდნენ სრულის მხნეობით, სიმამაცით, თავგანწირულებით, და ალექსანდრე იძულებული იყო უკანვე ბანაკებში ეხმო ჭარები იმ დღეს. მეორე დღის გააფთრებული იერიშებიც უშედეგო აღმოჩნდა მაკედონელთათვის. მესამე დღეს ალექსანდრემ ისეთივე სააბორდაჟე ხიდებით სცადა მასაგას კედლებზე ჭარის გადაყვანა, როგორითაც ეს განასრულა ტიროსის ალების დროს, ხუთი წლის წინათ. მაგრამ არც ამან გაამართლა ამჯერად. ხიდები კედლებზე გადააგეს, მაგრამ, ხიდებზევე მაკედონელებს ქალაქის დამცველები შემოეგებნენ სასტიკი ხმალცემით. ხიდებმა ხალხის სიმძიმეს ველარ გაუძლეს, ჩაიქცნენ და მეომრებიც ჩაიყოლიეს. ბევრი მაკედონელი ამაოდ ემსხვერპლა იმდღევანდელ ხოცვა-ჟლეტას.

მეოთხე დღეს კვლავ მიიტანეს იერიში მაკედონელებმა, ისევ საიერიშო მანქანებით, კიბეებით და სააბორდაჟო ხიდებით. ისევ საარაკო სიმამაცით იბრძოდნენ ინდოელნი, იბრძოდნენ მანამ, სანამ მათი

ბელადი უცაბედი ისრით განგმირული არ დაეცა და მის გარშემო რჩეულ მეომართა რაზმიც სულ არ ამოწყდა. და მასაგელებმა შერიგება თხოვეს ალექსანდრეს. ესეც დათანხმდა და შერიგების პირობად ეგზომ მამაცი მასაგელი მეომრების აყვანა მოითხოვა თავის საომარ სამსახურში. შეთანხმდნენ კიდევ და მასაგელთა რაზმები. გუშინდელი მტრები, დღეს „მოყვრებად“ და „მოკავშირეებად“ მიყვანეს და დააბანაყეს მაკედონელთა ბანაკის მახლობლად შემართულ ბორცვზე. მაგრამ იმ ღამით ალექსანდრეს შეატყობინეს — მასაგელნი თურმე გაქცევას აპირებენ, რაკი გადაუწყვეტიათ, შენს მხარდამხარ არ იბრძოლონ მოძმე ინდოელთა წინააღმდეგ. მეფემ აღარც აცევა, აღარც აცხელა — მაშინვე იმ ბორცვს ჯარით შემოერთყა, ყოველის მხრიდან იერიში მიიტანა და მასაგელთა რაზმები სულ ერთიანად ჩახოცა. მეორე დღეს უჯარისკაცოდ დატოვებული ქალაქი მასაგა უომრად დაიჭირეს მაკედონელებმა. ალექსანდრეს ტყვედ ჩაუვარდა ბრძოლაში დაღუპულ ასაკენთა ბელადის ცოლ-შვილი<sup>5</sup>.

მალაგას დაცემის შემდგომ კიდევ ორი მნიშვნელოვანი ციხე-ქალაქი შემოარჩიათ ინდოელ ასაკენებს — ბაზირა და ორა. ბაზირას დასაუფლებლად კენოსი გაგზავნა ალექსანდრემ, ორას დასაპყრობად კი — ალკეტოსი, თავიანთი ჯარებით. მეფეს ეგონა, რომ ასაკენები, მათი ხელმწიფის დაღუპვის შემდეგ მაინც, ადვილად დათმობდნენ პოზიციებს. მაგრამ მალე საშფოთარი ამბავი მობრუნდა ორივე მხრიდან. არც ბაზირიტები და არც ორიტები უსისხლოდ არ აპირებდნენ მშობლიურ ქალაქთა დათმობას. პირველი იერიშებიც თურმე მძიმე მსხვერპლად დაუჭდათ კენოსსა და ალკეტოსს. ის იყო ალექსანდრე თავის სარდალთა საშველად აემზადა, რომ კიდევ სხვა ამბავი მოიჭრა მოულოდნელად: ქაშმირის რაჯას, აბისარს, ორასთან კავშირი შეუკრავს და მისი შუამდგომლობით, ჩრდილოელი მთიელებისგან მაშველი ძალებიც მიუღიათ ორიტებს.

ალექსანდრემ ისევ ჩვეული სისწრაფით განაფინა საომარი განაზრახი. კენოსს შეუთვალა — ბაზირას სათვალთვალოდ ძლიერი ბანაკი დატოვე, დანარჩენი ჯარებით შენ თვითონ ჩემთან წამოდი და შემომიერთდიო. თან მეფე თავისი მხედრობით ორასკენ დაიძრა მგლური სვლით, მივიდა თუ არა მაშინვე, ყოველის მხრიდან თავბრუდამხვევი იერიშების ქვეშ, აიღო კიდევ ქალაქი ორა. გამარჯვებულებმა დიდძალი დავლა დაინადაველეს, მათ შორის რამდენიმე საბრძოლო სპილოც.

კენოსი კი, მეფის ბრძანებისამებრ, ის იყო ბაზირას კედლებს

მოშორდა, რომ ქალაქიდან ინდოელთა ჯარი გამოიქრა და მაკედონელებს გააფთრებით დაეძგერა. ბრძოლა კარგა სანს წონასწორად მიდიოდა. მაგრამ უკვე ხმამ მოუსწრო — ორა მაკედონელებს აულიათო და. ფრთაშესხმულმა კენოსმა და მისმა ჯარმა ფრთადანსუვარი ბაზირტება უკუაქციეს და ქალაქის კედლებამდე მისდრეს ჩუხვით. იმ დამით ბაზირიტებმა მშობლიური ქალაქი იღუმალ დატოვეს და გაღავიღნენ მთიან ციხესიმაგრე აორნში, მდინარე ინდის მარჯვენა ნაპირთან.

ეს სამი დიდი ქალაქი — მასაგა, ორა, ბაზირა — და მათი დაუფლება ალექსანდრეს მდინარე კოფენის ჩრდილოეთ მხარეში გაბატონების მტკიცე ნიადაგს აძლევდა. მდინარის სამხრეთით კი ალექსანდრეს მტრული სახელმწიფო იყო, სახელად — პევკელა, სადაც რაჯად იჯდა ასტე. ამ მხარეზე მომავალმა პეფესტიონმა ალყა შემოარტყა ციხესიმაგრეს, რომელშიც გამაგრებულიყო თვითონ რაჯა ასტე. ალყა ერთი თვე გაგრძელდა. ბოლოს. გადამწყვეტი შეტაკების შემდგომ, მაკედონელებმა აიღეს ციხე. რაჯა ასტე ბრძოლაში დაიღუპა. მალე უმეფოდ დარჩენილი პევკელას მთავარი ქალაქი (აგრეთვე, პევკელას სახელით) უომრად დანებდა უცებ მოვარდნილ ალექსანდრეს. კიდევ რამდენიმე დიდმა და მცირე ინდურმა ქალაქმა დაყარა იარაღი და, ამრავად, 327 წლის ზაფხულში ალექსანდრე მაკედონელის ხელში იყო ინდოეთის მიწა-წყალი პაროპამისადებიდან ინდის მარჯვენა ნაპირამდე, მდინარე კოფენის გასწვრივი ქვეყანა. ეს პირველი ინდური მიწა-წყალი ალექსანდრემ თავის სახელმწიფოში დაამკვიდრა სატრაპია „ინდოეთის“ სახელწოდებით და აქ პირველ სატრაპად დანიშნა პეტრი ნიკანორი.

ერთადერთი ციხესიმაგრე, რომელიც ამ მხარეში ჯერ კიდევ არ ეკუთვნოდა ალექსანდრე მაკედონელს, იყო აორნი, ინდისა და კოფენის წყალსაკრებიდან ჩრდილოეთით ათ კილომეტრზე. იგი ცალატყორცნილ, მიუვალ კლდეზე იყო წამომართული და მისი სახელიც — აორნი, ანუ „უფრინველო“, ფრინველისთვის მიუღწეველი — თავისთავად მეტყველებდა ინდის დასავლელ ინდოელთა ამ უკანასკნელი თავშესაფრის მრისხანებაზე. აორნი ცალკე სახელმწიფოსავით იყო, ყოველ შემთხვევაში, არანაკლებ ძალმოსილი „სახელმწიფო“, ვიდრე რომელიმე ბერძნული „პოლისი“, ვინათგან ზემოთ, კლდოვანსვეტოვანის თავანზე, აორნი წარმოადგენდა მრავალსახოვანი სამეურნეო დარგებით აყვავებულ მიწას — პურეულით, ხილეულით, ხორცე-

უღიო, ბაღიუელიო, ბოსტნუელიო. ივინიო, წყლიო, სანელებლებით და ყოველი სიკეთით, რაიც წლობით შეინახაველა აქ დაბინავებულ ათასობით მცხოვრებელს.

ძნელი, ძალზე ძნელი ჩანდა აორნის აღება. მაგრამ ალექსანდრე ისეთი იყო, წინ ერთ ნაბიჯსაც არ წაღგამდა, თუ ზურგში ყველაფერი საიმედოდ და საბეჭითოდ არ ჰქონდა „გაწყობილი“. აორნის გარეშე მისი წინსვლა მაინც წინსვლა უნდა ყოფილიყო, მაგრამ ვინ იცის — აქ მთის წვერიდან დაგორებული მცირე გუნდა მთის ძირამდე ყოვლისწამლევავ ზეკვად იქცევა ხოლმე!..

თითქოს, რადაცნაირი „აზარტიც“ იზიდავდა ალექსანდრეს აორნისაკენ, მასთან ლეგენდაც სმენოდა — ვითომც მის „წინაპარს“, ჰერაკლეს მოედწიოს აორნამდე, მაგრამ ვერასგზით ვერ აუღია ჰერაკლეს აორნი. ალექსანდრემ კი აუცილებლად უნდა აიღოს — უნდა აიღოს, რადგან ალექსანდრე ახლა უკვე გაცილებით დიდი გმირია, ვიდრე ჰერაკლე, ვიდრე აქილევსი, ვიდრე დიოსკურები — პოლიდეკე და კასტორი!..

ალექსანდრემ აორნის მახლობელ ქალაქში, ემბოლიმაში, ჯარის ნაწილით დატოვა კრატეროსი, რომელსაც უნდა ეზრუნა სურსათ-სანოვაგეზე; თვითონ კი დანარჩენი ჯარებით მიაღდა აორნის კლდის ძირს.

აქ ვინმე ადგილობრივი მცხოვრებლები ეახლნენ მეფეს, ეთაყვანენ და აღუთქვეს, ჩვენ წაგიყვანთ ერთადერთ ხერხიან გზაზე, საიდანაც შეიძლება აორნის აღებაო. მეფემ პტოლემაიოს ლაგოსის ძე გააყოლა მათ აგრიანების, მსუბუჭი მეომრების და რჩეული ფაროსნების თანხლებით, თან დააბარა პტოლემაიოსს, — როცა ადგილზე მიხვალ და დამაგრდები, მაშინვე ნიშანი მომეციო.

დაიძრა პტოლემაიოს ლაგიდი, წარუძღვნენ მეგზურები, და, თუმცა, დიდი ჭაპანწყევტით, მაინც ავიდნენ დანიშნულ მთაზე, ზედ ქალაქის კედელთა გასწვრივ. პტოლემაიოსმა მაშინვე — ისევ მტრისგან შეუთმინევლად — ბანაკი დასცა, გარშემო თხრილები, მიწაყრილება და ლობეები შემოავლო და მას უკან მთაზე ცეცხლიც დაანთო მეფის სანიშნოდ.

ალექსანდრემ კლდის იერიში დაიწყო. საცალფეხოზე ქალაქის დამცველები ჩაეგებნენ ქვების გორებით, ისრისა და სათხედის განუცადებელი სროლით. ის დღე ისე უშედეგოდ გაუთავდა ალექსანდრეს. გათამამდნენ ინდოელნი, თუმცა, ალექსანდრეს ვერ გაუბედეს,

მაგრამ პტოლემეოსის დაეცნენ თავზე გაალმასებით. მისქირდა ლაგიდს, ყოველთვის ლალად და ჭკვიანად მეომარს, ძლივს დაინარჩუნა ბანაკი ინდოელთა გააფთრებული იერიშებისაგან.

ალექსანდრემ იმ ღამით ყველაზე სანდო, იმ ადგილმდებარეობათა სრულად მცოდნე ინდოელი აარჩია, პტოლემეოსისთან გაგზავნა და შეუთვალა: მე ხვალ დილით შეტევაზე მივიღივარ და შენც, შენი ბანაკის დასაცავად კი არა, თვითონ გადადი სამკვდრო-სასიცოცხლო შეტევაზე შენის მხრიდანო. გამთენიისას ალექსანდრე შეუდგა იმავე გზას, რა გზითაც პტოლემეოსი ავიდა ორი დღის წინათ. მთელი დღის სასტიკი ბრძოლით მეფემ შეძლო მიმწუხრისას მისულიყო და შეერთებოდა პტოლემეოსის, რომელიც მთელი დღის სასტიკი ბრძოლით ამსუბუქებდა მეფის მალა ამოსვლას.

ბორცვი, რომელზედაც ახლა ერთად იდგა ალექსანდრესა და პტოლემეოსის უკვე გაერთიანებული ბანაკი, ქალაქის კედლებზე დაბალიც იყო და ღრმა, ფართო ხრამითაც გამოყოფილი. ალექსანდრემ გადაწყვიტა ამ ხრამის ამოვსებაც და ქალაქის სიმაღლეზე იმ ბორცვის ამალგებაც. ასეთი სამუშაოს შესრულება წარმოუდგენლად ძნელი ჩანდა, მაგრამ ალექსანდრემ არ დაიშალა, არ დაისვენა და არც არავინ დაასვენა. მთელი ერთი კვირა, დღელამსწორებით იმუშავა და ამუშავა მთელი ბანაკი, ყოველი რიგითისა და მეთაურის წაქეზებით. დაჯილდოებით, დასჯით, მუქარით, მუდარით და სამასი მეტრის სიგრძეზე ხრამიც ამოავსეს და ბორცვიც აღამაღლეს — მიწით, ხე-ტყით, ქვით, ღორღით და ყველაფრით, რაიც ამოსავსების ამოსავსებ მასალად გამოდგებოდა. როცა მაკედონელებმა ეს უცნაური აღმშენებლობა წამოიწყეს, ინდოელები ქალაქიდან სიცილს აყრიდნენ, მაგრამ როცა საქმე საქმედ განივთდა, მაშინ კი სცადეს ხელის შეშლა და რამდენჯერმე გამოუხტნენ კიდეც ისრისა და ქვის სროლით, მაგრამ ყოველთვის უკუაქციეს ისინი მაკედონელებმა. ზოლო, როცა მწაყრილი თითქმის ქალაქის კედელს მიებჯინა და მაკედონელებმა საიერიშო მანქანების მიგორებაც დაიწყეს, მაშინ კი აორნის მესვეურებმა ალექსანდრეს მაცნეები გამოუგზავნეს და ქალაქის ჩაბარების პირობებზე მოლაპარაკების გამართვა ითხოვეს. ალექსანდრემ იგრძნო, რომ აორნელებს იმ დღის მოგება სურდათ, რათა ღამით ქალაქიდან იღუმალ გაპარულიყვნენ. მეფესაც, თითქოს, საწინააღმდეგო რაღა უნდა ჰქონოდა, ღამით ქალაქის გარშემო განლაგებული საგუშაგოები მოხსნა და აორნელებს გაპარვის საშუალება მისცა. სანამ აორნელები „მიიპარებოდნენ“, ალექსანდრე შვიდასი რჩეული მეომრის თანხლე-

ბით პირველი გადავიდა ქალაქის კედელზე, დანარჩენ კედლებზეც ერთდროულად გადავიდნენ მაკედონელთა ჯარები. გადავიდნენ და ერთბაშად, ზარდამცემი ყიყინით დაესხნენ თავს გასაქცევად აშლელ უიარალო ხალხს. ბევრი ამოელიტეს, ბევრიც კლდეებსა და უფსკრულებში გადაიჩხა გზაუკვლევ ლტოლვას თავმიცემული. დილით აორნი მთლიანად მაკედონელთა ხელში იყო. ალექსანდრემ ეს გამარჯვება იქვე დიდი ზეიმითა და მსხვერპლწირვით აღნიშნა. ხუმრობა ხომ არ იყო — აორნი აიღო, პერაკლემ ვერ შეძლო მისი აღება. ალექსანდრემ კი შეძლო!..

ალექსანდრემ აორნის მმართველად, მაკედონური გარნიზონით, დასვა სპარსელი სისიკოტე, რომელსაც, როგორც ჩანს, უკვე სრული ხლობა მოუპოვებია მაკედონელი ხელმწიფისა.

ამასობაში ისევ აჯანყებულან ასაკენები. ბრძოლაში დაღუპული მეფის ძმა ჩასდგომია ასლა სათავეში აჯანყებულებს. იგი 20000 მეომრით და 15 სპილოთი გამაგრებულიყო ცხე-ქალაქ ღირტაში. ალექსანდრე რამდენიმე ათასეული მეომრით წარემართა ღირტასაკენ. მივიდა და ქალაქი დაცარიელებული დახვდა. მეფის მოახლოებაზე აჯანყებულები გაქცეულან შორეულ მთებში და გაუვალ ტყეებში თავშესაფარად. გაქცეულთა მოსაძებნად და მოსატყვევნად, განსაკუთრებით კი სპილოების ხელში ჩასაგდებად, ალექსანდრემ თავიანთი ათასეულებით გაგზავნა ნეარქოსი და ანტიოქოსი.

თვითონ ალექსანდრე დანარჩენი ჯარებით დაიძრა მდინარე ინდისაკენ. გზაზე სოფლები დაცარიელებული ხვდებოდათ. მეგზურებმა აცნობეს, რომ ხალხი ინდს გაღმა, აღმოსავლეთისკენ გაქცეულიყო, აბისარის სამეფოში, სპილოები კი ინდის პირას, მინდორში დაუტოვებიათ გაქცეულებს. ალექსანდრემ თხუთმეტიდან ცამეტი სპილო აიყვანა (ორი სპილო კლდეზე გადაიჩხილიყო). ინდზე მცირე ხომალდები და ნავეები გაამართვინა და ჯარი შიგ ჩასხა. ეს იყო ისტორიაში პირველი შემთხვევა ინდზე ფლოტით დაშვებისა.

ალექსანდრე მივიდა კოფენისა და ინდის წყალსაკრებში, სადაც ჰეფესტიონსა და პერდიკას ხიდიც გაედოთ, ხომალდებიც და ნავეებიც აეგოთ და საერთოდ ყველაფერი გაემზადებინათ ინდის გადასალახავად და აღმოსავლეთ ნაპირზე გადასასხმელად.

აქ, ინდზე გადასვლამდე, დასასვენებლად და გამოსაზამთრებლად დააპანაკა ალექსანდრემ ჯარები. აქვე თავი უნდა მოეყარათ და ალექ-

სანდრეს საომარ ძალებს შეერთებოდნენ ვასალებად თვითნობილი და მორჩილქმნილი ინდური ყარები.

ისევ მოვიდნენ ელჩები ტაქსილესგან. ისევ გამოუცხადეს სრული მორჩილება და ძღვენად მოართვეს ალექსანდრეს: 200 ვერცხლის ტალანტი, 3000 სამსხვერპლო ხარი, 10000 ცხვარი, 30 საბრძოლო სპილო და კიდევ — 700 ინდოელი მხედარი. თან აქვს უთვლიდა ტაქსილე ალექსანდრე მაკედონელს: როცა მდინარეს გადმოივლით, თქვენთვის მომირთმევია ჩემი სატახტო, ყველაზე დიდი ქალაქი ინდსა და ჰიდასპეს შორის<sup>6</sup>.

იღვა 326 წლის ადრე გაზაფხული. ალექსანდრე მაკედონელს ინდზე გადასასვლელად დაულაგებინა ყარები. წინასწარი დიდი მსხვერპლწირვანი, ტანვარჯიშობა და ცხენთა ჭირითი გაემართა. სამსხვერპლო-სამისნომაც კეთილსასურველი ნიშნები აჩვენა მეფეს. გადასვლა დაიწყო — ხილით, ხომალდებით, ნავეებით, ტივებით. თვითონ მეფე და მისი ამაღა საგანგებოდ გაწყობილ ორ იახტაში — ოცდაათნიჩბიან ხომალდებში ისხდნენ. გადასვლა დასრულდა უნაკლულად და უმსხვერპლოდ. გადასვლისთანავე, მარცხენა ნაპირზე, ისევ შესწირეს სამადლობელი მსხვერპლი ღმერთებს.

დაიძრნენ და წარემართნენ ტაქსილას მთავარი ქალაქისკენ მაკედონელი, მართლაც ამ ზღაპრული ქვეყნის სიმშვენიერით და სიმდიდრით განცვიფრებულნი. ჩრდილოეთიდან, ქაშმირის მხრიდან, ცადაზიდული თოვლით მოსილი მთები გადმოსცქეროდნენ უცხოტომელებს, სამხრეთით გაზაფხულის სუნთქვით აფეთქებული და აყვავილებული თვალუწვდენი მინდვრები გადაშლილიყვნენ. უთვალავ ციურ და მიწიერ სულიერთა გალობა და გნისი არყევდა გარემოს. გზაზე ევროპელებმა პირველად იხილეს ინდოელ მლოცველთა და მომნანიებელთა გუნდები, რომლებიც შიშვლად, უხმოდ და უძრავად იდგნენ მძვინვარე მზისა თუ მესთატეხით აღძრული კოკისპირული წვიმების ქვეშ.

მიუახლოვდნენ ტაქსილეს სატახტოს და გამოეგებათ თვითონ მეფე ტაქსილე (გამეფებამდე მას ერქვა ომფისე) საზეიმოდ მორთულ-მოკაზმულ სპილოებზე ამხედრებული ამალით, საბრძოლო მუსიკის გრიალით, ეყვანთა, ზინზილაკთა და ზარაზინთა ზრიალით. სპილოდან დაქვეითდა ტაქსილე, მიეახლა და ეთაყვანა ალექსანდრეს და



ერთხელ კიდევ მისცა და მიუსაკუთრა სატანტო ქალაქიც, მთელი სახელმწიფოც. თავისი ქვეშევრდომებიც და თავისი თავიც.

და შეუძღვა ინდოელი რაჯა ევროპელ ხელმწიფეს და მის ჯარებს თავის სატანტოში, აღმოსავლეთის კიდევ ერთ უბრწყინვალეს ქალაქში. სხვა ინდოელი რაჯებიც მოვიდნენ. ძღვენი მიართვეს და მორჩილება გამოუცხადეს ალექსანდრე მაკედონელს. მოსულთა, მორჩილთა და მოძღვენეთა შორის იყვნენ ელჩები დოქსარისა და ქაშშირის რაჯებისაგან. განსაკუთრებული ბრწყინვალეობით მოვიდა ქაშშირის მეფის, აბისარის ელჩობა, თვითონ მეფის ძმის მეთაურობით; მოვიდნენ და მოართვეს ალექსანდრეს უამრავი კეთილშობილი ქვა და თვალ-მარგალიტი, სპილოს ძვალი და ძვირფასი ქსოვილი, მოვიდა და დაარწმუნა მეფე აბისარის სრულ მორჩილებასა და ერთგულებაში.

ალექსანდრემ ყველას მორჩილება მიიღო „დიდსულოვნად“, ყველას სათხოვარი და საჩივარი მოისმინა და მათი სამფლობელო საზღვრები „მიასწორ-მოასწორა“ და „შეასწორ-შემოასწორა“. როგორც იქნა, საზეიმო ტრაპეზები, ასპარეზობანი და მსხვერპლწირვანი ჩათავდა.

ალექსანდრემ ინდური მიწების მმართველობის სტატუსში ახალი ცვლილებები შეიტანა. ყოველი ინდური მიწა-წყალი, რომელიც ახლა მას მდინარე ჰიდასპეს დასავლეთით ემორჩილებოდა, ერთ სატრაპიად — „ინდოეთად“ გააერთიანა და სათავეში უახლოესი და უერთგულესი კაცი — ფილიპე მაქატას ძე ჩაუყენა, ძლიერი მაკედონური გარნიზონით. იგულისხმებოდა, რომ „სატრაპია ინდოეთში“ თავ-თავისი „სამეფოებით“ შედიოდნენ ალექსანდრეს მორჩილი რაჯები, რომელთა შორის, როგორც ჩანს, მაინც „პრინცეპსობა“ ტაქსილეს ჰქონდა მინიჭებული.

ტაქსილეს ასეთი „თავგადასმკვდარი ერთგულება“ უცხოელი დამპყრობელისადმი, უწინარეს ყოვლისა, გაპირობებული იყო იმ ქიშპობითა და მტრობით, რომელიც მას ჰქონდა მეზობელ მეფესთან — პოროსთან, რომლის სახელმწიფო გაშლილი იყო მდინარე ჰიდასპესა და მდინარე აკესინეს შორის, „ხუთი ათასი ღირსშესანიშნავი ჭალაქისა და ფრიად მრავალი სოფლის“ მოცულობით.<sup>7</sup> თვითონ პოროსი იყო შთამომავალი უძველესი და უკეთილშობილესი ინდური გვარის — პარავასის. იყო ბრძენი, ჰკვიანი და მამაცი კაცი; ფლობდა

მრავალ სიმდიდრეს და მბრძანებლობდა მრავალრიცხოვან საომარ ძალებს.

ალექსანდრემ ტაქსილადან კლეოხაროსი აფრინა პოროსთან და შეუთვალა: მე მოვდივარ ჩემი მხედრობით, ხარკი იკისრე და შენ მორჩილებით შემომეგებე შენივე სახელმწიფოს საზღვრებზეო. პოროსმაც მაშინვე ეს პასუხი შეუტრიალა ალექსანდრეს: შენს მოთხოვნათაგან იმას აღვასრულებ, რომ მართლა დაგხვდები ჩემი ქვეყნის საზღვართან და დაგხვდები იარაღით ხელშიო.

ალექსანდრემ ფიცხლავ კენოსი იხმო და უბრძანა ხალხი წაეყვანა ინდზე, იქ გაწყობილი ხიდი და ფლოტი დაეშალა, სასწრაფოდ ჰიდასპეზე გადმოეთანა, ხელახლა აეწყო და ჰიდასპეს გადასალახავად გაემზადებინა. კენოსმა ყოველივე აღასრულა სრულად და წარმატებით.

ალექსანდრე მთელი თავისი საომარი ძალებით, მათთან ტაქსილას 5000 ინდოელით, ტაქსილადან ჰიდასპესაკენ დაიძრა. ერთბაშად ამინდი აირია. ტროპიკული წვიმები დადგა, საშინელი გრივალებით, მეხთატეხებით, ნიაღვრებით და ღვარნაფშვენებით. ლაფი დადგა. გზები მოიშალა.

ჰიდასპეზე გავიდნენ. ათას ხუთასი ნაბიჯის სიფართით მოექანებოდა დიდროობით გაზურავებული მდინარე.

მოპირდაპირე მხარეზე კი პოროსი მომდგარიყო სრული საომარი ძალებით. 300 სპილო სულ წინ ჩაემწყკრივებინა, ცოცხალ ციხე-კომკებად და „ტანკებად“; სპილოებს შემდგომ სამასი საომარი ეტლი დაეყენებინა; ეტლებს უკან კი ჭარი იდგა — 30000 მეომარი, მათ შორის — უჩვეულოდ გრძელი და მძიმე ისართა მტყორცნელნი. სულ წინ თვითონ პოროსი იდგა, უზარმაზარ სპილოზე ამხედრებული, თვითონ ტანად გოლიათი, უბრწყინვალესი აღჭურვილობით აღკაზმული. ორივე მხარეს, რამდენიმე ადგილას, — სადაც ასე თუ ისე მდინარე მაინც თხლად და საფონედ ჩანდა — საგანგებოდ ძლიერი საგუშაგოები დაეყენებინა ინდოთ ხელმწიფეს.

ალექსანდრემ იმ ლოკალში შეუძლებლად მიიჩნია მდინარის გადალახვა; ამიტომ მან ისევ ხერხს მიმართა — მოწინააღმდეგის ვარაუდთა გასაცრუებლად, ყურადღების მოსაღლელად და ალღოს ასაშლელად, მეფემ ჭარები რაზმეულებად დაჰყო და მტრის სათვალთვალოდ აღმა-დაღმა სანავარდოდ გაუშვა, მდინარის გასწვრივ თუ ასწვრივ; ამით მდინარესაც ზვერავედა — სად უფრო მოსახერხებელი

იქნება მისი გადალახვაო — და მტერსაც საგონებელში ავლებდა — ნეტავ, აგრე ჭენებით რას გვიმზადებენ მაკედონელებიო... ზოგი რაზ-ში ალექსანდრემ ქვეყნის სიღრმეში შეგზავნა, სურსათ-სანოვანის შესაგროვებლად. თან ხმამაღლა აცხადებდა, — მდინარე ყოველთვის ასე დიდი ხომ არ იქნება და ერთხელაც, დაზამთრებისას მაინც, ჩაცხრება და მაშინ გადავლახავთ ახლა გადაულახავსო.

ამ „ხმებმა“ ინდოელთა ბანაკშიც შეაღწია და, ბოლოს და ბოლოს, პოროსი დარწმუნდა, რომ ალექსანდრე ხანგრძლივად რჩებოდა გაღმა ნაპირზე.

მოულოდნელად ალექსანდრემ შეიტყო, რომ ქაშმირის მეფეს, აბისარს, მიუხედავად ისეთი ფიცი-მტკიცისა, ალექსანდრესთვის მაინც უღალატნია და პოროსის დასახმარებლად მთელი თავისი საომარი ძალებით წამოსულა.

ალექსანდრე საერთოდ არ აპირებდა ჰიდასპეს პირზე მართლა ხანგრძლივად დგომას, მაგრამ ახლა აბისარის წამოსვლის ამბავი რომ შეიტყო, კიდევ უფრო უნდა აჩქარებულყო და პოროსთან ანგარიშსწორება მანამ გაეთავებინა, სანამ აბისარი მასთან გაერთიანებას მოასწრებდა.

მაშ, მდინარის გადალახვა აუცილებელი იყო და აუცილებელი რაც შეიძლება სწრაფად. მაგრამ ეს შეუძლებელი იყო იქ, სადაც ახლა იდგა მაკედონელთა ბანაკი. აქ მდინარე ისევ დიდი იყო, უფრო და შეუღწევადი; მდინარესაც რომ გაეშვა, ხშირ ტყედ ჩაკორმებულ ინდოელებს შეეძლოთ გრძელ ისართა და სათხედთა „ცეცხლით“ ჩაეხოცათ მდინარეზე ცურვით გადამავალნი; და კიდევაც რომ გასულიყვნენ, ლაფიან-შლამიან ნაპირზე უნდა დაფლულიყვნენ ცხენკაციანად და ისევ ხელგაუნძრევლად შეწყვეტოდნენ საომრად გამზადებულ, ნასვენებ მოპირდაპირეს. საბედისწეროდ საშიში იყვნენ სპილოებიც, რომელთა სუნი და ხრინწიანი ყვირილი სიშლეგემდე აფრთხობდა მაკედონელთა ცხენებს.

აუცილებელი — გადაუდებლად სასწრაფო და აუცილებელი კი იყო მეორე ნაპირზე გაღწევა. და ალექსანდრემ შუალამისას ასტეხა საომარი ბუკებისა და ნაღარების ცემა, ხმაურით წამოშალა ბანაკი, მამხალეების ბრიალით გამოიყვანა ჯარები, ჩაუშვა მდინარეში ხომალდები. მოპირდაპირე ბანაკმაც ირწმუნა მტრის განზრახვა მდინარის გადალახვისა და პოროსმაც საომრად გააწყო ჯარები, განალაგა სპილოები, ეტლები...

მაგრამ იმ ღამით „ჩაეშალა“ ალექსანდრე მაკედონელს მდინარის გადალახვის განზრახვა. მეორე ღამეს კიდევ სცადა, ისეთივე ხმაურით და თავგამოდებით. პოროსმაც ისევ გაამზადა საომარი ძალები. მაგრამ ისევ „ჩაეშალა“ ალექსანდრეს მისი „მკვებარა განაზრახი“. მესამედ, მეოთხედ და კიდევ რამდენჯერმე განმეორდა ალექსანდრეს „ცდა“ მდინარის გადალახვისა, მაგრამ ისევ და ისევ „ყოველთვის ეშლებოდა“. და პოროსსაც მოსწყინდა და მობეზრდა წვიმასა და ქარიშხალში საომარ მზადყოფნაში დგომა, მხოლოდ სანაპირო საგულშეღობის გაფრთხილება იკმარა და თავი მიახედა ალექსანდრეს „ამაო ბრახაბრუხზე“ ყურისჯდებას.

ალექსანდრეც ამას უცდიდა. მან ბანაკში დატოვა კრატეროსი თავის ჰიპარქით, მასთან პოლიპერხონტისა და ალკეტოსის ფალანგებით და 5000 ინდოელით. კრატეროსს ეს კორპუსი უნდა ჰყოლოდა ადგილზე მანამ, სანამ პოროსი მოპირდაპირე მხარეს ფეხმოუცვლელად იდგომებოდა. უკეთუ პოროსი ჯარს გაჰყოფდა, თვითონ ერთი ნაწილით ბანაკს გაშორდებოდა, მაგრამ სპილოებს არ წაიყვანდა და ბანაკში დატოვებდა, არც მაშინ უნდა მოეცვალა ადგილიდან ფეხი კრატეროსს (სპილოებთან ბრძოლა ძალიან უჭირდა მაკედონურ კავალერიას), მაგრამ თუკი პოროსი სპილოებით გაუჩინარდებოდა, მაშინ კი უნდა დაეწყო მდინარის გადალახვა კრატეროსს. აქვე ალექსანდრემ დატოვა ატალოსიც, რომელიც მას ძალიან ჰგავდა გარეგნულად, მიმოხრით, მანერებით. დატოვა და თავისი ტანსაცმლით მორთო მეფემ ატალოსი, თავის კარავში დააბინავა და უბრძანა, ამავე კარვის წინ ესეირნა და საერთოდ ყოველივე ისე მოემოქმედა, რასაც თვითონ აკეთებდა ალექსანდრე გაღმა მდგარი მტრის შესახედავად. გასაგებია, რაც სურდა ალექსანდრეს ამ „მანევრით“: ინდოელები უნდა დარწმუნებულიყვნენ, რომ მაკედონელთა მეფე მისი ბანაკიდან არსად წასულა<sup>8</sup>...

მეორე კორპუსად ალექსანდრემ შეადგინა მელეაგრეს, ატალოსისა და გორგიას ნაწილები და გაგზავნა მდინარის ასწვრივ, კრატეროსის ბანაკიდან დაახლოებით ორი ათას ნაბიჯზე. აქ, ამ მეორე კორპუსს — უკეთუ იგი შენიშნავდა, რომ პოროსის ჯარები უკვე ბრძოლაში ებმებოდნენ — მაშინვე უნდა დაეწყო მდინარის გადალახვა.

მესამე ნაწილი თვითონ აიყვანა ალექსანდრემ — სამეფო აგემა, ჰეფესტიონი, პერდიკა, დემეტრიოსი და კენოსი თავიანთი ჰიპარქიებით, ბაქტრიული, სოგდიური და სკვითური მხედრობით, აკრი-

ანთა სწრაფი ცხენოსნებით. ყველა ამათი თანხლებით, ალექსანდრე გაეშურა უფრო ზემოთ. ჩრდილოეთით, სადაც მას მონიშნული ჰქონდა ადგილი მდინარის გადასალახადად. აქ მდინარეს თავს ადგა მთა. საიდანაც მოედინებოდა მეორე, მცირე მდინარე, მარჯვენა შენაკადი პიდასპესი. სწორედ აქ, მდინარეთა შორის. იყო ხშირი ტყით შემოსილი მცირე კუნძული. სწორედ ამ კუნძულზე უნდა გასულიყო, მტრისგან იღუმალ, ალექსანდრე თავისი კორპუსით. აქვე წინასწარ გაგზავნილ „ინჟინრებს“ უკვე ყველაფერი გაემზადებინათ გადალახვისთვის — ნაეები, ხომალდები, ტყავის ნავტიკები, ნავტიკებზე ტიკები (ცხენების გადასაყვანად).

ალექსანდრე ღამით მიდიოდა, ნაპირიდან მოშორებით — მტერს რომ თვალი არ დაეკრა გაღმიდან. საშინელი კოკისპირული წამოვიდა. სმენისა და გულის დამხშობი და დამთრგუნველი მეხთატება ატყდა. ამან კიდევ ხელი შეუწყო, მტრისგან სავსებით შეუმჩნევლად შესულიყვნენ იმ კუნძულზე მაკედონელები.

განთიადზე ქარი ჩადგა, წვიმამ გადაიღო და ალექსანდრე პირველი ავიდა ხომალდზე პტოლემეაიოსის, პერდიკას, ლისიმახოსის და სელევკოსის თანხლებით, და გადალახვის ბრძანება გასცა.

ინდოელმა მეთვალყურეებმა მტერი მხოლოდ მაშინ შენიშნეს, როცა მას ნახევარი მდინარე უკვე დაეძლია და გამალებით უახლოვდებოდა მარცხენა ნაპირს. მაშინვე ცხენებს ქუსლი ჰკრეს და პოროსთან ამბის მისატანად გაფრინდნენ. ალექსანდრე კი უკვე გადახტა ნაპირზე და მიწაზე ფეხის დაბიჯებისთანავე შეუდგა ერთმანეთის მიყოლებით გადასული ჭარბების საომრად დალაგებას, — უწინარესად ცხენოსნებს აწყობდა გამალებით. თითქოს, ყველაფერი წარმატებით თავდებოდა, მაგრამ, თურმე, სავსებით მოულოდნელი იმედგაცრუება კი ელოდათ. დიდროობით გაგიჟებულ მდინარეს თურმე აღმოსავლეთით ახალი ვანტოტება გაუწვდია და ხმელეთი, რომელზეც ახლა მაკედონელები იდგნენ, მეორე ახალ კუნძულად გადაუქცევია. მაშ, მაკედონელები, — რომელთაც ეგონათ უკვე მდინარის ნაპირზე გავედითო — ისევ წყალთა-შუა იდგნენ. მაგრამ სასოწარკვეთისა და შიშის გავლებაც არ აცალა ჭარბებს ალექსანდრემ და მაშინვე ფონის საძებრად მიაყენა ისინი ახალ. „ცინცხალ“ მდინარეს. დიდის გაჭირვებით, როგორც იქნა, მიაგნეს ასე თუ ისე ფონად ვარგის ადგილს და მაშინვე შეაგდო ალექსანდრემ ცხენი მდინარეში. ყელამდე ჩაიძირა ცხენი. ყველანი მიჰყვნენ; მცომრებსაც ყელამდე

სწვდებოდა და მიაქროლებდა სწრაფმქროლი ტალღები. მაინც გა-  
აღწიეს. ისევ დააწყო ალექსანდრემ სალაშქროდ და სააჰრად ჯარი.  
ისევ გამოსტაცა მან „ყოვლის მყლაპავ დროს“ უძვირფასესი წუთე-  
ბი, ისევ ვერ მოუსწრო მტერმა უკიდურესად საშიშ, ალბათ, დამ-  
ლუპველ მომენტებში — მდინარეს რომ სამჯერ ჭრიდა: მარჯვენა  
ნაპირიდან კუნძულზე, კუნძულიდან ახალ კუნძულზე და ახალი კუნ-  
ძულიდან მარცხენა ნაპირზე.

მთელი კორპუსით გადასულიყო ალექსანდრე მაკედონელი. ახლა  
მშვიდად იყო. ზულ 15000 მეომარი ჰყავდა — 5000 ცხენოსანი, 10000  
ქვეითი. ცხენოსნები წინ დააყენა. ქვეითი ჯარი — ამ მძივე სამდინა-  
რო თავგადასავლის შემდეგ, უარესად რომ არ დაქანცულიყო — მე-  
ფის ბრძანებით, ნელი ნაბიჯით უნდა წამოსულიყო, ცხენოსანთაგან  
ნახევარი საათის დამანძილებით. ეს დრო მეყოფაო, იფიქრა ალექ-  
სანდრემ და წამოუძღვა მხედრობას სამხრეთისაკენ, ჰილასპეს მარ-  
ცხენა ნაპირის ჩასწვრივ. ინდოელები მთელის ძალებითაც რომ შე-  
მომეფეთონ, ჩემი მხედრობით ვეყოფი და ამასობაში ქვეითი ჯარიც  
მომისწრებსო, ხოლო, უკეთუ მანამდე მტერს ამ მხედრობითაც გა-  
ვაქცევ (არც ამაში ეპარებოდა ეჭვი), იგივე მხედრობა დასადევნებ-  
ლადაც მეყოფაო...

პოროსმა კი, — როცა სასწრაფოდ მივარდნილ გუშაგთან საომარ  
ძალთა გამოჩენის ამბავი შეიტყო — ჯერ ეს ეგონა, ჩემი მოკავშირე  
აბისარ ქაშმირელი მოეშურება ჩემთან შესაერთებლადო, მაგრამ მა-  
შინვე იმასაც მიხვდა, რომ შეუძლებელი იყო მოკავშირეს — ან  
მდინარის გადმოლახვამდე, ან შემდგომ — წინასწარ არ ეცნობებინა  
თავისი მოახლოება, და ირწმუნა, რომ მდინარე სწორედ მაკედონე-  
ლებს გადმოულახავთ. მაგრამ ეს არც იმდენად საშიშად ეჩვენა პო-  
როსს, ვინათგან, გაღმა ისევ იმოდენა ჯარებს ხედავდა და მათთან  
კიდევ „ალექსანდრესაც“ ამჩნევდა, მაგრამ, დაუშვავთ, ის ალექსან-  
დრე ნამდვილი არ იყო და „ნამდვილი მეფე“ ბანაკიდან წამოვიდა —  
იგი უეჭველად მცირე ძალებით წამოვიდოდა და ექვევარეშეა აღიდე-  
ბულ მდინარეზე გადმოსვლისას კიდევ უმრავლესობა დაელუპებო-  
და. ამდენად, ახლა მდინარის აღმოსავლეთ ნაპირზე მომავალი ალექ-  
სანდრე არავითარ საშიშ ძალას არ უნდა წარმოადგენდეს. ის კი არა  
და, კაცმა რომ თქვას, იგი ახლა თვითონ მოქცეულა ხაფანგში, მისი  
განადგურებაც ახლა სავსებით ადვილი საქმეა და კიდევაც განადგურ-  
დება!..

სრული ძალებით პირადი გამოსვლაც არ ჩათვალა საჭიროდ პოროსმა და ალექსანდრესთან შესახვედრად შვილი გაგზავნა, 2000 მხედრით და 120 ეტლით.

როცა ალექსანდრემ იხილა მდინარის ამოსწვრივ სამხრეთიდან მომავალი ჯარი, ირწმუნა, ეს პოროსია ავანგარდით, ხოლო უკან უეჭველად მთავარი ჯარები მოჰყვებიან და მალეც გამოჩნდებიანო. ამიტომ მან ჯარი შეაყენა და საომრად შემართა. მაგრამ როცა დარწმუნდა, რომ მოწინააღმდეგის ჯარი მართო მოდიოდა და უკან არავითარი „მთავარი ძალა“ არ მოჰყვებოდა, ალექსანდრემ თვითონ დასძრა თავისი მხედრობა ელვისებურ იერიშზე.

პირველი დაჯახებისთანავე ასჩეხეს მაკედონელებმა ინდოელი მეწინავენი. სულის მოთქმა აღარ აცალა მტერს ალექსანდრე მაკედონელმა. საომარი ეტლებიც უსწორმასწორო და ატალახებულ მიწაზე, გამოდგომის ნაცვლად, ხელის შემშლელ ტვირთად გაუხდათ ინდოელებს. ისინი ამაოდ ცდილობდნენ გავეშებით მოიერიშე შტრის შეკაეებას. სასტიკად დამარცხდნენ და უკუიქცნენ. 400 ინდოელი დაეცა მკვდარი, მათ შორის სარდალი — ძე პოროსისა. საომარი ეტლებიც, თავიანთი ცხენებით, გამარჯვებულებს დარჩათ. ალექსანდრემ გამარჯვებით გალაღებული ჯარით დევნა განაგრძო.

ბრძოლიდან გაქცეულმა ინდოელმა მეომრებმა აცნობეს მათ მეფეს ალექსანდრესა და მისი ჯარის გადმოსვლის, მათთან შეტაკების, მარცხისა და უფლისწულის დაღუპვის ამბავი. პოროსი ახლა დარწმუნდა, რომ მართლაც დიდ, სწორუპოვარ მტერთან ახვედრებდა შას საწუთისოფლო ბედისწერა. როგორ უნდა მოქცეულიყო? გაღმა, პირდაპირ მდგარი კრატეროსის ბანაკი, ეტყობოდა, წკიპზე იყო შემდგარი მდინარის გადასალახავად. ამიტომ ინდოელი მეფისთვის ძალზე სახიფათო იქნებოდა ბანაკიდან მთელის ძალებით გასვლა. მაგრამ მთავარი მაინც ალექსანდრე იყო — მისი დაუყოვნებლივი განადგურება, სანამ დანარჩენი ჯარებიც გადმოლახავდნენ მდინარეს.

და პოროსმა ბანაკში დატოვა რამდენიმე სპილო, რამდენიმე ათასი ჯარისკაცი, — ვინძლო ამათ გარკვეულ დრომდე მაინც დაებრკოლებინათ მოპირდაპირე მხრიდან კრატეროსის ჯარების გადმოსვლა, ხოლო თვითონ პოროსი სრული საომარი ძალებით — 30000 ქვეითი მეომრით, 4000 მხედრით, 200 სპილოთი და 300 საბრძოლო ეტლით — ბანაკიდან სწრაფად გავიდა და ჩრდილოეთით წარემართა, ალექსანდრე მაკედონელთან შესახვედრად. მან ჯარები მიიყვანა

ფართო, სწორსა და მშრალ ველზე და იქ გაემზადა საომარი წყობით.

წინ, ფრონტის მთელს სიგრძეზე, ინდოთ მეფემ გაამწკრივა ორასი სპილო. — სპილოდან სპილომდე ორმოცი ნაბიჯის დამანძილებით. ქვეითი არმიაც იმდენ რაზმად დაჰყო, რამდენიც სპილო ჰყავდა, — თითოეულ რაზმში 150 მეომარი, — და ასე, 200 რაზმეულად დაყოფილი არმია მეორე რიგში ჩააყენა, თითოეული რაზმი სპილოთშორისი მანძილის უკან. ორივე მხარის ბოლოებში, ფლანგებზე, მხედრობა დააყენა, თითოეულ მხარეზე — 2000 ცხენოსანი. ცხენოსანთა წინ დადგნენ ეტლები, თითოეულ ფლანგზე 150 ერთეული. ყოველ ეტლზე მოთავსებული იყო ორი შეჭურვილი მეეტლე, ორი მძიმედ შეიარაღებული მეომარი და ორიც მოისარი, დიდი მშვილდით და გრძელი ისრებით.

ასეთი საომარი წყობის მთავარი ძალა და მოწინააღმდეგის მართ მისი უპირატესობა ეყრდნობოდა მაინც სპილოებს. მაკედონელები სპილოების გვერდის ავლით ინდოელებს ვერ მისწვდებოდნენ, რადგან სპილოები იდგნენ მთელი ფრონტის წინ და იერიშზე მომავალ მაკედონელს წინ აუცილებლად სპილო უნდა დახვედროდა, მის ზურგზე აღმართული ციხესიმაგრით და მასში ჩასაგრებული მეომრებით. ხოლო, სპილოთა შორის შეჭრასაც, პოროსის ფიქრით, მაკედონელები ვერც ცხენით და ვერც ფეხით ვერ გაბედავენ, ვინათგან პირუტყვიც და ადამიანიც ერთნაირად უფრთხიან სპილოსგან გასრესას.

მართლაც, ფრიად საშიში ჩანდა ინდოელთა საბრძოლო წყობა მაკედონელთათვის. მოსალოდნელი იყო სპილოებით მაკედონური მხედრობის უკუქცევა და ქვეითი ფლანგების გასრესა, ხოლო ეტლები და კავალერია დაედევნებოდნენ და მანამ გაანადგურებდნენ გაქცეულებს, სანამ ისინი მდინარეზე უკანვე გადაასწრებდნენ. ასე ჩანდა ინდოელთა უპირატესობანი, უკეთუ პოროსი ამ უპირატესობათა გამოყენებას დასაწყისშივე დაიწყებდა, ანუ — თუ იგი მიხვდებოდა, რომ ამ შემთხვევაში გადამწყვეტი მნიშვნელობა იერიშის ინიციატივას ენიჭებოდა. უკეთუ პოროსი იერიშს დაასწრებდა, ბრძოლის სასწორიც დასაწყისშივე მისი ძლევამოსილებით დაქანდებოდა.

მაგრამ პოროსი ვერ მიხვდა ამას, — იგი უძრავად იდგა — მტერს ელოდა.



ალექსანდრე კი თავიდანვე მიმხვდარი იყო, — იმ წუთიდანვე, რა წუთსაც მისმა ქვეითმა ჯარმაც მოაღწია და შემოუერთდა — პირველი დარტყმის „უფლება“ მას „ეკუთვნოდა“ და არასდიდებით არ უნდა დაეთმო რიცხვით დიდად უმეტესი და სპილოებით „შერკინული“ მტრისთვის. არ დაეთმო, რადგან მისი ჯარი როგორადაც არ უნდა გაშლილიყო, მტრის განლაგების მეოთხედსაც ვერ გასწვდებოდა, ამიტომ საჭირო იყო იერიშზე გადასვლა ისევე ირბი გრძივით, მტრის გარკვეულ, ყველაზე სუსტ და მგრძობიარე წერტილებზე. ხოლო, რაკი მთელს ფრონტზე სპილოების კედელი აღმართულიყო ალექსანდრემ ყველაზე სუსტ წერტილებად მაინც ფლანგებზე მდგარი კავალერია აირჩია. აქ, „საკავალერიო სასწოროზე“ ჰქონდა უპირატესობა ალექსანდრეს — 5000 წინააღმდეგ 4000-ისა. ამიტომ საკმარისი იქნებოდა 3000 ცხენოსანი მარჯვენა ფლანგით 2000-ის წინააღმდეგ და 2000 ცხენოსანიც მარცხენა ფლანგით კიდევ 2000-ის წინააღმდეგ.

მდინარისკენ, მარჯვნიდან, მტრის მარცხენა ფლანგს თვითონ დაემიზნა ალექსანდრე, 3000 ცხენოსნით, ჰეფესტოონის, პედრიკას და პტოლემეაიოსის თანხლებით. მარცხენაზე, მტრის მარჯვენა ფლანგზე დასატაკებლად კენოსი გააშზადა, 2000 ცხენოსნით და დემეტრიოსის თანხლებით. თან გააფრთხილა კენოსი მეფემ: შენ შეტევაზე გადახვალ მხოლოდ მაშინ, როცა მე უკვე შეჭრილს დამინახავ მტრის მარცხენა ფლანგშიო და უკეთუ შენი საიერიშო ინდოელი ცხენოსნობაც ჩემთან საომრად დაიძრება, შენ მას მაშინვე ზურგიდან დაჰკარი და ასჩეხეო. მერე, ანტიგენეს, ლეონატოსს, ანტიოქოსს და ტავრონს მიუბრუნდა მეფე — როცა ჩვენ ცხენოსნებით მტრის ფლანგებს შემოვკრავთ, თქვენ მაშინვე თქვენის ფლანგური ტაქსისებით მტრის შუაგულს დაეძგერეთო. სპილოებმა არ შევაშინოთო, — ამხნევებდა მეფე ჯარებს — ჩვენი გრძელი შუბები სპილოსაც მისწვდება და მის მხედრებსაცო; ძირს ჩამოჰყარეთ სპილოზე ამხედრებულნი და გაბედულად აძგერეთ იარაღი თვითონ სპილოებსაცო; სპილოების დაცვა სახიფათოა ჯარისთვისო, დაჭრილი და გაცოფებული სპილო მისიანებისთვის უფრო საშიშია, ვიდრე ჩვენთვისო...

მაშ, 326 წლის მაისი. სახელოვანი ბრძოლა ჰიდასპზე.

დასძრა ჯარი ალექსანდრე მაკედონელმა. ისრის სასროლზე რომ მიუახლოვდნენ, უცებ წინ გაიჭრა თვითონ მეფე ათასი მხედრით — ათასივე სკვითი ცხენოსანი მოისარი — და დაუშინეს ისრის ბარანი მტრის მხედრობას. დანარჩენი ორი ათასიც მიჰყვა მეფეს. მკექარე

ყვირით, შუბებისა და მახვილთა ცემით მიესივნენ ინდოელთა მარცხენა ფლანგს და დატაკებისთანავე მოშალეს და არივ-დარიეს იგი. აშლილმა ინდოელმა მხედრებმა სპილოებს მიაშურეს თავშესაფარებლად. მაშინ მარჯვენა ფლანგიდან მართლაც გამოუშვა ინდოთ მეფემ ცხენოსნები, მარცხენა ფლანგის მოსახმარებლად და ალექსანდრეს უკუსაგდებდა. მაგრამ მოუსწრო მათ კენოსმა, ზურგიდან დაეძგერა და შეუდგა ჩეხვას. პოროსი მიხვდა ალექსანდრეს განზრახვას, თუმცა, გვიან, მაგრამ სანამ უფრო გვიან არ იყო, შეეცადა მდგომარეობის გაუმჯობესებას. მან მტრის ორივე კავალერიის წინააღმდეგ სპილოები შეაბრუნა და გააქანა იერიშზე. ამრიგად, შას ფრონტი ორ უბნად უნდა ექცია. მაგრამ სწორედ ამ დროს მოუსწრო ცენტრში შაკედონურმა ფლანგამ. პოროსს „მესამე ფრონტიც“ დაჭირდა, ძალებიც საკმარისზე მეტი ჰყავდა და ცენტრშიც მიუსია სპილოები ფლანგებს. საშინელი ბრძოლა გაჩაღდა, მანამდე ევროპელთათვის უჩვეულო და არაგაონილი. სპილოები მანამდეც ენახათ, მაგრამ ეგზომ სრული, მასშტაბური „სპილოური ომი“ აქამდე მათთვის მართლაც თვალთ უნახავი და წარმოუდგენელი იყო. სპილოები, ვითარცა „ტანკები“, არღვედნენ, თელავდნენ და სრესდნენ მაკედონელთა სქლად შეკრულ ფლანგებს, საშინელი ყვირილით და სუნით აფრთხობდნენ ცხენებს, მეომრებს ხორთუმებით იტაცებდნენ და ეშვებით გლჯდნენ. გამხნევდნენ ინდოელი მხედრები. შეიკრნენ მჭიდროდ და შეუტიეს მაკედონელთა კავალერიას, მაგრამ ისევ სძლიეს მაკედონელებმა, ისევ უკუიქნენ და სპილოები იფარეს ინდოელებმა. ფლანგიტებიც „გაუშინაურდნენ“ სპილოებთან რკენას — ჯგუფჯგუფად ერტყმოდნენ, მათ მხედრებს ძირს ჰყრიდნენ, თვითონ სპილოებს ყვირილით აფრთხობდნენ. ძალმოკრებით სცემდნენ შუბებს და მახვილებს, ხორთუმებს ჰკვეთდნენ, მუხლებს აჭრიდნენ, თვალებს თხრიდნენ და გაცოფებული სპილოები მტერს და მოყვარეს ველარ არჩევდნენ, გზაარეულნი თავისიანებშიც იჭრებოდნენ, იმათაც თელავდნენ, ჰყლუტდნენ, ანაკუწებდნენ. ამასობაში კენოსმა და მისმა მხედრობამ, ინდოელ მემარჯვენე ცხენოსნობის აკაფვის შემდგომ, შიატანა ალექსანდრემდე და შეუერთდა მას. ხოლო ალექსანდრე ახლადმეყრილი და შემკვრივებული მხედრობით, — რამდენადაც მისთვის „სპილოური შიში“ თითქმის მოხსნილი იყო — გულსრულად თავს დაესხა ინდურ ქვეითთა რაზმეულებს, რომლებიც აქამდე ძლივს აკავებდნენ მაკედონური ფლანგის გაათრებულ იერიშს. ინდოელე-

ბი აირივნენ და თავი მისცეს უგზო-უყვლო ლტოლვას. უმრავლესობა ისევ სპილოებს აფარებდა თავს. მაგრამ მათი სპილოებიც აღარ იყო „მათი“. ეს „გამხეცებული მხეცები“ ახლა არავისი აღარ იყვნენ, ანუ — ერთნაირად „იყვნენ“ ან „არ იყვნენ“ მტრისთვისაც და მოყვრისთვისაც. ალექსანდრე მთელს საომარ ველს, სრული გარე-წრეწირით და შიგნით ყოველ უბანზე მაღალხელოვანი დირიჟორით უწევდა მეუფებას. ბრძოლის ველზე სივრცის პრობლემა ჩამოწვა. ინდოელები კაციან-ცხენიან-ეტლიან-სპილოიანად ჩაქედლიყვნენ საბედისწერო წრეში. მაკედონელები კი სივრცეს მთელის სისრულით ფლობდნენ. ისინი გარშემო უბრუნდნენ მათგანვე შეკრულ სალტეში მოქცეულ, უწესრიგო გროვად შეყრილ მტერს და თავისუფლად, სრული ხალვათობით შეეძლოთ გაშლა თავდასხმისა, ისრის სასაროლზე დამანძილებისა, მახვილით მიხდომისა, სპილოს შემოტევისას უკუ-შტევისა, ისევ მიქცევისა და მივარდნისა, წამდაუწუმ. ისევ და იხვე...

მაშინ პოროსმა შემოიყარა ჭერ კიდევ საღად გადარჩენილი ორმოცი სპილო და მათი იერიშით სცადა უკვე წაგებული ბრძოლის ბედის შეზღბრუნება. ალექსანდრემაც არ დააყოვნა და რჩეულ მოისართა, თრაკიელ-აგრიანთა და მაღალხელოვან აკონტისტთა (შუბო-სანთა) რაზმები მიუსია ინდოთ ხელმწიფეს ყოველი მხრიდან. იმედროულად, დანარჩენი ძალები ხელახლა შეამწყრივა და შეამკვრივა ალექსანდრემ — მხედრობაც, ფალანგაც — და ირგვლივი იერიშით გააქანა ისინი უკვე სულთმობრძავი მტრის გასათავეებლად.

ინდოელთაგან ცოცხლები გადარჩნენ ისინი, ვინც ადრევე გაექცა საბედისწერო ხმალთაყვეთებას. ზოგი ტყეში, ღრეში, ქაობსა თუ ღელეში ჩაჩუმჭრულიყო, ზოგიც ბანაკში დაბრუნებულიყო, მაგრამ ამაოდ — კრატეროსს თავისი ჭარბობით უკვე გადმოელახა მდინარე და სრულიად დაპატრონებოდა ინდოელთ ბანაკს.

ათსათიანი ხოცვა-ჟლეტა დამთავრებულიყო. ალექსანდრე მაკედონელს ხელთ ეპყრა კიდევ ერთი ბრწყინვალე კვერთხი „უცხოოდ საკითხავი“ ძღვევამოსილებისა. ბრძოლის ველზე იწვა 20000 ინდოელი ქვეითი და 3000 მხედარი. მკვდრად დარეცილიყო ყველა ინდოთ სარდალი, მათ შორის პოროსის ორი ძე და მოკავშირე რაჭა — ეპიტაკი. აჩეხილი იყო ყველა ეტლი და მეეტლე. დახოცილი ეყარა ასზე მეტი სპილო და სამი ათასზე მეტი ცხენი. გამარჯვებულებმა ტყვედ აიყვანეს 9000 ინდოელი და 80 სპილო. ალექსანდრეს კი ამ ბრძოლაში დაეღუპა 700 ქვეითი და 280 ცხენოსანი მეომარი<sup>10</sup>.

თვითონ მეფე პოროსმა — სტრატეგოსობაში საოცარ ევროპ. ო-  
 თან დიახ, წაგებულმა — ბრძოლაში სწორედ საარაკო გმირობა გა-  
 მოიჩინა. ალექსანდრე განცვიფრებული ხედავდა, როგორ იბრძოდა  
 მისი მეტოქე. იგი — უზარმაზარ სპილოზე ამხედრებული და ოქროს  
 აღჭურვილობით მოელვარე — ყოველთვის იქ გაჩნდებოდა, სადაც  
 ყველაზე მეტად მისიანებს მისპირდებოდათ; მიზანუმცდარად ისრო-  
 და ისარს, მაგრამ თვითონაც უკვე რამდენიმეჯერ დაქრილიყო მტრი-  
 სთვის იოლად მიზანსაცემი ბუმბერაზი, მაგრამ ბრძოლის მიტოვება  
 ერთი წუთითაც არ უფიქრია (განა, იგი დარიოსი იყო!). ხოლო, რო-  
 ცა ბრძოლის ბედი საბოლოოდ წაგებულად სცნო, ინდოთ მეფე პირ-  
 დაპირ სიკვდილს დაეძებდა მტრის უზშირეს კორომებზე გამგელებით  
 შოიერიშე. უკვე ცხრა ადგილას მოხვედროდა შორიდან ნატყორცი  
 ისარი გმირ რაჯას, სისხლი ექცეოდა, ძალა ელეოდა და მისგან ნას-  
 როლი ისრებიც უსაზმნოდ ცვივოდა ირგვლივ. ბოლოს ბექში მძიმედ  
 დაიჭრა და, — რაკი სამარცხვინო ტყვეობის საფრთხე შეიგრძნო,  
 სპილოს ქუსლი ჰკრა და ჰკვიანმა ცხოველმა იგი გაიტაცა ბრძოლის  
 ველიდან. გამოედევნა ალექსანდრე, რომელსაც სულით და გულით  
 ეწადა ცოცხალს დასწეოდა და მასთან შეხვედრაში ყველაზე დიდი,  
 „ღვთის სწორი“ დიდსულოვნება გაეთამაშნა. მაგრამ მთელი დღის  
 ომით ქანცაწყვეტილი ბუყეფალა დაუვარდა ალექსანდრეს. მაშინ  
 ტაქსილეს უბრძანა დასწეოდა გაქცეულს. წამოეწია ცხენით ტაქსი-  
 ლე პოროსს, ისულ ახლოს მისვლა ვერ გაბედა და დამანძილებით მია-  
 ძახა — მობრუნდი და შეუთრგდი ალექსანდრე მაკედონელსო. შემო-  
 უბრუნდა პოროსი მოღალატეს და მოსისხლეს და უკანასკნელი ძა-  
 ლის მოკრებით სტყორცნა ხელშუბი. ცხენის სისწრაფემ ძლივს დაი-  
 ხსნა ტაქსილე სასიკვდილო მოხვედრისაგან. ხელმეორედ ალექსანდ-  
 რემ სხვა ინდოელი გაგზავნა პოროსთან შესახვედრად და შუამავ-  
 ლად — რაჯა მეროე, პოროსის ადრინდელი მეგობარი და ახლობელი.  
 მეროეს მართლაც გაუჩერდა პოროსი და მოისმინა ყოველივე ალექ-  
 სანდრესგან დანაბარები. სპილომ ხორთუმით ჩამოსვა ძალადაცლილი  
 პატრონი. წყალი დალია და წყურვილი ძლივს დაიცხრო სიციხით და  
 მარცხით გულადუღებულმა პოროსმა. მცირედ შეისვენა, იფიქრა  
 და ბოლოს უთხრა მეროეს — კარგი, მოვიღვარ და წამიყვანე ალექ-  
 სანდრე მაკედონელთან<sup>11</sup>.

ალექსანდრე არჩეული ამალით შეეგება პოროსს. იგი ერთხანს  
 განცვიფრებით და აღტაცებით უცქერდა საოცრად ახოვან — „ხუთ

წყობაზე უმაღლეს<sup>12</sup> (ორმეტრნახევარზე უმაღლეს). — პირმშენი-  
ერ მოხუც ხელმწიფეს, რომელსაც ეგზომ მწუხარების ეამს — შვი-  
ლუნდახოცილსა და ხალხამოწყვეტილს, დამარცხებულსა და დაქვეს-  
კნებულს — მაინც არ დაჰკარგვოდა ღირსებით სავსე თავშეკავებუ-  
ლობა და კეთილშობილური ამპარტავნობა.

ისინი ერთმანეთს შეხვდნენ და მიესალმნენ არა როგორც გამარ-  
ჯვებული და დამარცხებული, არამედ ვითარცა სწორფერნი — მეფე  
შეფეს, გმირი გმირს.

და ჰკითხა ალექსანდრე მაკედონელმა ინდოთ ხელმწიფეს: რას  
ისურვებდი და როგორ მოგექცეო?

— მეფურადო, — მოკლედ მოპრა პოროსმა.

ასე ერთ სიტყვაში ჩატეული მინიშნებაც ძალიან მოეწონა ალექ-  
სანდრეს — მეფურად მომექეციო, ანუ ისე მომექეც როგორც მეფეს  
ეკადრებო; თანაც, შეიძლებოდა ეს ერთი სიტყვა ორაზროვანიც ყო-  
ფილიყო, ერთი — როგორც მე, მეფეს მეკადრებო და მეორე —  
როგორც შენ, მეფეს გეკადრებო; უკეთუ პოროსი ამ თქმაში პირ-  
ველს გულისხმობდა, მაშინ იგი თავის თავს განადიდებდა, ხოლო  
თუ მეორეს — მაშინ იგი ალექსანდრეს ანიჭებდა უპირატესობას.  
ალექსანდრემაც უეჭველად ასე გაიგო, როცა პოროსის ერთსიტყვი-  
ან პასუხს ასე გაეპასუხა: „მე აგრეც მოგექეცივი, ვინათგან ეგ თვით  
მე მეხება, ხოლო შენ მთხოვე ის, რაც შენ თვითონ გსურსო“. მაგ-  
რამ პოროსმაც არ დაიხია და უთხრა გადაჭრით ალექსანდრეს: „მე  
ერთ სიტყვაში მე ვთქვი ჩემი სათხოვარი და გავათავეო.

და ალექსანდრემაც დააჩილდოვა ინდოთ ხელმწიფე სწორედ „მე-  
ფურად“, გნებავთ, ორივე გაგებით: ვითარცა ეკადრებოდა მეფე  
ალექსანდრეს და ვითარცა ეკადრებოდა მეფე პოროსს. დიდსულოვ-  
ნების თამაში ალექსანდრეს საპოლიტიკო თამაშს გულისხმობდა, მით  
უფრო აქ, შორეულ ინდოეთში. მან პოროსი შეუზღუდველად და-  
ტოვა მეფედ თავისსავე სამეფო ტახტზე, რამაც ტაქსილეს უეჭველი  
უკმაყოფილება გამოიწვია, მაგრამ ალექსანდრე მაკედონელის ბატო-  
ნობაც ამ შორეულ ქვეყანაში, ევროპიდან შემოტანილი მახვილის  
გარდა, სწორედ ადგილობრივი დინასტიების ქიშპსა და მტრობაზე  
უნდა ყოფილიყო დაფუძნებული...

ალექსანდრემ, მას შემდეგ, რაც ბრძოლაში დაღუპულები მიწას  
მიაბარა, ინდოეთში მოპოვებულ გამარჯვებათა აღსანიშნავად ჰელი-  
ოსის სადიდებელი მსხვერპლწირვა და ასპარეზობანი გამართა; აღ-

ლუმზე შეყრილ ჯარებს სახობტო სიტყვით მიმართა და გამოაცხადა, ამ უკანასკნელ ბრძოლაში ინდოელთა განადგურებისა და დიადი ძლევამოსილების მოპოვების შემდგომ, ჩვენ განვაგრძობთ წინსვლას არა იმდენად ომით, რამდენადაც უზარმაზარი ქონების დაგროვებით, და ჩვენ ამიერიდან მოვიპოვებთ იმდენს, რომელთან შედარებით სპარსეთში მოპოვებული ქონება არააობად მოგეჩვენებათ; დღეიდან თქვენ იშოვით იმდენ ძვირფას ქვას და თვალ-მარგალიტს, იმდენ ოქროს და სპილოს ძვალს, რაიც გაავსებს არა მარტო თქვენს სახლებს, არამედ სრულად მაკედონიას და საბერძნეთსო<sup>13</sup>.

მაშ, ალექსანდრე ისევ მიილტვოდა წინ, ისევ აღმოსავლეთისაკენ, ისევ „მზის აღმოსავლამდე“, ისევ „ქვეყნის დასასრულამდე“ (თუ „დასაწყისამდე“) და „საპროგრამო სიტყვაც“ სწორედ ასეთი უნდა ეთქვა მეფესა და მთავარსარდალს ჯარისთვის, რომელსაც ამ უთავჯამო ჯოჯოხეთის გზებზე მამონა-ქონების უძირო სიხარბის გარდა არავითარი სხვა რამ ძალა წინ ნაბიჯსაც ვერ წაადგმევინებდა.

ალექსანდრემ აქ, მდინარე პიდასპეზე კიდევ ორი ახალი ბერძნულ-აღმოსავლური ქალაქი დააარსა; ერთი — იმ კუნძულის გასწვრივ, სადაც მან და მისმა ჯარმა მდინარე გადალახა, და უწოდა ამ ქალაქს — ბუკეფალია, მისი საომარი ცხენის, ბუკეფალას სახელზე (წინა დღეებში მოკვდენია ბუკეფალა მეფეს, უკვე ბებერი — 30 წლისა — და უთავჯამო ლაშქრობებით ჯანგატეხილი; ალექსანდრეს მწუხარედ უთქვამს — ბუკეფალა ჩემთვის ცხენი კი არა, ახლობელი ადამიანი იყო).<sup>14</sup> მეორე ქალაქი კი ალექსანდრემ დააფუძნა იმ ადგილზე, სადაც მან პოროსთან ბრძოლაში აიღო ის დიდი გამარჯვება და სახელადაც „გამარჯვება“ — „ნიკეია“ დააქვა.

იმავე დღეებში ალექსანდრეს კიდევ რამდენიმე გადაუღებელი პოლიტიკური ღონისძიება უნდა გაეტარებინა. უწინარეს ყოვლისა, მას ერთხელ და სამუდამოდ უნდა გაეუკვია პოზიცია და სამომავლო ურთიერთობა ქაშმირის შეფე აბისართან, რომელიც სიტყვით ალექსანდრეს ეფიცებოდა ერთგულებას, საქმით კი მის მტრებს ეხმარებოდა. სწორედ მაშინ აორნის გარნიზონის უფროსმა, სისიკოტემ შემოუთვალა ალექსანდრეს, ასაკენები ისევ აჯანყდნენ და შენგან დაყენებული მეფეც მოკლესო; ისე ეტყობოდა, ასაკენების აჯანყებაში წილი აბისარ ქაშმირელს ედო. ალექსანდრემ ფიცხლავ ბრძანება გაუგზავნა პაროპამისის სატრაპს ტირიასპეს, და ინდოეთის სატრაპს, ფილიპეს, სასწრაფოდ ჯარები დაეძრათ ასაკენტა აჯან-

ყების ჩასახშობად. კიდევ იმ დღეებში ალექსანდრესთან მოვიდა ელჩობა მდინარე აკესინეს აღმოსავლეთ სახელმწიფოს, განდარტიდოს რაჯასაგან, პოროსისაგან, ანუ როგორც მას ბერძნები უწოდებდნენ — „მშიშარა პოროსისგან“. ეს „მშიშარა პოროსი“ დიდი პოროსის ნათესავი, მეზობელი და კლიენტი იყო, მაგრამ საერთო მტრის წინააღმდეგ საღვთო ომში ხელიც არ გაუწივია. მას ეგონა, ეს „დამსახურება“ დაუფასდებოდა ალექსანდრესგან. მაგრამ რაოდენ განცვიფრებულნი დარჩნენ „მშიშარა პოროსის“ ელჩები, როცა მათ დიდი პოროსი, რომელიც ბორკილდადებული და საკნად ჩაგდებული ეგულებოდათ, თვითონ ალექსანდრეს გვერდით იხილეს დაბრძანებული, პატივდებული და მოალერსებული: ისინი ცივად მიიღო მაკედონელმა, სანუგეშო დაპირებაც არაფერი გაუტანებია მათ „ლაჩარ პოროსთან“ გადასაცემად. კეთილად მიიღო ალექსანდრემ „ხუთმიდინარეთის“ სხვა ტომთა წარმომადგენელნი, რომლებიც მას ეახლნენ მდიდარი საბოძვართ და სრული მორჩილების გამოცხადებით.

აბისარისგან კი ისევ ბაიბურიც არ ისმოდა. ალექსანდრეს ისევ იარაღისათვის უნდა მიემართა. ოცდაათდღიანი შესვენების შემდეგ, მან პიდასპეზე, არმიის დიდი ნაწილით, დატოვა კრატეროსი, რომელსაც დაევალა დაესრულებინა ბუკეფალიისა და ნიკეიის მშენებლობა, თვითონ კი დანარჩენი ჯარით დაიძრა ჩრდილო-აღმოსავლეთისკენ, სადაც მას უნდა დაემორჩილებინა გლავკანიკების (გლავსები) ტომი და იქიდანვე გზა გაეკაფა ქაშმირისაკენ. ახლა კი იკადრა პასუხის გაცემა აბისარ ქაშმირელმა. ფიცხლავ ელჩობა გამოგზავნა თავისი ძმის მეთაურობით, — ბოდიშს იხდიდა იგი ალექსანდრეს წინაშე, პატიებას ითხოვდა და თავის ქვეყანასაც და თავის თავსაც მის „მწყალობელ ხელს“ უქვემდებარებდა; თანაც, ნიშნად ერთგულებისა, ძღვნად 40 სპილოს უგზავნიდა ქაშმირის რაჯა „ევრაზიის ხელმწიფეს“. ალექსანდრეს კი გამოცდილება კარნახობდა, აბისარის ფიცს არ ნდობოდა და მოითხოვა პირადად გამოცხადებულიყო იგი მაკედონელთა ბანაკში, თორემ, თუ მოსვლას დააგვიანებდა თვითონ ალექსანდრე გაჩნდებოდა ჯარით ქაშმირში!.. ეს მუქარა გაუბრუნა ალექსანდრემ აბისარს და თვითონ გზა განაგრძო გლავკანიკების ქვეყნისკენ. მაკედონელები შევიდნენ მთაგორიან და ტყიან ქვეყანაში, მკვიდროდ დასახლებულ ქალაქებსა და სოფლებში, 37 მარტო ქალაქი მოითვალეს, თითოეული არანაკლებ 5000 მცხოვრებით, ბევრიც 10000-ზე მეტი მცხოვრებით. ყველა ეს ქალაქი და მათთან მრავალი

სოფელი, სრულიად ქვეყანა გლავკანიკებისა, ალექსანდრემ დაიპყრო და „დამეგობრებულ“ პოროსს შეუერთა სამმართველოდ. აქვე, ხშირ-სა და მდიდარჭიშოვან ტყეებში ალექსანდრემ დიდძალი ხეები დააპ-რევირა და ჰიდასპუზე დააცურებინა ბუქეფალა-ნიკეისაკენ, სადაც კრატეროსის მეთვალყურეობით ფლოტი უნდა აეგოთ — ფლოტი, რომლითაც ალექსანდრე და მისი ჯარი მდინარე ინდით ოკეანისკენ უნდა დასურებულყო.

აღმოსავლეთისკენ, მდინარე აკესინესკენ წარემართა ჯარით ალექსანდრე. გზაზე მას შეატყობინეს — განდარიტიდის რაჯას, „მშიშარა პოროსს“, რამდენიც მოუსწრია, ჯარიც შემოუყრია, სა-ქურტკლეებიც მოუძარცვია და მდინარე განგისკენ გაქცეულა. ალექ-სანდრემ დიდი პოროსი თავის სამეფოში დატოვა და დაუბარა, შეეკ-რიბა ახალი ჯარები, სპილოები და გაჰყოლოდა მაკედონელებს კვალ-დაკვალ. თვითონ ალექსანდრე აკესინეს მიადგა, ადგილი აარჩია და გადალახვას შეუდგა. მდინარეზე დიდრობა იდგა. გადალახვისას ბევრი მეომარი დაეღუპა, განსაკუთრებით ნაევებში მჭდომნი, ნავტი-კებმა კი უფრო გაუმართლეს. ალექსანდრემ გადასვლისას, მარცხენა ნაპირზე კენოსი დატოვა ჯარების სრული გადმოლახვის სამეთვალყუ-როდ, თვითონ კი შეუჩერებლად განაგრძო სვლა განდარიტიდის მი-წაზე. განდარიტიდაც ორ მდინარეს შორის — აკესინესა (ახლ. ჩინაბი) და ჰიდრაოტეს (ახლ. რავი) შორის მოქცეული ქვეყანა იყო. ალექ-სანდრე ჰიდრაოტესკენ მიეშურებოდა, — იქნებ გაქცეულ „მშიშარა პოროსსაც“ წამოსწეოდა. ჰიდრაოტეს რომ მიადგა, იქ ჰეფესტიონს დემეტრიოსი შეუერთა და სამხრეთით გაგზავნა, რათა ჰიდრაოტესა და აკესინეს შორის მოქცეული სამხრეთი მიწები მთლიანად დაეპყრო და დაემორჩილებინა.

თვითონ ალექსანდრემ კი ჰიდრაოტეც გადალახა და გადავიდა ფენჯაბის უკიდურეს აღმოსავლეთ ქვეყანაში, სადაც ცხოვრობდნენ ეგრეთ წოდებული „თავისუფალი ანუ უმეფო ინდოელები“. ამ ტომ-თაგან ზოგიერთებმა ალექსანდრეს ბატონობა მაშინვე, უომრად სცნეს. მაგრამ სხვებმა, განსაკუთრებით კათეების, ანუ კათარების მეომრულმა ტომმა, გადაწყვიტა უსისხლოდ არ დაეთმოთ თავისი მი-წა-წყალი. ალექსანდრე მიუახლოვდა კათეების მთავარ ქალაქს — სანგალას, რომელსაც მძლავრი, ირგვლივი კედლები ერტყა; ერთი მხრიდან კიდევ ტბა იცავდა, მეორე მხრიდან — მაღალი მთა. კათე-ელები და მათი მეზობელი მოკავშირეები მთაზე გამაგრებულიყვნენ.



ალექსანდრემ ჯერ მშვილდოსან-მოისარნი მიუშვა მტრის სიმაგრეზე, ირგვლივი უწყვეტი სროლით, იქიდან გარეთ გამოხდომანზე რომ არ ეფიქრათ. ამასობაში კი თვითონ დანარჩენი ჯარები დაალაჯა საიერიშოდ. მარცხენა ფლანგს პერდიკა უჩინა სარდლად, მარჯვენას ისევ თვითონ წარუძღვა და იერიშზე დაიძრა. მაკედონელებმა დიდის გაჭირვებით დასძლიეს კათეელთა გააფთრებული, თავზე ხელაღებული წინააღმდეგობა და მთის სიმაგრე, როგორც იქნა, აიღეს. კათეელებმა ქალაქის კედლებს შეაფარეს თავი. მაკედონელებმა ალყაში მოაქციეს სანგალა. შუალამისას კათეებმა ქალაქიდან იღუმალი გაქცევა სცადეს, ტბის გადალახვით, — მაგრამ ესეც წინასწარ გაუთვალისწინებია ალექსანდრეს. ტბასთან კათეებს ჩასაფრებული მაკედონელები დაუხვდნენ და, ვინც უკანვე ქალაქში ვერ შეასწრო, ყველა ამოწყვიტეს. ბრძოლა რამდენიმე დღეს კიდევ გაგრძელდა. პოროსმაც მოუსწრო 5000 ინდოელი მეომრით და სპილოებით. უკანასკნელი იერიშები მიიტანეს მაკედონელებმა სანგალაზე. ლოდსატყორცნებით და ტარანებით რამდენიმე ადგილას კედლები გაარღვიეს და ქალაქში შეეკვიდნენ. ალექსანდრეს ბრძანება იყო, იარაღიანი ცოცხლად არავინ გაეშვათ. წაქეზებაც აღარ სჭირდებოდათ, ისეთი ხოცვა-ჟლეტა გაახურეს მაკედონელებმა. 17000 კათეელი გაწყდა, 70000 ტყვე მონად აიყვანეს, მაკედონელთაგან 100 მოისრა, 12000 დაიჭრა, ამათ შორის — ალექსანდრეს მამაცი სარდალი და მკველი ლისიმახოსი და კიდევ რამდენიმე მაღალი მეთაური<sup>15</sup>.

სანგალას დაცემისთანავე ალექსანდრემ 300 მხედრით ევმენე აფრინა კათეების მოკავშირე ქალაქებთან, მოთხოვნით და განმარტებით — ალექსანდრე მაკედონელი თქვენთან მოდის მხოლოდ სამეგობროდ და ამიტომ მასთან შეხვედრის და „მეგობრობის“ ერთადერთი პირობაა უსისხლოდ იარაღის დაყრა. მაგრამ უკვე აღარავის სჯეროდა მაკედონელი მეფის მეგობრობისა. მას უკვე დიდძალი ინდური სისხლი დაედო კისრად. ახლად გაქეულებსაც ამბავი ჩამოერიგებინათ მაკედონელთა ხელით სანგალაში გაჩაღებული საშინელი სისასტიკისა და სისხლისქეცვისა. ამიტომ კათეელთა მოკავშირე ტომები თავიანთი სოფელ-ქალაქებიდან დედაბუდიანად აიყარნენ და ჩრდილოეთით გადაიხვეწნენ. გამოედევნა ალექსანდრე გაქეულებს, მაგრამ ლტოლვილნი უკვე შორს იყვნენ; მხოლოდ ჩამორჩენილებს, ხუთასამდე ადამიანს, წამოეწივნენ მაკედონელნი და ასწყ-

ვიტეს უწყალოდ. დაცარიელებული ქალაქები ალექსანდრემ საპატრონოდ გადასცა პოროსს.

მობრუნდა ალექსანდრე და საძიკველიანად მოთხარა სანგალა (სისასტიკე როდი აკლდა „ინდოელთა მეგობარს“!).

ბოლოს, ალექსანდრე მაკედონელი, მდინარე ჰიფასისის (ახლ. სატლუჯ) ზემო წელზე, შევიდა რაჯა სოფიტეს სახელმწიფოში. მთავარ ქალაქს რომ მიადგნენ მაკედონელი, არავინ წინ არ შემოხვედრიათ, არც სამტროდ არც სამოყვროდ, არც ქალაქის კარებს იცავდა ვინმე, არც კედელზე და კოშკზე ჩანდა გუშავი. ასე, რომ სატახტო ქალაქი, სადაც მაკედონელებს თვითონ რაჯა ეგულებოდათ, სულაც დაცარიელებული ეგონათ. მაგრამ მალე გაიღო მთავარი კარიბჭე და ბრწყინვალე ამალით გამოვიდა რაჯა სოფიტე, აქეთ-იქით ორი უფლისწული მოჰყვებოდა. გასაოცრად ძვირფასი მორთულობით მობიჯებდა რაჯა. ტანსაცმელი მთლიანად ოქროთი და ძოწით ნაქარგი ემოსა, ფერხთსაცმელი — ბაჯალო ოქროსი და კეთილშობილი ქვებით მოოქვილი, ხელები, ყურები და წინამხარნი — თვალ-მარგალიტით დატვირთულნი; ხელში ოქროს კვერთხი ეჭირა, ბერილის თვლებით შემკობილი.

მეიახლა ალექსანდრეს სოფიტე, ეთაყვანა, კვერთხი გადასცა და თავისი შვილები და სრულად სამეფო მასვე მიართვა და შეაერთა<sup>16</sup>.

სოფიტეს სახელმწიფოს მეზობლად, აღმოსავლეთით, კიდევ ერთი რაჯა, სახელად — ფეგოსი, დაემორჩილა თავისი სამფლობელოებით ალექსანდრე მაკედონელს...

იდგა აგვისტო 326 წლისა.

იდგა ალექსანდრე მაკედონელი მდინარე ჰიფასისის პირას.

ჰიფასისის იქით კი გრძელდებოდა დიდი ინდოეთი და საერთოდ გრძელდებოდა ქვეყანა, რომელიც ალექსანდრეს „აუცილებლად ბოლომდე“ უნდა დაეპყრო. ცნობებიც ჰქონდა ფეგოსისგან და პოროსისგან დამოწმებულნი, რომ ჰიფასისს გადაღმა ჯერ თერთმეტი დღის სავალზე უდაბნო იყო გადაჭიმული, ხოლო უდაბნოს შემდეგ დიდი საღვთო მდინარის, განგის ხეობა იწყებოდა, უთვალავი სიმდიდრით. მრავალრიცხოვანი ინდური ტომებით დასახლებული ქვეყანა. ყველაფერი და ყოველი უნდა დაეპყრო მაკედონელს, უნდა აჩქარებულიყო და დაეპყრო...

მაგრამ თურმე საისტორიო ბედისწერას ეს ადგილი — ჰიფასისი —

დაედგინა დედამიწის იმ უკიდურეს წერტილად, რომლის იქით უდიდესი მსოფლიო დამპყრობლის ხარბი ნაბიჯი ვეღარ გადაიდგებოდა.

აქ „ყოველმოსიერსა“ და „ყოვლისმძლეველ“ კაცთაგანს თურმე ისეთი დაბრკოლება ელოდა, რომლის დაძლევა „ამონ-ზევისის ძესაც“ აღარ შესძლებია.

და ამ „უძლეველი დაბრკოლების“ სახელი იყო — ჭარის უარი შემდგომ წინსვლაზე — მისთვის უკვე უაზრო და გაუგებარ წინსვლაზე.

მოთმინების ფილაა გადმოქცეულიყო, ძაფი გაწყვეტილიყო. ჭარისკაცები ხან აქ, ხან იქ, ჭგუფ-ჭგუფად იყრებოდნენ, ბევრი ტირილდა, სამშობლოში დაბრუნების იმედმომწილნი, სხვები იმუქრებოდნენ, ქუფრი სახეებით ყარყაშებდნენ, ღრტვინავდნენ და ერთმანეთს აფიცებდნენ მტკიცედ ყოფილიყვნენ და, სიცოცხლედაც რომ დასჯდომოდათ საომრად აღარ გასულიყვნენ და, ბოლოს და ბოლოს, სამშობლოში დაბრუნება მეფისთვის გადაჭრით მოეთხოვათ.

როგორც კი ალექსანდრეს ბანაკის სულიერი მღელვარების ავი სუნთქვა მისწვდა, მაშინვე ჭარები ჰიფასისის მდიდარ სანაპიროთა საძარცვავად გაუშვა, ჭარისკაცების დაბრუნებამდე კიდევ მათ ცოლებსა და შვილებს უხვი საბოძვარი მიუბოძა, მაგრამ ამით ვერაფერიც ვერ მოიგო — ჭარებმა მოსაძარცვავე მოძარცვეს, საბოძვარიც შიიბოძეს, მაგრამ მდინარის გადალახვაზე და ომის გაგრძელებაზე ისევ გადაჭრით იძახდნენ უარს.

ალექსანდრემ ჭარები შეჰყარა და სიტყვით მიმართა: ჭარისკაცებო, თქვენ კარგად იცით ჩემი განზრახვა — განზრახვა შემდგომი საომარი წინსვლისა და, ვინათგან, როგორც ეტყობა, ბევრს არ სურს ამ განზრახვის გაზიარება, მოგიწოდებთ — ან მე უნდა დაგარწმუნოთ შემდგომ ლაშქრობათა სარგებლიანობაში, ან თქვენ უნდა დამარწმუნოთ მის უაზრობაში და უკან დაბრუნების აუცილებლობაში. აქამდე წარმოებული ომებით ჩვენ, მაკედონელებმა და ბერძნებმა, მოვიპოვეთ მცირე აზია, სირია, ფინიკია, პალესტინა, ეგვიპტე, ლიბია, მესოპოტამია, სპარსეთი, მიდია, ცენტრალური აზია, ინდოეთი; დღეს ჩვენს სამფლობელოებზე მოედინებიან — ნილოსი, ევფრატი, ტიგროსი, ოქსი, იაქსართი, ინდი, ჰიდასპე, აკესინე, ჰიდრაოტე და, აჰა, ჰიფასისზე ვდგავართ ახლა, — და ვის შეუძლია ამტკიცოს, რომ აქამდე წარმოებულ ომებს ჩვენთვის, ყველასთვის არავითარი აზრი და სარგებელი არა ჰქონია?! ვაჟკაცი კაცისთვის ცხოვრებისეული ბრძოლის მიზნად თვითონ ბრძოლის გარდა მე არაფერი გამიგონია.

თუ ვინმეს სურს, ჩემი ლაშქრობების ბოლო წერტილი იცოდეს, მე ვასახელებ მდინარე ინდსა და აღმოსავლეთის ზღვას; ერთი ახლოა და მეორეც, ხოლო აღმოსავლეთის ზღვიდან მე წაგიყვანთ უკან, საზღვაო გზებით, სპარსეთისაკენ, ლიბიისკენ (აფრიკა) და მიგიყვანთ პერაკლეს სვეტებამდე (ჰიბრალტარი). აკი პერაკლეს სვეტები და აღმოსავლეთის გზა დაუდგენია უზენაეს ღმერთს დედამიწის საზღვრებად! ახლა ჰიფასისზე ვდგავართ-მეთქი და მის გადაღმა კიდევ დარჩნენ ხალხები, რომლებიც ჩვენი მბრძანებლობის ქვეშ უნდა მოექცნენ, და ნუთუ თქვენ ახლა ამბობთ უარს ამ ბოლო ლაშქრობებზე? ნუთუ თქვენ რაიმე საფრთხე გაშინებთ? ნუთუ თქვენ დაივიწყეთ თქვენი დიდებანი და მისწრაფებანი? ჩვენ ხომ სულ მალე დავასრულებთ მსოფლიო დაპყრობას და დავაბრუნებ მაკედონიაში ყველას აღვსილს უთვალავი ქონებით, დიდებით და მოგონებებით<sup>17</sup>.

ალექსანდრეს ამ სიტყვას კარგახნის მღუმარება შეხვდა პასუხად. ვერავინ ბედავდა ეგზომ გადამწყვეტ წუთებში თავისი აზრის გამოთქმა ეკისრებინა — ან მეფის საწინააღმდეგოდ, ან მის მხარდასაქერად. ალექსანდრე კი მოითხოვდა ეთქვათ სიტყვა, სინდისისმცერი, გაბედულად და მისგან მოურიდებლად.

ბოლოს, წინ წამოვიდა კენოსი და თქვა: რამდენადაც მეფეს სურს ჯარი მას მიჰყევოდეს არა მხოლოდ ბრძანების ძალით, არამედ რწმენით და მისწრაფებით, ამიტომ მე ვილაპარაკებ სწორედ ჯარის სახელით და არა ჩვენი სარდლების სახელით, ვინათგან ჩვენ — სარდლები ისედაც ავსებულნი ვართ პატივით, ჯილდოებით, თანამდებობით, ქონებით, სახელდიდებით. თანაც, ჯარისკაცებზე ლაპარაკისას მე იმის თქმას კი არ ვაპირებ, რა მოუხდებათ და ესიამოვნებათ თვითონ მათ, არამედ — ჩვენი რჩევით რას ვარგებთ მეფეს ამჟამად და სამომავლოდ. თანაც, ჩემი ასაკი, ომებში მიღებული ჭრილობები, მეფისა და თანამებრძოლების პატივისცემა, მე უფლებას მაძლევს ყველაფერი ვთქვა პირდაპირ, გულახდილად, რასაც მე უკეთესად და სარგებლიანად ვთვლი ასეთ ჟამს. და ვამბობ — რაც უფრო დიადი საქმენი განასრულეს მეფე ალექსანდრემ და მისმა ჯარებმა, მით უფრო აუცილებელია საზღვარი დაედოს სალაშქრო შრომას, ჰირს, საფრთხეებსა და დაბრკოლებებს; შენ თვითონ ხედავ, მეფეო, რამდენი მაკედონელი და ბერძენი წამოვიდა სამშობლოდან შენთან ერთად და რამდენიღა შემორჩა კიდევ ცოცხალი, რამდენი ბრძოლაში დაიღუპა, რამდენი ავადმყოფობამ და უძლურებამ ამო-

ხოცა, ხოლო ვინც გადარჩა და ჯერ კიდევ პირში სული უდგას, გაფანტული არიან მთელი აზიის ქალაქებში და ოცნებობენ, ბოლოს და ბოლოს დაბრუნდნენ სამშობლოში, დედასთან და მამასთან, ცოლთან და შვილებთან; იქ, მშობლიურ კერაზე სურთ მაგ უბედურებს გაატარონ სიცოცხლის უკანასკნელი დღეები, მოუთხრონ თავისიანებს შენი მეთაურობით გარდაცდენილი გმირობანი, მოიხმარონ და შეიტკბონ შენის წყალობით მოპოვებული სიმდიდრენი. ნუ წაიყვან მეფეო, ჯარებს მათი სურვილის წინააღმდეგ; თუ მათ ბრძოლა აღარ სურთ, ისინი ახალ ბრძოლაშიც უკვე ისეთნი აღარ გეყოლებიან, როგორც გყავდნენ ადრე, აქამდე. არ შეიძლება ასეთი ჯარით ახალ ომებში წასვლა. დააბრუნე და შენც დაბრუნდი სამშობლოში, მეფეო, დაბრუნდი და ინახულე შენი დედა, განიკითხე და განაგე საქმენი ელინთა, შეიყვანე შენს მამაპაპეულ სასახლეში შენი უთვალავი და უდიადესი გამარჯვებანი, და ამის შემდგომ, თუ მოისურვებ, ისევ აღიკაზმე ახალ ლაშქრობად, საითაც გსურს და ვისზედაც გსურს — აღმოსავლეთ ინდოელებზე თუ ევქსინის პონტოზე. კართაგენის წინააღმდეგ თუ კართაგენის გადაღმა ლიბიაზე. შენი საქმე იქნება მხოლოდ ხალხის გაძლოლა და შენ გამოგყვებიან სხვა მაკედონელნი და სხვა ბერძენნი — ახალგაზრდები მოხუცთა მაგივრად, ძალ-ღონით სავსენი ძალდაშრეტილთა ნაცვლად. სიხარულით გამოგყვებიან და ღმერთები ისევ გარგუნებენ ახალ-ახალ დიად გამარჯვებებს. ღმერთები სწორედ ბედნიერებაში ზომიერებას აფასებენ ყველაზე მეტად. შენ, ასეთ ბელადს, თანაც ასეთი ჯარის პატრონს, განა მტრისა შეგეშინდება, მაგრამ ღმერთებისგან კი, რაღაც მოულოდნელ საბედისწეროს უეჭველად უნდა ელოდე <sup>18</sup>.

კენოსის სიტყვამ ააღელვა და აატირა ჯარი, — შეძახილით თუ მღუმარე გამომეტყველებით. ყველა მისადმი მხარდაჰქრას ამჟღავნებდა. ყველას ომის შეწყვეტა და სამშობლოში დაბრუნება უნდოდა.

გაჯავრებულმა ალექსანდრემ საკრებულო დაშალა, კარავში შეიკეტა და მეორე დღის დადგომამდე აღარავინ მიიყარა. მეორე დღეს კი ისევ შემოიყარა ჯარები, ჰეტერ-მეგობარნი, თანაშემწენი და თანასარდალნი და რისხვით აღსავსემ ასეთი მოკლე სიტყვით მიმართა მათ: მე მაინც გაეწევე წინ და არც ერთ მაკედონელს არ ვაიძულებ მისი სურვილის წინააღმდეგ გამომყვეს ლაშქრად; მე ისედაც დამრჩა საკმარისად მამაცი მეომარნი, რომელთაც ახალ-ახალი სახელ-დი-

დებათა მოხვეჭა კვლავაც არ მოყირქებიან. ხოლო, სხვები, ვისაც სახლში დაბრუნება აუჩემებია — დაე, დაბრუნდნენ და იქ, სამშობლოში მოუთხრონ ყველას, როგორ მიატოვეს მათი მეფე მტრების გარემოცვაში — ეს თქვა, ისევ კარავში შევარდა და კიდევ სამი დღე და სამი ღამე აღარავის უნახავს იგი.

იქდა კარავში ცოფით ატანილი და ელოდა — იქნებ გაეწიათ ანგარიში ჭარისკაცებს მისი ჭავრისთვის, იქნებ „უგუნურ ს-ჩიუტზე“ ხელი აეღოთ და, ერთიც არის, მისი კარვისკენ დაძრულიყვენ ძახილით: „მოვდივართ და თუნდაც ჰადესში წაგვიყვანე, ჩვენო მეფეო ღვთაებრივო, ძეო ამონისა“... და სხვა მისთანანი; მაგრამ არ ჩანდა ასეთი სანატრელი ძახილი. ჩანდა და ისმოდა მხოლოდ დრტვივნა, მუქარა, ქვითინი, მუდარა — ომის შეწყვეტისა და სამშობლოში დაბრუნებისა.

მიხვედრა არ უნდოდა, მაგრამ ბოლოს და ბოლოს უნდა მიმხვედარიყო ალექსანდრე, რომ მისი ჭარი აღარ იყო ის ახალგაზრდული ძალ-ღონით, შემმართველობითა და გმირული სულით შეკრული და ჩაყირული საომარი სხეული, რომელიც მან რვა წლის წინათ გადმოიყვანა აზიის მიწაზე. სწორედ ამ რვაწლოვან უმძიმეს საომარ სვლას, სისხლის თხევას, შიმშილს, წყურვილს, სიცხეს, სიცივეს, თითქოს, სავსებით დაებერებია და დაედნო მსოფლიოს დამპყრობელთა „უბერებელი“ სული და სხეული. მშობლიური აღარაფერი შემორჩენოდათ. მასზე ცრემლის დათხევით მაინც რომ მოეოხებინათ სამშობლოზე სევდით აღუღებული გული. ჯავშანი დაელეწათ, ფარ-ხმალი დაეფშენათ, ცხენთა ფლოქვები დაუცვდათ, დამდნარ-დაფლეთილი ბერძნულის ნაცვლად ტანზე ბერძნულად დამოკლებული და დახალვათებული ინდური სამოსის ჩაცმა ეკადრებინათ<sup>19</sup>. ინდოეთის გასაოცარმა, მრისხანებით აღსავსე ბუნებამ მაინც სულ ააფორიაქა, დააფრთხო და შიშით დააქინა ევროპელის ნებიერი სული. ზეცაში აყრილი მთები, მთებისგან შევიწროებული ზეცა, ტროპიკული წვიმები, განუცადებელი ქექა-ქუხილი და მეხთატეხანი, ზღვადმოსხლეტილი მდინარეები და მდინარეებად მომსკდარი ხევები, გაუვალი ჭუნგლები და აღამიანზე მონადირე ნადირნი, შხამიანი ქვეწარმავალნი და ზეწარმავალნი, მახრჩობელა პითონები და ჩხრიალა გველები. უკანასკნელად მაინც სულ შეიჩყა და შეიშალა სკნელი ყოველი. 70 დღე-ღამე პირდაპირ აპოკალიპსური წარღვნა იდგა ინდოეთში — წვიმდა კოკისპირულად, გადაუქარებლად, შეუწელებლად. სამოცდაათი დღე-

ლამე ცა დედამიწას განუცადებლად სცემდა მეხსა და ელვას. შიშმა შეჭამა სული მსოფლიოს დამპყრობელი ჯარისკაცისა. ახლა მას აღარაფერზე აღარ შეეძლო ფიქრი, გარდა ამ ჯოჯოხეთიდან გაღწევისა და განაწამები სხეულის სამშობლოში ჩათრევისა.

და გატყდა „მარად გაუტეხელი“ ალექსანდრე მაკედონელი.

თავი დამარცხებულად სცნო „მარად დაუმარცხებელმა“.

ჯარები შეჰყარა და უკან დაბრუნება გამოაცხადა.

წარმოუდგენელი, ენით აუწერელი სიხარული და აღტაცება გამოიწვია ამ „ღვთაებრივმა გამოცხადებამ“. აღრიალდა, აბლაუღდა, ატირდა ჯარი. შემოესივნენ ალექსანდრეს და მის კარავს ბლავილით, ცრემლთა თხევით, მუხლებზე ფორთხვით უძღვნიდნენ მადლს „მარად უძლეველს“, რომელმაც თავი მხოლოდ მის ჯარისკაცებს დააძლევინა!<sup>20</sup>

მეფის ბრძანებით, ჯარისკაცებმა ჰიფასისის ნაპირას აღმართეს 12 წყრთის სიმაღლის 12 საკურთხეველი და მათ გარშემო გამართეს საზეიმო მსხვერპლწირვანი და ასპარეზობანი. ამ საკურთხეველ-გოდოლთა გარდა, ალექსანდრემ სამომავლო სახსოვრად ჯარისკაცებს ააშენებინა სამხედრო ბანაკი, მაღალი კედლებით და ღრმა თხრილებით გარშემორტყმული — სამჯერ მეტი მოცულობისა, ვიდრე მაშინდელი მათი სადგომი. ყოველ ჯარისკაცს, კიდევ, ახალი დიდი საცხოვრებელი კარავი ააშენებინა, შიგნით ორი ხუთწყრთიანი საწოლით, შესაბამისად ყოველი სხვა საცხოვრებელი ნივთისა და საგნის ტანსრულობით, მომავალში აქ მოსულთა და მხილველთა განსაცვიფრებლად — მართლაც, რა ბუმბერაზი და ზეადამიანური ძალის მქონე გმირები მოუყვანია აქ ალექსანდრე მაკედონელსო!<sup>21</sup>

ამის შემდეგ ალექსანდრემ უკანასკნელად მიაპყრო მხედრული აღტყინებით თვალი აღმოსავლეთს, მისმა მხედრებმაც უკანასკნელად დაარწყულეს ცხენები ჰიფასისის წყლით და გამობრუნდნენ დასავლეთისკენ. ისევ, უკანვე გადალახეს ჰიდრაოტე, გადაიარეს განდარიტიდა და მიადგნენ აკესინეს. აქ ახალი ქალაქი, ალექსანდრია დაესრულებინა ჰეფესტიონს. ალექსანდრე მცირე ხანს შეჩერდა, რათა თვალყური ედევნებია სამხრეთით დაცურების სამზადისისა და ქალაქის უფრო განსრულებისათვის. აქვე სათაყვანოდ ეახლნენ ელჩები აბისარ ქაშმირელისგან. ელჩობას ისევ მეფის ძმა მოუძღვა, მდიდარი ძღვენით, მასთან 30 სპილოთი. ალექსანდრეს წინარე ნაბრძანები მაინც ვერ შეასრულა და პირადად ვერ ეახლა მას აბისარი,

ამჯერად ავადმყოფობის გამო. ქაშმირს გაგზავნილმა მაკედონელმა ელჩებმაც დაადასტურეს აბისარის ავადმყოფობა და ალექსანდრემაც სცნო მისი მფლობელობა მისსავე ქვეყანაში, ბუნებრივია, ქვეშევრდომად და გარკვეული ხარკის გადახდით.

ამის შემდეგ ალექსანდრემ ისევ დიდი მსხვერპლწირვით და ასპარეზობით აკურთხა ახალი ალექსანდრია, ჯარები აკესინეზე გადაიყვანა და შუა სექტემბერს მივიდა ჰიდასპეზე, მისგანვე დაარსებულ ქალაქებში — ბუკეფალიასა და ნიკეაში.

აქ ალექსანდრეს ადრევე ჰქონდა დატოვებული ბრძანება ფლოტის მშენებლობისა. ახლა თვითონ ჩაუდგა სათავეში გაცხოველებულ გემთმშენებლობას; ჰითასისიდან აქამდე, ჰიდასპემდე მაკედონელები ძველი, ნაცნობი გზებით მობრუნდნენ და ამდენად დაბრუნება დაბრუნებას ჰგავდა, მაგრამ აქედან, ბუკეფალია-ნიკეადან ალექსანდრე გეზს იცვლიდა სამხრეთისაკენ, საითაც მას უნდა დაეპყრო ისევ ახალი ქვეყნები და ხალხები, დიდი ინდური ქვეყანა — სინდეთი, ანუ მთელი ინდის ხეობა, ფენჯაბიდან „დიდ ოკეანემდე“ (ინდოეთის ოკეანემდე). დამპყრობელი თავისას არ იშლიდა. ჯარისკაცებმა იგი თავისი „ჭირვეულობით“ განგის აუზზე არ მიუშვეს, მაგრამ დამპყრობელურ ვნებათა დასარწყულებლად არანაკლებ მომგებნიანი იყო ინდის ხეობა, რომლის დასაპყრობადაც ამზადებდა ახლა ჯარისკაცებს მთავარსარდალი.

ალექსანდრემ თავის ახლო ჰეტერ-მეგობართაგან აარჩია 33 ყველაზე დიდი სარდალი და დანიშნა ისინი ტრიერარქოსებად — გემთუფროსებად, გნებავთ — „ადმირალებად“. ამათ ევალეობდათ აეგოთ და აღექურვათ გემები თავისი ხარჯით. 33 ტრიერარქოსიდან 24 მაკედონელი იყო, 6 ბერძენი, 2 კიპროსელი უფლისწული და ერთიც სპარსელი. და გამოაცხადა მათ შორის შეჯიბრი ალექსანდრემ — ვინ უკეთეს ხომალდებს ააგებდა — უფრო მტკიცეს, ლამაზსა და საომარი გაწყობილობით უმჯობესსა და უკლებელს.

ერთ თვეში ფლოტი მზად იყო. ალბათ, ტრიერარქოსების ხარჯით და თავგამოდებით უნდა აშენებულყო 80 საუკეთესო სამხედრო, სამბაქნიანი და ოცდაათნიჩბიანი გემი (ტრიერემები), რომლებზეც ალექსანდრემ საზღვაო ეკიპაჟად აიყვანა ფინიკიელები, ეგვიპტელები, კიპროსელები, ეგეოსის კუნძულებისა და მცირე აზიის სანაპიროთა ბერძენები. ცალკე 200 გემი მზად იყო ცხენების სატარებლად. ამათ გარდა, კიდევ აშენდა, ან აშენებული შეგროვდა — არანაკლებ



1000 გემისა, რომელთა დიდი ნაწილის დანიშნულება იყო ჯარების გადაყვანა, სხვებისა — სურსათ-სანოვაჯის, საქუთრვის ტარება, საინტენდანტო სამსახური...

ლაშქრობად გასვლა დანიშნული იყო 326 წლის ნოემბრის დამდეგს. ალექსანდრემ სადარბაზოდ მოიწვია თავისი ამაღა, ჰეტერ-მეგობართა წრე და მასთან მყოფი ინდოელი ელჩები. მეფემ იმედი გამოთქვა, რომ მის მიერ ფენჯაბში დამყარებული წესრიგი და მშვიდობა იქნება შეუცვლელი და მარადიული.

რაჯა პოროსს ალექსანდრე მაკედონელმა ერთხელ კიდევ დაუდასტურა მისი „პრინციპსობა“ ფენჯაბში, და მასვე გადასცა ახალი ტერიტორიები მდინარე ჰიფასისამდე, შვიდი ტომობრივი გაერთიანებით და ორი ათასამდე ქალაქით. მეფემ საბოლოოდ „მიასწორ-მოასწორა“ საზღვრები პოროსს, ტაქსილეს, სოფიტეს, აბისარსა და ფეგოსს შორის. რაც მთავარია, მაკედონელმა ხელმწიფემ ინდოელებს ერთხელ კიდევ „შეახსენა“ მის წინაშე მათი სახარკო და საქვეშევრდომო ვალდებულებანი. აქვე ალექსანდრემ ბრძანა ინდური სამხედრო ნაწილების დაშლა და სახლებში დაბრუნება.

ბოლოს, გადაწყდა გამგზავრების განწესრიგება. მეფე, მისი ამაღა, სამეფო ცხენოსნური აგემა, ფაროსნები, აგრიანები და მოისარნი — სულ 8000 კაცი — გამგზავრებოდნენ გემებით. სრულიად ფლოტის მთავარსარდლად, აღმირალად, მეფემ დანიშნა ნეარქოსი, ხოლო საკუთარი გემის მესაქედ — ონესიკრატოსი (ფილოსოფოსი და ისტორიკოსი). იმ რვა ათასი მეომრის გარდა, დანარჩენი ჯარები გაიყო ორ კოლონად, რომელთაც ხმელეთით უნდა ევლოთ მდინარის ორივე მხარეს, მარჯვნივ, — კრატეროსის სარდლობით, მარცხნივ — ჰეფესტიონის მეთაურობით. ჰეფესტიონს მოჰყავდა, აგრეთვე, 200 სპილო. ორივე კოლონას უნდა ევლო სწრაფად და შეჩერებულყო სამხრეთით, მდინარეზე, სამი დღის სავალზე, და იქ დალოდებოდნენ ფლოტის ჩასვლას.

მაგრამ სად არის კენოსი? რატომ აღარ ჩანს ალექსანდრე მაკედონელის უსაჩინოესი, უერთგულესი და უსაყვარლესი მეგობარი და თანამებრძოლი? უბრალოდ ითქვას: იგი მოულოდნელად ავად გახდა და გარდაიცვალა. მეფემ დიდის ამბით დაიტირა და დაკრძალა კენოსი, თუმცა ესეც წაიციდუნა პირიდან: სწორედ ამ ცხოვრებულმა მოითხოვა პირველად მაკედონიაში დაბრუნება<sup>22</sup>. არც ეს არის გამორი-

ცხული, — მეფის პრინციპულ მისწრაფებათა საპირისპირო „რჩევის“ ავტორები ხშირად ავად ხდებიან და იხოცებიან!..

დადგა გამგზავრების დღე. დილიდანვე გემებმა დაიწყეს თავიანთ ეკიპაჟთა აყვანა. მდინარის ორივე ნაპირზე, კრატეროსმა მარჯვნივ და ჰეფესტიონმა მარცხნივ, სამგზავროდ დაალაგეს თავიანთი კოლონები. მეფემ მდინარის პირას, ბერძნული წესებით, მსხვერპლი შესწირა ბერძენთა ღმერთებს, მას უკან — მდინარეს, ინდური წესებით. აქედან ავიდა თავის ხომალდზე. ხომალდიდან მდინარეს ოქროს ფიალით ზედაშე აპყურა და მესაყვირეს უბრძანა ბუკით სალაშქრო ნიშანი მიეცა. და ასე, ბუკების, საყვირების, ყიყინისა და საომარი ემბატერიების გრილის ქვეშ, უთვალავ გაოცებულ ინდოთა თვალწინ, დაიძრა ფლოტი, ნაირფერი იალქნების ფრიალით და ნიჩბების წყობილი ტყლამუნით<sup>23</sup>.

ქვეითმა კოლონებმა, მეფის ბრძანებისამებრ, სამი დღის შემდეგ ბანაკი დასცეს ჰიდასპეს ორივე ნაპირზე. ალექსანდრემაც მიატანა ფლოტი. ორი დღე დაისვენეს. ორ დღეში „სატრაპია ინდოეთის“ მმართველიც მოვიდა — ფილიპე — და თან ჯარებიც მოიყვანა. ახლა ალექსანდრეს ხელქვეით 120000 მეომარი იდგა. უკვე უცხო ქვეყნებში იწყებდნენ შესვლას და მეტი სიფრთხილე მართებდათ. ამიტომ მეფემ ახლად მოსული ფილიპე თავისი ჯარებით ჰეფესტიონის მარცხენა მხარეზე დააყენა, მდინარე აკესინესკენ, რათა ამ მხრიდან რაიმე მოულოდნელი თავდასხმა აღეკვეთათ. დანარჩენი საომარი ნაწილები ისევ თავისი გეზით მიდიოდნენ. ასე უნდა ევლოთ ჰიდასპესა და აკესინეს შერთვის ადგილამდე. ამ ორი მდინარის წყალსართავის სამხრეთით მძლავრად მეომრული ინდური ტომების, მალეებისა და ოქსიდრაკების მტრულ დახვედრას ელოდნენ მაკედონელები.

მაგრამ მაკედონელები, სანამ იარაღსხმულ მტერს შეხვდებოდნენ, მანამდე სრულიად მოულოდნელად ლამის წყლის სტიქიონის მსხვერპლი გამხდარიყვნენ. მეხუთე დღეს, ჰიდასპესა და აკესინეს შესაყარს რომ მიაღწიეს, უეცრად აქ ფლოტი საშინელი სისწრაფის, სიღრმისა და სიმძლავრის მორევთა ქვაბში მოექცა. რამდენიმე ხომალდი, მათ შორის ორი დიდი, ოცდაათნიჩბიანი გემი, სულ ერთიანად დაიღწა, ბევრი ეკიპაჟთაგანიც დაიღუპა. საფრთხე მეფის ხომალდსაც დაემუქრა და ალექსანდრეც ტანს იხდიდა — მდინარეში გადასახტომად და გადასაცურავად ემზადებოდა. დიდის ვაივაგლახით გააღწიეს, მარჯვენა ნაპირზე მიდგნენ, დახოცილთა გვამები აას-

ვენეს და დაკრძალეს. დაზიანებული გემები შეაკეთეს. მანამდე ალექსანდრემ მოაწყო ადგილობრივი ტომის, სიბების დარბევა, რადგან ცნობა ჰქონდა, რომ სიბები მალეებთან და ოქსიდრაკებთან მეგობრობდნენ. მაკედონელებმა სიბების მთავარი ქალაქიც აიღეს იერიშით.

ხელმარცხნივ, აკესინესა და ჰადრაოტეს ქვემო წელზე, მალეები და ოქსიდრაკები, — აქამდე რომ ერთმანეთს მტრობდნენ — ახლა საერთო მტრის წინააღმდეგ გაერთიანებულან, ერთმანეთთან შეფიცულან, მძევლები გაუცვლიათ და ორივე ტომს საომრად გაუშხადებია 50000 ქვეითი, 10000 ცხენოსანი და 700 საბრძოლო ეტილი. მაგრამ მაინც ვერ დაახვედრეს ინდოელებმა ერთიანი ფრონტი საერთო მტერს. საერთო ბელადის არჩევანზე წაეკიდნენ ერთმანეთს, ისევ გაითიშნენ და გაიფანტნენ, ცალკე მალეები და ცალკე ოქსიდრაკები.

ალექსანდრესთვის მთავარი სამტრო ძალა მაინც მალეები იყვნენ და ისიც მიქროდა მალეების მთავარი ქალაქისაკენ. მან აკესინეს სამხრეთ-აღმოსავლეთით, ორი დღის სავალი უდაბნო ხუთ საათში გადაიქროლა, მერე მცირე შესვენების შემდეგ, დანარჩენი დღე და მთელი ღ-მე შეუსვენებლივ იარა და უეცრად მიადგა ქალაქ აგალასას. მალეები ასეთი გზით და ასეთი სისწრაფით მტრის გამოჩენას არ ელოდნენ და სანამ გონს მოეგებოდნენ და იარაღს მიწვდებოდნენ, მაკედონელები მათ ისე დაერივნენ, როგორც ცხვრის ფარას. ერთბაშად ათასეულობით ინდოელი ხელგაუნძრევლად დაირეცა მკვდრად. მხოლოდ მცირე ნაწილმა შეასწრო და შეიკეტა აგალასას კედლებში. აგალასა ალექსანდრემ კავალერიით ალყაში მოაქცია. პერდიკამაც მოუსწრო ფალანგებით. პერდიკა მეფემ მეორე ქალაქისკენ (სახელი არაა ცნობილი) აფრინა ბრძანებით — ალყა შემოერტყა, გარეთ არავინ გამოეშვა და იერიშიც არ მიეტანა, სანამ თვითონ არ მიეშველებოდა. თვითონ კი მაშინვე ირგვლივ იერიშები წამოიწყო აგალასაზე. მალეები უკვე გონს მოსულიყვნენ და გაათვრებით იცავდნენ თავს. მაკედონელებმა ქალაქის კარიბჭეები შემუსრეს და შეიჭრნენ. რამდენიმე ათასმა ინდოელმა აკროპოლისს შეაფარა თავი. პირველი იერიშები აკროპოლისზე მაკედონელებს უშედეგოდ დაუტრიათ, მაგრამ ალექსანდრეს პირადმა სიმამაცემ, მისმა დაუცხრომელმა ენერგამ მაინც თავისი გაიტანა. მაკედონელებმა აკროპოლისიც აიღეს და ბრძოლის სიძმივით გაცოფებულმა, ორი ათასი ინდოელი მეომრისგან არც ერთი ცოცხალი აღარ გაუშვეს.

ამასობაში პერდიკაც მიხდომია მალეების მეორე ქალაქს, მაგრამ

აღყაშემოსარტყმელი იმ ქალაქში არავენ დახვედრია — მალევი გაქ-  
ცულიყვნენ. პერდიკა დაედვენა და ყოველი ინდოელი, რომელმაც  
ჰიდრაოტეს ვერ გადაასწრო, ამოწყვიტა.

ალექსანდრემ აგალასაში მცირე ციხიონი შეაყენა და მალევის და-  
ნარჩენ ციხესიმაგრეებსა და სამალაევებს მისდგა. ყველა აიღო, ყველა  
ამოწყვიტა, ყველა დაანგრია. განსაკუთრებით ერთი ბრაჰმანული  
ციხე-ქალაქი გაძლიანდა, ბევრი მაკედონელიც შეიწირა. ისევ იმ-  
ძღავრა ალექსანდრემ, ჯერ ქალაქის კედლები გადალახა, ქალაქის  
ციტადელიც აიღო; ინდოელებმა ციტადელს თვითონ გაუჩინეს ხან-  
ძარი და ბევრი მათგანი ცეცხლში თვითონ გადაეშვა, დანარჩენები —  
5000 ინდოელი — მაკედონელებმა გაელიტეს.

ერთი დღის შესვენების შემდეგ ისევ გაიყვნა ჯარები მარბიულად  
მეფემ. ხუთი დღე სდიეს და ჟლიტეს მალევი შეუსვენებლივ, სადაც  
წაეწივნენ, ყველგან — ციხესიმაგრეებში, ტყეებში, ბუჩქნარებში,  
ქაობებში. კიდევ შესვენება და კვლავ ნადირობა მალეებზე — ხუთ-  
დღიურებად, კვირეულებად.

ბოლოს, ალექსანდრე მიადგა მალევის კიდევ ერთ დიდ ქალაქს  
(ეს უნდა ყოფილიყო დღევანდელი მულტანის ადგილზე). დილით,  
სისხამზე ირგვლივი იერიშები მიიტანეს მაკედონელებმა — ერთ ნა-  
ხევარზე ალექსანდრემ, მეორე ნახევარზე პერდიკამ. ალექსანდრემ  
კარიბჭე შეანგრია და პირველი შეიჭრა ქალაქში. მალევი უკუიქცნენ  
და აკროპოლისს მიაშურეს. აკროპოლისი კი უაღრესად ძლიერად გა-  
ემავრეებით მალეებს. მალალი კედლები და კოშკები ხშირი ურთიერთ-  
მიჯრით გაევსოთ იარაღში დასილადებულ მეციხოვნეებს, ხელუცთო-  
მელ მოისრეებსა და მესათხედებს. იმიტომაც საიერიშოდ მისვლა  
ძალზე სახიფათო ჩანდა და პირველი, რითაც მაკედონელებმა დაი-  
წყეს, იყო კედლების საძირკველთა გასწვრივი მიწის გათხრა, რამ-  
დენჯერმე საიერიშო კიბეებით კედლებზე ასვლაც სცადეს, მაგრამ  
ყოველთვის ინდოელმა მეციხოვნეებმა ისრისა და სათხედის სეტყვით  
უკუჰყარეს მოიერიშე მაკედონელნი.

მაშინ კიბე აიტაცა და კედელზე მიაგდო ალექსანდრემ და — მარ-  
ცხენაში ფარით, მარჯვენაში მახვილით — კიბე აირბინა ელვასავით.  
იმავე კიბით ფეხდაფეხ მიჰყვნენ პევესტა და ლეონატოსი. მეორე  
კიბე მიადგა და აირბინა აბრეიოსმა. მეფე უკვე კოშკის ზეთავზე იყო,  
ფარით ისრის სეტყვას იგერიებდა, მახვილს სცემდა საოცარი სისწ-  
რაფით და მიმოხრით; ყოველი შემხვედრი ძირს დაანარცხა ან კოშკი-

დან გადასჩეხა. ეს ყველაფერი გაგრძელდა წუთით. მაკედონელებიც არზიან ორივე კიბით, ერთიმეორის მიყოლებით. მაგრამ კიბეები სიმძიმეს ვეღარ უძლებენ, იმსხვრევიან და მოიერიშენი ძირს ენარცხებიან. ალექსანდრე, პევეესტა, ლეონატოსი და აბრეიოსი კოშკსე, მტრის გარემოცვაში, მარტო რჩებიან. ალექსანდრეს გასაოცარი სიმამაცით და საომარი ხელოვნებით გამოწვეული წუთიერი გარინდება სძლიეს მალეზმა, ბრწყინვალე აღჭურვილობით და მუზარადზე ფრთებით შეიცვენეს მეფე. მიტომაც ახლოს, ხმლის მისაწვდენზე მისვლა ვეღარ შეუბედეს და შორიდან დაუშინეს გაალმასებით. ესროდნენ ყოველი მხრიდან — კედლებიდან, კოშკებიდან, აკროპოლისის შიგნიდან; ესროდნენ ისარს, შუბს, სათხედს, ქვას და ყველაფერს, რაის სროლაც შეიძლებოდა. საშინელი ღრიალი დადგა შიგნით და გარეთ.

გადმოდმიდან მაკედონელები ბლავილით ევედრებოდნენ მეფეს, უკანვე გადმომბტარიყო და ეხსნა სიცოცხლე თვისი. ალექსანდრემაც წამიერი მზერის ტყორცნით გაზომა სიმაღლე კოშკიდან და გადახტა... გადახტა ქალაქის შიგნით!.. ეს უკვე გმირობა კი არა, სიგიჟე იყო... ჩახტა, ზურგით კედელს მიეყრდნო — უკანა მხარე უვნებელჰყო — და პირისპირ მტრის იერიშებს დაელოდა, „აქილევის ფართა“ და მახვილით ხელში. გავეშებით დაეძგერნენ ინდოელნი. მათი მეწინავე, ალბათ წინამძღოლი, მისვლისთანავე მახვილის დაკვრით უსულოდ დასცა ალექსანდრემ, მეორეს ქვა დასთხლიშა და დააწვინა, მესამე და მეოთხე ისევ მახვილით დაასიკვდილა თავის ფეხებთან. უკუიქნენ დანარჩენები და ისევ დამანძილებით დაუშინეს ისარი და სათხელი, შუბი და შურდული — ყველაფერი, რითაც ამ უცნაური კაცთაგანის მოკვლა შეიძლებოდა. კვლავ გასაოცარი ხელოვნებით ისხლეტდა მტრის ნასროლს ალექსანდრე ფართით, მახვილით, ელვისებური გახტომ-გამოხტომით. მაგრამ მაინც დაიჭრა რამდენიმე ადგილას, ქვამ მუზარადიც გაულრიცა, თუმცა ყველაფრის გასააზრებლად „ვერ მოიცალა“ თავდავიწყებით მეომარმა.

უკვე გაჩნდნენ მის გვერდით პევეესტა, ლეონატოსი და აბრეიოსი. მისვლისთანავე აბრეიოსს მძლავრად ნასროლი ისარი სახეში მოხვდა და მკვდარი დაეცა. აღტაცებული ბლავილი აღმოხხდათ მალეებს და გაახშირეს სროლა მეფეზე — ყველაზე „ძვირფას სამიზნეზე“.

ახლა კი ისრისა და სათხედის ბარანში ყველაზე მძლავრად ნასრო-

ლი ქეიბური გამოერჩა და ალექსანდრეს მარჯვენა ძუძუში გამკოლად შეიჭრა; სისხლმა იქეჟა შადრევანივით. ხელი მოივლო დაჭრილმა ისრის ამოსაძრობად, მაგრამ ამოდ. დაბარბაცდა. მსროლელმა მეფის სიკვდილის სიახლოვე ირწმუნა და იარაღის ასაყრელად მიეჭრა, ალტაცებული ბლავილით. ისევ ძალანაკრები შეეგება ალექსანდრე, ხმალი ფერდიდან დარტყმით გულში გაუტარა და, უსულოდ დასცა ნაადრევად განარებული მოსისხლე. მაგრამ თვითონაც ძალა თანდათან დაეშრიტა, მუხლები მოეშალა, მკლავები იარაღთან ერთად დაუცვივდა და ამდენხანს ღირსეულად ნატარებ და ნაომარ აქილევსურ ფარზე დაეცა ცნობაწართმეული. პევეესტა და ლეონატოსი ფარების მიჯრით გადაეფარნენ თითქმის სიკვდილის საუფლოში ჩაძირულ მეფეს. მაგრამ თვითონაც დაჭრილები არიან — პევეესტა სამგზის სათხედით, ლეონატოსი კისერში დარტყმით. და ორივე სისხლისგან იცლებიან. ამასობაში მაკედონელებს გადმოულახავთ აკროპოლისის კედლები — ზოგს კიბეებით, ზოგს პალოებით, სხვებს თოკებით თუ ერთმანეთის ზურგზე გადავლით; ზემოდან თვალს ჰკიდებენ დარეცილ მეფეს და თავზე ხელალებით ცვივიან მის გადასარჩენად. პირველნი ტიმეოსი და არისტონი მიცვივდნენ მეფესთან. ტიმეოსი დაცხრილეს და მკვდარი დასცეს მალემა. არისტონიც დაიჭრა მძიმედ. პევეესტაც უკვე მინებდა სიკვდილს. მაგრამ უკვე შიგნიდან გაეხსნათ აკროპოლისის კარიბჭენი კედლებიდან გადმოცურებულ მაკედონელებს. აკროპოლისი ერთბაშად აივსო მაკედონელთა ჯარებით. ხმაც გავარდნილიყო მეფის სიკვდილისა. იხილეს კიდევ, როგორ მისაგენებდნენ ვითარცა მკვდარს, ილიონურ ფარზე დასვენებულ მეფეს მისი პეტერები. საშინელი ხოცვა-ჟლეტა გააჩაღეს მხეცადქეულმა მაკედონელებმა. სჩეხავდნენ ყველას — კაცსა და ქალს, მოხუცს და ახალგაზრდას, შუაზე ზღეჩდნენ და აკვანში ჰყლეტდნენ ძუძუთა ბავშვებს. მალთა ქალაქში მალთაგან აღარავინ გადარჩენილა<sup>24</sup>.

მეფე სისხლის თქეშით ავსებული ქალაქიდან ბანაკში გადაიყვანეს, მის კარავში დააწვიინეს და მიეხვივინენ „ხეირურგინი“ და „ხეირურგინს“ მჩემებელნი. ვერ იქნა და, ვერ ამოართვეს ისარი მკერდიდან დაჭრილს. ქეიბურის ანკესი მჭიდროდ მოსდებოდა მკერდის შიდაძვალს. — ჩასჭერთ, ჩააფართოვეთ და ისე ამოიღეთო, — ამოიკვნესა ალექსანდრემ და ისევ დაჰკარგა გრძნობა. ისე მოიქცნენ, როგორც ბრძანა „ყველაფრის მცოდნემ“ — ჰკრილობა ხმლით ჩაუფართოვეს და ამოუღეს ისარი. ძლივს შეუტრეს ჰკრილობა, ძლივს

შეუწყვიტეს სისხლდენა. მთელი ღამე სიკვდილი და სიცოცხლე თავ-გამოდებით ებრძვიან ერთმანეთს ალექსანდრე მაკედონელის სხეულის დაუფლებსათვის. მთელი ღამე დასტირიან მისი „მეგობრები“ და „პაეები“ სიკვდილის წიაღისკენ გათრეულ მეფეს. ჭარბი ღამეს ათევენ მის კარავთან — მეფის, სარდლისა და „პატრონის“ სიკვდილ-სიცოცხლის მოლოდინში.

მაკედონელთა იმ ბანაკებშიც, რომელთაც ამ ბრძოლაში მონაწილეობა არ მიუღიათ, მიიჭრა თავზარდამცემი ამბავი უმძიმეს შეტაკებაში ალექსანდრეს დაჭრისა და მისი სიკვდილისა, დიახ — სიკვდილისა! და აუწერელმა მღელვარებამ მოიცვა მაკედონელთა მთავარი ბანაკი. რომელიც ალექსანდრემ მალეებზე გალაშქრების წინ ჰეფესტიონსა და ნეარქოსს დაუტოვა ჰიდრაოტეს და აკესინეს შესაყარში. ჭერ იყო ყვირილი, ღმუილი, ბღაილი; ტირილი, ცრემლი — ვისთვის სინანულისა, ვისთვის სიხარულისა, მაგრამ საყოველთაო — ყო შიში — შიში იმ მომენტისა, შიში „უალექსანდრეობისა“; რა მოხდება ახლა. ამ წუთიდან? ვინ იქნება მის მაგიერი და ვინღა შეძლებს ალექსანდრობას? როგორი იქნება ის ვინმე „მეორე ალექსანდრე“, და (რაც მთავარია) როგორი თვალით დამიწყებს ყურებას მე?! როგორ გავაღწევთ აქედან, უთვალავ მტერთაგან გარშემორტყმულნი, როცა აღარ გვყავს „ღვთის სწორი“ ალექსანდრე? ვინ დაგვაბრუნებს, რა გზით და რა საშუალებით სამშობლოში, როცა ცოცხალთა შორის აღარ არის ის?! მაგრამ ცოცხლები იმიტომ არიან ცოცხლები, რომ ყოველნაირი კაცთაგანის სიკვდილს ბოლოს და ბოლოს ურიგდებიან და ასევე უნდა ყოფილიყო ალექსანდრეს მიმართაც. და ისევ მოიჭრა უცებისი ამბავი — ალექსანდრე სიკვდილს გადარჩენილა. თუ გაცოცხლებულა, თუ მკვდრეთით აღმდგარა... ახლა ამის დაჭერება გასჭირდა (ზოგს არც სურდა, ალბათ). მალე ხმას თვითონ ალექსანდრეს წერილიც მოჰყვა — მალე დავბრუნდები ბანაკშიო — იწერებოდა მეფე. მაგრამ ბევრს მაინც არ სჭეროდა, — ეს წერილი მხოლოდ ალექსანდრეს ახლობელთაგან შეთხზული იქნება — რომელიმე „ჰეტერთაგან“ თუ „პაეთაგან“ — ჩვენს დასამშვიდებლად და მოსალორებლადო.

არა და, ეს რეალობა იყო. ალექსანდრე მართლა გადარჩა სიკვდილს. შვიდ დღეში ჭრილობა მოუშუშდა, მგზავრობა მაინც საშიში იყო, მაგრამ აიჩემა წამიყვანეთ ბანაკშიო. შიშობდა მეფე, ჭარბი პანიკამ და უწესრიგობამ არ მოიცვას ჩემი დაღუპვის შემტყობარემო. ჰიდრაოტაზე ხომალდი კარვითა და საწოლით გააწყვეს, მეფე

შიგ შეიყვანეს და დააწვინეს. ხომალდი ნელა აუშვეს და, მეფე რომ ზედმეტი რყევით არ შეეწუხებინათ, ნიჩბების მოსმის გარეშე, ნელად მიმავალი მდინარის ნებისად გაცურდნენ. მეოთხე დღეს მიუახლოვდა ბანაკს წყნარად მიმავალი ხომალდი. ჯარი ელოდა მუხლმოუკეცავად და თვალმოუხუჭავად. ბევრს კიდეც არ სჭეროდა მეფის სიცოცხლე. ხომალდი რომ გამოჩნდა, მაშინაც ფიქრობდნენ, რომ იმ ხომალდით მეფის ცხედარს მოასვენებდნენ. ალექსანდრემ ბრძანა, კარავი ვაეხსნათ, რამეთუ ყველას ეხილა იგი. თვითონ წამოიწია, აღიმართა და ხელის ქნევით მიესალმა ხალხს. ათასეულების შებღავლებამ შესძრა ცა და ქვეყანა. ხომალდი ნაპირს მიადგა. ძლივს აკავებდნენ „პაყები“ აბლავლებული და ატირებული ხალხის მოწოლას.

საკაცეები მოიტანეს, — მეფე უნდა დაესვათ და ისე წაეყვანათ მის კარავში. მაგრამ არ ინება ალექსანდრემ — ბრძანა ცხენი მოერთმიათ. და როგორც კი ჯარმა ისევ ამხედრებული იხილა იგი, ახალის ძალით ატყდა გრგვინვა, ფარებზე მახვილების და შუბების ცემა, გაუთავებელი და გამაყრუებელი ზათქი-ზრიალი. კარავთან ცხენიდან გადმოხტა და ხალხს ერთხელ კიდეც აჩვენა, კვლავ როგორ შეეძლო ფეხზე დგომა და სიარული. ყველა მისკენ მიისწრაფოდა, ყველას უნდოდა, ხელით შეხებოდა მის სხეულს, სამოსს, როგორმე მისი მზერა დაეჭირა. მიელტვოდნენ, ყვავილს და ფიანდაზს უგებდნენ და თვითონაც ფეხებში ეგებოდნენ.

კარავში შეჰყვნენ ჰეტერ-მეგობრები ალექსანდრეს, შემოეხვივნენ და შეჰკადრეს საყვედურები — რატომ აგრე გაუფრთხილებლად ეპყრობი შენს სიცოცხლესო, საკუთარ თავსაც რომ არად აგდებდე, ქვეყანას, ჯარსა და ჩვენ რაღა პასუხს გვაძლევო, ისედაც — ბრძოლაში ეგზომ თავგანწირვა რიგითი ჯარისკაცის საქმეა და არა მეფისა და მთავარსარდლისაო, და სხვა მისთანანი. მაინცა და მაინც არ ეპიტნავა მეფეს ამგვარი შეგონებანი. ერთი მოხუცი ბეოტიელის ნათქვამმა კი ძალიან ასიამოვნა მას: „ჰოი, ალექსანდრევე, ვაჟკაცს საქმენი ამშვენებენ, ხოლო ვინც მოქმედებს, იგი ტანჯვა-წამებასაც არ უნდა შეუშინდეს“. ამ თქმისთვის ძალიან შეიყვარა და დაიახლოვა ის ბეოტიელი ბერძენი ალექსანდრემ.

უმამაცესი მალეების განადგურებამ და მათი სატახტო ქალაქის დაუფლებამ კვლავ განადიდა მაკედონელი მეფის სახელი და გააღრმავა შიში მის წინაშე მთელს ინდოეთში. თვითონ მალეებმა ელჩები გამოგზავნეს და მათი მიწა-წყალი ალექსანდრეს ქვეშევრდომად ცნეს.



მაკედონელთა მორჩილად უომრად აღიარეს თავი ოქსიდრაკებმაც — მეორე ძლიერმა, მეომრულმა ტომმა ინდოეთში. ამათგან ალექსანდრემ ათასი მძევალი მოითხოვა. ოქსიდრაკებმა ის ათასი მძევალიც მისცეს და კიდევ, თავისი ნებით, ხუთასი საბრძოლო ეტლიც მიუძღვნეს — ყოველი ეტლი ერთი მეეტლითა და ორი მეომრით. ასეთი „უქვეელი ერთგულების“ გამომხატველი ქცევით ნასიამოვნებმა ალექსანდრემ ის ათასი მძევალი გაათავისუფლა, ხოლო ნაჩუქარი ეტლები თავის საომარ ძალებს შეუერთა.

მალებისა და ოქსიდრაკების ტერიტორიები მეფემ „სატრაპია ინდოეთს“ შეუერთა და თავიდანვე დანიშნულ მის სატრაპს, ფილიპეს დაუმორჩილა.

სანამ ალექსანდრეს კრილობა პირს იკრავდა, მანამ მისმა გემთმშენებლებმა კიდევ ბევრი ახალი ხომალდი ააგეს. ასე გაზრდილ ფლოტს ახლა შეეძლო წაეყვანა 10000 ქვეითი და 1700 ცხენოსანი მეომარი.

ალექსანდრეც გამოჩანსად და გამოძიელდა. ღმერთებს სამადლობელი მსხვერპლი შესწირა, იასპარეზა, ინადრმა, გეშუე ავიდა, დაიძრა ფლოტით და ჯარით. გაიარეს შესართავი ჰიდრაოტესი, შემდეგ ჰიფასისისა და ბოლოს, როცა ყველა ერთად — ჰიდასპე, აკესინე, ჰიდრაოტე და ჰიფასისი იქცევა ერთ მდინარედ პანჯანადად. და ერთვის ინდს — მაკედონელთა ფლოტიც შეერთო მსოფლიოს ამ ერთ-ერთ უდიდეს მდინარეს.

გზადაგზა ინდური ტომები ელჩებს ელჩებზე აგზავნიდნენ, მაკედონელ ხელმწიფეს მორჩილებას მოახსენებდნენ და ძვირფას ძღვენს მოართმევდნენ — ურიცხვ აღმასს, მარგალიტს, უცხო ქსოვილებს, გველის ტყავებს, კუს ჯავშნებს, მოშინაურებულ ღომებს და ვეფხვებს. ჭერჯერობით მხოლოდ პერდიკას დასჭირდა თავისი ფალანგით საომრად გასვლა — აბასანტების ტომის ძალით დამორჩილება.

იქ, სადაც ხუთმდინარეთი ერთ დიდ ინდთან იკვრება, მაკედონელმა დააარსა კიდევ ერთი ქალაქი თავისი სახელობისა — ალექსანდრია, რომელსაც თვითონ ალექსანდრეს გაანგარიშებით, თავიდანვე დიდი როლი უნდა ეთამაშნა ჯერ ინდოეთისა და შემდგომ აღმოსავლეთ-დასავლეთ ქვეყანათა სავაჭრო და კულტურულ ურთიერთობაში. ამ ახალი ალექსანდრიის გაზრდის, განმტკიცებისა და სავაჭრო ცენტრად გადაქცევის მეთაურობა მეფემ მიანდო ისევ ფილიპეს, ინდოეთის სატრაპს.

ზამთარი ახალ ალექსანდრიაში გაატარეს. 325 წლის თებერვალში ალექსანდრემ ფლოტი და ჯარი ინდის ზემო წელისკენ დასძრა. მაკედონელები მივიდნენ სოგდების ქვეყანაში და ბანაკად დადგნენ მათ მთავარ ქალაქში, რომელიც მაშინვე გადააქციეს ბერძნულ კოლონიად და უწოდეს — „ალექსანდრია-სოგდიანა“. იგი საგანგებოდ გამაგრეს, სავაჭრო ნავსადგურებით და შენობებით გააწყვეს და გამოაცხადეს ახალი სატრაპიის რეზიდენციად; ხოლო, ეს ახალი ინდური სატრაპია მოიცავდა ტერიტორიებს ინდ-პანჯნადის შესაყარიდან ვიდრე ინდის შესართავამდე და ინდოეთის ოკეანემდე. სატრაპად კი, 10000-იანი ციხიონით, ალექსანდრია-სოგდიანაში მაკედონელმა ხელმწიფემ დასვა პითონი.

ინდის ქვემო დინებაზე ინდოელი ტომები მტრულად შეხედნენ უცხო დამპყრობელს. აქაური რაჯები და მათი წარმომადგენლები, ნაწილობრივ საკუთარი თვითდაჯერებით და ნაწილობრივ კიდევ „ღმერთებთან მოსაუბრე“ ბრაჰმანთა კასტის წაქეზებით, მძულვარებით და მედიდურობით ეგებებოდნენ მაკედონელებს, ერთადერთი აღმოჩნდა რაჯა სამბა,<sup>25</sup> რომელმაც „ცხვირის აბზეკის“ გარეშე გამოაცხადა მორჩილება ალექსანდრე მაკედონელის წინაშე. სამბას ასეთი „ანტიეროვნული“ ნაბიჯი ადვილად აიხსნებოდა: იგი უფრო ძლიერისა და მაკედონელების მომტრე მუსიკან რაჯას ქვეშევრდომი იყო და უცხო დამპყრობელთან შეკავშირებით უცდია „მშობლიური მიაგვრელისგან“ თავის დახსნა. ალექსანდრემაც „დააფასა“ სამბას ერთგულება და იგი თავისი ქვეყნის შეუზღუდველ სატრაპად აღიარა — რასაკვირველია, ისეთივე სახარკო ვალდებულებებით, როგორც ფენჯაბის სატრაპები.

დანარჩენი რაჯების „გონზე მოსაყვანად“ ისევ მიწვდა ალექსანდრეს ხელი მრისხანე მახვილს. იგი ალექსანდრია-სოგდიანადან დაემოვა მუსიკანის სატახტოსაკენ. მისვლა და იერიში აღარ აცალა მუსიკან რაჯამ, სასწრაფოდ ქალაქიდან გამოვარდა, ალექსანდრეს მუხლებში ჩაუვარდა, პატიება თხოვა და თავისი ქვეყანაც ქვეშევრდომად მიუბოძა. მრავალ ძვირფას საჩუქართა გვერდით, მუსიკანმა მაკედონელ მეფეს მიართვა ყველა სპილო, რომელიც კი მას ჰყავდა სახელმწიფოში. ალექსანდრემ მონანიებულ რაჯას წინანდელი მტრობა შეუწოდო და დატოვა იგი თავისი სახელმწიფოს გამგებლად და მაკედონიის მოხარკედ. მუსიკანი შეუძღვა თავის რეზიდენციაში უცხო სტუმარს და ხელისუფალს. ალექსანდრე განაცვიფრა ქალაქისა და

მისი მიდამოების სიმდიდრემ და დოვლათიანობამ. აქვე მან მაკედონური გარნიზონი ჩააყენა და კრატეროსს ახალი აკროპოლისის აგება უბრძანა.

მტრულად შეხვდა ალექსანდრეს პრეტიების მეფე ოქსიკანი.<sup>26</sup> ალექსანდრემ პრეტიებიც გაანადგურა, მათი მეფეც მოაკვლევინა. მოულოდნელად რაჯა სამბა აუჯანყდა ალექსანდრეს. იგი უკმაყოფილო დარჩენილა, მაკედონელმა რომ მისი მეტოქე მუსიკანი შეიწყალა და რაჯას ტახტზე დატოვა. მის კარზე მყოფი ბრაჰმანებიც აქეზებდნენ სამბას უცხოელი დამპყრობლების წინააღმდეგ სამბამ მაკედონელთა მფლობელობა მის ქვეყანაზე გაუქმებულად გამოაცხადა, მაგრამ უმაღვე ბრძოლას დაუშინდა, ანარქიით მოცული სამეფო მიატოვა და ინდს გადაღმა უდაბნოს შეაფარა თავი. გაქცეული რაჯას სატახტო ქალაქი, სინდომანა, უომრად ჩაბარდა ჯარით მოსულ ალექსანდრე მაკედონელს. სპილოები და სახელმწიფო საჭურჭლეებიც მაშინვე მიართვეს. დანარჩენი ქალაქებიც დანებდნენ, გარდა ერთისა, სადაც ბრაჰმანებს შეეფარებინათ თავი. ალექსანდრემ ეს ქალაქი აიღო და ყველა ბრაჰმანი სიკვდილს მისცა.

მობრუნება ვერ მოასწრო ალექსანდრემ, რომ მოახსენეს — ბრაჰმანების წაქეზებით, მუსიკანიც აჯანყებულა მთელი თავისი ქვეყნით. მაშინვე მეფემ პითონი გაგზავნა აჯანყებული მუსიკანის წინააღმდეგ, თვითონ კი მის ქალაქებს დაერია. ყველა ქალაქი აიღო და ყველას სასტიკად გაუსწორდა — გამარცვა, დაანგრია, დასწვა, მოსახლეობა ან ამოწყვიტა, ან მონებად გაირეკა. ყველგან მაკედონური ციხიონები შეაყენა და უკან დაბრუნდა. პითონიც მოვიდა და შეპყრობილი მუსიკანიც მოიყვანა. მეფის ფიცხელი ბრძანებით, მუსიკანიც და მისი წამქეზებელი ბრაჰმანებიც, შარავზების გაყოლებით, სახრჩობელებზე ჩამოჰკიდეს.

ალექსანდრემ ერთი ბრაჰმანი გაიშინაურა, აღარ მოიშორა და აღარც ის მოშორდა. სახელად სფინე ერქვა, მაგრამ პტოლემეაიოსმა და ლისიმახოსმა, — რომელთაც ამ ინდოელთან საუბარი ძალიან შეუყვარდათ — მას „კალანე“ დაარქვეს, რაკი იგი ამ სიტყვით ესალმებოდა ყველას. ერთხელ, კალანემ მეფეს ალევგორიულად დაუხატა მისი უზარმაზარი სამეფოს სურათი: საქონლის გამხმარი ტყავი მოატანინა, მიწაზე დადო და ერთ მხარეზე რომ ფეხი დააჭირა, ტყავის დანარჩენი კიდები ზევით აიპრინა; კალანემ ტყავს ასე შემოუარა გარშემო — ერთ მხარეს რომ ფეხით მიწას აკრავდა, დანარჩენი

ბოლოები ისევ და ისევ მაღლა იმართებოდა; ბოლოს შუაგულზე და-  
აკირა ფეხი და ტყავი მთლიანად, მისი ყოველი ბოლოთი გაეკრა მი-  
წას. აი, ასე გახლავთო, — დაასვენა კალანემ — ხელმწიფე თავისი სა-  
მეფოს შუაგულში უნდა იდგესო და არა სხვათა დასაპყრობად, „სხვა-  
თა კიდეზე“ ფეხს ადგამდესო, თორემ სულ ერთია, ყველაფერი მანც  
წარმავალიაო<sup>27</sup>.

იქნებ კალანეც იმ „ინდოელ სოფისტთა“ შორის იყო, ერთ მინ-  
დორში, ერთსა და იმავე ადგილზე რომ ფეხებს ატყაპუნებდნენ და  
გაოცებულ ალექსანდრეს ეუბნებოდნენ: „მეფეო ალექსანდრე, ყო-  
ველ ადამიანს მხოლოდ იმდენი მიწა ეკუთვნის, რამდენსაც მისი ფე-  
ხის ტერფები ფარავს; შენც ისეთივე ადამიანი ხარ, როგორც სხვა-  
ნი ყოველნი, ოღონდ უფრო მოუსვენარი და ამაყი, სახლიდან წა-  
მოსულხარ, ამდენი მიწა გამოგივლია, არც შენ ისვენებ, არც სხვას  
ასვენებ; მალე შენც მოკვდები და შენც იმდენი მიწა გეყოფა, რამდე-  
ნიც მხოლოდ დასამარხავად დაგკირდება“<sup>28</sup>.

კალანეზე ჭერჭერობით ეს ვიკმართ და ჩვენ მას კიდევე შევხვდე-  
ბით, როცა იგი კვლავაც იტყვის „თავის სიტყვას“.

ალექსანდრე მაკედონელს ინდის ხეობაში მხოლოდლა მდინარის  
დელტა დარჩენოდა დასაპყრობელი. დელტაში დიდი ქალაქი იდგა,  
პატალა, ამავე სახელწოდების სამეფოს სატახტო ქალაქი. პატალის  
რაჯამ, მიორისმა, ჭეოვანად შეაფასა, რა დღეც აყარა მის თანა-  
მოძმეებს ურჩობისთვის უცხოელმა დამპყრობელმა და თვითონ ეახ-  
ლა ალექსანდრეს ალექსანდრია-მარგიანაში. ეახლა, დიდძალი სა-  
ჩუქრები მიართვა, პირადი სიცოცხლეც და სამეფოც სრულ მორჩი-  
ლებაში ჩააბარა. ალექსანდრემ მიორისიც დატოვა მისსავე ტახტზე,  
ხარკის გაღებით და მაკედონელთა უმაღლესი ხელისუფლების აღიარებით.  
აქვე მიორისმა ალექსანდრეს მისცა მისთვის საჭირო ყოვე-  
ლი ცნობა ინდის დელტის გარშემო. ინდის დელტა ნილოსის დელ-  
ტაზე უდიდესიაო, — ირწმუნებოდა მიორისი — იგი აღუწერდა ალექ-  
სანდრეს ინდის შესართავისა და ოკეანის გასწვრივი ქვეყნების ბუ-  
ნებრივ პირობებს, იქ მცხოვრები ხალხების ადათს, ზნეობასა და გან-  
წყობილებებს. ალექსანდრემ ყოველივე მოისმინა და მიორისი უკან-  
ვე, პალატაში გაგზავნა ბრძანებით — ყოველივე გაამზადე ჩემი ჭა-  
რებისა და ფლოტის მისაღებადო<sup>29</sup>.

ალექსანდრე მაკედონელს უკვე შეეძლო საომარი კამპანიები ინ-  
დოეთში დასრულებულად ჩაეთვალა. ფენჯაბი და სინდეთი მთლიანად

მის ხელში იყო. ზოლოს და ბოლოს. ახლა მაინც უნდა დამსჯავსებოდა „დაბრუნება“ დაბრუნებას. ამდენი ჯარიც უკვე აღარ სჭირებოდა ალექსანდრეს. მისი მთავარი მისწრაფების საგანი ახლა მხოლოდ ოკეანესთან მისვლა და იქიდან სპარსეთისაკენ ზღვითა და ხმელეთით სვლა იყო. ამისთვის იმოღეწა ჯარი საჭირო კი არა, ზედმეტი დამაბრკოლებელი ტვირთიც კი იქნებოდა. ზღვითა გასწვრივ მოძრაობის დროს, ხშირად უწყლო და უნაყოფო უდაბნოების გადალახვისას, ისედაც, ამოდენა ჯარის შენახვა და მოვლა-პატრონობა გაჭირდებოდა. ინდოეთიდან დასავლეთით და ჩრდილო-დასავლეთ სატრაპიებშიც აქა-იქ არეულობანი დაწყებულა. ბაქტრაში, ბაქტრიის მთავარ ქალაქში, მაკედონურ გარნიზონს თვითონ მოუწყვია აჯანყება, ალექსანდრესგან დაყენებული უფროსი გადაუგდიათ და მის ნაცვლად ვილაც მეჭინბე ათინოდორე დაუნიშნავთ, ათინოდორე კიდევ ვილაც ბიკონს ნადიმობისას სუფრაზე დაუკლავს, სამაგიეროდ ჯარისკაცებს ბიკონის წამებით სიკვდილი გადაუწყვეტიათ, მერე ისევ ხელი აუღიათ და მასთან ერთად, სამი ათასი ბერძენი და მაკედონელი ბაქტრიიდან დასავლეთით წასულან, სამშობლოში დასაბრუნებლად.<sup>30</sup> პაროპამისიდან, კიდევ, საჩივრები მოუვიდა ალექსანდრეს, მისგან დაყენებული სატრაპის, ტირიასპეს უკანონო მმართველობაზე. ალექსანდრემ ტირიასპე მოხსნა და მის ნაცვლად პაროპამისის სატრაპად ოქსიართი გაგზავნა. არიანაშიც, არიასპების ტომში, სპარსელ ორდანს თავი მეფედ გამოუცხადებია. ამიტომ ყველა ამ „არეულ ოლქში“ საჭირო იყო მაკედონური ჯარების უბრალო გამოჩენა და გავლა მაინც, „მაკედონური წესრიგის“ აღსადგენად და გასამტკიცებლად. ასეთი „გავლა“ კი სწორედ „დაბრუნებულ ჯარს“ უნდა დაჰკისრებოდა.

ერთი სიტყვით, ალექსანდრემ ალექსანდრია-მარგიანაში გადაწყვიტა თავისი ჯარების ერთი მესამედი ინდოეთიდან დასავლეთით გაებრუნებია. ისინი იყვნენ ფალანგები კრატეროსისა, ატალოსისა ანტიგენესი და მელეაგრესი, ნაწილი მშვილდოსნებისა, საომარი სამსახურისთვის უკვე უვარგისი ვეტერანები და ყველა სპილო. მთავარსარდლად მეფემ კრატეროსი უჩინა და უბრძანა გეზი აეღოთ არახოზია-დრანგიანა-კარმანიის გავლით ბაბილონისკენ. გზადაგზა, ყველგან, დანგრეული „მაკედონური წესრიგი“ უნდა აღედგინათ, შერყეული უნდა განემტკიცებინათ, ადგილობრივი სატრაპებისათვის ბრძანება გადაეცათ, რათა ყველას ზღვის გასწვრივ მოლაშქრე მეფისთვის

სურსათი დროზე მიეწოდებინა, და ასე ევლოთ დასავლეთისკენ. კრატროსმაც დასძრა „ჯარი დაბრუნებულთა“

თვითონ მეფე დელტისაკენ დაეშვა. იგი ასევე ფლოტს მიუძღოდა. სასმელეთო ჯარებს მდინარის მარჯვნივ ჰეფესტიონი მიუძღოდა, მარცხნივ — პითონი.

მესამე დღეს მოულოდნელი საშფოთარი ამბავი შემოაგებეს ალექსანდრეს. თურმე, პატალის მეფეს, მიორისს, იმის მაგივრად, რომ ალექსანდრესთვის მიცემული პირობა შეესრულებინა და მაკედონელებს ზარ-ზეიმით შეხვედროდა, ქალაქის მოსახლეობა აუყოლიებია და სადღაც უდაბნოში გადახვეწილა. ალექსანდრემ სვლა ააჩქარა. გზებზე სოფლები და დაბები დაცარიელებული ხვდებოდათ, იენისის ბოლოს უკვე პატალაში იყვნენ. ქალაქი მკვდარი დახვდათ, მოსახლეობისგან და ქონებისგან სრულიად დაცლილი და გახვეწილი. ყველაზე სწრაფმორბენალი ცხენოსნები აფრინა მეფემ. ვისაც წაეწივნენ, მოიხელთეს და მოიყვანეს. ესენი კიდევ მეფეჲ დანარჩენ ხალხთან დაგზავნა და შეუთვალა — მობრუნდით, თქვენს კერას და მეურნეობას მიჰხედეთ, ისე იცხოვრეთ, როგორც ცხოვრობდით, არავინაც არ გერჩითო. მოსახლეობის დიდი ნაწილი მართლაც მობრუნდა.

პატალაში ალექსანდრე შეუდგა თავისი კიდევ ერთი გრანდიოზული განაზრახვის აღსრულებას. იგი დარწმუნებული იყო, რომ ეს სამი მდინარე — ინდი, ტიგროსი და ევფრატი — ერთ ზღვას თუ ოკეანეს ერთვოდა. ასე, რომ მას შესაძლებლად მიაჩნდა, ინდის დელტიდან, „დიდი ოკეანის“ გავლით, უწყვეტად ზღვის გზით, ევფრატის შესართავთან მისვლა და მისი აყოლებით ბაბილონში ასვლა. ეს იმ დროისათვის „დიდი გეოგრაფიული აღმოჩენა“ იყო. ალექსანდრეც პირველი უნდა ყოფილიყო, ვინც ამ გზაზე გაივილიდა, იგი პირველი და საძირკვლის დამდები უნდა გამხდარიყო კიდევ ერთი ახალი გზისა. რომელსაც უაღრესად ცხოველმყოფელი როლი უნდა შეესრულებინა აღმოსავლეთ-დასავლეთ ქვეყანათა მრავალმხრივი და მრავალსაუკუნოვან ურთიერთობის ისტორიაში. ამავე გზაზე, ინდის დელტიდან ნილოსის დელტამდე, ახალ-ახალ „ალექსანდრიათა“ და „ალექსანდრეპოლისთა“ დაარსებას აპირებდა მაკედონელი. სწორედ ამ ქალაქებს უნდა აღესრულებინათ „ცენტრთა“ და „შუამავალთა“ როლი მაშინ ცნობილ სამივე კონტინენტს შორის ნივთიერ და სულიერ ფასეულობათა „მი-მო-ტანის“ საკაცობრიო ისტორიაში.

და დაიწყო ალექსანდრე მაკედონელმა მისთვის ჩვეული სიცხო-ველით და სისწრაფით. ჰეფესტიონს ბრძანება მისცა პატალაში ახალი ციხესიმაგრე, გემთსაშენი და სრულსივრციანი ნავსადგური აეშენებინა. პატალას აღმოსავლეთით უწყლო და უდაბურ ადგილებში ალექსანდრემ ჭარის ნაწილი გაგზავნა ქების ამოსათხრელად და სი-ცოცხლის დასაფუძნებლად.

ახალ აღმშენებლობათა სრულად გაშლისა და გაფართოების შემდგომ, ალექსანდრემ საჭიროდ ჩათვალა პატალადან ოკეანისკენ დამ-ვებულიყო და ყველაფერი თვისი თვალთ მოეხილა და შეესწავლა დედამიწის ამ ნაკვეთზე. და გაემართა ალექსანდრე ფლოტით, ინდის მარჯვენა განტოტებით, ოკეანისკენ.

პირველი დღე ცურვა მშვიდობიანად მიდიოდა, მაგრამ მეორე დღეს, ოკეანიდან წამოსული მოქცევით, საშინელი გრიგალი შემოიჭრა მდინარეში. რამდენიმე ხომალდი დაელუპათ, უფრო მეტი დაუზიანდათ. მაშინვე ნაპირს მიაღწენ გემების შესაკეთებლად და ზარალის ამოსავსებად. ალექსანდრემ მეომრები გაგზავნა, ადგილობრივ მცხოვრებთაგან ვისმეს მოსაყვანად — ვინც აქაურ გზასა და კვალს იცნობდა. მეომრებმაც რამდენიმე მეთევზე მოიყვანეს მეგზურებად და მომდევნო დილას ისევ განაგრძეს ცურვა. მდინარე თანდათან მალღებოდა და განიერდებოდა. ზღვის სუნთქვა მძლავრობდა, წყალი კვლავ მქვინვარებად, მეზღვაურებს ნიჩბების ხმარება აღარ შეეძლოთ. ცურვა ძალზე სახიფათო გახდა. მაშინ მეგზურებმა მარჯვენა მხარეს ერთი არხი აჩვენეს და ხომალდებიც შიგ შეაცურეს და იქ, მყუდრო წყალში ჩაუშვეს ლუზები. მაგრამ წყალმა უკუქცევა დაიწყო, არხი მეჩეჩად იქცა და გემები შლამში ჩაეფლნენ. ამას არც ევროპელები ელოდნენ და არც ინდოელ მეგზურებს სცოდნოდათ წყლის ამნაირი „მუხანათობა“. რამდენიმე საათი ასე იყვნენ გაოცებულნი და გაშეთებულნი. მერე ისევ დაიწყო მოქცევა, წყალი ადიდდა, ტალღები აიყარა, გემები აიტაცა, გააქანა და ნაპირებს შეანარცხა. ზოგი გემი გადაბრუნდა, ზოგი ერთმანეთს შეეღეწა და ჩაიძირა. დიდის გაჭირვებით განაპირდნენ გადარჩენილნი. ალექსანდრემ ისევ ბრძანა ზარალის ამოვსება. მან უკვე ისწავლა „სიბრძნე“ ზღვის მოქცევა-უკუქცევისა და მისი მიხედულობით წყალზე მოძრაობისა. მან, სანამ მისი ზღვაოსანნი დაზიანებულ ხომალდებს აკეთებდნენ, ორი საუკეთესო ხომალდი შეარჩია და სამხრეთით გაუშვა, მდინარის შესართავში არსებულ კუნძულ სკილუტასკენ. მეთევზე მეგზურები

არწმუნებდნენ ალექსანდრეს — სკილუტა ოკეანესთან ახლოა და ნაპირებიც მყუდრო აქვს გემების შესაფარებლად. ალექსანდრეს გაგზავნილი გემები სკილუტას ეწვივნენ, იქაურობა დაათვალიერეს, მობრუნდნენ და მეფეს მოახსენეს: კუნძული მართლაც ზღვასთან ახლოა, მისი ნაპირებიც მყუდრო სანავსადგურია, სასმელი წყალი ზედ უხვად მოიპოვება. ალექსანდრე მაშინვე წარემართა ფლოტიც, კუნძულს მიადგა, გემები დააბინავა, თვითონ კუნძულზე გადავიდა და დიდხანს უცქირა მღელვარე თვალით შორს, მდინარის შესართავსა და ზედ წამოზიდულ ოკეანის კაბადონს. გული აღარ დაუდგა, ფლოტი და ჯარი ლეონატოსს დაუტოვა, ოცდაათნიჩბიანი საუკეთესო ხომალდები აარჩია და ოკეანესთან შესახვედრად გასცურა. მდინარე ერთბაშად გაფართოვდა, ხუთი-ექვსი კილომეტრის სიგანეით გადაიშალა, მალე დასავლეთი ნაპირი სულ დაინთქა და ირგვლივ ზღვაური სამყაროს უსაზღვროებამ დაისადგურა.

ალექსანდრე მაკედონელი ინდოეთის, ანუ — როგორც მაშინ უწოდებდნენ — „დიდ ოკეანეში“ იდგა.

ხელმარცხნივ დაიხიეს, მდინარის მარცხენა შესართავისკენ; აქ მეორე კუნძულს მიადგნენ, გადავიდნენ და, ამ საოცარი ხილვის სამადლოდ, მსხვერპლი შესწირეს ალექსანდრეს „მამას“ — ამონს. ისევ გავიდა მეორე დღეს ზღვაზე ალექსანდრე, ისევ სკილუტაზე დაბრუნდა და ახლა, „ამონის მითითებით“, ბერძენ ღმერთებს შესწირა მსხვერპლი. მესამედ წავიდა იგი ზღვაზე, ამჯერად კიდევ უფრო თამამად, უფრო ღრმად, და როცა ხმელეთი უკვე თვალსამზირიდან სავსებით დაინთქა, როცა გარშემო, ჰორიზონტიდან ჰორიზონტამდე წყლის სტიქიონისა და ზემოდან ცის გარდა აღარაფერი ჩანდა, ალექსანდრემ წყვილად ხარი დაკლა და ზღვაში ჩაუშვა ზღვათა მბრძანებელ პოსეიდონის სადიდებლად, მერე ოქროს ფიალით ზღვას ზედაშე ასხურა და ის ფიალა კიდევ ოქროს თასებთან ერთად ზღვაშივე ისროლა — დიოსკურებისა და მისი წინაპრის, აქილევსის დედის, ვერცხლისფეხება თეტიდას შესაწირავად. სწირავდა, ლოცულობდა და შესთხოვდა ყველას — პოსეიდონსაც, დიოსკურებსაც, თეტიდასაც — სამშვიდობოდ და სასიკეთოდ მიეღოთ მათ საგამგებლო ზღვათა წიაღში მისი გემები და მისი ხალხი მშვიდობიანად ეტარებინოთ ისინი ინდოეთიდან ბაბილონამდე<sup>31</sup>.

მობრუნდა ოკეანიდან ალექსანდრე სკილუტაზე, ფლოტი გაიყოლია და ისევ პატალას მივიდა. აქ ჰეფესტიონს აკროპოლისის მშე-



ნებლობა უკვე დაესრულებინა და ნავსადგურს აშენებდა გამალე-  
ბული.

ალექსანდრემ კიდევ რამდენჯერმე მოათვალ-ერა და გულდასმით  
მოჩხრიკა ინდის დელტისა და ზღვის შესაყარი, უფრო სრული დაკ-  
ვირვებით გაიცნობიერა ამინდისა და უამინდობის, ქართა ძვრისა და  
ზღვის მოქცევა-უკუქცევის აქაური კანონზომიერებანი და ბოლოს  
მიადგა უმთავრესს — ზღვაზე გასვლის დროისა და საზღვაო ძალთა  
უფროსის — ნეარქოს-ადმირალის საკითხს.

მეფემ საზღვაო საქმეთა ყველაზე დიდი მცოდნე და უერთგულესი  
კაცი მოიხმო სათათბიროდ. ეს კაცი იყო ნეარქოსი, დაბადებით კრე-  
ტელი ბერძენი, მოქალაქე ამფიპოლისისა. — შენ უნდა მითხრა ვინ  
გამოდგება ევფრატისკენ მიმავალი ფლოტის მეთაურად, ვის ვან-  
დოთ ეგზომ მძიმე და საპასუხისმგებლო საქმეო, — ეკითხებოდა მეფე  
ერთგულ მეგობარსა და თანამებრძოლს. ნეარქოსმაც ხან ვინ დაასა-  
ხელა და ხან კიდევ ვინ, მაგრამ ალექსანდრემ ყველა დაიწუნა —  
ზოგი მერყევედ მიიჩნია, ზოგი ნაკლებ ერთგულად, ზოგი ნაკლებ  
მცოდნედ, სხვა ნაკლებ გაბედულად, სხვა კიდევ სამშობლოზე ზედ-  
მეტად მოწუწუნედ. როცა ყველა კანდიდატურა ასე დაწუნებულ  
იქნა, მაშინ უთხრა ნეარქოსმა ალექსანდრეს: „მეფეო, მე თვითონ  
ვარ მზად ვიკისრო საზღვაო ძალთა მეთაურობა და, ღმერთთა და  
კაცთა შემწეობით, სრული უკლებლობით მივიყვან მათ სპარსეთში,  
უკეთუ მაგ საზღვაო მგზავრობის აღსრულება ადამიანურ ძალებს არ  
აღემატება“. ალექსანდრემ ჯერ იუარა — არ შემიძლია შენისთანა  
ერთგული და ნამსახური კაცი ეგზომ დიდ ხიფათში ჩაეაგდოო. მაგ-  
რამ ნეარქოსიც უნდა მიმხვდარიყო, რომ მეფე ეშმაკობდა — მას  
სწორედ ერთადერთი ნეარქოსი სურდა საზღვაო ლაშქრობის მეთა-  
ურად. ნეარქოსიც „მიეძალა“ და ალექსანდრეც „ძლივს დათანხმდა“,  
ხოლო მესაჭეთუხუცესობა ერგო ისევ ონესიკრიტოსს.

ზღვაზე გასვლა დაინიშნა ოქტომბრის ბოლოსათვის.

მანამდე კი სახმელეთო ძალებით თვითონ ალექსანდრე უნდა დაძ-  
რულიყო დასავლეთისკენ, გზადაგზა, ზღვის სანაპიროებზე, რომ  
ქები ამოეთხარათ და სურსათი გაემარაგებინათ ზღვაზე მომავალთა-  
თვის.

325 წლის აგვისტოს მიწურულს ალექსანდრე, 35000 მეომრის თანხლებით პატალადან გამოვიდა და დასავლეთით, გედროზიისაკენ წარემართა. მან სწრაფად გაიარა ინდოეთ-გედროზიის გამყოფი მთები და მეცხრე დღეს შევიდა მდინარე არბიოსის (ახლ. პორალი) ხეობაში. მდინარის მარცხენა მხარეზე არბიტების ტომი ცხოვრობდა, მარჯვენა მხარეზე — ორიტებისა, ალექსანდრემ ჭარები კოლონებად დაჰყო, — ვინიცობაა, ომი დასკირვებოდა, ორივე ტომი ერთდროულად უნდა გაენადგურებინა. მეწინავე კოლონას თვითონ გაუძღვა მეფე, დანარჩენებს კი სარდლებად უჩინა ჰეფესტიონი, ლეონატოსი და პტოლემეაიოსი.

არბიტები მაკედონელთა გამოჩენისთანავე დედაბუდიანად აიყარნენ და უდაბნოებში გაიხიზნენ. ორიტები კი საომრად მოემზადნენ.

მეფეს მარცხენა მხარე ეკირა — ჰები უნდა ამოეთხარა ზღვით მომავალი ნეარქოსისთვის. ასედაც აღასრულა — ჰები გაამზადა და ფიცხლავ ორიტებს შემოუტია. წინ კავალერია მიუშვა, ძალზე გრძელ ფრონტზე გაშლილი ილებით, უკან ფალანგა მიაყოლა. სოფელს სოფელზე ილებდნენ მაკედონელნი. ზოგან წინააღმდეგობაც ხვდებოდათ, — ჩასაფრებული ორიტები მოწამლულ ისარს უშენდნენ მტერს. პტოლემეაიოსი დაიჭრა ასეთი ისრით. ძლივს დაიხსნეს ლაგიდი რაღაც ბალახის წამლებით. მაკედონელები დაუნდობლად სპობდნენ ყველას, ვინც წინააღმდეგობის გაწევას შეეცდებოდა. ორიტებიც მიწვდნენ, რომ „მსოფლიოს მძლეველებთან“ ვერაფერს გახდებოდნენ და ბედს შეურიგდნენ.

ალექსანდრეს ორიტთა ერთი დიდი სოფელი, სახელად სამბაკია, მისი წყაროს წყლები და ადგილმდებარეობა ძალიან მოეწონა და გადაწყვიტა ერთი „ალექსანდრია“ აქაც დაეარსებინა. ახალი ქალაქის მშენებლობა მან ისევ ჰეფესტიონს მიანდო, თვითონ კი გაერთიანებული ორიტებისა და გედროზიელების წინააღმდეგ საომრად წა-

ვიდა მთებში. მის მიახლოებაზე მოპირდაპირენი დაფრთხნენ და დაიფანტნენ. ორიტების ბელადები ალექსანდრეს ეახლნენ და ამერიდან სრული შორჩილება, ქვეშევრდომობა, მოხარკეობა და „მოჩანჩალეობა“ გამოუცხადეს.

ალექსანდრემ ორიტთა, არბიტთა და გედროხთა ტერიტორიები ერთ სატრაპიად გამოაცხადა, სატრაპად აპოლოფანოსი დანიშნა და პირველ დავალებად ეს მისცა: გედროხიის სიღრმეში მას სახორცე საქონელი და სხვა სურსათი უნდა გაემარაგებინა იქ გაუღლი ჯარის საკვებად. აქვე ლონატოსიც დატოვა მეფემ მისი ჯარით, და უბრძანა — მანამ დარჩენილიყო იგი აქ, სანამ ნეარქოსი არ მოადგებოდა ფლოტით ნაპირებს, მანამ კი მათთვის ყველაფერი უხვად უნდა გაემზადებინა; ახალი ალექსანდრიის დასახლებისა და აშენების დაჩქარებისთვისაც უნდა ეზრუნა ლონატოსს.

ორიტების ქვეყნიდან გედროხიისკენ დაიძრა ალექსანდრე. გზა უკვე უდაბნოზე მიდიოდა. მთელი დღეები ცხელ ქვიშაზე მიაბრჯებდნენ, მძვინვარე მზის ქვეშ. რაც უფრო ზღვას შორდებოდნენ და ქვეყნის სიღრმეში შედიოდნენ, სიცხე უარესად მძლავრდებოდა. სიარული შეუძლებელი ხდებოდა. ისევ ღამით მილასლასებდნენ. დღისით ცხელ მიწაზე დაეყრებოდნენ. ზღვის პირს მაინც არ იციწყებდა ალექსანდრე: ეამ-ეამად მალემსრბოლ მხედრებს აგზავნიდა ჭებრის ამოსათხრელად, ნეარქოსის ზღვაოსანთა დასარწყულებლად. ამ მხედრებმა, — რომელთაც თოანტი მეთაურობდა — ამბავი მოიტანეს — ზღვის პირზე ზღვის ცხოველთა ძვლებით აკინძული ქოხმახები ვნახეთო, შიგ ჩია, სისხლდაშრეტილი ადამიანები ცხოვრობენო, მარტო თევზით იკვებებიანო; იხითოფაგები (თევზის მჭამელნი) ყოფილანო, — დაასკვნეს ბერძნებმა და მაკედონელებმა და გზა განაგრძეს. ძალიან ჩქარობდნენ გედროხიის შუაგულში მისვლას, ვინათგან უკვე შიმშილი მკვიდრდებოდა ბანაკში. როგორც იქნა, მიიტანეს. ალექსანდრეს ბრძანებით, აქ დაგროვილი ხორცი და სხვა საჭმელ-სასმელი დიდი მომჭირნეობით გაინაწილეს. დიდი ნაწილი მაინც, მეფის მკაცრი განკარგულებით, აქლემებზე აკიდეს, მეფის ბეჭდებით დაბეჭდეს, შეიარაღებული მცველები მიუჩინეს და ნეარქოსისთვის ისევ ზღვაზე გაგზავნეს. მაგრამ როგორც კი ალექსანდრე და მისი ჯარი თვალს მიეფარნენ, მცველებმა საპალნეებს მეფის ბეჭდები თვითონ აჰყარეს და საჭმელ-სასმელიც თვითონ დაიტაცეს. ალექსანდრემ ეს სულწასული მცველები დაუსჯელი დატოვა, ახალი სურსათი

და სახორცე საქონელი შეაგროვა და ისევ გავზავნა ზღვისკენ. უფრო ძლიერი და სანდო რაზმებით.

გზა განაგრძეს ჯარებმა დასავლეთისკენ. უღაბნოური ხვატი და პაპანაქება სულის ამოხდენამდე აუტანელი ხდებოდა. მთელი დღეები მდიოდნენ და წყალი არსად ჩანდა. ჯარი შიმშილმა, წყურვილმა და უწყესრიგობამ მოიცვა. იხოცებოდა ცხენი, აქლემი, ჯორი. ადამიანები ხორცს გლეჯდნენ უმად. დამპალ ლეშსაც აღარ ერიდებოდნენ. ლუკმა-მძორისთვის ერთიმეორეს მოსაკლავად აღარ ინდობდნენ. ავადმყოფებით დატვირთული საზიდარებიდან ცხენებს ხსნიდნენ, კლავდნენ, ჭამდნენ და სხეულ ამხანაგებს ღვთისანაბარად ყრიდნენ უღაბნოში. სასიკვდილოდ იყო განწირული, ვინც კი მთავარ კოლონას ჩამორჩებოდა, მისთვის არავის ეცალა, დახმარების ხელს გაწვედნა, არც არავის შეეძლო, არც არავის სურდა. თუკი სადმე ჭას წააწყდებოდნენ, სვამდნენ მაშინვე, ცხელ შიგნეულზე და ბევრი ახლასმით იხოცებოდა. ერთ ღამეს, საღდაც სიცხით ჩამშრალი მდინარის კალაპოტში ათევდნენ ღამეს, კარვებში შემძვრალნი. უეცრად მოიჭრა მდინარე და გაიტაცა მძინარე ბანაკი. ბევრი დაიღუპა კაცი და საქონელი; წყალმა გაიტაცა კარვები, საქურველი, ლუკმის მარაგი. სტიქიას ძლივს გაასწრო თვითონ მეფემ, კარავი და ნაწილი საქურველისა მაინც წაართვა წყალმა.

ისევ ვილოდნენ განაწამებნი, და ერთხელ უღაბნოში ისეთი ქარბორბალა ამოვარდა, სილის კორიანტელმა სულ დააბნელა და ამოავსო ცისა და დედამიწის შესაყარი. ადგილობრივმა მეგზურებმაც გზაკვალი ველარ გაარკვიეს და ყველაზე მამაცი ჯარისკაცებიც სულთ დაეცნენ და აქვითინდნენ მწარე, ღიაცური ცრემლებით. მაშინ ალექსანდრემ შემოიყარა უძლიერეს მხედართა რაზმი, გააზხნევა და განამტკიცა და გაიყოლია გზის საძებრად, სამხრეთით, ზღვისკენ. უმრავლესობამ მაინც ვერ გაუძლო, ცხენები დაუვარდათ, თვითონაც დავარდნენ და დაირეცნენ, მხოლოდ ხუთმა შეძლო ბოლომდე მიჰყოლოდა ამ „რკინის მეფეს“. და მართლაც მიაღწიეს ზღვას. ცხენებიდან გადმოეშვნენ, მახვილები გაიძრეს და მიწის თხრა იწყეს, — სასმელ წყალს ეძებდნენ, არ მოეშვნენ და... იხეთქა წყალმა! ცხენს მოახტა ალექსანდრე და უკუიქცა ჯარის საძებრად. მიაგნო, გამოუძღვა და მოიყვანა წყალთან განაწამები ჯარისკაცები.

ისევ დასძრა ალექსანდრემ მისგან დასაპარებული და მისგანვე მკვდრეთით აღმდგარი ჯარები წინ, ქვეყნის სიღრმეში. შვიდი დღე

კიდევ იარეს და, როგორც იქნა, მივიდნენ გედროზის მშვენიერ და ნაყოფიერ ზთავარ ქალაქში — პურაში.

60 დღე გაგრძელდა ეს საშინელი უდაბნოური ოღრესა. ამ ცხრა წლის უმძიმეს ლაშქრობათაგან ასეთი ვასაქირი ჯერ არ დასდგომიათ, პატალადან გამოსული ჯარიდან მეოთხედი ძლივს გადაჩენოდა და-ღუპვას და გადარჩენილებიც აღარ ჰგავდნენ ადამიანებს — გამხდარ-ნი, ქანცგაწყვეტილნი, დაკონკილნი, სულით გატეხილნი, სასო-წართმეულნი. პურაში შეჩერდა ალექსანდრე, ჯარის დასასვენებლად, სულით და სხეულით ასაღორძინებლად და გასამტკიცებლად. ორი-ტიდა-გედროზის სატრაპი, რომელმაც უდაბნოში ტანჯვით მოარულ ჯარს სურსათი ვერ მიაწოდა, ალექსანდრემ მოხსნა და მის ნაცუ-ლად სატრაპად დასვა თოანტი.

გედროზიდან კარამანიაში გადავიდა ალექსანდრე. აქ ადრე წამო-სული კრატეროსი და მისი ჯარი უნდა დახვედროდა მას. აქვე წინას-წარ, კიდევ, ცენტრალური აზიის რამდენიმე სატრაპი ჰყავდა ალექ-სანდრეს დაბარებული.

325 წლის დეკემბერი დამდგარიყო. ნეარქოსისა და მისი ფლო-ტისა არაფერი იცოდა ალექსანდრემ, სიმშვიდე დაეკარგა, იმედი და-ელა, უსაზღვრო წუხილმა და ურვამ შეიპყრო. და სწორედ დროზე აცნობა მას აქაურმა, კარმანელმა „ჰიპარქოსმა“<sup>1</sup>. ხუთი დღის წინათ ნეარქოსმა სავსებით მშვიდობიანად და უკლებელად მოაყენა ფლოტი მდინარე ანამისის შესართავში, ქალაქ პარმონის ახლოს, და რო-გორც კი აქ შენი ყოფნა შეიტყო, ფლოტის დაბანაკებას შეუდგა, და ალბათ, სადაც არის თვითონაც პირადად გეახლებო.

უსაზღვრო სიხარულმა შეცვალა მეფის წუხილი. იგი ბედნიერი იყო იმ წუთს. მაგრამ დღე დღეს გადაება, ღამე ღამეს და ნეარქო-სი კი არ ჩანდა. მძებნელს მძებნელზე აგზავნიდა მეფე, მაგრამ ზო-გი უკან აღარ ბრუნდებოდა, ხოლო ვინც ბრუნდებოდა, იმით ნეარ-ქოსი და მისი ფლოტი თვალთაც ვერ უხილავთ, ყურითაც ვერ უს-მენიათ. გაცოფებულმა ალექსანდრემ ის „ჰიპარქოსი“ ბორკილებით შეკრა, ტყუილის თქმისთვის და ეგზომ საშფოთარი საქმის გამასხრე-ბისათვის.

არა და, ჰიპარქოსმა სრული სიმატლე უთხრა მეფეს: ნეარქოსი მართლა მოადგა ფლოტით კარმანიის ნაპირს; მართალია, მას გზაზე დიდი გაჭირვებანი ენახა, მაგრამ მაინც ინდოეთიდან წამოყვანილი ძალები — 100 გემი, 12000 ჯარისკაცი და 2000 მეზღვაური — მხო-

ლოდ მცირე დანაკლისით მოიყვანა კარმანიაში. აქ, ნეარქოსთან შემთხვევით მოხვდა კაცი, რომელმაც აცნობა მას ალექსანდრეს ყოფნა ამავე ქვეყანაში. იგივე გაუმეორა „ჰიპარქოსმა“, რომელმაც ალექსანდრესაც შეატყობინა სანატრელი ამბავი ნეარქოსის გამოჩენისა.

ნეარქოსმა ფლოტი დროზე დააბინავა და თავის თანამემწესთან, არქიოსთან ერთად და კიდევ ხუთი კაცის თანხლებით, დაადგა კარმანიის სიღრმეში მიმავალ გზას. მათ გზაზე კიდევაც შეხვდნენ ალექსანდრესაგან გამოგზავნილი მძებნელნი, ერთმანეთი ვერ იცნეს და ერთმანეთს შეშორდნენ. ნეარქოსისა და მისი თანამოლაშქრეების ცნობა მართლაც ძალზე ძნელი იყო. ზღვაზე თმა-წვერი უზომოდ გაზრდოდათ და გახუნებოდათ, დამწვარი და დანაცრული სახეც აღარ ეცნობოდათ. მერე, არქიოსი მოვიდა აზრზე და უთხრა ნეარქოსს — ეგ ცხენოსნები იქნებ ჩვენ გვეძებენ და ველარ გეცნობენ, ვინათგან ჩვენ აკი ისეთები აღარა ვართ, ინდოეთში რომ ვიყავით, ამიტომ. თუ კიდევ შეგხვდებიან, ვუთხრათ ვინცა ვართო. მართლაც, როცა მძებნელნი ისევ გადაეყარნენ, ჰკითხეს მათ, ვის ეძებთო, — ნეარქოსს და მის გემებსო, — იყო პასუხი. „მე ვარ ის, ვისაც თქვენ ეძებთ და წაგვიყვანეთ მეფესთან!“ — შესძახა ნეარქოსმა.

ასე მოიყარეს თავი, ბოლოს და ბოლოს, მეფემ და მისმა ადმირალმა. ალექსანდრემ ძლივს იცნო ნეარქოსი, ფლოტი მაინც დაღუპულად იგულისხმა და უთხრა მას ხანგრძლივი ქვითინის შემდეგ: შენ და არქიოსს ცოცხლებად რომ გხედავთ, მიმსუბუქდება ეგ უდიდესი დანაკლისი. ახლა კი მიამბე, როგორ დაიღუპა ჩემი ფლოტი და ჩემი ჯარი? ზღაპრული სიზმარივით ჩაესმის მეფეს ნეარქოსის პასუხი: შენ ორივე გყავს, მეფეო, ჯარიც და ფლოტიც, და ჩვენ მოვედით, რათა გაუწყოთ, როგორ გადაარჩა იგი და როგორ მოვალწიეთ თქვენამდე, და სხვა მისთანანი (რაიც აღუწერია თვითონ ნეარქოსს თავის ჩანაწერებში). უსაზღვრო იყო ალექსანდრეს სიზარული: იცნობდა ტიროდა, ნეარქოსს ეხვეოდა, ჰკოცნიდა და ზევსსა და ამონს იფიცებდა, ეს დღე უფრო ძვირფასია ჩემთვის, ვიდრე მთელი აზიის დაუფლებაო.

ამასობაში კრატეროსმაც მოატანა თავისი ჯარით, მხედრობითა და სპილოებით, კარმანიაში. მას წარმატებით და უზარალოდ გადმოელახა არახოზია და დრანგიანა. აქვე კარმანიაში ალექსანდრეს ეახლნენ სარდლები, რომლებიც მან ხუთი წლის წინათ დატოვა მიდიამი — კლენდროსი, ჰერაკონტოსი, აგათონი და სიტალკ თრაკიელი. მოვიდ-

ნენ და 5000 ქვეითი და 1000 მხედარი მოართვეს მეფეს. მოვიდნენ-  
აგრეთვე, არეისა და ღრანგიანის სატრაპი სტასანორი და პართის  
სატრაპის, ფრატაფერნის ძე ფარასმანი. ამთ მორეკეს მრავალი აქ-  
ლემი, ცხენების რემა და ხარების ნახირი.

მალე, — ვითარცა სჩვევიათ ცოცხალთ — მკვდრები დაეიწყებას  
მისცეს, ზარალი და ჭავრი გაიქარვეს და შეუდგნენ ზეიმს, ასპარეზო-  
ბას, ზორვას, ნადიმს, ღრეობას, თავაწყვეტელ და თავდავიწყებულ  
ღიონისიას. უხვი ჭილდოები დაარჩა. ალექსანდრემ ნეარქოსს თავი  
გვირგვინით შეუმკო; პეკესტა, — რომელმაც მეფე მალეებთან ბრძო-  
ლისას აშკარა სიკვდილისაგან გადაარჩინა — მერვე მკველად აიყვანა  
ალექსანდრემ.

აქვე მან განარიგა ახალი სალაშქრო გზები ჭარისა და ფლოტს-სა.  
მომავალ შესაკრებ ადგილად სუნა გამოაცხადა. ფლოტს სპარსეთის  
ყურეში ცურვა უნდა განეგრძო და მდინარე პასტიგრადით სუზას-  
კენ წასულიყო. სახმელეთო ჭარების ერთი ნაწილი ჰეფესტიონს უნ-  
და წაეყვანა, ზღვის სანაპიროებით ევლო და ისე მისულიყო სუზაში:  
მეორე ნაწილით — მაკედონური მხედრობით, ფაროსნებით და მშვილ-  
დოსნებით — თვითონ ალექსანდრე მეორე გზით გასწევდა სუზისა-  
კენ, — უფრო ჩრდილოეთის, პერსეპოლისისა და პასარგადის გზით.

ახალი სამოძრაო მარშრუტები ასე განარიგა ალექსანდრე მაკედო-  
ნელმა, მაგრამ მთავარი საზრუნავი მაინც სულ სხვა რამ იყო „მსოფ-  
ლიო ხელმწიფისა“. იგი ერთხელ კიდევ უნდა დარწმუნებულიყო,  
რომ მსოფლიო სახელმწიფოს მოპოვებაზე გაცილებით უფრო ძნელი  
მისი შენარჩუნება ყოფილა. ალექსანდრემ თვითონ იცოდა (და ეს  
სწორედ მის ღრმა აზროვნებაზე მეტყველებს), რომ მარტო იარაღი  
არ შეიძლება სახელმწიფოს შინაგანი სიმტკიცისა და სულიერ-სხეულე-  
ბრივი მთლიანობის საძირკველად იქცეს. მთავარი ქვაკუთხედი სახელ-  
მწიფოთა (ნით უფრო, მრავალხალხოვან მსოფლიო სახელმწიფოთა)  
მკვრივი ერთიანობისა მაინც ადამიანთა შორის (და ხალხთა შორის)  
სამეურნეო, ეკონომიური, ზნეობრივი, კულტურული და ფსიქოლო-  
გიური გამთლიანებაა. ეს თვითონ ალექსანდრეს „დოქტრინაც“ იყო,  
მაგრამ მისი განხორციელება — უკეთეს საერთოდ ოდესმე ამ იდეას  
განხორციელება ეწერა — უალრესად ხანგრძლივ დროს, ალბათ, მთელ  
თაობებს მოითხოვდა.

ხოლო, ახლა საკმარისი გახდა, ალექსანდრე სამი-ოთხი წლით  
თვალს მიფარებოდა და მისგან ნაწყალობევმა და მისგან აღზევებულ-

მა სატრაპებმა — მაკედონელებმა, ბერძნებმა, სპარსელებმა თუ ინდოელებმა — ცალკე ხელმწიფობა და ცალკე „ალექსანდრეობა“ მოინდომეს.

მაშ, ალექსანდრეს „ერთიან სახელმწიფოში“ მისსავე სოცოცხლეში თავს იჩენენ ცალკე „ერთეულ სახელმწიფოთა“ გამოყოფას ტენდენციები.

ალექსანდრესაც ისლა დარჩენოდა, ისევ მახვილისათვის მიემართა, მას სისასტიკე საერთოდ არ აკლდა. ახლა კი უსასტიკესობა იყო საჭირო და ესეც ჭარბად შეეძლო საერთოდ ზომიერებადარღვეულ მეფეს.

ჯერ, თვითონ კარმანიაში, აქაური სატრაპი, ასპატი, იმისთვის, რომ მან ჯარის მომარაგება სურსათით თავის დროზე ვერ უზრუნველყო, ალექსანდრემ ჯალათებს მიუგდო საწამებლად და სასიკვდილოდ. ასპატის ნაცვლად მეფემ კარმანიის სატრაპად ჯერ სიბირტიოსი, მერე ტლეპოლემოსი დანიშნა. მერე, არახოზიაში გამოვლისას კრატეროსმა შეიპყრო არეულობის მეთაური, სპარსი ორდანი და მეფეს მიჰგვარა კარმანიაში. მეფემ ორდანიც მაშინვე მისცა სიკვდილს.

ინდოეთიდანაც ცუდი ამბები დაეწია მეფეს კარმანიაში. „სატრაპია ინდოეთის“ მმართველი ფილიპე მოუკლავთ მის ქვეშევრდომ მოქირავნებს, თუმცა მკვლელები კიდეც მოკლულის მცველებს დაუხოციათ. აბისარიც მომკვდარა და ქაშმირის რაჯობისთვის ამტყდარა დიდი ცილობა. სატრაპია ინდოეთის მმართველობა ალექსანდრემ დროებით მიანდო ტაქსილეს და ევმენეს. აბისარის ტახტზე კი მისი შვილის აყვანა ბრძანა მაკედონელმა.

მიდიიდან რომ სტრატეგოსები ეახლნენ მეფეს, გამოირკვა, რომ მათგან სამი — კლეანდროსი, ჰერაკონტოსი და სიტალკ თრაკიელი — თურმე მიდიაში უაღრესად თვითნებურსა და თავგასულ ცხოვრებას ეწეოდნენ — ხალხს ავიწროებდნენ, არბევდნენ და აბუჩად იგდებდნენ, ტაძრებსა და აკლდამებს ტუხდნენ და ძარცვავდნენ. ალექსანდრემ სასამართლო გამართა. კიდეც ექვსასი მეომარი აღმოჩნდა მათი სტრატეგოსების თანამძარცველი. მხოლოდ ჰერაკონტოსმა მოახერხა თავის გამართლება; დანარჩენები — კლეანდროსი, სიტალკი და ის ექვსასი მეომარი იქვე ჩაახოცინა მეფემ. დავიწყებული იქნა ისიც, რომ პარმენიონის მკვლელობაში ალექსანდრეს დიდი სამსახური გაუწიეს სწორედ სიტალკმა და კლეანდროსმა.



მეფემ სასტიკო ბრძანება გაუგზავნა ყველა თავის სატრაპს — დაუ-  
ყოვნებლივ დაეშალათ ყოველი დაქირავებული ჯარი, რომელიც პი-  
რადად მეფის ბრძანებით არ იყო შეყრილი?.

ალექსანდრემ კარმანია დატოვა და სპარსეთს მივიდა. მისგან და-  
ნიშნული აქაური სატრაპი, ფრასპორტი, გარდაცვილიყო. სატრა-  
პის ტახტი, — ისე რომ ინდოეთში მყოფ ალექსანდრეს ამის შესახებ  
არაფერიც არ შეატყობინეს — თვითნებურად დაუჭერია ერთ სპარ-  
სელ წარჩინებულს, ორქსინეს. პირველი, რამაც სპარსეთში, პა-  
სარგადში მისვლისას ალექსანდრეს გულისწყრომა გამოიწვია, იყო  
შებღიწვა სახელოვანი კიროს უფროსის საფლავისა. ადრე, ხუთი  
წლის წინათ, პასარგადში ყოფნისას, ალექსანდრემ ხელახლა მოაწ-  
ყო კიროსის აკლდამა, ქვის ნაგებობა გაასწვეინა, შიგნით აკლდა-  
მა და კუბო გააწმენდინა და მოახატვინა, ხელახლა დაახურვინა და  
კვლავ აღამართვინა ფილა, ეგზომ მრავლისმეტყველი წარწერით:  
„ადამიანო, ვინც არ უნდა იყო შენ და საიდანაც არ უნდა იყო მო-  
სული — და რომ მოხვალ, მე ამაში დარწმუნებული ვარ — იცოდე,  
მე ვარ კიროსი, სპარსთა მბრძანებლობის დამფუძნებელი. და ნუ  
შეგმურდება შენ ეს ერთი პეშვი მიწა, რომელიც ახლა ჩემს სხეულს  
ფარავს“. სპარსელ მოგვებსაც უბრძანა მაშინ ალექსანდრემ, ისევ  
ძველებურად ელოცათ, მსხვერპლი ეწირათ და პატივი ეცათ სპარს-  
თა უდიდესი წინაპრისათვის. ახლა კი კიროსის სამარხი დაქცეული,  
გაძარცვული და შეგინებული იყო. თალი და კარები დაეღწათ, კუ-  
ბოს სახურავი მოეგლიჯათ, ცხედრის ნაშთები ამოეღოთ და მტვერში  
გადაეყარათ. ყოველი ძვირფასი ნივთი და სამკაული გაეტაცებინათ.  
ალექსანდრემ უბრძანა არისტობულეს, ხელახლა ჩაესვენებინა ნეშტი  
კუბოში, სხვაც ყველაფერი თავის ადგილზე დაებრუნებინა, აღედ-  
გინა და სამეფო ბეჭდით დაებეჭდა მისი უღირსი თანამემამულეების-  
გან ეგზომ მკრეხელურად შეგინებული დიდი წინაპრის საძვალე-  
თვითონ საკუთარი ძვირფასი ლაბადა მოიხსნა ალექსანდრემ და კი-  
როსის კუბოს ქვეშ დაუფინა, ზემოდან კი ოქროს გვირგვინი დაუს-  
ვენა. მას უკან დამნაშავეები მოიკითხა ალექსანდრემ. არავინ გამო-  
ეხმაურა. აკლდამის მოღარაჯე მოგვები შეიპყრო, აწამა, მაგრამ მა-  
ინც ვერ შეიტყო, რადგან მოგვებსაც არ სცოდნოდათ, ვისი ხელით  
მოხდა ეს მკრეხელობა. ალექსანდრეს ისღა დარჩენოდა, მთელი  
რისხვა გადაეტანა სატრაპზე; რომელიც მას პერსეპოლისში ელოდებო-  
და?.

პერსეპოლისშიც ჩავიდა ალექსანდრე. შემოეგება ორქსინე; მაგრამ შემოაგებეს საჩივრებიც ორქსინეზე. თურმე გასაოცარი თავაშვებულობით და თვითნებობით განაგებდა თვითნებურად აღზევებული სატრაპი სპარსეთის სატრაპიას. ანგარება, გამომძალველობა, ტაძრებისა და სამეფო აკლამების ძარცვა — ყველაფერი გამოძიებით დაუდასტურდა ორქსინეს. მეფის ბრძანებით იგი ჩამოახრჩვეს.<sup>4</sup> მის ნაცვლად, სპარსეთის სატრაპად ალექსანდრემ დასვა მალბთან ბრძოლის გმირი პევკესტა, რომელსაც მაკედონელ პეტერთა შორის ყვლაზე უკეთ ეხერხებოდა სპარსული ყაიდით ცხოვრება. პევკესტა მაკედონელთაგან ერთადერთი იყო, ვინც სპარსული ტანსაცმელი ჩაიცვა, ყველაფერი წარმატებით აითვისა სპარსელებისა — ენა, ზნე-ჩვევა, მიხრამოხრა. ამიტომაც ფრიად შეიყვარეს იგი სპარსელებმა<sup>5</sup> (და ალექსანდრესაც ხომ ეს უნდოდა.

პერსეპოლისში ალექსანდრეს გამოეცხადა მიდიის სატრაპი, ატროპატი, და თან მოიყვანა ბორკილდადებული მიდიელი დიდკაცი — ბარიაქსი, რომელსაც თავი მიდიელად და სპარსელთა მეფედ გამოუცხადებია. ალექსანდრემ ბარიაქსიც მაშინვე მისცა სიკვდილს.

პერსეპოლისი დატოვა ალექსანდრემ, მისთვის ნაცნობი „სპარსეთის კარებიც“ გაიარა და 324 წლის თებერვალში სუზას მივიდა. მთელს სახელმწიფოში გავრცელებული იყო აზრი, რომ ალექსანდრე მეფეს მის სატრაპებზე მეტად ხალხი „უყვარს“, ხალხი „ეცოდება“, სატრაპთაგან შევიწროებულ ხალხს „ესარჩლება“ და ხალხის მჩაგვრელ სატრაპებს სასიკვდილოდ არ ინდობს. ამიტომ თამამად მიდიოდნენ „დემოკრატ მეფესთან“ საჩივრებით მისი „საყვარელი ხალხის“ წარმომადგენელი. სუზაშიც უხვად დახვდა საჩივრები ალექსანდრეს. ამ საჩივართა განხილვამ დაარწმუნა მეფე, სიკვდილით დაესაჯა სუზის მმართველი აბულითი და მისი ძე ოქსიართი, პარეტაკენების სატრაპი — და დასაჯა კიდევც.

კამანიაში რომ სტრატეგოსმა პერაკონტოსმა თავი იმართლა და სიკვდილისგან მაშინ თავი დაიხსნა, ახლა აქ მის შესახებ ალექსანდრეს ახალი საჩივარი შეაგებეს. თურმე პერაკონტოსს სუზაში ტაძარი გაუძარცვავეს. ალექსანდრემ მაშინვე მოაკვლევინა პერაკონტოსი.

სუზაში, დათქმისამებრ მოვიდნენ ჰეფესტიონი სახმელეთო ჯარებით და ნეარქოსი სამხედრო ფლოტით. ახლა ყველა სუზაში იყო — მეფის მეგობრებიც, სარდლებიც, ჯარისკაცებიც, მეზღვაურებიც, მოწვეულებიც — მოწვეულნი, ზოგი სასიკვდილოდ, ზოგი სა-

ქორწილოდ... დიახ, მარტო სასიკვდილოდ კი არა, არამედ სალხ-ნოდ და საქორწილოდაც.

სუზაში ყველაფერზე საკვირველი, მანამდე გაუგონარი და თვალთუხილავი სწორედ ქორწილი იყო. „მსოფლიო ქორწილი“, რომელსაც „მსოფლიო მეფე“ იხდიდა. იმ დღეს 10000 ევროპელი ამდენივე აზიელ ქალზე ქორწინდებოდა. ასეთი იყო ნება ალექსანდრე მაკედონელისა, რომელსაც სურდა მსოფლიოსთვის სიმბოლურად ეჩვენებინა ევროპისა და აზიის ხალხთა სამუდამო შეერთება, დამოყვება და დანათესავება.

„მსოფლიო ქორწინების“ მთავარი წყვილი თვითონ ალექსანდრე და მისი ახლად დანიშნული ქალი იყო. იგი მეორე ქორწინებით (როქსანა სოგდიანელის შემდეგ) ცოლად ირთავდა სპარსეთის მეფის, დარიოს III-ის ასულს — სტატირას. სპარსელ ქალებს ირთავდნენ ალექსანდრეს მეგობრებიც: ჰეფესტიონი — ბარსინას, დარიოსის უმცროს ასულს, სტატირას უმცროს დას; კრატეროსი — ამასტრიდას, ოქსიართის ასულს; პერდიკა — მიდიის სატრაპის, ატროპატის ასულს; პტოლემეაოსი — არტაკამას, არტაბაზის ასულს; ევმენე — არტონიდას, არტაბაზის მეორე ასულს; ნეარქოსი — მენტორ როდოსელის ასულს; სელევკოსი — სპიტამენ სოგდიანელის ასულს. სულ მეფის ოთხმოცი „ჰეტერი“ ქორწინდებოდა აზიელ ქალებზე იმ დღეს.

შუაზე მეფის უზარმაზარი, ძვირფასქსოვილიანი კარავი იდგა. იგი ეყრდნობოდა ოქრო-ვერცხლით და ძვირფასი ქვებით მოოჭვილ ორმოცდაათ მაღალ სვეტს. შიგნით კარავი მოგებული იყო უძვირფასესი ხალიჩებით და ხალებით. კარვისა და მასში გადაშლილი საქორწინო სუფრის სიგრძე ათას ნაბიჯს აღწევდა. ერთ მხარეზე სასიძოებისთვის ასი ვერცხლისფეხებიანი დივანი გადაებათ ერთმანეთისთვის. ხოლო შუაზე მეფის დივანი იყო ოქროისა. სამეფო საყვირებმა საქორწინო ნადიმის დაწყება ამცნეს. აქეთ-იქით გაშლილ სუფრებზე სტუმრები ჩამორიგდნენ. საყვირებმა ხელახალი გრიალით ამცნეს, რომ მეფე საღვთო ზედაშეს აპკურებდა. ყველამ მიბაძა მეფეს — ყველამ ზედაშე აპკურა მის წინ დადგმული ოქროს თასით (ეს თასებიც მეფისგან საჩუქრად ეძღვნებოდა ყველას). მესამე საყვირზე საპატარძლოები შემოვიდნენ. სპარსული წესით ჩადრ-დაბურვილნი, და თავიანთ საქმროებს მიუსხდნენ.

„მსოფლიო ქორწილი“ და ნადიმ-ღრეობა ერთი კვირა გაგრძელდა. მოდიოდნენ და საქორწინო საჩუქრებს მოართმევდნენ აზიისა და

ევროპის სატრაპიების, ოლქების, ქალაქების წარმომადგენელნი ელჩები, კერძო სტუმრები. 15000 ტალანტად ღირებული მარტო ოქროს გვირგვინები შემოვიდა საჩუქრად. ალექსანდრეც უხვად გასცემდა. 10000 ოქროს თასი დაარიგა. ყოველი საპატარძლო თვითონ გაამზიხთვა უმდიდრესი მზითევით. ყველა სასიძო უხვი საჩუქრებით აავსო. მეფემ გამოაცხადა ვალში ჩავარდნილ მექორწილეთა ვალების გადახდა და იქვე გადაიხადა კიდევ, სულ — 20000 ტალანტი. მეფემ თავის ხელით ოქროს გვირგვინები დაადგა თავზე — ჰეკესტას, ლეონატოსს, ნეარქოსს, ონესიკრიტოსს, ჰეფესტრონს, ლისიმახოსს. არისტონს, პერდიკას, პტოლემაიოსს და პითონს. ბოლო აღარ უჩანდა სმას, ზმას, ჰომერულ ხარხარს და ხორხოცს, ერთმანეთს ეჯიბრებოდნენ ბერძენი რაფსოდები, ფლეიტისტები, არფისტები, პოეტები, სოფისტები, გიმნაზისტები, მოქიდავენი, მოჭირითენი, მოკრივენი, მსახიობნი, სპარსელი მოგვები და მხედარნი, ინდოელი ჯამბაზები და ილუზიონისტები<sup>6</sup>.

ბოლოს, ქორწილის დასასრულს, თავისი „საკუთარი სიტყვა“ თქვა სფინემ, ანუ კალანემ — იმ კალანემ, ბრამპანმა და ფილოსოფოსმა, ინდოეთიდან რომ წამოჰყვა ალექსანდრე მაკედონელს. აქამდე მოსულიყო იგი, უმძლავრეს ჯარისკაცთა გვერდით, უმძიმეს გზათა მღვწველი, და აქამდე ისე დაბერებულიყო, ფრჩხილიც რომ არ წამოსტკენია. მხოლოდ ახლა იგრძნო 73 წლის კალანემ რაღაც ყრუ ტკივილი კუჭის არეში. მაშინვე მეფესთან მივიდა და უთხრა — მე არ მსურს, ამქვეყნიური ჩემი ცხოვრება სხეულებრივი ტკივილებით დავასრულო; ჩემს სამშობლოში, ინდოეთში, ყველაზე დიდ სირცხვილად ითვლება, როცა ავადმყოფობა არღვევს ადამიანის სულიერ სიმშვიდეს, ამიტომ ჩემი რწმენა მე მკარნახობს ავიდე კოცონზე და ფერფლად ქცეული სხეულიდან თავდახსნილი სული ჩემი გადავიდეს სხვა სამყაროში.

მეფეს არ შეეძლო წინაღობა „საოცარი ინდოელის“ რწმენისმიერ ურყევლობას და უბრძანა პტოლემაიოსს, გაემზადებინა კოცონი კალანეს საზეიმო გარდასახვისა და „გარდაცვალებისთვის“. კოცონიც აღიმართა, ქალაქის შუა მოედანზე; კოცონის თავზე ოქროს საწოლი დაედგათ. დღევ დაინიშნა და დილიდანვე დაიწყო ჯარისა და ხალხის საზეიმო სვლა კოცონის გარშემო, მოდიოდნენ ცხენოსანნი და ქვეითნი, ბრწყინვალედ აღჭურვილნი, სპილოები შეჯავშნულნი, მერე ხალხი დას-დასად, არომატული სასხურებლებით, სამეფო ტან-

საცმლით, ხალიჩებით, ოქროსა და ვერცხლის თასებით. მერე მოდიოდა თვითონ კალანე, ცხენზე აღმჯდარი. ცხენიდან ჩამოსვეს. საესეებით მშვიდად, პირზე საზეიმო ღიმილით, ხელის ჩამორთმევით დაემშვიდობა ყველა ახლომყოფს და სთხოვა მთელ საკრებულოს, ის დღე, მის სახსოვრად, სულ ზეიმსა და მხიარულებაში გაეტარებინათ — მათ საყვარელ მეფესთან ერთად, რომელსაც მე თვითონ მალე ბაბილონში შევხვდებით (მაშინ ყურადღება არავის მიუქცევია ამ უკანასკნელი სიტყვების საშინელ „წინასწარმუწყებლობაზე“); მერე, ის ცხენი, რომლითაც კალანემ თავისი ამქვეყნიური წუთისოფლის უკანასკნელი სივრცე და დრო განკვეთა, ლისიმახოსს აჩუქა, დანარჩენ „მეგობრებს“ ოქროსა და ვერცხლის თასები და ხალათები დაურიგა და კოცონზე ავიდა დიხჯი, აურევნელი ნაბიჯებით.

კოცონის ზეთავიდან ერთხელ კიდევ მზერამოვლებით გამოემშვიდობა ხალხსა და ჯარს, თმა აიკვეცა და კოცონზე დააგდო, ტანზე ზედაშე იპკურა, ვითარცა სამსხვერპლო ცხოველმა, თავზე გვირგვინი დაიდგა და ინდურ საწესო საგალობლებს მოჰყვა; ბოლოს, გალობას რომ მორჩა, სახე მზისკენ მიიქცია, ხელები აღაპყრო და საწოლზე წამოწვა. ეს ნიშანი იყო და ცეცხლი შეუგზნეს. ატყდა საყვირების და ბუკების გრიალი, ჯარის საოშარი ზახილი და იარაღის ზათქი-ზრიალი. სპილოები შემაზრზენი ყვილით ესალმებოდნენ მათ „თანამემამულეს“. ხანძარი აიჭრა და გარს შემოადგა უძრავად და უშფოთველად მლოცველ ინდოელს. მალე იგი სულ დაიფარა და დაინთქა ცეცხლის სტიქიონში.

ალექსანდრე არ დაესწრო თავისი მეგობრისა და მასწავლებლის თვითდაწვას. მხოლოდ ესა თქვა გაოცებულმა: კალანემ ჩემზე უფრო ძლიერი მოწინააღმდეგე დაამარცხაო.

დიდი სიმბოლიკაც ინაკვთება ალექსანდრესა და კალანეს სიახლოვეში. ალექსანდრე ამ შემთხვევაშიც, თითქოს, ისევ თავისი „დოქტრინის“, აღმოსავლეთისა და დასავლეთის „შერწყმის“ ერთგული რჩებოდა: თვითონ, თავის პიროვნებაში, ერთმანეთს უერთებდა და „ურწყავდა“ დასავლეთელი არისტოტელესა და აღმოსავლელი კალანეს ფილოსოფიურ გააზრებებს.

სუზაში, იგივე „დოქტრინის“ პრაქტიკული ნაყოფი იხილეს და „იწვნიეს“ მაკედონელებმა. ამ შემთხვევაში საქმე შემდეგში იყო: ალექსანდრეს რამდენიც არ უნდა ეძახნა და ლოზუნგები ეფრიალებია — მაკედონელები და სპარსელები გაერთიანდით და გაერთიან-

დითო — მაინც ყველაფერი გარეგნული, ფორმალური და ფიქტიური რჩებოდა. დარიოსის სიკვდილის შემდეგ, ალექსანდრე სამხედრო სამსახურში ხომ სპარსელებსაც იწვევდა და მომავალ ომებში, — ვთქვათ, ინდოეთში — სპარსელების ღვაწლიც, თუ მეტი არა, მაკედონელების ღვაწლს არ ჩამორჩებოდა; მაგრამ სპარსელი თავისი ხასიათით, შეიარაღებით და საომარი წესებით მაინც სპარსელი იყო და მაკედონელი მას მაინც ისე უცქერდა, ვითარცა მონობისთვის დაბადებულ ბარბაროსს და არა როგორც თანასწორ თანამებრძოლსა და საერთოდ ამ პლანეტაზე თანასწორუფლებიან თანამცხოვრებს. უეჭველად, ალექსანდრეც კარგად ხედავდა, რა იყო მისი პოლიტიკის პრაქტიკაში ფაქტობრივი და რა ფიქტიური, რა ნამდვილი და რა მოჩვენებითი. ამიტომ ალექსანდრე ცდილობდა სპარსელები როგორმე „გაემაკედონელებინა“, ან „გაეელინებინა“. აზიელების ასეთი „ევროპეიზაციის“ უმოკლეს გზად ხელმწიფეს ბერძნული ენისა და მაკედონური საომარი ხელოვნების ათვისება მიიჩნდა, და აკი სუზაში მოსვლამდე შვიდი წლით ადრე, 331 წელს, ალექსანდრეს ბრძანებით, 30000 სპარსელი ყმაწვილი აიყვანეს და მაკედონურ სამხედრო სასწავლებლებში გაამწესეს. ახლა — როცა ალექსანდრეს საომარი ძალები 25000 მეომარზე დასულიყო — ერთბაშად მოიყვანეს სწორედ ის 30000 დავაქაცებული სპარსელი, რომლებიც უკვე აღარ იყვნენ დარიოსის დროინდელი სპარსელები, არამედ — „გამაკედონელებული სპარსელები“, აღზრდილნი ბერძნულ ენაზე, დასილაღებულნი მაკედონური აღჭურვილობით, გაწვრთნილნი მაკედონური საომარი ხელოვნებით. ეს ალექსანდრეს ახალი ჯარიც იყო და მისი ახალი სახელმწიფოს ახალი მოქალაქეებიც.

ალექსანდრემ ამ ახალი, „ევრაზიული ჯარიდან“ ის მხედრები, რომლებიც წარმომავლობით და მოხდენილი გარეგნობით გამოირჩეოდნენ, მეფის „მეგობართა“ კავალერიაში ჩარიცხა, დანარჩენებს მაკედონელებიც შეურია და მეხუთე ჰიპარქია ჩამოაყალიბა. მან სამეფო აგემოში შეიყვანა ისევ „ევროპეიზებული აზიელები“: კოფეტ არტაბაზის ძე, გიდარნი და არტიბოლა მაზეიოსის ძენი, სისინი და ფარასმანი ფრატაფერნის ძენი, აიგობარ მითრობის ძე და იტან ოქსიართის ძე, როქსანას ძმა (ალექსანდრეს ცოლისძმა). აგემის უფროსად, კიდევ, ალექსანდრემ დანიშნა ბაქტრიელი ჰისტასპი<sup>8</sup>.

მაკედონელი მეომრები ძალიან ააღელვა მათი „მეტოქეების“ მოყვანამ და მათდამი მეფის ეგზომ დიდმა ყურადღებამ და პატივისცე-

მამ. ალექსანდრეს ჩვენ უკვე აღარ ვკვირდებითო, ბარბაროსები თავზე დაგვასვაო, თვითონაც გაბარბაროსდაო, მაკედონია შეიძულა და აღმოსავლეთი შეიყვარაო; მისი გადაგვარება მაშინ დაიწყო, ტანი რომ მიდიური და სპარსული ტანსაცმლით შეიმოსაო; პევეკესტას რომ აგრე სულში იძვრენს, სწორედ იმიტომ, რომ პევეკესტამ ყოველი მშობლიურ-მაკედონური ბარბაროსულ-სპარსულზე გაცვალაო; ან ის ქორწილი რას ჰგავდა, ალექსანდრემ რომ გადაგვიხანდა — ცოლებად სპარსელები შეგვრთო და ქორწილიც სპარსული წესებით ჩაატარაო.

სწორედ სააჩანყო განწყობილება ღვიოდა მაკედონელ ვეტერანთა ბანაკში. მხოლოდ მცირე საბაბი იყო საკმარისი ასაფეთქებლად.

ალექსანდრემ გადაწყვიტა სუსადან ასულიყო ტიგროსზე, ქალაქ ოპისში, სადაც ორი გზა იყრებოდა — ერთი დასავლეთით, მესოპოტამიის სიღრმეში, მეორე აღმოსავლეთით, მიდიისკენ. პეფესტიონს სახმელეთო ჯარების უმრავლესობა ჩააბარა და ხმელეთით გაგზავნა ოპისისაკენ, თვითონ კი ალექსანდრე, აგემით, ფაროსნებით, მცირე მხედრობით, ნეარქოსს ჩაუჭდა ხომალდებში და სპარსეთის ყურის გავლით ტიგროსის შესართავს მიადგა. აქ კიდევ ერთი „ალექსანდრია“ დააარსა მეფემ და ამის შემდეგ შესცურა ტიგროსში. მდინარე რამდენიმე ადგილას კაშხალით იყო ალაგმული. ალექსანდრემ ეს ძველი კაშხალები დაანგრევინა და ტიგროსი თავისუფალი ნაოსნობისა და სავაჭრო მიმოქცევის მდინარედ აქცია.

324 წლის ივლისში ალექსანდრემ და მისმა ყოველმა ჯარმა თავი მოიყარეს ქალაქ ოპისში. ჯარის მღელვარება სუსიდან წამოსვლის შემდგომ სრულებითაც არ დამცხრალიყო.

ალექსანდრემ ქალაქის გარეთ, მინდორზე, ჯარები შეჰყარა და, როგორც თვითონ ვარაუდობდა, სწორედ ჯარისკაცთათვის ძალზე სასიხარულო და სასიამოვნო გადაწყვეტილება გამოაცხადა: მე ვათავისუფლებ და სამშობლოში ვაბრუნებ ყველა ხანდაზმულ და ჭრილობებით დასუსტებულ ჯარისკაცსო; ვათავისუფლებ და ვაბრუნებ ყოველ მათგანს ისე დასაჩუქრებულს, სამშობლოში რომ ყველა შენატრებს და მათი შემხედვარე ყოველი ახალგაზრდა მაკედონელი სურვილით აღინთება ბრძოლასა და შრომაში თავმისაცემადო.

მაგრამ რას ელოდა და რას წააწყდა ამის მთქმელი მეფე: მაკედონელი ჯარისკაცები ავად აღრიადლდნენ და აყარყაშდნენ, — როგორ თუ მეფე ჩვენ, ამდენი სამსახურისა და დამსახურების შემდეგ, თავიდან გვიშორებსო, როგორ თუ ჩვენ თავს ის პრანჟია ბარბაროსები

ამჟობინაო; ერთიც ვნახოთ, ჩვენ წავიღეთ და ეგ ვისთან ერთად იომებსო, — ალბათ, მამამისთან ერთადო („ამონის ძეს“ უკაცუნებდნენ).

რისხვამ აიტანა ალექსანდრე. ტრიბუნიდან გადმოსტა და შიგ ჯარში შევარდა, ცამეტი ყველაზე აქტიური მოთავე თავისი ხელით გამოათრია და მცველებს მიუგდო საგანგებოდ დასასაჭელად.<sup>9</sup> ისევე აიქრა ტრიბუნაზე და უკვე ენაჩაწყვეტილ ჯარს ჯავრით აღსავსე სიტყვით მიმართა: მე ახლა მოგმართავთ არა იმისთვის, რომ დაგამშვიდოთ და დაგინარჩუნოთ, — საითაც გნებავთ, იქ მიბრძანდით, — არამედ მე უნდა გაგაგებინოთ, რანი იყავით თქვენ ადრე და რა მდგომარეობაში მყოფნი მეყრებით დღეს მე. ჯერ, მამაჩემის, ფილიპეს დროით დავიწყოთ. ფილიპემ თქვენ მოგისწროთ მათხოვრებსა და მაწანწალებს; გეცვათ ტყაბუჭი და მიუვალ მთებში მწყემსავდით თითო-ოროლა ცხვარს და ძლივძლივობით იგერიებდით ილირიელების, ტრიბალებისა და თრაკიელების თავდასხმებს.

ფილიპემ კი თქვენ მყრალი ტყაბუჭის ნაცვლად ჩაგაცვათ ძვირფასი ქლამიდა, ჩამოგაბრძანათ მთიდან ბარში, გადაგაქციათ თქვენი მათხარი მეზობლებისთვის მრისხანე მეომრულ ძალად, გასწავლათ ბრძოლა, მტრისა და მოყვრის დახვედრა, დაგასახლათ ქალაქებში, მოაწესრიგა თქვენი ცხოვრება, გაგზარდათ და მიგაჩვიათ კეთილ ჩვევებს, კანონებს და კანონების პატივისცემას. ფილიპემ თქვენ გაგაბატონათ ყველა იმათზე, ვისაც ადრე ტყვედ და მონად მიჰყავდით, ვისაც თქვენი ქონება მიჰქონდა, — თქვენ, მონებო! ფილიპემ შემოუერთა მაკედონიას დიდი ნაწილი თრაკიისა, დაიპყრო ზღვისპირეთი და სავაჭრო გზებზე გაიყვანა მაკედონია; ფილიპემ შეგიქმნათ სამთამადნო საქმიანობა; მან გაგაბატონათ იმ თესალიელებზე, ადრე რომ მათ წინაშე შიშით სული გძვრებოდათ; მან დაამდაბლა ფოკეა და ამით თქვენ გზა გაგიხსნათ შუა ელადისკენ, ადრე რომ იქ ფეხის ჩაღმასაც ვერ იღირებდით.

ფილიპემ ათენელები და თებელები — ახლა უკვე ჩემი მონაწილეობით — ისე დაამდაბლა, რომ თქვენ კი აღარ უხდით მათ ხარკს, არამედ ისინი იღვწიან თქვენი სიკეთისა და უვნებლობისთვის. ფილიპემ დაამყარა წესრიგი პელოპონესში. ფილიპე გამოაცხადეს მთელი ელადის სრულუფლებიან მთავარსარდლად და ამან უდიდესად გაუთქვა სახელი მაკედონიას. ყველაფერი ეს გააკეთა მამაჩემმა თქვენთვის, თავისთავადი ეგზომ დიდი საქმენი, მაგრამ ყველაფერი მაინც



არის აზარაობა იმასთან შედარებით, რაც შემდგომ მე გამიკეთებია თქვენთვის.

მაჰაჩეშმა მე დამიტოვა რამდენიმე ოქროსა და ვერცხლის თასი; ხაზინაში 60 ტალანტიც აღარ იყო და ფილიპეს ვალი 500 ტალანტს უდრიდა. მე კიდევ 800 ტალანტი ვალის აღება დამქირდა. და გამოვედი მე ქვეყნიდან, რომელიც თქვენ ხეირიანად ვერც კი გაძლებდათ. და უცებ გაგისხენით გზა ჰელესპონტისკენ, მიუხედავად იმისა, რომ ზღვაზე ჯერ ისევ სპარსელები ბატონობდნენ. მერე მე დავამარცხე დარიოსის სატრაპები და თქვენს სამფლობელოს შემოვუერთე მთელი იონია, მთელი ეოლიდა, ორივე ფრიგია და ლიდი; ალყაში მოვაქციე და ავიღე მილეტი. ყველა დანარჩენი მიწები მათივე ნებით დამემორჩილა და მოგართვით თქვენ.

სიკეთენი ეგვიპტისა და კირენისა, რომლებიც მე მოვიპოვე მშვიდობიანი გზით, აგრეთვე გეკუთვნით თქვენ; კელესირია, პალესტინა და შუამდინარეთი — თქვენი საკუთრებაა; ბაბილონი, ბაქტრა და სუზა — ეგეც ხომ თქვენი; სიმდიდრენი ლიდელებისა, საგანძურები სპარსელებისა, სიკეთენი ინდოელებისა და მთელი გარეთა ზღვანი — თქვენია და თქვენი; თქვენ ხართ სატრაპები; თქვენ ხართ სტრატეგოსები; თქვენ ხართ ტაქსიარქოსები. მე კი რა მიმიღია ამდენი შრომისა და გარჯის საფასურად, გარდა ამ წამოსასხამისა და დიადემისა? ჩემთვის მე არაფერიც არ მომიხვეჭია; ვერაინ ვერ მიმიითებს მე ჩემს საგანძურებს, გარდა იმ საგანძურებისა, რომლებიც მხოლოდ თქვენთვის შემინახავს და თქვენთვის დამირიგებია.

ჩემთვის მე არაფრის შენახვა არ მჭირდება; აკი მეც ისეთსავე პურს ვჭამ, როგორსაც თქვენ, ისეთივე საწოლზე მძინავს, როგორზეც თქვენ. ის კი არა და, ვფიქრობ, ბევრი თქვენგანი ჩემზე მდიდრულად ცხოვრობს და მე კი ღამეებს ვტეხავ იმისთვის, თქვენ რომ მშვიდად გეძინოთ. იქნებ თქვენ თქვათ, მე რაც მოვიპოვე, მხოლოდ თქვენი გარჯით მოვიპოვე და მე მხოლოდ ბრძანებებს ვიძლეოდი და სხვა არაფერი? მაგრამ, მითხარით, რომელი თქვენგანი შრომობდა ჩემზე მეტს? აბა, გამოვიდეს ვინმე თქვენგანი, ტანთ გაიხადოს, თავისი ქრილობები მაჩვენოს და მეც გაჩვენებთ ჩემსას. სხეულზე წინიდან ერთი ადგილიც არა მაქვს დაუჭრელი; არ არსებობს იარაღი, ხელჩართულად საბრძოლო თუ შორიდან სატყორცნი, ჩემს ტანზე რომ კვალი არ დაეტოვებინოს; მე მჩეხდნენ მახვილით, მცხრილავდნენ მშვილდით და მანქანით ნატყორცნი ისრებით; რამდენჯერ ქვეთ

და ნამორით დამაშავეს — და ყველაფერი ეს ხდებოდა თქვენთვის, თქვენი დიდებისთვის, თქვენი გამდიდრებისთვის.

მე თქვენ მოგატარეთ ვითარცა ძღვევამოსილნი მთელს დედამიწაზე, ზღვებზე, მდინარეებზე, მთებზე, ველ-მინდვრებზე. მე დავეკორწინდი იმავე ყაიდით, როგორც თქვენ და ბევრი თქვენგანის შვილები ჩემი შვილების ნათესავეები იქნებიან. ვისაც ვალი გქონდათ, მე გადაგიხადეთ, ისე რომ არც გამომიკითხავს, რისთვის აიღეთ ეგ ვალები, როცა იმდენ ჯამაგირს გაძლევდით, იმდენ ქონებას გახვეტივდით, იმდენ ქალაქს გაძარცვინებდით. თქვენგან უმრავლესობას ოქროს გვირგვინებიც არ აკლია, — ვითარცა სახსოვარი თქვენი სიმამაცისა და ჩემი თქვენდამი პატივისცემისა. ხოლო, ვინც დაიღუპა, დიდებულად დაიღუპა და მისი საფლავიც არ დაკარგულა, უმრავლესობას სამშობლოში ბრინჯაოს ქანდაკებანი დაუდგით და მათი მშობლები ცხოვრობენ პატივში და გათავისუფლებული არიან ყოველგვარი გადასახადისა და ვალდებულებისაგან. თქვენს შორის, ჩემი მეთაურობით, კაცი არ გამოჩენილა, ბრძოლის ველიდან გაქცევით რომ დაღუპულიყოს. ხოლო, ახლა მე ვაპირებდი სამშობლოში გამეგზავნა ის მეომრები, რომელთაც სამხედრო სამსახური აღარ შეუძლიათ და თანაც გამეგზავნა ისე, რომ იქ, სამშობლოში, ყველას მათი შეშურდებოდა; მაგრამ რაკი არ ინებეთ, ახლა ყველა წადით, მიბრძანდით, დამეკარგეთ, მომშორდით!

დაასრულა ალექსანდრემ ეს მწარე სიტყვა და, ისე რომ პასუხისა და გამონმაურებისათვის აღარ დაუცდია, უმაღვე ტრიბუნიდან გადახტა, სასახლეს მიაშურა და ჩაიკეტა. ჯარი კი გაქვავებული დარჩა ადგილზე. ორი დღე აღარ გამოჩენილა მეფე. ჯარი ამასობაში გამოერკვა და ისევ უფრო მძაფრად და მკაცრად განაგრძო თავისი უკმაყოფილების გამოხატვა „უმაღური ხელმწიფის“ მიმართ. ალექსანდრეს სიტყვას არ შეეძლო რაიმე გარდატეხა შეეტანა ჯარისკაცთა სულში. იგი უბრალო ჩამოთვლა იყო იმისა, რაც ჯარისკაცებმაც ძალიან კარგად იცოდნენ. ალექსანდრე არ პასუხობდა იმ საჭირობოროტო კითხვას, რის გამოც ჯარისკაცები ჯანყდებოდნენ. მთავარი „საკითხავი“ კი ეს იყო: ჩვენ, მაკედონელებს, თავზე სპარსელები დავვასვიო, ჩვენ გვაძევებ და სპარსელებს იშინაურებო. ალექსანდრემ კი ამ პროტესტანტულ ხმას ჩახშობა დაუპირა, ყველაზე მოქმედი „პროტესტანტები“ შეიპყრო და სიკვდილს მისცა და ბოლოს ყველა მაკედონელს ერთად უბრძანა — წადით, მომშორდით, სადაც გინდათ იქით

გადაიკარგეთო. ჭარისკაცებს ასეთი პასუხი, ვითარცა მღელვარე გონების ნაყოფი, არ შეიძლებოდა მეფის საბოლოო გადაწყვეტილებად მიეღოთ. ისინი ალექსანდრესგან „უფრო გონივრული“ ნაბიჯის გადადგმას ელოდნენ. და, ალექსანდრე რომ ორი დღე სასახლიდან არ გამოსულა, არც ჭამა-სმა და არც ხელ-პირის დაბანა არ გახსენებია, ამ დროის განმავლობაში ალბათ იმ „გონივრული გადაწყვეტილების“ ძებნაში იყო მთელის გონებით ჩაძირული.

და აი, მესამე დღეს, გამოვიდა ალექსანდრე მისი უკანასკნელი, გადაწყვეტი, გონივრული გადაწყვეტილებით: ფიცხლავ სპარსელთა და მიდიელთა ჯარები შეჰყარა, მაკედონური სამხედრო განწესრიგებით დაალაგა და ჩამოაყალიბა: სპარსული სამეფო ცხენოსანთა აგემა, სპარსელი ცხენოსანი ჰეტერები, სპარსული ჰიპარქიები, სპარსული ფალანგები, ილები, ლოხოსები, ტაქსისები, სპარსული ქვეითი ჰეტერ-მეგობრები, სპარსული „ვერცხლის ფაროსნები“, ყველას დაუნიშნა სპარსელი და მიდიელი მეთაურები, რჩეულთაგან რჩეულებს — ისევ სპარსული სასახლის ტრადიციით — მიანიჭა „ნათესაების“ ტიტული და მეფის კოცნის უფლება; მეფისა და სასახლის მცველებსაც მაშინვე სპარსელები დააყენა ალექსანდრემ<sup>10</sup>.

და ალექსანდრე მაკედონელმა სეფე-სიტყვითაც მიმართა თავის ახალ ჯარს, „თავის აზიელებს“: მე რომ ევროპიდან აზიაში მოვდიოდი, იმედი მქონდა, ჩემს სახელმწიფოს მრავალ დიდებულ ტომს და ძლიერ ხალხს შემოვუერთებდი, და არც მოვტყუვდი. თქვენში მე ვხედავ დიდ სიმამაცეს და მეფისადმი ურყევ ერთგულებას. ადრე მე ვფიქრობდი, რომ აქ ყველა მხოლოდ ფუფუნებაში იყო ჩაძირული და ყველა ზედმეტი კეთილდღეობისგან მხოლოდ ვნებებს იყო აყოლილი. მაგრამ, ვფიცავარ ღმერთებს, თქვენ სამხედრო სამსახურს ატარებთ სულისა და სხეულის ერთნაირი ამტანიანობით, ერთნაირი სიმამაცით და ერთგულებით. მე ამას ახლა პირველად გეუბნებით, თუმცა დიდი ხანია ამას ვხედავდი. ამიტომ აფიყვანეთ და დაგალაგეთ ჩემს ახალ ჯარებად. თქვენ გაცვიათ იგივე ტანსაცმელი, გასხიათ იგივე აღკუთრვილობა, მაგრამ გაქვთ მორჩილება და დისციპლინა გაცილებით მაღალი, ვიდრე სხვებს (მაკედონელებს გულისხმობდა).

მე თვითონ ცოლად შევირთე ასული სპარსელი ოქსიართისა, რათა შვილები ჩემი არ ყოფილიყვნენ ტყვე-ქალის ნაშობნი. უფრო გვიან, — როცა შთამომავლობის გამრავლება მოვისურვე — ცოლად კიდევ დარიოსის ასული შევირთე და ჩემს მეგობრებსაც ვურჩიე და-

ქორწინებულებიყვენ სპარსელ ქალებზე და შეექმნათ შთამომავლობა, რათა ასეთი წმინდა კავშირით წაშლილიყო ყოველგვარი განსხვავება გამარჯვებულებსა და დამარცხებულებს შორის. ამიტომ იცოდეთ, რომ თქვენ ჩემი შთამომავლობითი მეომრები ხართ და არა დაქირავებულნი. აზია და ევროპა ახლა ერთი სამეფოა, და მე თქვენ გაძლევთ მაკედონურ შეიარაღებას. თქვენ ჩემთვის აღარ ხართ უცხოელები — თქვენ ჩემი მოქალაქენი და ჩემი მეომრები ხართ. ყველაფერი გაწონასწორდა. როგორც სპარსელებს არ უნდა ეძაგებოდეთ მაკედონელთა ჩვეულებანი, ისე მაკედონელებსაც არ უნდა ერცხვინებოდეთ სპარსელების ჩვეულებათა გადაღება... ერთნაირი უნდა იყოს ყველას უფლება, ვინც ერთი მეფის ხელქვეით ცხოვრობს...<sup>11</sup>

ერთი სიტყვით, ალექსანდრე მაკედონელს ახალი ჯარი მზად ჰყავდა — ფორმით მაკედონური, სულით და ხორციით აზიური. ეს სწორედ უკიდურესობა იყო. ალექსანდრე ერთბაშად „შუალედურ თამაშს“ მოეშვა და რადიკალურ გამოწვევაზე გადავიდა — მან თავის მაკედონელებს ასეთი „რადიკალიზმით“ პირდაპირ გამოუცხადა — ან ქედი მოიდრიკეთ და რასაც გიბრძანებთ ის მიიღეთ, ან „ჩემს აზიელებთან“ ომი იწებეთო! და კიდევაც პირდაპირ გაუგზავნა ალექსანდრემ ბრძანება მაკედონელებს: ახლავე ბანაკი დასცალეთ და სადაც გინდათ მიბრძანდით, ხოლო უკეთუ ბრძოლას არჩევთ, მაშინ მეთაური აირჩიეთ, ალექსანდრეს შეებრძოლეთ და, როცა განადგურდებით, მაშინ დარწმუნდებით, რომ ალექსანდრეს გარეშე თქვენ არარაობას წარმოადგენთ<sup>12</sup>.

ეს ბრძანება რომ ისმინეს, მაკედონელები ერთბაშად მოწყდნენ და ბლავილით ალექსანდრეს სასახლეს მიაწყდნენ; იარაღი დაჰყარეს და ცრემლთა ფრქვევით შეწყალებისა და პატიების თხოვნას შეუდგნენ. მეფესთან შეგვიშვით, მუხლებში ჩავუვარდებით, მისი გულმონწყალებისა ვიცით — იგი გვაპატიებს, ჩვენს წამქეზებლებს ჩავაბარებთ და დავასჯევიებთ, ყოველივეს აღვასრულებთ, რასაც გვიბრძანებს, სულ ერთია, დღე და ღამე აქედან ფეხს არ მოვიცვლით, სანამ მეფე არ მიგვიღებს და არ გვაპატიებსო.

ალექსანდრემ აცალა — ერთხანზე კიდევ ებღავლათ და ეფრქვიათ სინანულის ცრემლები მის კადნიერ თანამემამულეებს... და მერე გამოვიდა. და შემოეხვივნენ აღტაცების ბლავილით, პატიების ღაღადით, ცრემლების თხევით. ალექსანდრესაც შეეძლო „თავის დროზე“ ატირება და ისიც ატირდა. მაკედონელები სულ შეიშალნენ. ალექ-

სანდრემ ცრემლები „ძღვის“ შეიწყვიტა, შეიშრალა და სიტყვის სათქმელად მოემზადა. მაკედონელები უარესად აბლაღლდნენ, შიშით — ვაი თუ იმ პირველივე სიტყვაზე გაოჩნდეს და მეფემ შერიგებაზე უარი გვითხრასო. ამიტომ დაასწრო მეფეს ერთმა ხანდაზმულმა სამხედრო მეთაურმა, ჰეტერმა კალინემ, და მოახსენა: „მეფო, მაკედონელებს ყველაზე უფრო ის სწყინთ, რომ შენ სპარსელებს დაუნათესავდი; სპარსელები „ალექსანდრეს ნათესავებად“ იწოდებოან და გკოცნიან შენ; მაკედონელთაგან კი ეს პატივი არავისაც არ გაუსინჯავს“. შეაწყვეტინა ალექსანდრემ: „ყველას თქვენ გთვლით ჩემს ნათესავებად და ამიერიდან ყველას ასე გიწოდებთ“. ეს რომ გაიგონა, მაშინვე მიეახლა და აკოცა მეფეს კალინემ. მიესივნენ სხვა „ნათესაებიც“ მეფეს საკოცნელად. მერე ყველამ აიღო თავისი საქურველი, დაეწყვენ გახარებულნი და პეანებისა და ემბატერიების სიმღერით გაეშურნენ ბანაკისაკენ<sup>13</sup>.

მაშ. ალექსანდრემ ისევ თავისი გაიტანა. ყოველი გამარჯვების აღაწარმნავად, როგორც წესი, ის ღმერთებს მსხვერპლს სწირავდა და ახლაც გამართა ზორვა, მერე ნადიმი მოაყოლა და სანადიმო ტრაპეზზე ირგვლივ მაკედონელები შემოისვა, მათ გვერდით სპარსელნი, შემდგომ სხვა ტომელნი ჩაარიგა. შუაზე ერთი დიდი კრატერი დაადგმევინა და ზედაშეს იმ კრატერიდან ყველა ერთნაირად იღებდა — მაკედონელიც და სპარსელიც. 9000 მონადიმე ევროპელი და აზიელი ერთი კრატერიდან სვამდა, ადლეგრძელებდა და უმღეროდა მაკედონურ-სპარსული სახელმწიფოს ერთიანობას, „ერთსულოვნებას“, „ერთსახოვანებას“, „ერთნაირობას“.

ამის შემდგომ, 10000 მაკედონელი მეომარი,<sup>14</sup> ხანდაზმული და ინვალიდი ვეტერანები, ალექსანდრეს „სიამტკბილობით“ დაშორდნენ და სამშობლოში დაბრუნდნენ. ალექსანდრემ ყოველ მათგანს ნამსახურ ჯამაგირთან ერთად, მისცა კიდევ თითო ტალანტი საგზაო ხარჯებისათვის. ბავშვები, რომლებიც ამ ვეტერანებს აზიელ ქალთაგან შეეძინათ, ყველანი ალექსანდრემ დაიტოვა, რათა მაკედონიაში მათ ჩაყვანას ოჯახური უსიამოვნებანი არ წარმოეშვა სამშობლოში ვეტერანის მომლოდინე ცოლ-შვილში. ამ ბავშვების აღზრდას თვითონ მეფე კისრულობდა — მათგან ნამდვილ მაკედონელ მეომრებს აღზრდიდა, ასე დაეაყვაცებულთ მაკედონიაში ჩაიყვანდა და მათ მამებს დაურიგებდა (კაცი ბჭობდა, ღმერთი იცინოდა!).

ლუსტინადაგიანი დასაბუთება რომ უფრო მყარი გამხდარიყო და

დათხოვნილი ჯარისკაცებისადმი თავისი ერთგულება კიდევ უფრო დაემტკიცებინა, ალექსანდრემ მათ წინამძღოლად და მფარველად, სამშობლოში მიმავალ გზაზე, დაუნიშნა თავისი უერთგულისი და თვალის ჩინივით ძვირფასი<sup>15</sup> კაცი — კრატეროსი, რომელიც მაშინ ძალიან დასუსტებული იყო, ალექსანდრემ კი, ჯარისკაცთა „უსაზღვრო სიყვარულისთვის“ მაინც ასე „გაიმეტა“ იგი. გზაზე რომ რამე არ დამართნოდა და ხშირად მისი მაგიერობაც გაეწია, ალექსანდრემ კრატეროსს თანაშემწედ დაუნიშნა პოლიპერხონტი. კრატეროსი სამშობლოში უნდა დაჩენილიყო. მას ანტიპატროსისგან უნდა ჩაებარებინა მაკედონიის, თრაკიის, თესალიისა და „თავისუფალი საბერძნეთის“ მმართველობა. ანტიპატროსი კი ალექსანდრესთან უნდა წასულიყო, ვეტერანთა ცვლის — ახალგაზრდა მაკედონელთა ჯარის თანხლებით<sup>16</sup>.

ვეტერანები და მათი მეფე სიყვარულს, განშორების და სიწინაულის ცრემლთა ფრქვევით გამოეთხოვნენ და გაშორდნენ ერთმანეთს. უკანასკნელი იყო მათი თანაყოფნაც, უკანასკნელი — მათი შეტაკებაც, უკანასკნელი — მათი თანახილვაც.

ვეტერანთა დაბრუნებას იმდენი მითქმა-მოთქმა არ მოჰყოლია, რამდენიც კრატეროსისა და ანტიპატროსის ადგილთა შეცვლას. ეს ფაქტობრივად ანტიპატროსის დაცემას ნიშნავდა — თუნდაც „სხვა ადგილზე გადაყვანის გამო“. არც ისე უსაფუძვლოდ გაისმოდა, რომ ანტიპატროსის დაცემაში მაინც ალექსანდრეს დედამ, ოლიმპიადამ შეასრულა დიდი როლიო, მართლაც მტრობამ ოლიმპიადასა და ანტიპატროსს შორის უმადლეს წერტილს მიაღწია. ალექსანდრესთან წამდაუწუმ აბეზღებდნენ ერთმანეთს. ალექსანდრე ისევ იმ აზრზე იყო, რომ ანტიპატროსის ათასი წერილის წასაშლელად დედს ერთი ცრემლიც კმაროდა, მაგრამ მშობლის უსაზღვროდ მოყვარული შვილი სახელმწიფოს საქმეებში მის ეგზომ აქტიურ ჩარევას მაინც ვერ იტანდა, მწარე სიცილით იტყოდა ხოლმე — დედაჩემს მე მუცლად ათი თვე შევიჩი და ახლა იმ ათი თვის ბინის ქირას ძალიან ძვირად მახდევინებსო<sup>17</sup>.

მაინც ოლიმპიადას პირადი მტრობა ვერ დაამხოდა ანტიპატროსის განუყოფელ მბრძანებლობას ბალკანეთზე. მთავარი მიზეზი, რისთვისაც ალექსანდრე ბალკანეთზე მისი „ნაცვლის“ უზენაესობას ვეღარ შეიწყენარებდა, იყო თვითონ ანტიპატროსი, რომელიც „მეფის ნაცვლობას“ თითქმის აღარ კმარისობდა და „მეფობის“ ტიტულს

ელაციცებოდა. განსაკუთრებით, მისი სიძის, ფილოტას მკვლელობის შემდეგ გახდა საცნაური ანტიპატროსის „იდუმალი თვითნებობ-ს“ აღკვეთა... და ალექსანდრემ უკვე ბრძანა თავისი საბრძანისი: ანტიპატროსმა ბალკანეთის მმართველობის საქენი უნდა გადასცეს კრატეროსს!..

მაგრამ კრატეროსი და მისი ვეტერანები — ვისაც მეფის ეს ბრძანება მაკედონიაში უნდა მიეტანათ — ჯერ კიდევ გზაში იყვნენ. ანტიპატროსი მათ ჩასვლამდე უნდა მჯდარიყო ბალკანეთის „ტახტზე“. და ამავ დროს, „მათ ჩასვლამდე“ კიდევ სხვა ამბები უნდა დატრიალებულიყო თვითონ ბალკანეთზე.



საბერძნეთმა ალექსანდრე მაკედონელის უკანასკნელი ხუთი წლის მონაპოვარნი არ ჩააგდო „თავის მონაპოვრებად“. ბერძნული პოლისები გულგრილად სვდებოდნენ აღმოსავლეთიდან მოფრენილ, ყოველი ახალი გამარჯვების მაუწყებელ ამბავს. ათენშიც, „ელადის ტვინში“, თითქოს მობეზრდათ კიდევ მაკედონური მახვილის შეუჩერებელი წინსვლის გარშემო აზრისა და ტვინის „ჭყლეტა“, თითქოს ყოველგვარი ინტერესი დაკარგა „მაკედონელობამაც“ და „ანტი-მაკედონელობამაც“ და შეწყდა ოცწლოვანი სილოგისტურ-ფრაზეოლოგიური ბრძოლა ამ ძველი სამყაროს ინტელექტუალი ჰამლეტებისა.

გულგრილად და უმწეო სარკაზმით შეხვდნენ საბერძნეთში ალექსანდრეს ბრძანებას — თავიანი ეცათ მისთვის, ვითარცა ღმერთისთვის, ზევსის ძისთვის, და საამისოდ საგანგებო დადგენილებაც მიეღოთ ყოველი პოლისის საზოგადოებრივ საკრებულოზე.

ამასთან დაკავშირებით, სპარტაში ეს დაუდგენიათ; დაე, იყოს ალექსანდრე ღმერთი, რაკი მას ღმერთობა მოსურვებიაო.<sup>18</sup> ათენში, კიდევ ახალგაზრდა ორატორს, პითეიას უთქვამს — ალექსანდრეს გაღმერთება სოლონის კანონებს ეწინააღმდეგება, რადგან სოლონის კანონმდებლობით ჯვენ მართო სამამულე ღმერთებს უნდა ვეთაყუანოთო. ვილაცამ პითეიას მიიძახა, შენ ძალიან ახალგაზრდა ხარ და ნება არა გაქვს ეგზომ დიდმნიშვნელოვან საქმეებზე ლაპარაკობდეო. თუ აგრეა, — ალექსანდრე ჩემზე უფრო ახალგაზრდააო — უპასუხა პითეიამ. ლიკურგემაც მხარი დაუჭირა პითეიას: რანაირი ღმერთი

უნდა იყოს ალექსანდრე, როცა მისი სალოცავიდან გამოსული კაცი ისევ განსაწმენდელი შეიქნებაო.

და სანამ ათენელი ჰამლეტები მაკედონელი მეფის ღმერთობის კანონიერებასა და უკანონობაზე მსჯელობით თავს იყოლიებდნენ, ალექსანდრეს მეორე ბრძანებამაც შემოაღწია საბერძნეთში. ეს იყო ბრძანება საბერძნეთიდან სხვადასხვა დროს, სხვადასხვა მიზეზით გაქცეული და განდევნილი ბერძნების შესახებ. უმეტესწილად ესენი სპარსელთა სამსახურში შესული დაქირავებული ჯარისკაცები იყვნენ. ხოლო, როცა სპარსთა მეფეც მოისრა და ცალკეულ სატრაპებსაც ალექსანდრე მაკედონელმა მოქირავნეთა აყვანა აუკრძალა, მოქირავნობა ერთბაშად დრომოკმული“ და „ანაქრონისტული“ გახდა. არა და, კორინთოს კონგრესის ცნობილი დადგენილებით, საბერძნეთის მტრის სამსახურში მებრძოლი მოქირავნენი სამშობლოს მტრად და სიკვდილის კერძად იყვნენ გამოცხადებული. ახლა ბერძნული მოსახლეობის ეს უჯანსაღესი ნაწილი — ბრძოლისა და შრომის ეს ჭარბძალოვანი მასა — უქმად, უმაქნისად და მოუხმარისად დაეხეტებოდა ქვეყნიდან ქვეყნად. სამშობლო აღარ ლებულობდა, „ანტი-სამშობლოს“ აღარ სჭირდებოდა. და ისევ „ყოვლისმხსნელი“ ალექსანდრე მოევლინა მხსნელად და მშველელად მისი დროის „დრომოკმულ კონდოტიერობას“. მან სამშობლოდაქარგული ბერძნების ამნისტია და სამშობლოში დაბრუნება ბრძანა.

ამ „დიაგრამის“ გამოსაცხადებლად მეფემ აარჩია მორიგი ოლიმპიადა — 324 წლის ივლისი (114-ე — ოლიმპიადა). იმ დღეს, ყოველი საბერძნეთის საკრებულოს წინაშე, — რომელსაც 20000 განდევნილი ჯარისკაცი და ნაჯარისკაცალიც ესწრებოდა — ალექსანდრესგან საგანგებოდ წარმოგზავნილმა ემისარმა, ნიკანორ სტავირელმა, მაცნეთა შორის გამარჯვებული და დაფნით მოსილი მაცნეს პირით გამოაცხადა: „მეფე ალექსანდრე გიგზავნით სალამს ბერძნულ ქალაქთაგან ღვენილებს. თქვენი განდევნის მიზეზი ჩვენ არ ვყოფილვართ, მაგრამ ჩვენ გვინდა მოგცეთ საშუალება სამშობლოში დაბრუნებისა ყველას, გარდა მკვლელობაში ბრალდებულისა. ამიტომ ჩვენ ვუბრძანეთ ანტიპატროსს, ძალით აიძულონ ის ქალაქები, რომლებიც უარს იტყვიან თქვენს მიღებაზე“<sup>19</sup>.

ზეცა შეარყია ამნისტირებულთა და მათ ნათესავთა აღტაცებულმა ბლავილმა. ბრძანება მაშინვე ძალაში შევიდა — ყველა თავისი მშობლიური ქალაქისკენ წარემართა. მაგრამ, — როგორც თვითონ



„დიაგრამის“ ტესტიდან ჩანს — ყველა პოლისი როდი აპირებდა, თურმე. მიეღო და სიყვარულით გულში ჩაეკრა თავისი დევნილი. „უძღლები“ თუ „ნაძღლები“ შვილები. ამ ახალი სოციალური ძალის დაპრუნებას უქვეყლად რაიმე სოციალური შეხლა-შემოხლანი უნდა გამოეწვია ბერძნულ პოლისთა ისედაც მშფოთვარე საზოგადოებრივ ცხოვრებაში.

გამორჩევით, ათენი დადგა ალექსანდრეს ბრძანების წინააღმდეგ. ათენს კუნძული სამოსი ჰქონდა დაპყრობილი, იქიდან ადგილობრივი სამოსელები ათენელებს გაედევნათ და მათი მიწები თვითონ დაენაწილებინათ კერძო კლერუხიებად. ალექსანდრეს ბრძანება კი სამოსელებს დაბრუნების უფლებას აძლევდა, რაიც. ბუნებრივია, იმავე დროს სამოსიდან ათენელთა განდევნას გულისხმობდა. ამას გარდა, ალექსანდრეს ბრძანება კორინთოს ერთიანი „სამოკავშირეო კონგრესის“ დადგენილების დარღვევას ნიშნავდა და, მაშასადამე, ასეთი „სეპარატისტული დიაგრამით“ მაკედონიის მეფე ერთხელ კიდევ დაუფარავად ამჟღავნებდა თავის „დესპოტურ“ ხელყოფას ბერძნულ პოლისთა „აგტონომიის“ მიმართ.

ამ ამბებს უეცრად დაემთხვა კიდევ ერთი საინტერესო ზნეობრივ-პოლიტიკური მოვლენა, რომელსაც, შეიძლება, მისი ხასიათის მიხედვით, დავარქვათ „ჰარპალოსის კაზუსი“.

ჰარპალოსი ყრმობითვე ალექსანდრეს უახლოესი და უსაყვარლესი მეგობარი იყო. ფილიპესა და ალექსანდრეს შორის ატეხილ „მამა-შვილურ ომში“ ჰარპალოსს — ნეარქოსთან და პტოლემეიოსთან ერთად — დიდი ამაგი მიუძღოდა უფლისწულის სასარგებლოდ. შემდგომ, მეფობის ქამს, ალექსანდრეც უხვი წყალობით ავსებდა მეგობარს. ალექსანდრე იმასაც ანგარიშს უწევდა, რომ გარეგნულად ლამაზი, მაგრამ ფიზიკურად სუსტი ჰარპალოსი მეომარ-მოლაშქრედ არ გამოდგებოდა და ამიტომ სპარსეთთან ომის დაწყების წინ ალექსანდრემ ის ომში არ წაიყვანა და სახელმწიფო ხაზინის უფროსად დატოვა. ომიც დაიწყო, ალექსანდრეც უკვე აზიაში იბრძოდა და ისოსის ბრძოლის წინ შეიტყო, რომ ჰარპალოსს მაკედონიის სამეფო საქურქლეები გაუტაცნია და, აღმა-დაღმა მორბენალს, ბოლოს მეგარა აურჩევია, თავისი „ჰეკუის ქეიფზე“ საცხოვრებლად. ალექსანდრემ რომ ეს შეიტყო, ფრიალ გაჭავრდა, მაგრამ მაინც აპატია და თავისთან მიიხმო აზიაში ეს მსუბუქი ჰეკუის კაცი. მიიხმო და გაიყოლია სალაშქრო გზაზე.

მერე, ალექსანდრემ რომ მთელი დასავლეთი და ცენტრალური აზია დაიმორჩილა, ჰარპალოსი ისევ მთავარ ხაზინადრად დანიშნა. ჰარპალოსის ხელში იყო მაშინდელი მსოფლიოს ყველა უძვირფასესი საგანძური — მცირე აზიასა, ეგვიპტისა, ბაბილონისა, სუზისა, პერსეპოლისის, პასარგადისა, სხვათა და სხვათა... და, რაც უფრო შორს, აღმოსავლეთით მიდიოდა ალექსანდრე, რაც უფრო იზრდებოდა და მატულობდა მისი სამფლობელონი, მით უფრო იზრდებოდა და მატულობდა ჰარპალოსის ფუქსავატური თავაწყვეტილობა, ფულის ფანტვა, ღრეობა და ნადიმობა, გაუუღმართებული სხეულებრივი ტრფიალება, თითქოს ალექსანდრე მსოფლიოს იმიტომ იპყრობდა და სისხლს აქცევიებდა, ჰარპალოსს რომ თავისი ბრიყვული სული და ბილწი სხეული ეამებინა. ჰარპალოსი მაშინდელი მსოფლიოს ყბადალებული სკანდალი იყო. ჰარპალოსი კომედიოგრაფოსთა ყველაზე ინტრიგანულ თემად ითვლებოდა. მაღალი, სერიოზული აზროვნების სფეროში ჰარპალოსზე სიტყვის ჩამოგდება შეუწყნარებელ მკრეხელობად მიიჩნეოდა. ცნობილმა ისტორიკოსმა თეოპომპემ, ღია წერილიც კი მისწერა ალექსანდრეს, — ბოლოს და ბოლოს, დროა ზღვარი დაედოს ეგზომ განმაუტრებულ უმსგავსობასო.

ჰარპალოსი კი ანგარიშმიუცემლად განაგრძობდა თავისი, „საკუთარი ფილოსოფიით“ გარყვნილობას. აზიელი კახპები რომ მოყარქვდა, ათენიდან პითიონიკა გაიწვია — მთელს საბერძნეთში განთქმული, საჯარო სიძვის დიაცი. მერე, როცა ეს ქალი მოუკვდა, ჰარპალოსმა მას. რასაკვირველია, სახელმწიფო ხაზინის ხარჯზე, ორი უბრწყინვალესი ძეგლი აუგო და ორივე მსოფლიოს უბრწყინვალეს „დედაქალაქში“ — ერთი ათენში, მეორე ბაბილონში.

სწორედ საოცრად იცინოდა და იკბინებოდა ბედისწერა ისტორიისა: არავის გახსენებია ძეგლები დაედგათ გრანიკოსის, ისოსის და გავგამელას გმირებისათვის, როცა დროის ყველაზე ბრწყინვალე ძეგლი დაედგა ერთ უკანასკნელ როსკიპს, რომლის დაუფლება ყოველ ქუჩის ვიგინდარას შეეძლო ნახევარ გროზად. ეს არ იკმარა ჰარპალოსმა, — გარდაცვლილი პითიონიკას ნაცვლად არანაკლებად სახელგანთქმული მეძავი ქალი გამოიწვია ათენიდან, სახელად — გლიკერია. ჩამოიყვანა და კილიკიის მთავარ ქალაქში — ტარსოსის სასახლეში დაასახლა, სირიის ქალაქ როსოსში ძეგლი დაუდგა და ყველას სიკვდილის მუქართ მოსთხოვა, ამ თახსირისთვის თაყვანი ისე ეცათ, ვითარცა დედოფლისათვის.

ალექსანდრეს მისდიოდა ცნობები ჰარპალოსის ყოველ უმსგავსო-  
ბათა შესახებ. ჯერ არ სჯეროდა ან გადაჭარბებულად მიაჩნდა, მაგ-  
რამ დრო დადგა, თვალები ველარ დაითხარა და დაიჭრა. რაც უფრო  
შორს მიდიოდა ალექსანდრე, ჰარპალოსს ჰგონებია, იგი უკან მო-  
უბრუნებლად მიდიოდა; მაგრამ როცა მან დაინახა, რომ ალექსანდრე  
უკან მობრუნდა და თანდათან კიდევაც ახლოვდებოდა, იფიქრა ჩემი  
განკითხვის დღეც ახლოვდებაო და თავის შველა ისევ გაქცევით და-  
აპირა. უზარმაზარი ფული — 5000 ტალანტი მოხვეტა, გლიკერია და  
პითიონიკასგან შეძენილი გოგონა აიყოლია, 6000 მეომარიც დაიჭი-  
რავა და ეგეოსის ზღვისკენ გაუტია. იქ, მცირე აზიის სანაპიროზე  
30 გემი იშოვა და ათენში გასამგზავრებლად გაამზადა. ათენი მას იც-  
ნობდა, მისგან დარიგებული პურის გემოც იცოდა, ბოლოს და ბო-  
ლოს, ჰარპალოსი ათენის საპატიო მოქალაქე იყო და ესეც საკმარისი  
უნდა ყოფილიყო, რომ ქალაქს „თავისი შვილისთვის“ მოევლო და  
ეპატრონებინა... მაგრამ დემოსთენეს დაყენებითი მოთხოვნით, ჰარ-  
პალოსს უარი ეთქვა ათენში მიღებაზე. ჰარპალოსიც რა ფრინველი  
იყო, ეგრე იოლად მოშვებოდა, და ბოლოს, დიდი ფულისა და დაჭი-  
რავებული ჯარის „ანგარიშ-გაწევით“, მაინც შეაღწია ათენში.

მალე ათენში ალექსანდრეს ახალი ხაზინადარი — ფილოქსენე —  
გამოჩნდა და მეფის სახელით ჰარპალოსის ჩაბარება მოითხოვა. ისევ  
გამოცოცხლდნენ და ერთმანეთს მიესივნენ „მაკედონელი“ და „ან-  
ტიმაკედონელი“. პირველნი ჰარპალოსის გაცემას მოითხოვდნენ,  
მეორენი — დაცვას და შენახვას. ალექსანდრეს მოთაყვანე ფოკიონიც  
კი წინააღმდეგი იყო ჰარპალოსის გაცემისა. დემოსთენე ხომ მაკედო-  
ნელთა დაუძინებელ მტრად რჩებოდა და იმანაც ახლა ჰარპალოსისა  
და მისი ხაზინის დაცვა მოითხოვა. კრებამაც დაადგინა, თვითონ დე-  
მოსთენეს ჰარპალოსისთვის მისი თანხლებული თანხა ჩამოერთმია და  
აკროპოლისში შეენახა. დემოსთენემ მაშინვე ჰკითხა ჰარპალოსს,  
რამდენს შეადგენდა მის ხელში არსებული თანხა. 700 ტალანტსო,  
უპასუხა ჰარპალოსმა, მაგრამ მეორე დღეს აკროპოლისში მას 350 ტა-  
ლანტზე მეტი აღარ მიუტანია. თურმე, იმ ღამით ხაზინის უდიდესი  
ნაწილი სამეგობროდ და მხარდასაპყრად დაგულეებული მოქალაქე-  
ებისთვის დაურიგებია. დემოსთენემ ამის შესახებ ხალხს აღარაფერი  
აცნობა, ოღონდ ჰარპალოსს სიტყვა ჩამოართვა, რომ იგი არეოპაგს  
დაუსახელებდა იმ პირებს, ვისაც მან ფული დაურიგა.

ალექსანდრეს კი ბრძანება გაეცა, ფლოტი გაემზადებინათ და,

უკეთუ ათენი, რომელმაც ალექსანდრეს გაღმერთებაზე უარი თქვა, ახლა ჰარპალოსის გაცემაზეც უარს იტყოდა, დაუყოვნებლივ დასხმოდნენ თავს ატიკას.

ფილოქსენემ უფრო მკაცრად მოითხოვა ჰარპალოსის გაცემა. იგივე ბრძანება გამოუგზავნეს ათენს ანტიპატროსმა და ოლიმპიადამ.

საომარი ატმოსფერო ჩამოწვა. მაგრამ ისევე გაუჩინარდა ჰარპალოსი. მის გუშაგობაზე ზრუნვა დემოსთენეს ჰქონდა მინდობილი. დემოსთენეს და მის მომხრეებს მათმა მოწინააღმდეგეებმა ბრალი დასდეს ჰარპალოსისგან ფულის აღებაში. საქმის გამოძიება არეოპაგს მიენდო. არეოპაგმა გამოძიება გააჭიანურა. ჯერ ისევე გრძელდებოდა კამათი ალექსანდრეს ორივე ბრძანების გარშემო, საერთოდ: ელიარებიანთ თუ არა მაკედონელი მეფე ღმერთად და დაებრუნებიანთ თუ არა განდევნილი თანამემამულენი თავის ქალაქში.

ხოლო, ჰარპალოსი თავისი ხაზინით და დაქირავებულთა ჯარით კუნძულ კრეტაზე გაქცეულიყო. აქ იგი მუხანათურად მოკლა მისმა მეგობარმა, სპარტელმა თიბრონოსმა, ხაზინაც და მოქირავნეებიც ახლა ამან მოიხელთა და მათთან ერთად კირენაში გადაიხვეწა.<sup>20</sup> ცოცხალი გადარჩა და როდოსზე გაიქცა ჰარპალოსის მონა, რომელიც თურმე თავისი ბატონის შემოსავალ-გასავლის დაეთრებს აწარმოებდა. ეს მონა თავისი დაეთრებით მიჰგვარეს ფილოქსენეს. დაეთრებში აღმოჩნდა იმათი სიაც, ვისაც ჰარპალოსმა ათენში ფული დაურიგა. მათ შორის დემოსთენეს სახელი არ აღმოჩნდა. ნახევარწლიანი გამოძიების შემდეგ, როგორც იქნა, „ჰარპალოსის კაზუსის“ გარშემო ათენში დაიწყო სასამართლო პროცესები, რომლებშიც ბრალმდებელთა და ბრალდებულთა სახით მონაწილეობდნენ მაშინდელ ბერძნულ სამყაროში ყველაზე დიდი ორატორები: ბრალმდებელნი — ჰიპერიდე, პითეია, მნესექემე, ჰიმერიოსი და სტრატოკლე, ბრალდებულნი — დემოსთენე, დემადე, ფილოკლე და ქარიკლე. დემოსთენეს ბრალად ედებოდა 20 ტალანტის აღება. რიტორიკის დიდოსტატმა იბრძოლა მისი დიდოსტატური ლოგოსით. ამოდ მოიყვანა სასამართლოზე შვილებიც — მსაჯულ-ჰელიასტა გულის ასაჩუყებლად — მას ხუთმაგად მიუსაჯეს აღებულის გადახდა, და რაკი ასეთი თანხის დაფარვა არ შეეძლო, იგი დილეგში ჩააგდეს. მეექვსე დღეს გაქცევა მოახერხა დემოსთენემ.

ათენის სახელგანთქმულმა დემოკრატიამ სამუდამოდ შეირცხვინა თავი. სასამართლომ, დემოსთენესთან ერთად, ყველა სხვა დიდი პა-

ტრიოტი მკაცრი სასჯელით გაიმეტა, ხოლო ყველაზე მავნე მედრო-  
ვენი გაამართლა და გაათავისუფლა.

ბოლოს, სახალხო კრებამ გადაწყვიტა, ელჩები გაეგზავნა ალექსან-  
დრესთვის, თხოვნით — როგორც გამონაკლისი, ნება დაერთო ათენი-  
სათვის, არ შემოეშვა თავისი დევნილი მოქალაქენი, რომლებიც იმჟა-  
მად მეგარაში იდგნენ და, მეფის ბრძანების შესაბამისად. სამშობლო-  
ში დაბრუნებას მოითხოვდნენ.

მართლაც და — O, tempora! O, mores! საზოგადოება ყველაზე დიდ  
მტერს ეხვეწებოდა — შენგან მოკვეთილი ჩემი ყველაზე პრძოლის-  
უნარიანი და შრომისუნარიანი ნაწილი უკანვე აღარ დამიბრუნო!..

## ალექსანდრე უკანასკნელი ნელსაბრუნავი

ალექსანდრეს კი არც ათენელი ელჩები უნახავს და აღარც მათი უმწეობისა და უთავბოლობის მაუწყებელი თხოვნა მოუსმენია. იგი. — მალე მას შემდეგ, რაც ოპსიდან ვეტერანები გაუშვა — აღმოსავლეთით შებრუნდა და მიდიის მთავარი ქალაქის, ეკბატანასკენ აიღო გეზი.

ინდოეთში ყოფნის ქამს ალექსანდრეს ყურს რამდენჯერმე მისწვდა მიდიაში მისგან დატოვებულ მმართველთა კადნიერებისა და თავგასულობის ამბები. აკი მიდიის მმართველ სტრატეგოსთა სიკვდილით დასჯაც დასჭირდა მეფეს. მიდიის მიუვალ მთებში ზოგიერთი ტომიც, — მათ შორის, მამაცი კოსეელები — ჯერ კიდევ მაკედონელთა ბატონობას არაფრად აგდებდნენ და ალექსანდრეს კიდევ სჭირდებოდა მახვილის წარმართვა მიდიის სრულყოფილი დამორჩილებისათვის.

მეფემ რაზმეულებად დაყოფილი და ერთიმეორისგან დამანძილებული ჯარებით გაიარა მდინარე ზაგროსის ხეობა და გავიდა ნისეის ველებზე (ახლ. სერპულსა და კერინდს შორის), სადაც მაკედონელები შედგნენ და დადგნენ მთელი ერთი თვე. 50—60 ათასამდე ცხენი გადათვალეს ნისეის ნოყიერ საძოვრებზე. აქვე მოვიდა მიდიის სატრაპი — ატროპატი, რათა ხლებოდა და მისალმებოდა ალექსანდრეს მისი სატრაპიის საზღვარზე. მიესალმა და დიდი „სიურპრიზიც“ მიართვა სატრაპამ მეფეს — ასი ცხენოსანი ქალი, აღჭურვილნი საომარი ნაჯახებით და მსუბუქი ფარებით. მალე ხმაც გავარდება, რომ ამ ქალთა სახით ალექსანდრე თითქოს ამორძალებს — მითიურ მეომარ ქალებს შეხვდა<sup>1</sup>.

აქვე, ნისეის ველზე, ერთი უსიამოვნო ამბავიც მოხდა მაკედონელთა შორის. ეს იყო კონფლიქტი მეფის ორ უახლოეს კაცს შორის — ჰეფესტიონსა და ევმენეს შორის.

ჰეფესტიონი, როგორც ადრევე ითქვა და ვხედავდით, ყველაზე ახლო ადამიანი იყო ალექსანდრე მაკედონელისა — ყრმობითვე მასთან

შეზღდილა უადრესად ერთგული და თავდადებული. არავის ისე უტყუერად არ შეეძლო ალექსანდრეს საფიქრალთა და საზრუნავთა ამოცნობა და განხორციელება, როგორც ჰეფესტიონს. თითქოს და მართლაც არანაკლები იყო მეგობრული სიყვარული და თავდადება ალექსანდრე-ჰეფესტიონისა, ვიდრე აქილევეს-პატროკლესი. ჰეფესტიონი იყო ალექსანდრეს უშინაგანეს გრძნობათა მესაიდუმლე, მისი „მეორე მე“ (აქი უთხრა მეფემ დარიოსის დედას ჰეფესტიონზე—ეგეც ალექსანდრე არისო), კაცი, რომელსაც უფლება ჰქონდა მეფისთვის ზურგიდან ხელი გადაეხვია და თვალი მიედევნებინა მის ხელში გაშლილი დედის საიდუმლო წერილისათვის, რომელშიც არც ისე იშვიტად ჰეფესტიონის სააუგოც ბლომად ეწერა.

ევმენე მეფის მდივანი და წერილობითი საქმეების გამგებელი იყო. მისი მოძულენი კიდევაც ამბობდნენ დაცინვით, — ევმენე მეფეს შუბით და მახვილით კი არა, სანთლის ფირფიტებითა და ლერწმით (კალმით) ემსახურებო. სიძულვილით კი ძალიან ბევრს სძულებია ევმენე, განსაკუთრებული სიხარბისა და ცბიერებისთვის. ზოგჯერ მეფესაც წონასწორობას აკარგვინებდა მისი „მწერალი-მინისტრის“ ანგარების-მოყვარეობა და სიძუნწით ნაკარნახევი თაღლითობა. ერთხელ ინდოეთში, ალექსანდრემ თავის ახლობლებს სთხოვა ფული გაეღოთ სამდინარო ფლოტის ასაგებად; ევმენეს 300 ტალანტი უნდა გადაეხადა, მაგრამ 100 ტალანტის მეტი არ გაიღო — ესეც მეგობრებში ძლივს შევაგროვეო. ალექსანდრემ კი ევმენეს სიმდიდრე ძალიან კარგად იცოდა, ამიტომ მან ქვახარშია მდივნისგან არც ის ასი ტალანტი მიიღო და შუალამისას მისი კარავი, მის სიმდიდრესთან ერთად, ცეცხლს მიაცემინა. მეფეს უნდოდა ყველას დაენახა, როგორ გამოჰგლეჯდა ცეცხლს ევმენე მის საგანძურებს; თუმცა ხანძარი ისე სწრაფად გავრცელდა, ევმენემ თვითონ ძლივს გამოასწრო და მთელი მისი ქონება, არანაკლებ 1000 ტალანტისა, და მასთან მთელი საკანცელარიო დოკუმენტაცია — ცეცხლმა შთანთქა. ალექსანდრემ ცეცხლში გადამდნარი ოქროვერცხლი ისევ ევმენეს დაუტოვა, ხოლო წერილობითი არქივის აღსადგენად სატრაპებს და სტრატეგოსებს უკანვე გამოსთხოვა მათთან გაგზავნილი ბრძანებათა პირები<sup>2</sup>. მიუხედავად ასეთი თვითნებობისა და თაღლითობისა, ალექსანდრე ევმენეს არ იშორებდა, მის ნიჭს, ერთგულებას და მოქნილობას იგი ძალიან აფასებდა.

ჰეფესტიონი და ევმენე — საწინააღმდეგო ხასიათთა მქონე ეს ორი ადამიანი — ხშირად ჩხუბობდნენ მეფის უახლოესთა წრეში. — ახლაც,

საკმარისი აღმოჩნდა მეფეს ჰეფესტიონი დაესაჩუქრებინა, რომ ხარბი და შურიანი ევმენე დაჯილდოებულს მიხდომოდა და გაელანძლა. ჰეფესტიონმაც არ შეარჩინა და მეფემ ჭერ ძლივს გააზავა და მერე ძლივს შეარიგა ორივენი<sup>3</sup>.

ოცდაათდღიანი დასვენების შემდეგ, მაკედონელებმა გზა განაგრძეს და შეიდ დღეში ჩავიდნენ ეკატანაში. ალექსანდრემ მიდიის უძველეს სამეფო სასახლეში დაიდო ბინა. იშვიათი სილამაზითა და სიმდიდრით იყო ნაგები ეს სასახლე — კედრისა და კვიპაროსისა, სვეტები, კაპიტელები, ფრონტონები, ჭერი და სანთიობოთა კედელ-ყურენი — სულ ოქროთი მოკვედილი და მოპირკეთებული; სახურავიც ვერცხლის ფურცლებისა. ასევე განსაცვიფრებელი იყო იქვე, მეორე შენობა — ანტიისის ტაძარი, რომლის სვეტთა კაპიტელებიც ოქროისა იყო, ხოლო ზემოდან — ოქროსა და ვერცხლის კრამიტებით გადახურული<sup>4</sup>.

324 წლის ოქტომბრის ბოლოს ალექსანდრემ ამ სასახლეში გადაინახა გრანდიოზული ზეიმი — დიონისობა. ერთიმეორეს გადაება მსხვერპლწირვანი, მხედრული ასპარეზობანი, ჩირაღდნიანი სვლანი, პოეტური და სახიობური შეჯიბრებანი, ნადიმობანი, ღრეობანი. მიდიის სატრაპმა ატროპატმა ყველა გააოცა ალექსანდრეს საპატიოდ გამართული ნადიმის უზღვრო სიმდიდრით და სიდიადით. მან მეფესთან ერთად მიიწვია არა მარტო მისი ამალა, არამედ მთელი ჯარი, ყველა უცხოელი და შინაური სტუმარი. სუზის „მსოფლიო ქორწილის“ შემდგომ, აღარავის ენახა ეგზომ გრძლად და ფართოდ გადაჭიმული სანადიმო ტრაპეზნი. ზეცას აზანზარებდა ზარხოშით გატენილი ხმაური, სიმღერა, ხორხოცი და ყარყაში.

მხოლოდ ალექსანდრე იყო მოწყენილი. მოწყენილი იყო, ვინათგან, ჰეფესტიონი ციებ-ცხელებას ჩაეგდო ლოვინად. აქიმი გლავკიოსი დღედაღამ განუშორებლად თავს დასტრიალებდა, მაგრამ უძლური ჩანდა მისი სააქიმო მეცნიერება და ხელოვნება. ალექსანდრეს აღარ ექეიფებოდა, მაგრამ მეტი გზა არ ჰქონდა — წესი მოითხოვდა მასპინძელსა და ჯარს არ მოშორებოდა. უკვე შეიდი დღე მიდიოდა ნადიმი და სწორედ მეშვიდე დღეს, — როცა მეფე სტადიონზე იჯდა და ყმაწვილთა შეჯიბრებას უტკეირდა — მოახსენეს, ჰეფესტიონი ძალზე ცუდად არისო. ალექსანდრე წამოვარდა და გავარდა სასახლეში, მაგრამ მეგობარს ცოცხალს ვეღარ მიუსწრო. მრავალ მწუხარებანაქამი მეფე არასოდეს ასე არაფერს შეუწყუხებია. სამი დღე და სამი ღამე არ მოშორებია ძვირფას ცხედარს: ან ქეითინებდა, ან კაემანს მღუმარედ



იყო ჩაღრმავებული. არც ჭამა და არც სვა, სანუეგმოდაც არავენ გაი-  
ქარა. თმები აიკვეცა და ცხედარს მოაპნია, — ვითარცა მწუხარე აქი-  
ლევსმა დარეცილ პატროკლეს. მთელი ჯარი გლოვობდა. ყველამ  
თალხი ჩაიცვა. ყველა ცხენს ფაფარი ააკვეცეს. მიდიელმა მოგვებმა  
ტაძრებში საღვთო ცეცხლი ჩააქრეს, როგორც ეს მეფის სკვდილის  
უამს სჩვეოდათ <sup>5</sup>.

მერე, მეოთხე დღეს, როგორც კი წუხილს მცირედად გამოეხსნა,  
ალექსანდრემ ბრძანა გაემზადებინათ სამგლოვიარო პროცესია, რო-  
მელსაც ჰეფესტიონის ცხედარი ბაბილონში უნდა გადაესვენებინა. ევ-  
მენეს მეთაურობით ჰეტერებმა, ჰიპარქოსებმა და სტრატეგოსებმა  
ძვირფასი სამკაულებით და ბრწყინვალე აღჭურვილობით დატვირთეს  
ეტლი, რომელზეც ესვენა ჰეფესტიონი. პროცესიის გაძღოლა და მე-  
თაურობა დაევალა პერდიკას. მასვე გაჰყვა დინოკრატოსი რომელ-  
საც ბაბილონში უნდა აღეშარათა უძვირფასესი კოცონი, რომელზეც  
მომავალ გაზაფხულზე უნდა დაესვენებინათ და დაეწვათ „მეორე  
ალექსანდრე“.

სამგლოვიარო პროცესია მთავარი გზით დაიძრა ბაბილონისკენ.  
ალექსანდრეს კი ჯერ კოსეების მოთარეშე ტომები უნდა დაელაშქრა  
და ისე წასულიყო ბაბილონში. 324 წლის მიწურული იყო, მთები და  
ხევები დიდი თოვლით ავსებულიყო და ალექსანდრეს ვარაუდით  
სწორედ ახლა სჯობდა ბარში ჩამოსახლებული და მთისკენ გზამოჭრი-  
ლი კოსეების დალაშქვრა. ასედაც მოხდა. ალექსანდრემ ჯარი ორ კო-  
ლონად გაჰყო, ერთს პტოლემეიოს ლაგოსის ძე უჩინა სარდლად, მეო-  
რეს თვითონ გაუძღვა და შეესია კოსეების დასახლებებს. შეესია და  
ორმოცი დღე არბია, ულიტა და ძარცვა, „გლოვით გულადუღე-  
ბულმა“ მეფემ ეს მამაცი, მანამდე თავისუფალი და სხვათა მარბიელი  
ტომები. ყველა მათი ციხესიმაგრე მიწასთან გაასწორეს, მაკედონე-  
ლებმა, ათასობით ტყვედ აიყვანეს და მონად გაირეკეს <sup>6</sup>.

ალექსანდრემ არ იცოდა, რომ კოსეებთან ბრძოლა უკანასკნელი  
ბრძოლა იყო მისი დაუდგრომელი წუთისოფლისა.

ისედაც, იგი აღარ ჰგავდა იმ ალექსანდრეს, როგორც იყო ჰეფეს-  
ტიონის სიკვდილამდე. ვერ იქნა და, ვერც ახალ საომარ განაზრახთა  
რთული ფიქრებით მოახერხა მძიმე მელანქოლიის დათრგუნვა. არავინ  
იცის, იყო თუ არა იგი გულწრფელი, როცა — აქილევსის მსგავსად —  
მეგობრის სიკვდილს თავის სიკვდილს ამჯობინებდა, მაგრამ წუხილი  
კი უეჭველად გაუნელებლად შეჰყროდა მის გულს. იგი მაშინ 32 წლი-

სა იყო. მაშასადამე, მისი ვაჟკაცობის ყვაილი ჯერ კიდევ ყვაილობდა, „აქმეს“ საბოლოო დამწიფებამდე შეიღი-რვა წელიწადი კიდევ აკლდა, მაგრამ მეგობრის დამმარხველს, — რომელთან ერთად თავისი ბავშვობა და ყმაწვილობაც დაემარხა — გული თითქოს დაბერებოდა, საშინელი წინათგრძნობები ტანჯავდა, განუწყვეტლივ სიკვდილზე ფიქრობდა, — ვითარცა გილგამეში ენქიდუს სიკვდილის შემდეგ.

— პატროკლე რომ მოკვდა, აქილევსიც მალე მიჰყვავო, — ხშიანდებოდა მის სულში.

ტიგროსი რომ გადმოიარა და ბაბილონს მიაშურა, წინ ქალდეველი მისნები, ბაბილონელი ქურუმები და ვარსკვლავთმჩხრეკელები შემოეგებნენ და ჯარისგან ნამალევად შეჰკადრეს — ნულარ წახვალ ბაბილონშიო, ღვთაება ბელმა მიგვანიშნა, რომ ბაბილონი შენთვის საბედისწერო იქნებაო. ალექსანდრემ ეს გაფრთხილება თითქოს არაფრად ჩააგდო და მისნებს ევრიბიდეს ლექსით უბასუხა: „უმჯობესია ის მკითხავი, ვინც გვიმკითხავებს ბედნიერებას“. არ მოეშვნენ ქალდეველები, — მაინც ნუ წახვალ, მეფეო, მაგრამ თუ არ დაიშლი, მაშინ დასავლეთს პირი უქციე და აღმოსავლეთის მხრიდან შემოდი ბაბილონშიო<sup>7</sup>. ეს კი დაიჯერა ალექსანდრემ. ჯარი ქალაქის აღმოსავლეთით შეაჩერა, თვითონ კი ეფფრატს ჯერ სამხრეთისაკენ დაუყვავა, მერე გადალახა, ხელმარჯვნივ შემობრუნდა და ქალაქს ზურგით დასავლეთისკენ და პირით აღმოსავლეთისკენ მიადგა. აქ მას ბერძნები შემოეყარნენ, მათ შორის სოფისტი ანაქსარქოსი, რომელმაც გამოიკითხა მეფის ეგზომ უცნაური სამოძრაო გეზნი და დაჟინებული „ფილოსოფიური შთაგონებით“ დაარწმუნა მეფე ქალდეველთა მისნობის სიმცდარესა და უნიადაგობაში. ალექსანდრე გულდადებულად შევიდა ბაბილონში.

მაშ, 323 წლის ახალწლობაზე ალექსანდრე მაკედონელი უკვე ბაბილონში იყო. ბაბილონი გამოაცხადა მან თავისი უზარმაზარი, ტანსრულობით და ხალხთა სიმრავლით მანამდე გაუგონარი სახელმწიფოს სატახტო ქალაქად. აქაც ნათლად გამოჩნდა ალექსანდრე მაკედონელის გონებრივი განსჯის სიმაღლე: მსოფლიო მონარქიის სატახტოდ მსოფლიო ქალაქი ბაბილონი და არა „მშობლიური“, მაგრამ, უკვე „პროვინციული“ პელა (მაკედონიის „მშობლიურობას“ ისედაც უნდა გაურბოდეს ალექსანდრე, ვინათგან მისი „სამშობლო“ ახლა არის მთელი მსოფლიო!). დიახ, ბაბილონი, — რომელსაც ისედაც ალექსანდრემდე მთელი ათასი წელი უქირავს პალმა მსოფლიოს პირველქალაქობისა; ბაბილონი მსოფლიოს შუაგული — ბუნებრივ-გეოგრაფიულად,

საეპრო-ეკონომიკურად, პოლიტიკურ-სტრატეგიულად, კულტურულ-მორალურად.

ბაბილონში, მსოფლიოს სატახტოში, „მსოფლიოს ხელმწიფესთან“, უამრავ ხალხთა და ტომთა ელჩობა მოედინებოდა — თუ მორჩილებს გამოსაცხადებლად, თუ ძღვენთა და საჩუქართა მოსართმევად, თუ კავშირის, მეგობრობისა და მოყვრობის გასამართავად, თუ მეზობელზე საჩივლელად, თუ სახელმწიფოთა შორის სადავო საქმეთა გარიგების სათხოვრად.

მოდითღენ ლიბიელნი, ეთიოპელნი, კართაგენელნი, იტალიელნი, ეტრუსკები, რომაელნი, იბერიელნი (ესპანელნი), კელტები, სხვანი და სხვანი.

ალექსანდრემ ბრძანა რიგი და დრო დაეწესებინათ ელჩთა მისაღებად. ყველას თავის დროზე ღებულობდა, ყველას გულსყურობით და თავით უსმენდა, ყველას გასაოცარი სიბრძნით განსჯიდა, განიკითხავდა, მისაგებელს მიუგებდა და მისასჯელს მიუსჯიდა.

და არც ერთმა იმ ელჩთაგანმა არ უწყოდა, რომ ეს „მსოფლიოს განმამბრძნობელი“, „კოსმოკრატორი“ და „კოსმოფაგი“, ხელს თუ ზეგმათ სამშობლო ქვეყანათა დასამონებლად და ჩასაყლაპავად ემზადებოდა.

ჯერ კიდევ გზაში, ბაბილონს მისვლამდე, ალექსანდრეს ბრძანება გაეგზავნა ფინიკიაში — ზღვაოსნები შეჰყარეთ, გემთა ნაწილები გასთაღეთ და ასაწყობად, ხმელეთის გზებით, ბაბილონში გადმოიტანეთ. აქ ნეარქოსიც ამოვიდოდა თავისი ფლოტით, ძველს ახალი ხომალდები შეუერთდებოდა და ნეარქოსი სრული საზღვაო ძალებით დაეშვებოდა და ზღვებით გარს შემოადგებოდა მთელს არაბეთის ნახევარკუნძულს. იმავე ჟამს ალექსანდრემ ჰირკანიაში გაგზავნა ჰერაკლიდე არგეოსის ძე, რომელსაც თან გაატანა გემთმშენებლები და ხუროები. ამათ ევალებოდათ ჰირკანიის მთებში ხე-ტყის დამზადება და კასპიის ზღვაზე გემების აგება. ახალი, ბერძნული ანაგების ხომალდებით კასპიის ზღვაზე უნდა გასულიყო ექსპედიცია და ევლო ჩრდილოეთით და დადგენილიყო, უერთდებოდა თუ არა კასპიის ზღვა მეოტიის (აზოვის) ზღვას, ან თუ იყო შესაძლებელი, ბოლოს და ბოლოს, ამ გზით ინდოეთის ზღვებში გასვლა.

ბაბილონში თავს იყრიდნენ სახმელეთო ჯარები, რომლებიც ალექსანდრესა და მისი სარდლების წინამძღოლობით უნდა დაძრულიყვნენ ჯერ ისევ დაუპყრობელ ქვეყანათა დასაპყრობად — სამხრეთით (არა-

ბეთი), ჩრდილოეთით (შავი ზღვის აუზი), დასავლეთით (დასავლეთ ხმელთაშუა ზღვის აუზი).

იმჟამად ბალკანეთიდან ეწვივნენ „მშობლიურ ალექსანდრეს“ წარმომადგენელი მაკედონელებისა, თრაკიელებისა, ილირიელებისა და ბერძნებისა. ყველანი ანტიპატროსს უჩიოდნენ. არც ანტიპატროსს წაუთვლემია და თავისი ძე, კასანდროსი, უფრო ადრეც უფრენია ალექსანდრესთან. კასანდროსს უნდა დაერწმუნებინა მეფე მამაპისის უცოდველობაში. კასანდროსის გაგზავნა თავისთავად „გარდამეტებულ ერთგულებას“ მოწმობდა ალექსანდრესადმი, რადგან ანტიპატროსის კიდევ ერთი, უმცროსი ძე — იოლაოსი — უკვე ადრევე საკუთარ ღვინისმწოდელ (მერიქიფედ) ჰყავდა აყვანილი ალექსანდრეს. ისე გამოდიოდა, ორივე შვილი, თითქოს თვითნებობით მძევლებად მიეცეს ანტიპატროსს ალექსანდრესთვის...

როგორც ეტყობა, კასანდროსს (მომავალი მეფე მაკედონისა) მამისეული კადნიერება მაინც არ აკლდა და პირველ აუდიენციაზევე: — როცა მეფის წინაშე რომელიღაც აზიელი სათაყვანოდ მიწაზე გაერთხა — ხმამაღლა სიცილი აუტყდა. განრისხებული ალექსანდრე ფეხზე წამოიჭრა, კასანდროსი თმებით დაითრია და კედელზე თავი ატახუნებინა <sup>8</sup>.

ამის შემდგომ ბალკანეთიდან ჩამოსულებმაც ალექსანდრეს წინაშე ანტიპატროსის წინააღმდეგ საჩივრები აღავლინეს. — ეგენი მამაჩემს ცილსა სწამებენო, — იყვირა კასანდროსმა, — რას ამბობ, ეს ხალხი რომ მართლა შეურაცხყოფილი და შევიწროებული არ იყოს, ამოდენა გზას ცილისწამებისათვის როგორ გამოივლიდაო? — დაუბრიალა თვალები მეფემ, — სწორედ ეს ადასტურებს ამათ ცილისწამებასო, — ასე შორს იმიტომ წამოსულან, რომ სიცრუეში არ გვამხილონო. — არ თმობდა კასანდროსი. ამაზე ალექსანდრემ სიცილით დაიწყო და მუქარით დაამთავრა: ეგ ნამდვილი არისტოტელური სიტყვის ჰახრაკობა არისო — ეგ შენი აზრი მამაშენის გასამტყუნებლადაც გამოდგება და გასაპართლებლადაცო; მაგრამ ვაი შენ და მამაშენს, თუ ეს ხალხი ოდნავდაც შეურაცხყოფილი აღმოჩნდებაო <sup>9</sup>.

წყაროებში მაინც აღარ ჩანს, როგორ წარიმართა მტყუანთა და მართალთა გამოვლინება, მაგრამ ფაქტად ის გამოჩნდა, რომ ანტიპატროსი ჯერ ისევ დაუსჯელი და ხელუხლებელი რჩებოდა. რაც შეეხება ბერძენთა სხვა თხოვნას, რომ ბერძენი მოქირავნენი სამშობლოში

აღარ დაბრუნდნენ, ალექსანდრემ არ შეიწყნარა და ყოველი ბერძენი ლტოლვილი საბოლოოდ საბერძნეთში დააბრუნა.

საბერძნეთი კმაყოფილი იმით მაინც უნდა დარჩენილიყო, რომ ალექსანდრემ უკანვე, სამშობლოში დააბრუნა ქსერქსეს ლაშქრობის დროს სპარსთაგან გატაცებული ყოველი ძვირფასი ძეგლი და ნივთი, რომლებიც აქამდე „ტყვედ ინახებოდა“ პასარგადაში, პერსეპოლისში. სუზაში თუ ბაბილონში.

მთელი ბაბილონი გაცხოველებულ აღშენებლობას მოეცა. ქალაქის მოსახლეობა, ჯარი, სირია-ფინიკიიდან ჩამოყვანილი მშენებელები — ყველანი თავთავის უბანზე მიეშვა ალექსანდრეს სამუშაოდ. ნაბუქოდონოსორის შემდგომ, აღარ ახსოვდა ბაბილონს ასეთი აღშენებლობითი „ციებ-ცხელება“. აშენებდნენ გემებს, ნაევებს, ნავსადგურს, საგემომშენებლო დოკებს, არხებს, ღმერთ ბელის ტაძარს, პეტესტიონის საკრძაღველ კოცონს.

ალექსანდრემ წინასწარ გაგზავნა რამდენიმე ხომალდი, რომელთაც გააარეს ევფრატი, მოიარეს სპარსეთის ყურის კუნძულები, გავიდნენ ოკეანეში, გეზი აიღეს დასავლეთით, გაუყვნენ არაბეთის სანაპიროებს და მიადწიეს წითელ ზღვამდე. ისევ შემობრუნდნენ და მოართვეს წინასწარი ცნობები „იმ წელსვე დასაპყრობი“ ქვეყნის შესახებ მეფეს. ალექსანდრემ ერთხელ კიდევ ირწმუნა, რომ ევფრატიდან მას ცურვით შეეძლო გასულიყო ხმელთაშუა ზღვაზეც და შავ ზღვაზეც.

მას უკან თვითონ დაეშვა გემით ევფრატზე მეფე. მას განსაკუთრებით აინტერესებდა არხად გაჭრილი მდინარის მარჯვენა განტოტება, რომელიც აწესრიგებდა საერთოდ ევფრატის მოძრაობას მისი აღიღებისა და დამცრობის მიხედვით. მეფემ ყურადღება მიაქცია იმას, რომ არხის სათავე ფხვიერი იყო, ხშირად იშლებოდა და მისი ხელახალი აღდგენა ან შეუძლებელი ხდებოდა, ან უზარმაზარ შრომას და ხარჯებს მოითხოვდა. ამიტომ ალექსანდრემ მოიძია და მიაგნო უფრო მყარ და მკვრივ ადგილს, სადაც მისი ბრძანებით მაშინვე დაიწყეს არხის ახალი სათავეს გათხრა, გაკვალვა და გამაგრება. არხს დაუყვა და დელტამდე მივიდა მეფე. საუკეს საკუთარი ხელით მართავდა და გზადაგზა გულდასმით ათვალიერებდა ყოველივე თვალთ მისაწვდომს, განსაკუთრებით დასავლეთით, არაბეთის სანაპიროებს. აქვე, არაბეთისა და მესოპოტამიის შესაყარში, იგი შეუდგა კიდევ ერთი „ალექსანდრიის“ დაფუძნებას და მშენებლობას.

ერთი ფრად დამაფიქრებელი და ცუდად მისანიშნებელი ამბავიც

შემთხვევა ამ მგზავრობის უკვე ფატალიზმის ტყვეობაში ჩაყარდნით მეფეს. საჭესთან მდგარს თავზე სამეფო დიადემით შეკრული კავსია ეხურა — მაკედონური ფართოფარფლებიანი ქეჩის ქული. უცებ ამოვარდნილმა ქარმა ის კავსია და დიადემა თავიდან მოაძრო და ორ-ვე მდინარეში გადაუგდო. კავსია წყლით აივსო და დაიძირა, დიადემა კი ჭაობში ჩაძირულსა და ლერწმიანით შემოსილ რომელიღაც მესობოტამიელი მეფის აკლდამას ჩააფრინდა. უცებ გადახტა მდინარეში ვიღაც მეზღვაური, დიადემა — რომ არ დასველებულიყო — თავზე მოიხვია და ისე მოართვა მეფეს. მიესაგნენ ალექსანდრეს მკითხავეები შეშფოთებულნი — ცუდი ნიშანია, რომ ვიღაც ვიგინდარას თავზე მეფის დიადემა აღმოჩნდაო, არ შეიძლება ამნაირი თავი მოუკვეთელი დარჩესო. ალექსანდრემ იმ მეზღვაურს, ჯერ ერთგული თავჯამობისთვის ერთი ოქროს ტალანტი აჩუქა, მერე თავი გააგდებინა\*. სხვა ცნობით, ალექსანდრემ იმ მეზღვაურს ფული აჩუქა, თავი შეარჩინა და გაჭოხვა აკმარა. კიდევ სხვა ცნობით, იმ დიადემის ამომტანი წყლიდან მეზღვაური კა არა, სელევკოსი იყო, ალექსანდრეს ერთი უახლოესი ჰეტერი, რომელსაც მართლაც, ალექსანდრეს სიკვდილის შემდგომ, დიდი ხელმწიფობა ელოდებოდა<sup>10</sup>.

ბაბილონში მობრუნებულ ალექსანდრეს ახლადმოყვანილი ჯარები დახვდა. პევეკეტას სპარსეთის სატრაპიიდან 20000 სპარსელი მეომარი მოეყვანა, ამათთან კიდევ — მეომრული ბუნებით განთქმულ კოსიელთა და ტაპურიელთა რაზმები. ცხენოსანი და ქვეითი ჯარები მოეყვანათ: კარიიდან — ფილოქსენეს, ლიდიიდან — მენანდრეს, მაკედონიიდან — მენიდას. განსაკუთრებული გულისყურით მოიხილა მეფემ სპარსული ჯარები. მადლობა უთხრა მათ, ჯარსაც და სარდალსაც — პევეკეტას — ერთგული სამსახურისთვის, ჯარისკაცთა მაღალი გაწრთვნილობისა და განწესებისათვის.

ახალი სამომარი წყობით დააწყო ალექსანდრემ ახალი ჯარები. მან მანამდე ცალ-ცალკე სახეობათა მიხედვით საჯარისო დაყოფის ნაცე-

\* ანალოგიურ ამბავს ვგაშინებ უფრო ადრე ჰეროდოტე: სპარსეთის მეფემ, ქსერქსემ, საბერძნეთიდან უკუქცევისას, მესაჰე, — რომელსაც საჰე გაუტყდა, მაგრამ ხომალდი მანაც ნაპირს მიაყენა და მეფე გადაარჩინა — ჯერ, ვითარცა თავდადებული ვაჟაკი, უხვად დააჭილოვია და მერე, როგორც გაუფრთხილებელი მესაჰე, სიკვდილით დასაჯა. უეჭველად, ძველი სამყაროს ისტორიის ეს ორი „სენსაციური“ პასაჟი, ან ერთი მათგანი, გამოიყენა ვიქტორ ჰიუგომ თავის რომანში — „93 წელი“ — ლანტენაკი რომ გემზე მეზარბაზნეს ჯერ აჭილოვებს და მერე ხვრეტს.

ლად, პირველად შემოიღო სხვადასხვა სახეობათა — პოპლიტთა, პელტასტთა და მსუბუქთა — კომბინირებული და მცირერიცხოვანი, მობილური დანაყოფები, რაიც, თავის მხრივ, შესაბამისად ახალ ტექტიურ განლაგებებსა და მიმართულებებს მოითხოვდა საომარ ველზე <sup>11</sup>.

ბრძანება ბრძანებას მისდევდა, ხმელთაშუა ზღვის სანაპიროებზე შეეყარათ ყოველი ანაგებისა და წყალწყვის სამხედრო გემა, აღჭურვილობანი, საზღვაო ეკიპაჟი და მომზადებულაყენენ სალაშქროდ დასავლეთის ყველა მიმართულებით — აფრიკისკენ, სიცილიისკენ, იტალიისკენ, იბერიისკენ და ეს ყველაფერა ერთბაშად დაიწყებოდა მაშინ, როცა ალექსანდრე თვითონ გავიდოდა ბაბილონიდან: ხმელეთით — ფინიკიისკენ, წყლით — ევფრატ-სპარსეთის ყურით, არაბეთის შემოვლით, წითელი ზღვით, ნილოსის დელტით <sup>12</sup>.

იღვა 323 წლის მაისი. ბაბილონი ახალი „მსოფლიო ომის“ ცეცხლებას მოეცვა. ლაშქრობის დაწყებას ერთი ნაბიჯიღა უკლდა — დაკრძალვა ჰეფესტიონისა. კოცონიც მზად იყო — გრანდოზულობით და ფასეულობით მანამდე გაუგონარი და თვალთუხილავი საცხედრე კოცონი. 10000 ტალანტი თვითონ ალექსანდრეს დაეხარჯა მისთვის, 2000 ტალანტიც სხვებს — მეგობრებს, სტუმრებს, მამებლებს მეფისას. იგი ხუთ ტერასზე აღემართათ, ოქროს სვეტები შეედგათ, ოქროს არწივებით, გრიფონებით და გველებით მოერთოთ, ზეთაეზე დაედგათ ოქროს სირენები, რომლებიც მიცვალებულის სადიდებელ სამგლოვიარო სიმღერებს მღეროდნენ <sup>13</sup>. გარშემო ხალხისა და ჭარის ტევა აღარ იყო. საბერძნეთიდან ახლად მოსული ელჩები „მეფე-ღმერთს“ ეახლნენ, თაყვანა სცეს და ოქროს გვირგვინები მიართვეს. ალექსანდრეს ეგვიპტეში — ამონიუმში — თეორები (საკულტო საქმეთა რწმუნებულნი) გაეგზავნა შეკითხვით — როგორ მოვიქცეთ და როგორ დავკრძალოთ ჰეფესტიონი, ვითარცა ღმერთი თუ ვითარცა გმირი. მხოლოდ ვითარცა გმირი, — იყო პასუხი.

და მისცეს ცეცხლი ჰეფესტიონი-გმირის საარაკო საზორველს, სამგლოვიარო სიმღერებს, ფლეიტების, საყვირებისა და ნალარგზის გრიალში, ზარსა და ზუნში ჩაიწვა და ჩაიფერვლა ყოველივე. ალექსანდრემ პირველმა აპკურა ზედაშე ძმობილი-გმირის ფერფლს. სხვებიც მიჰყვნენ.

ათი ათასი ხარი მსხვერპლად დააკვლევანა იმ დღეს ალექსანდრემ და ქელებზე მიიწვია იქ დამსწრე ჭარი და ხალხი.

საქელებო და სამსხვერპლო ჭამა-სმა ხუთი დღე გაგრძელდა. ყვე-

ლამ იცოდა, კიდევ ამ ერთი „მსოფლიო ტრაპეზის“ შემდგომ, ახალი „მსოფლიო ომი“ იწყებოდა. ასეთი იყო ნება „კოსმოფაგ-სა“ და „კოს-მოკრატორისა“.

და უცებ აპერიონში განსხეულდა ეს ნაღვლიანი შეგონება — „კაცი ბჭობდა, ღმერთი კი იცინოდა“. ასე მოხდა, ვინათგან სრულიად მოულოდნელი გეზითა და შინაარსით წარემართნენ ქვემოთ დღენი, ქრისტეს წინარე 323 წლისა:

31 მაისი. ალექსანდრემ ნეარქოსის გამოსამშვიდობებელი და ზღვაზე გასასვლელი ტრაპეზი გააწყო და ადმირალთან ერთად დანარჩენი მეგობრებიც მიიწვია. საღამოს, ის იყო, მსუბუქად შემთვრალი სტუმრები წავიდ-წამოვიდნენ, რომ მეფეს თესალიელი მიდიოსი მიეახლა და ეაჯა — მეგობრული, ფრიად მხიარული სუფრა გვაქვს და გვეწვიეთო. ალექსანდრეს მიდიოსი უყვარდა, სამხიარულო სუფრაც იტაცებდა და თხოვნაზე უარი აღარ თქვა. წავიდა, დილამდე სვა, იმღერა, იხუმრა და წამოსვლისას, თანამესუფრეების თხოვნით, პირობა დადო. მომდევნო საღამოსაც მივიდოდა სანადიმოდ.

1 ივნისი. პირობა შეასრულა — იმ საღამოს კიდევ მიდიოსთან და მის ამხანაგებთან შუალამემდე დარჩა სმასა და ზმაში.

2 ივნისი. შუალამეზე რომ მობრუნდა, თავი ცუდად იგრძნო. იბანავა, ორიოდღე ლუკმა შეჭამა და ჩაწვა. მთელი დღე სიცხის აღმურში იყო გახვეული, ოფლს ასხამდა, აცახცახებდა. აშკარა იყო — ტანში ტროპიკული ციებ-ცხელება ჩასდგომოდა.

3 ივნისი. ისევ ცუდად იყო, ძალიან ცუდად. ბრძანა, საკურთხეველთან მიმიყვანეთო; მიიყვანეს, მსხვერპლი შესწირა (რააც წესად ჰქონდა ყოველდღიურად). სარდლები დაიბარა სათათბიროდ, სიცხიანმა. გალაშქრება 7-ში იყო დანიშნული, ერთი დღით გადასწია, 8-სთვის, უკეთ ვიქნები და შევძლებ გემზე ასვლასო. საღამოს ევფრატს გადაღმა, ბაღში გასვლა მოისურვა, გემზე აიყვანეს და გადაიყვანეს. ბაღში იბანავა. დააბრუნეს. მთელი ღამე ციებ-ცხელების თონეში იწვოდა.

4 ივნისი. დღით იბანავა, მსხვერპლი შესწირა, სამუშაო ოთახში გადავიდა და მთელი დღე იქ იწვა, ისევ დიდ სიცხეში ჩავარდნილი მთელ დღე მიდიოს თესალიელი საწოლთან უჯდა და ენამახვილაკობით ცდილობდა მეფისთვის ტანჯვა გაექარებინა. მომდევნო დღისთვის სარდლებთან თათბირი დანიშნა ავადმყოფმა. საღამოს ცოტა წა-



ციკნა და დასაძინებლად დაწვა. მაგრამ მთელი ღამე თეთრად გაც-  
ვითა, ოფლით და ცეცხლით გათანგულმა.

5 ი ვ ნ ი ს ი. ისევ ბანაობა, ისევ მსხვერპლწირვა. იქვე, საბანაო  
ოთახში დარჩა. ნეარქოსი და მისი თანაშემწე სარდლები ეახლნენ. მუ-  
ფემ ისევ შეახსენა, რომ ზღვაზე გასვლა 8-შია დანიშნული. მანამდე  
სამი დღეა, სამ დღეში მეფე გამოკეთდება და უეჭველად შეძლებს გემ-  
ზე ასვლას. ნეარქოსი დაიტოვა, საწოლთან დაისვა და, ეს მერამდენედ,  
ათხრობინებდა ოკეანეზე განცილდ თავგადასავლებს. გატაცებით უს-  
შენდა და უხაროდა — მეც მალე ავდგები, მეც გავალ ზღვაზე და ყო-  
ველივეს თვითონ განვიციდი, რაც შენ ხიფათი გადაგბდენიაო. ციებ-  
ციხელება კი მთელი ღამე ისევ განუცადებლად ჰქადა მის სხეულს.

6 ი ვ ნ ი ს ი. დილით, ჩვეულებრივი ბანაობისა და მხვერპლწირ-  
ვის შემდეგ, ისევ შემოიყარა ფლოტის მეთაურები და ისევ გააფრთხი-  
ლა — 8-ში თქვენთან ვარ და ყველაფერი გამაზადეთ ჩემს შესახვე-  
დრად და ზღვაზე გასასვლელადო. საღამოს აბაზანის შემდგომ, უფრო  
მძაფრად შემოუტია ციებ-ციხელებამ. ისევ აუტანელი ტკივილები, ისევ  
სრულიად უძილო ღამე.

7 ი ვ ნ ი ს ი. დილით მაინც ბრძანა, დიდ წყალსაცაეში ჩაეშვათ  
იგი. ჩაუშვეს. ძლივს ამოიყვანეს. ძლივსა შეძლო მსხვერპლის შეწი-  
რვა. ისევ მოიწვია ფლოტის სარდლობა, ისევ ეთათბირა, ვილაც მეთა-  
ურების გადაყენება ურჩია სტრატეგოსებს, ახალთა შერჩევაში სერი-  
ოზულობა და სიმკაცრე უბრძანა.

8 ი ვ ნ ი ს ი. დადგა გალაშქრების დღე. ალექსანდრე კი მძიმე  
ავადმყოფად დარეცილიყო. მაგრამ მაინც ბრძანა მიეყვანათ იგი სა-  
კურთხეველთან. ხელში აიყვანეს და ეგრევე აღასრულებინეს მსხვერ-  
პლწირვა. ზღვაზე გალაშქრება კი ისევ გადასდო. სარდლებს უბრძანა,  
შორს ნუ წახვალთ, ღამე აქ, ეზოში გაათიეთო. უმძიმესი ღამე. უმ-  
ძაფრესი ბრძოლა სიკვდილსა და სიცოცხლეს შორის „კოსმოკრატო-  
რის“ სხეულის დაუფლებისთვის.

9 ი ვ ნ ი ს ი. დილით თითქოს ისევ იმძლავრა სიცოცხლემ. ძლივს  
შეძლო, თუმცა მაინც შეძლო მსხვერპლის შეწირვა. სასახლის მეორე  
ნაწილში გადაიყვანეს. მცირედ ჩაეძინა, მაგრამ ხურვებამ ისევ გამო-  
აღვაძა. სარდლები რომ შევიდნენ, ყველა იცნო, თუმცა სიტყვის და-  
ძვრა კი ვეღარ შეძლო. ენა წართმეოდა მეფეს.

10 ი ვ ნ ი ს ი. დილიდანვე ჭარი და ხალხი მიაწყდა მეფის სასახ-  
ლეს. ხმა გავარდნილიყო ალექსანდრე მაკედონელის სიკვდილისა.

სტრატეგოსები არწმუნებდნენ, მეფე ცოცხალია, ოღონდ მძიმე ავად-  
მყოფია, მაგრამ ავადმყოფობასაც დაძლევეს, ვითარცა ხშირად სიკვდი-  
ლი დაუძლევიანო. ზოგმა დაიჯერა, უმრავლესობამ არ დაიჯერა—მეფე  
მკვდარია და არ გვიმხელენო. მაგრამ ვინც ირწმუნა და არ ირწმუნა,  
ყველა ერთად მოითხოვდა სასახლის კარის გაღებას და მეფის სანახა-  
ვად შეშვებას. არაფერმა გაჭრა — არც თხოვნამ, არც მუქარამ — და  
კარები გააღეს, ჭარი რიგში ჩააყენეს და მეფის სახილველად შეუშვეს.  
რიგ-რიგად მიდიოდნენ და მის საწოლს ჩაუვლიდნენ ჭარისკაცები. მე-  
ფე მარჯვენა ხელის სუსტი ჩამორთმევით, ოღნავი თავის დაქნევით და  
მკრთალი ღიმილით ემშვიდობებოდა ყველას. ის ღამე პეკკესტამ, სე-  
ლეკოსმა, პითონმა და კიდევ რამდენიმე ჰეტერმა სარაპის-ს ტაძარში  
გათიეს და იქვე, ქურუმთა საშუალებით, „ღმერთს ჰკითხეს“: ხომ არ  
სჯობია, რომ ავადმყოფი მეფე გამოსამჯობინებლად ტაძარში გადმო-  
ვასვენოთო; მაგრამ შუალამისას ეს „ზეციური“ პასუხი მოესმათ: „არა,  
აქ არ მოიყვანოთ, ვინათგან იქ უფრო მალე გახდება კარგადო“... არც-  
ერთ მათგანს არ უფიქრია, რომ ალექსანდრესთვის მაშინ „კარგად გახ-  
დომა“ თურმე სიკვდილს ნიშნავდა.

11 ი ვ ნ ი ს ი. იმ დღეს მხოლოდ უახლოესი მეგობრები და თანა-  
მებრძოლები დასდგომოდნენ თავზე ხელმწიფეს. სიკვდილი კი უკვე  
ზეიმობდა. ალექსანდრეს დაუცხრომელი სიცოცხლე იშრიტებოდა.  
უეჭველად, ყოველ იქ მყოფს უწვავდა გონებას ეს საკითხავნი: იგი  
კვდება და რა იქნება მის შემდგომ? ან ვინ იქნება? და სად ვიქნები და  
ვინ ვიქნები მე? ვინ იქნება მისი დიადოხოსი (მემკვიდრე)? იქნებ მე?!  
ან, რატომაც არა — მე!!! ან რომელია ჩემზე უმეტეს, ჩემზე უმჯობეს,  
ჩემზე უმაჟავეს, ჩემზე უნიჭიერეს?! ჰა, იქნებ მე? დიახ, მე!..

უკანასკნელად გაახილა თვალი მომაკვდავმა. მზერა რიგრიგად ჩა-  
მოატარა და, ალბათ, ყველას თვალებში „ის საკითხავნი“ ამოიკოხხა.  
პერდიკას ანიშნა, აწ დაღუპული თათიდან ბეჭედი ადვილად წაიძრო  
და გადასცა. მაშინვე რომელიდაცამ შესძახა, ისტერიული მღელვა-  
რებით: „ვის უტოვებ, მეფეო, შენს სამეფოს?“... „საუკეთესოს“ —  
ამოიხრიალა ალექსანდრემ. ერთხელ კიდევ ჩამოატარა მზერა მის „დი-  
ადოხოსთა“ სახეებზე და თქვა დაქანცული ხმით: „ვხედავ საშინელ  
ხმალთაკვეთებას და სისხლთა თხევას ჩემს სარეცელთან“...

ეს მასი უკანასკნელი სიტყვები იყო.

ალექსანდრე მაკედონელი სიკვდილის საუფლოში ესვენა.

## ალექსანდრეს სიკვდილის შემდეგ

დიდი ხელმწიფის სულის აღმოხდენისთანავე, დასანგრევად შე-რ-ყა და შეტორტმანდა მისი ცოდვიანი მახვილით მობოკილი „კოსმო-პოლისი“ — გეოგრაფიული სივრცითა და ხალხთა სიმრავლით მანამდე უსწორო და უბადლო მონარქია, გადაშლილი და გადაწვართული ად-რიატიკის ზღვიდან და ლიბიის უდაბნოდან ინდოეთის შუაგულამდე.

„ღვთაებრივი“ დამპყრობლის „სურნელოვანი სხეული“ ჯერ სრუ-ლად არც კი გაცივებულებოდა, რომ მის სარეცელთან მართლაც გაისმა უთავყამო ომებისა და სისხლთათხევეების მაუწყებელი საქურვლის ჟღარიალი.

საესებით ბუნებრივად, იდგა საკითხი ალექსანდრეს მემკვიდრეო-ბის სამომავლო ბედისა; მაგრამ მოხერხდებოდა კი, უსისხლოდ გა-დაწყვეტილებოდა სწორედ სისხლისა და გვამის ნალექზე დაფუძნებუ-ლი პოლიტიკური მემკვიდრეობის სახვალიო და სამერმისო ბედ-ი-ბალი?!

მდგომარეობას უფრო ისიც ამწვავებდა, რომ თვითონ ალექსანდ-რეს, არც წერილობით და არც სიტყვიერად, არავითარი „ანდერძი“ არ დაუტოვებია ტახტის მემკვიდრისა და მისი უზარმაზარი დანატო-ვარის მოვლა-პატრონობის თაობაზე. სარდალთა კითხვაზე — „ვის უტოვებ სამეფოსო“ — მომაკვდავმა მეფემ — „საუკეთესოსო“, — თუ ამნაირი კითხვა-პასუხი მართლა შედგა, მაშინ, ამნაირი პასუხი დააშოშ-მინებდა კი არა, კიდევ უფრო გაამწვავებდა დამოკიდებულებებს ტახტის „მაძიებელთა“ და „მზრუნველთა“ შორის. ასე უნდა ყოფი-ლებოდა, ვინათგან ყველა ისინი — ყველა ეს „დიადოხოსნი“ — ერთნა-ირად იყვნენ „საუკეთესონი“, ერთნაირად-მეტქი: ერთნაირად ღირ-სეულნი თუ უღირსონი, ერთნაირად ნიჭიერნი თუ უნიჭონი, ერთნა-ირად ბრძენნი თუ უგუნურნი. ერთი სიტყვით — იყვნენ ერთნაირნი და არც ერთი მათგანი არ იყო ტოლი და ბადალი ალექსანდრე მკველო-ნელისა. ამიტომ, როგორც „ერთნაირთა“ წრეს სჩვევია, ვერც ერთი

მათგანი ვერ მისცემდა თავს უფლებას, წინ გამოჰკრილიყო და დაეძახნა — მე ვარ ის „საუკეთესო“, ალექსანდრემ რომ თავის ხელმწიფურ ადგილზე გაიგულისხმაო და ამიერიდან სწორედ მე გახლავარ ალექსანდრე მაკედონელიცო. ისედაც — „ერთნაირები“ ხომ თავისი წრიდან არც არავის მისცემენ ნებას ასეთი მეტიჩრული გამოხდომისთვის!

დაე, იყოს სხვა, თუნდაც ჩვენზე უარესიც, ოღონდ არავითარ შემთხვევაში რომელიმე ჩვენთაგანი! — აი, მარადიული შურის ემანაცია „ერთნაირებისა“...

არა და, ტახტი უეჭველად ვილაცას უნდა მიჰკუთვნებოდა. ეს გარდუვალად საპირო იყო, უკეთუ აუცილებლობას წარმოადგენდა ალექსანდრესეული სახელმწიფოს ერთიანობის შენარჩუნება, უკეთუ საისტორიო ბედისწერა ალექსანდრეს დიდი ტახტისგან მრავალი მცარე ტახტის გამოჰქედვას არ აპირებდა.

რასაკვირველია, დიადოხოსობის ყველაზე „სასურველი ვარიანტი“ ისევ თვითონ ალექსანდრეს ძე, ტახტის უშუალო მემკვიდრე უნდა ყოფილიყო. კიდევაც ჰყოლია ვაჟი ალექსანდრეს, სახელად ჰერაკლე — ჰყოლია მემნონ როდოსელის ქერივისგან, ბარსინასგან. მაგრამ ჰერაკლე მაინც „უკანონო ეშმაკობის“ ნაყოფად ითვლებოდა და მისი გამეფების სასარგებლოდ ბოლომდე თავს მაინც ვერავენ გამოიდებდა.

ამ მხრივ „საიმედოდ ბრწყინავდა“ ალექსანდრეს კანონიერი მეუღლე-დედოფალი როქსანა, რომელიც გვირგვინოსანი ქმრის აღსასრულისას მეექვსე თვის ფეხმძიმობაში იდგა და ტახტის „ნაღდი მემკვიდრის“ დაბადებას ელოდებოდა. მაგრამ ვინ იცოდა, მაინც და მაინც ვაჟი დაიბადებოდა, ან თუ აქაც გაამართლებდა, ვინ აიჩემებდა, რომ ის ნანატრი უფლისწული ღღემოკლე ან ჰკუჰამოკლე არ აღმოჩნდებოდა, ანდა — თუ აქაც ყველაფერი საბედისწეროდ და ნორმალურად წარიმართებოდა, მაინც ვინ იძლეოდა პოლიტიკური მდგომარეობის გარანტიას იმ — აწი დასაბადებელი უფლისწულის გაზრდამდე და სამეფო კბილის ამოსვლამდე?!

ასე რომ, ის „მომავალი ახალი ალექსანდრე“ მაინც მხოლოდ საოცნებო იმედად რჩებოდა, ტახტზე კი „მოსვლამდე“ და „ასვლამდე“ აუცილებლად ვინმე უნდა მჯდარიყო — „მეორე ვარიანტი“, მეფის ძმა. და ასეთი „ვარიანტიც“ ყოფილა — ალექსანდრეს ძმა ჰყავდა. ეს იყო არიდაოსი, რომელიც ფილიპეს თესალიელი მოციქეკავე ქალისგან შესძენოდა და ახლა, ალექსანდრეს სიკვდილის უამს, ასაკობრივად მოწიფულიც გახლდათ. რა ვუყოთ, რომ არიდაოსი ალექსანდრეს მხო-

ლოდ ნახევარძმა იყო, თანაც ეპილეფსიით დაავადებული და ქვეაშერ-  
ყელა. მთავარია, რომ იგი ფილიპეს შვილი და ალექსანდრეს სისხლს  
თანაზიარი იყო.

არიდაოსის პოზიციას განსაკუთრებით განამტკიცებდა მ-სი  
„წმინდა ევროპელობაც“ — მამით მაკედონელი, დედით ბერძენი  
(თვითონ ალექსანდრესავით!). ასეთი კაცის გამეფებით უნდა შენაშუ-  
ლიყო „სიწმინდე“ მაკედონურ-ელბინური ტახტისა და გადარჩენილყო  
იგი „ზიურ-ბარბაროსული შერევისაგან“.

და აი, პირველი შეიარაღებული გამოსვლა სწორედ არიდაოსის  
სახელს დაუკავშირდა. პირველმა ხმა აღიმალა ქვეითმა ჯარმა, წარ-  
მომავლობით სრულიად „ნაციონალურმა“ — მაკედონურ-ბერძნულ-  
მა — და სოციალურად გლეხურმა. ეს ის ჯარი იყო, ალექსანდრესაც  
რომ არ ერიდებოდა და „ბარბაროსების“ აღზევებისთვის პირში სა-  
ყვედურობდა.

სასახლისკენ დაძრულ ჯარს სათავეში ედგა მელეაგრე, „გაუსწო-  
რებელი ნაციონალისტი“, რომელიც არიდაოსს თავგამოდებით უჭერ-  
და მხარს სწორედ მისი სისხლის „რასიული სიწმინდისათვის“.

ჯარისკაცები გამაყრუებელი ღრიალით და იარაღის ზრიალით სა-  
სახლეს მიაწყდნენ, შიგ შეიჭრნენ, სადღაც შიშით შეკუნჭული არი-  
დაოსი გამოათრიეს, სამეფო ტანსაცმლით მორთეს და, ფილიპე  
III-ის სახელით, მეფედ გამოაცხადეს.

(საისტორიო ბედისწერას უყვარს ასეთი ფარსის გათამაშება: გე-  
ნიოსის ადგილზე იდიოტის დასმა!).

ეს, ფაქტიურად, მელეაგრეს ერთპიროვნულ აღზევებას მოასწა-  
ვებდა, ამას კი დანარჩენი დიადოხოსები არასდიდებით არ დაუშვებ-  
დნენ. ისინი, პერიდიკას მეთაურობით და კავალერიის თანადგომით,  
წინ ჩაეღობნენ მოიერიშე ფალანგიტებს.

და, უკვე აღესრულა წინა დღის წინასწარმეტყველება ალექსანდრე  
მაკედონელისა: მის სარეცელთან სისხლიანი ქელეხი იწყებოდა. დად-  
გა საომარი ყოინა, ხმალთა ცემა, სისხლის ქცევა, დაჭრილთა ბლავი-  
ლი და მომაკვდავთა უკანასკნელი მაწყევარი ამოძახილი. და ყოველი-  
ვე ეს ხდებოდა იმ სასახლეში და იმ დარბაზში, სადაც ახლა ყოველ-  
გვარ ბრძოლათა და ადამიანურ ჭიდილთა მიმართ ისე მშვიდად და  
გულგრილად იწვა თვითონ, მარად მოუსვენარი, სისხლით მარად უძ-  
ლები ომის ღმერთი — ალექსანდრე მაკედონელი.

ქვეითმა ჯარმა ბრძოლის უპირატესობა მიიღო, მაგრამ წარმატება ვეღარ განავითარა და იძულებული გახდა სამშვიდობო ნილაპარაკებაზე დათანხმებულიყო.

თათბირს პერდიკა მეთაურობდა, ასაკით ყველაზე უფროსი და თანაც იმ უპირატესობის შეგრძნებით, რომ მომავლადემა ალექსანდრემ ბეჭედი სწორედ მას გადასცა. რასაკვირველია, მეფის თათბირიდან წაძრობილი ბეჭედი სამეფო მემკვიდრეობის უფლებას როდი ანიჭებდა მოხუც სარდალს, მაგრამ ხელმწიფური ინსიგნიების დაცვა, მოვლპატრონობა და სახელმწიფო მმართველობისათვის ბჭობა-განწესრიგების მეთაურობა შეიძლება „ეპატიებიანთ“ პერდიკასთვის დანარჩენ დიადოხოსებს.

თათბირმა სცნო არიდაიოსის, ანუ ფილიპე III-ის მეფობა. მაგრამ ამავე დროს, მის თანაზიარ მეფედ, ანუ „თანამეფედ“, გამოაცხადეს უფლისწულიც, რომლის დაბადებასაც მოელოდნენ როქსანასაგან. ასეთი გადაწყვეტილება კომპრომისი იყო ქვეით ჯარსა და კავალერიას შორის, ანუ პერდიკასა და მელეაგრეს შორის. ამასთანავე, ფაქტიურად არარსებულ „მეფეებზე“ ზედამხედველობაც ორივე ბელადმა დაიკისრა, მაგრამ სულ მალე პერდიკამ, საზეიმო მსხვერპლწირვის დროს, მელეაგრე ზედ სამსხვერპლოზე მიაკლა და მისი სამასი რჩეული თანამებრძოლიც სპილოებს დააქვლეთინა.

საბოლოოდ, ალექსანდრეს სარდლებმა და „ნამდვილმა დიადოხოსებმა“, ვითომც „ორმეფობის ფონზე“, რეალურად და ფაქტიურად თავისი მმართველობა დაადგინეს და ერთმანეთში ნადავლივით გაიწილეს. პერდიკა და კრატეროსი იმ ფაქტიურ მეფეთა მეურვეებად, ანუ „რეგენტებად“ გამოცხადდნენ, დანარჩენებს კი „მათი წილი“ ქვეყნები დაურიგდათ: ანტიპატროსს — ოსეე მაკედონია-საბერძნეთი, ლისიმახოსს — თრაკია, პტოლემაიოსს — ეგვიპტე, ანტიგონეს — დიდი ფრიგია, ლაკია და პამფილია, ევმენეს — კაპადოკია და პაფლაგონია, ლეონატოსს — პელესპონტის ფრიგია, ლაომედონტოსს — სირია. პითონს — მიდია, პევეესტას — სპარსეთი. დანარჩენი აღმოსავლეთ აზიური და ინდური სატრაპიები სამმართველოდ დარჩათ ალექსანდრესგან დატოვებულ სატრაპებსა და რაჯებს.

სხვანაირად — ეს ნიშნავდა ალექსანდრე მაკედონელის სახელმწიფოს ფაქტიურ დაშლას.

იმ დღეებში როქსანამ ალექსანდრეს მეორე ცოლი დარიოსის ასული სტატირა, მის დასთან ერთად, დაახოცვინა და ჭაში ჩააყრევინა. მა-

ლე როქსანამ მართლაც ნამდვილი ტახტის მემკვიდრე აჩუქა დაზავრულ ქვეყანას.

აწლად დაბადებულს მეფობის სახელად ალექსანდრე IV დაერქვა. მაგრამ ქვეყანა მაინც უმეფოდ იყო. ძუძუთა ბაღლი და მოწიფული სულელი რა ანგარიშში ჩასაგდები იყვნენ და ერთბაშად აღზევდა და გამძლავრდა პერდიკა — მზრუნველი და რეგენტი ფიქტიური მეფეებისა. დანარჩენი დიადოხოსები კი თავიანთ „წილ სამფლობელოებში“ და თავიანთ კანში ვერ ეტეოდნენ და მტრული თვალით ზომავდნენ „ზომაზე მეტად“ ამაღლებულ „თანატოლ მეტაჩარას“.

პირველი, ვინც გაბედა რეგენტის ნება-სურვილთა ხელყოფა, იყო პტოლემეაიოს ლაგიდი, ეგვიპტის გამგებელი და მპყრობელი. ამ შემთხვევაში, საქმე შეეხო ალექსანდრე მაკედონელის დაკრძალვას.

3000 ბერძენი მხატვარი მონაწილეობდა ალექსანდრეს საზეიმო დაკრძალვის მოწყობაში. უბრწყინვალეს რელიეფებით გამოკვართულ ოქროს სარკოფაგში ჩაასვენეს დიდი ხელმწიფის მუშია, ნაირგვარი ნელსაცხებლებით გაუღენთილი. სარკოფაგი ძოწის ძვირფასი საბურველით შებურეს და უზარმაზარ, ოქრო-ვერცხლით შექვილი ეტლზე დაასვენეს. ზემოდან ეტლს კვლავაც დიდებული ხელოვნებით ნაკეთები თაღოვანი კატაფალკი გადამხობოდა, ესეც მთლიანად ოქროთი და ძვირფასი ქვებით მოოქვილი. კატაფალკის თაღქვეშ ოქროს ტახტი იდგა, ტახტს ზემოთ კი — ოქროს რგოლებზე დაკიდებული უბრწყინვალესი გვირგვინი. სარკოფაგის გვერდით ელაგა უამრავ ბრძოლებში გამოვლილი საქურველი ალექსანდრესი. სულ ზემოთ, წრიულად, ზარები და ზარაზინები ეკიდა, სვლის დროს შორიდანვე რომ შეეტყოთ საზეიმო-სამგლოვიარო პროცესიის მოძრაობა და მოახლოება. ბალდახინის ოთხივე კუთხეში გამარჯვების ქალღმერთის, ნიკეას ქანდაკება იდგა. თაღის საყრდენი პერისტილიც, იონიური კაპიტელებით გაწყობილი, აგრეთვე ოქროსი იყო, ოთხივე სვეტი თავიდან ბოლომდე ოქროს ფოთლებით შემკობილი; შიგნით, ოთხივე სვეტთან, ოთხი სურათი იდგა, ნაირგვარი თხზულხაზებით შემკულ ჩარჩოებში. ერთ სურათზე თვითონ მეფე იყო გამოხატული, ხელში მსოფლიოს მპყრობელობის სკიპტრით, ევროპელ და აზიელ მცველთა თანხლებით; მეორე სურათზე — სპილოებზე ამხედრებულ მაკედონელთა ადლუმი; მესამეზე — სამხედრო ხომალდთა საზღვაო ადლუმი; მეოთხეზე — ცხენოსანთა ბრძოლა და ხმალთაკვეთება. კატაფალკში შესასვლელს ოქროს ლომები იცავდნენ. თაღის ზეთავზე, სახურავის შუაგულში, გამ-

ლილი იყო ძვირფასი ფინიკიური ხალიჩა, რომელზეც ესვენა ზეთისხილის რტოთა სახოვანი ოქროს გვირგვინი. ეტლის ოთხივე ბორბალი სრულად ოქროთი იყო მოქვედილი, ეტლსაც ისინი ოქროს ზამბარებით უდგენენ — მოძრაობის უამს, უსწორმასწორო გზებზე რომ არ შეწყუხებულებოდნენ მეფის ცხედარი. ეტლში, ოთხ-ოთხ წალიკად, თექვსმეტი ლამაზი და სრულტანოვანი ჯორი იყო შებმული, ყოველი მათგანი — ოქროს გვირგვინით თავშემკობილი, ოქროს ლაგმებით, ოქროს საკისრე-სამკერდულებით და ოქროს ეყვან-ზარაზინებით მორთულ-მოკაზმულნი.

ასეთი ანაგებით ალექსანდრეს ცხედარი ბაბილონიდან გამოასვენეს და ევროპისკენ გაუყენეს. პროცესიას მიუძღოდა თვითონ პერდიკა, მცირე ამაღისა და საპატიო სამხედრო ესკორტის თანხლებით. ალექსანდრე უნდა მიესვენებიათ ეგეში, მაკედონიის თავდაპირველ სატახტოში, და იქ დაეკრძალათ მამა-პაპეულ სამეფო საძვალეში. მაგრამ პროცესიამ ჩრდილოეთ სირიაში რომ ჩააღწია, სავსებით მოულოდნელად, წინ პტოლემეაიოსი გადაეღობათ, გვარიანად მოზრდილი ჯარით, და სრულიად უბოდიშოდ და მოუხრიდებლად, ეტლი ალექსანდრეს საჩუკრავით და ყოველი გაწყობილობით, სამხრეთისაკენ გაატრიალა — ალექსანდრეს ცხედარი მე მისგანვე დაარსებულ ქალაქში, ალექსანდრიაში უნდა დაეკრძალათ, — ბრძანა ლაგიდმა, ხმლის ვადაზე ხელდადებულმა. პერდიკა ერთი თვალის შეწონებით მიხვდა, რომ თავისი მცირე ამაღით მოპირდაპირის ჯართან ვერაფერს გააწყობდა, ბოღმა გულში ჩაიტრიალა და შურისგება სამომავლოდ გაიგულისხმა. პტოლემეაიოსმა კი ალექსანდრეს ცხედარი ეგვიპტისკენ გაუყენა. დიდი მნიშვნელობა ეძლეოდა პტოლემეაიოსის ამ ნაბიჯს — „მკვდრის მიტაცებას“: სადაც ალექსანდრე დაიკრძალება, სწორედ ის არის ცენტრიც ალექსანდრეს სახელმწიფოსი! მაშასადამე, ალექსანდრეს „ნამდვილი მემკვიდრე-დაადოხოსიც“, — ანუ „ახალი ალექსანდრე“ — არის იგი, ვინც ბატონობს ალექსანდრიაში, ეგვიპტეში, და არა სხვაგან — სადმე ბაბილონში, სადმე პელაში, თუ სადმე „სხვაგან“...

პტოლემეაიოსმა ალექსანდრეს ცხედარი მემფისში მიასვენა და იქვე დაასვენა, მანამ სანამ ალექსანდრიაში საგანგებო აკლდამის მშენებლობა დამთავრდებოდა. ის აკლდამა კი ოთხმოცდახუთი წელიწადი შენდებოდა და პტოლემეაიოსი ვერც მოესწრო მის დამთავრებას მხოლოდ პტოლემეაიოს II-მ მოახერხა იმ საოცარი, გრანდიოზული სამარხის დასრულება და შიგ „ამონ-ზევის ძის“ დაბინავება.



პერდიკას კი აუცილებლად უნდა მოესწრო შურისძიება პტოლემი-  
იოსისადმი, ამ ურჩი და თავხედი „სატრაპისადმი“, რომელმაც მას  
მკედარი ალექსანდრე წარსტაცა და ამით კიდევაც დაამცირა და ღია-  
დობოსთა შორის პირველობაც საექვოდ გაუხადა. ბედმაც გვარიანად  
გაუღიმა იმეამად პერდიკას: ალექსანდრეს დედა, ოლიმპიადა, მას თავისი  
ასულის, კლეოპატრას ცოლობას სთავაზობდა. ოლიმპიადას ამით  
სურდა თავისი ნიადაგამოცლილი ძალაუფლება განემტკიცებინა მა-  
რად საძულველი ანტიპატროსის წინააღმდეგ. პერდიკასთვისაც ფრიად  
მომგებნიანი უნდა გამხდარიყო ეს საქორწინო გარიგება, ვინათგან იგი  
ამ გზით სამეფო სახლის წევრი ხდებოდა, „პრაქტიკულად“ აწ მოპო-  
ვებულ უფლებებს უკვე „თეორიულად“ განამტკიცებდა. მაგრამ  
პერდიკა ეგზომ მომგებიან წინადადებაზე პასუხს არ ჩქარობდა. თეი-  
თონ მას ცოლად ანტიპატროსის ასული ჰყავდა და მასთან გაყრა და  
ანტიპატროსის მოსისხლე ოლიმპიადასთან დამოყვრება საშიშიც ჩან-  
და. პერდიკას მაშინ, ანტიპატროსის მტრად გადაკიდება კი არა, მასთან  
კავშირი და პტოლემიიოსის დასჯა ეჩქარებოდა.

მაგრამ უეცრად წარმოქმნილმა მოვლენებმა უარესად გაართულეს  
და სულ სხვა მიმართულებით წარმართეს ისედაც უადრესად რთული  
და არეულ-დარეული წუთისოფელი. წინა პლანზე წამოდგა ისევ  
„საბერძნეთის საკითხი“. საბერძნეთი განსაკუთრებით ამომძრავა ალექ-  
სანდრეს სიკვდილის ამბავმა. „ტყუილია, ალექსანდრე არ მომკვდარა;  
ის რომ მართლა მკედარი იყოს, მთელი მსოფლიო ლემის სუნით აივ-  
სებოდაო“; — ყვიროდა ათენელი დემადე. ხოლო, როცა ალექსანდრეს  
სიკვდილი სარწმუნო გახდა, მაშინვე ანტიმაკედონურმა პარტიამ მაკე-  
დონური უღლის დასამზობად საომარი ნაღარა დაჰკრა. საომარ სამზა-  
დისს სათავეში უდგნენ — ჰიპერიდე, ლეოსთენე და დემოსთენე. რო-  
მელიც ექსორიიდან დააბრუნეს და ათენში დიდის ზარ-ზეიმით მიიღეს.

ათენელებს შეუერთდნენ ეტოლიელები, ფოკიდელები. თესალი-  
ელები და, ლეოსთენეს სარდლობით, დაიწყეს შეტევები მაკედონურ  
გარნიზონებზე. მალე პელოპონესის ქალაქებიც შეუერთდნენ აჯანყე-  
ბულებს. ანტიპატროსმაც აღარ დააყოვნა და დაძრა ჯარები საბერძნე-  
თისკენ.

ასე დაიწყო ე. წ. „ლამიის ომი“ (323—322), ასე დაერქვა, ვინათ-  
გან იგი უმეტესწილად მიმდინარეობდა თესალიის ციხესიმაგრის. ლა-  
მიის გარშემო. პირველ ხანებში ბერძნებმა წარმატებით განავითარეს  
შეტევები, მაგრამ მალე მათ შორის უთანხმოება ჩამოვარდა, ეტო-

ლიელებმა აჯანყებულთა ბანაკი დატოვეს, ანტიპატროსმა იდროვა და ძლიერად შემოუტია. ათენელებმა ბრძოლა წააგეს, ლეოსთენეც ბრძოლაში დაიღუპა. ამასობაში კიდევ ანტიპატროსს მეშველი ძალა მოუვიდა; ეს იყო ლეონატოსი, ალექსანდრე მაკედონელის უერთგულესი და უმამაცესი თანამებრძოლი, ჰელესპონტის ფრიგიის მაშინდელი მმართველი.

მაგრამ სანამ ანტიპატროსი და ლეონატოსი შეერთდებოდნენ, ბერძნებმა დაასწრეს და ლეონატოსს, — რომელიც თავის მთავარ, ქვეით ჯარებს ჩამოშორდებოდა და წინ მხოლოდ კავალერიით მოიჩქაროდა — გზა მოუჭრეს და ბრძოლა მარტოკას მიაღებინეს. ლეონატოსი კიდევაც დამარცხდა და ბრძოლაშიც დაიღუპა. მაგრამ ბერძნებმა ვერც ამ წარმატებით იხიერეს. ანტიპატროსმა ლეონატოსის ქვეითი ჯარები შეიერთა; აზიიდანაც ახალ მეშველ ძალად კრატეროსმა მოუსწრო თავისი ვეტერანებით და კრანიონთან (თესალიაში) გამართულ გადამწყვეტ ბრძოლაში მან სასტიკად დაამარცხა ბერძენ მოკავშირეთა ჯარები.

დამარცხებულებმა ზავი ითხოვეს. გამარჯვებულებმა მძიმე საზავო პირობები წააყენეს და თავისიც გაიტანეს. საბერძნეთმა ისევ იტვირთა კისრად მაკედონური უღელი. ათენში დემოკრატია დაემხო. პოლიტიკურ მმართველობაში მონაწილეობისათვის დაწესდა ქონებრივი ცენზი, 2000 დრაქმის რაოდენობით, ამრიგად, ამიერიდან დემოკრატიის ნაცვლად, სახელმწიფოს მართვა-გამგეობა მთლიანად მდიდარი ოლიგარქიის ხელში გადადიოდა. დემოსთენემ და ჰიპერიდემ გაქცევა მოასწრეს. ათენის უმაღლესმა სასამართლომ მათ, — ვითარცა „ომის გამჩალებლებს“ — სიკვდილი მიუსაჯა. ვინმე არქიოსმა, ყოფილმა მსახიობმა და რიტორიკის მასწავლებელმა, მაძებართა რაზმი შემოიყარა და გაქცეულების შეპყრობა იკისრა. მკვლელებმა ჰიპერიდე კუნძულ ეგინაზე იპოვეს, შეიპყრეს და ანტიპატროსს მიჰგვარეს. ანტიპატროსის ბრძანებით, ჰიპერიდეს ენა ამოართვეს და სიკვდილს საშინელი წამებით შეჰყარეს. მას უკან დემოსთენეს გამოუდგა არქიოსი და მიაგნო კიდევ, არგოლიდის ნაპირას, მცირე კუნძულ კალავრიაზე, პოსეიდონის ტაძარში თავშეფარებული. არქიოსმა იცოდა, ტაძარში კაცის არც მოკვლა, არც ხელის ზღემა არ შეიძლებოდა და გარედან მოუწოდებდა დემოსთენეს — გამოდი, შენის ნებით ჩაბარდი და პირობას გაძლე, ანტიპატროსი შეგიწყალებს და ყველაფერს გაპატიებსო. მაშინ დემოსთენემ ეს უბასუხა ყოფილ აქტიორს: „არასოდეს შენს მსახიობო-

ბას ჩემთვის გული არ შეუძრავს და ისევე არც ახლა შენი ალექმანი გაეკარება ჩემს გულს; შე ბრიყვო, ნუთუ არ გესმის, რომ მე სწორედ ანტიპატროსის შეწყალება უფრო მაშინებს, ვიდრე წამება და სიკვდილი; ანტიპატროსმა რომ შემიწყალოს, განა არ იტყვიან, რომ მე მაკედონელებს მივეყიდე და საბერძნეთის თავისუფლებას ვულალატე? რა გაეწყობა? — ბედი მტრის მხარეს გადავიდა, მე კი არ გადავალ მოღალატე ბედის მიბაძვით და მშობლიურ ათენს სირცხვილს არ შევყრი; მე არ შეგველევი თავისუფლებას — უმშვენიერეს სუდარას ჩემსას; სიკვდილი ჩემი უმტკიცესი თავშესაფარია; იგი დამიცავს და მიხსნის ყოველგვარი დამცირებისგან“. ეს თქვა დემოსთენემ და სტილი აიღო — საწერელი ლერწმის კალამი, რომელშიც საწამლაი ჰქონდა; დაეწაფა, გამოსწოვა და არქიოსს გასძახა: „ახლა შენ შეგიძლია ითამაშო როლი კრეონის და ჩემი გვამი დაუსაფლაველად დააგდო ფრინველთა და მხეტთა საჯიჯგნად“. ეს მისი უკანასკნელი სიტყვები იყო. ასე აღესრულა 62 წლისა, 322 წელს, უდიდესი რიტორი, დაუცხრომელ სახელმწიფო მოღვაწე, დაუღალავი და გაუტეხელი მამულიშვილი. შემდეგ, ათენელებმა, როცა დემოსთენეს ნაშთები ათენს გადაასვენეს და ბრინჯაოს ძეგლი დაუდგეს, ზედ ასეთი ეპიტაფია წააწერეს: „დემოსთენევ, შენ რომ იმდენი ძალა გქონოდა, რამდენიც სიბრძნე, ვერასოდეს მაკედონური მახვილი საბერძნეთზე ბატონობას ვერ ეღირობოდა“.

ანტიპატროსის გამარჯვებამ და ძალაუფლების გაზრდამ შეათქრიანა და შეაშფოთა პერდიკა.

ერთბაშად სცენაზე კიდევ ახალი გმირებიც გამოჩნდნენ, ქალები, დედა და შვილი — კინანა და ევრიდიკა, ორივენი ფრიად ლამაზნი (ჟრომლისოდაც ქალი საერთოდ „გმირი“ ვერ განდება), პატივმოყვარენი და გაბედულნი. კინანა ფილიპე II-ის ასული იყო, ილირიელი ქალისგან. და ამ მეფური სისხლისა და „ჩიშის“ ქალებმა გადაწყვიტეს მათ „კუთვნილ ტანტს“ მიახლოებოდნენ. მეფე არიდაიოს-ფილიპეს ცოლად უნდა შეერთო ევრიდიკა. პერდიკამ წინააღმდეგობა სცადა, მაგრამ კინანას მოკვლის მეტი ვერაფერი მოახერხა. არიდაიოსი და ევრიდიკა დაქორწინდნენ. მაშინ პერდიკა ანტიპატროსის ასულს გაეყარა და გადაწყვიტა ცოლად შეერთო ოლიმპიადასგან შეთავაზებული მისი ასული — კლეოპატრა. მაგრამ ეს ქორწინება აღარ შედგა. ანტიპატროსმა და კრატეროსმა ევროპიდან მცირე აზიისაკენ ჯარები დაძრეს. პერდიკამ მცირე აზიის პროვინციები ერთიანად ეკმენეს დაუმორჩილა და ან-

ტიპაროსსა და კრატეროსს საომრად შეახვედრა. თვითონ კი, თავისი ჯარით, ეგვიპტისკენ გაეშურა, პტოლემეაიოსის დასასჯელად.

მცირე აზიაში საშინელი ბრძოლა ეგემენმა მოიგო. კრატეროსი ბრძოლაში დაიღუპა.

პერდიკამ ნილოსის დელტაში შეაღწია, მაგრამ პტოლემეაიოსთან შეტაკებაში ვერაფერს გახდა, 2000 მეომარიც ნილოსში ჩაუცვივდა ნიანგთა ლუქმად. გადარჩენილი ჯარისკაცები აჯანყდნენ. აჯანყებულებს სელევკოსი და პითონი გაუძღვნენ, პერდიკას კარაეში შეუხტნენ და ისრებით დაცხრილეს (321 წ.) სელევკოსმა და პითონმა, მოკლული პერდიკას ადგილზე, რეგენტობა პტოლემეაიოსს შესთავაზეს, მაგრამ ფრთხილმა და ჭკვიანმა ლაგიდმა უარი თქვა და ისევ ეგვიპტის მმართველობა იკმარა. სამეფო სახლისა და „მეფე-ლანდთა“ რეგენტად ანტიპატროსი გამოცხადდა.

ანტიპატროსმა ორივე მეფე და სამეფო სახლეულნი ბაბილონიდან მაკედონიაში, პელაში გადაიყვანა, ბაბილონის მმართველობა კი სელევკოსს ჩააბარა.

319 წელს მოკვდა 80 წლის ანტიპატროსი და სიკვდილის წინ ბალკანეთის მმართველობა და სამეფო რეგენტობა დაუტოვა არა თავის შვილს, კასანდროსს, არამედ ძველ შეგობარსა და თანამებრძოლს — პოლიპერხონტს.

არ შეუურიგდა მშობლისგან არადღაგდებას კასანდროსი, კავშირი შეკრა ლისიმახოსთან, ანტიგონესთან, პტოლემეაიოსთან და მათი დახმარებით შეუდგა ბალკანეთზე უმაღლესი ძალაუფლებისათვის ბრძოლას.

პოლიპერხონტმა, ბერძენთა გულის მოსაგებად და ერთგული მოკავშირეების მოსახვეჭად, საბერძნეთს „ელევეთერია“ (თავისუფლება) გამოუცხადა და ათენში დემოკრატია აღადგინა. კასანდროსი კი ისევ ოლიგარქიას უჭერდა მხარს. დემოკრატებმა გაიმარჯვეს და ოლიგარქთა ბელადები ამოწყვიტეს. მოკლულთა შორის იყო ფოკიონი, 85 წლისა, ათენის უკანასკნელი დიდი ხარდალი და პოლიტიკოსი, უაღრესად პატიოსანი მოქალაქე, რომელმაც შვილს ანდერძად ეს დაუბარა: არამც და არამც ჩემი სიკვდილისთვის ჩემს მტრებზე შური არ იძიოო. მისი გვამი, თანამებრძოლთა ცხედრებთან ერთად, ატიკის გარეთ გაათრიეს და იქ დააგდეს დაუსაფლაველად. ცოლმა იღუმალ მონახა ფოკიონის ცხედარი, იღუმალ დაწვა, ფერფლი უბით ჩამოიტანა და სახლში, კერის ძირში დაკრძალა. რამდენიმე წლის შემდეგ, ხალხმა მაინც მოი-

კითხა ღირსეული მამულიშვილის ნეშთი; გამოასვენეს, დიდ-ს პატი-  
ვით დაკრძალეს და ძეგლი დაუდგეს. შვილმა მამის ანდერბი არ შეას-  
რულა და მამის მკვლელები თავისი ხელით დახოცა.

ომი და სისხლისღვრა კი გრძელდებოდა. კასანდროსმა, მოკავშირე-  
თა დახმარებით, პოლიპერხონტი გაანადგურა და საბერძნეთს დაეუფ-  
ლა. ათენში მან მმართველად დემეტრიოს ფალერელი (ფალერის ოლ-  
ქიდან) დანიშნა — დაკვირვებული პოლიტიკოსი, სწავლული, მწერალი  
და რიტორი.

მალე მოკავშირე დიადოხოსთა შორის განხეთქილება ჩამოვარდა.  
მიზეზი ანტიგონეს ერთპიროვნული უმადლესი ძალაუფლებასკენ  
სწრაფვა აღმოჩნდა. მან ომი გაუშართა სელევკოსს, დაამარცხა და გა-  
აქცია იგი ბაბილონიდან. სელევკოსი პტოლემაიოსთან ჩავიდა ეგვიპ-  
ტეში, ახლა ანტიგონეს წინააღმდეგ შეიკრა კოალიცია — პტოლემაიო-  
სი, სელევკოსი, კასანდროსი და ლისიმახოსი. სელევკოსმა ისევ დაიბ-  
რუნა ბაბილონი. ბრძოლა კი გრძელდებოდა. თოთხმეტი წელიწადი არ  
შეწყვეტილა წვიმა სისხლისა ევროპასა თუ აზიაში.

ამავე ხანში სრულიად ამოწყდა ფილიპესა და ალექსანდრეს ოჯა-  
ხიც და გვარ-ჯილაგიც.

317 წელს ალექსანდრეს დედამ, ოლიმპიადამ, შეიპყრო და საშინე-  
ლი წამებით დაახოცინა მეფე არიდაიოსი და მისი მეუღლე ევრიდიკა.

მას უკან კასანდროსმა იმძლავრა, მაკედონიაზე სრულიად გაბატონ-  
და და ახლა მან ოლიმპიადას მიუგზავნა მკვლელები. ეს მოხდა იმავე  
317 წელს. ალექსანდრეს დედა მოკლეს ქვათა დაკრებით.

311 წელს კი კასანდროსმა შეიპყრო ალექსანდრეს ცოლ-შვილი,  
როქსანა და თორმეტი წლის ალექსანდრე IV. შეიპყრო და დაახოცინა.  
დაახოცინა და ამით „მაკედონური დინასტია“ — წარმომშობელი დი-  
დი ალექსანდრე მაკედონელისა — სამუდამოდ აღიგავა პირისაგან მი-  
წისა.

დიადოხოსთა ბრძოლები კი გრძელდებოდა. ელინისტური დრო-  
უამის რუკა თითქმის ყოველ წელიწადს იცვლებოდა, იშლებოდა,  
ხელახლა დგებოდა და ისახებოდა. 283 წელს აღარც ერთი დიადოხოსი  
ცოცხალი აღარ იყო.

მაგრამ ამიერიდან ბრძოლას განაგრძობენ „დიადოხოსთა დიადო-  
ხოსნი“, ანუ „მემკვიდრეთა მემკვიდრენი“, ანუ — საკუთარი საისტო-  
რიო სახელდებით — ეპიგონები, ალექსანდრე მაკედონელის მიმდევარ-  
ნი, მიმბაძველნი, „ალექსანდრობის“ დაუცხრომელი მძიებელნი.

ისევ იცვლებოდა, იშლებოდა, ხელახლა დგებოდა და სისხლიანი მახვილებით იკერებოდა პოლიტიკური რუკები ელინისტური სამყაროსა.

ყველაზე ხანგრძლივი, მდგრადი და ძალმოსილი ელინისტურ სახელმწიფოთაგან მაინც სამი გამოდგა, სამივე კონტინენტზე განთითოებული:

ანტიგონიდური მაკედონია — ევროპაში,

სელევკიდური სირია — აზიაში,

პტოლემაიდური ეგვიპტე — აფრიკაში.

„გმირის სიკვდილი მზის ჩასვლას ჰგავს...“ თქვა კარლ მარქსმა, და ალექსანდრე მაკედონელის სიკვდილს ძალზე მჭიდროდ ესადაგება ეს მშვენიერი ლოგოსი. ალექსანდრე 32 წლისა და 8 თვისა აღესრულა და ეგზომ ახალგაზრდა კაცმა, ეგზომ მცირე დროის ნაკვეთში, ეგზომი სივრცის, სიღრმისა და სიმრავლის მქონე მემკვიდრეობა დატოვა. ალექსანდრეს „მზის ჩასვლა“ თუმცა მაშინვე მისი უზარმაზარი სახელმწიფოს მზის ჩასვენებასაც მოასწავებდა, მაგრამ მისი პოლიტიკური განაზრახვის ნანგრევთა ღამის ნათევზე სავსებით ახალი, ცინცხალი მზე ამოუბრწყინდა კაცობრიობას — მზე ახალი კულტურისა, ახალი ცივილიზაციისა.

და სწორედ ეს იყო აპოთეოზი ალექსანდრე მაკედონელისა — აპოთეოზი სიკვდილის შემდგომ, რომლის სიმაღლეს იგი მის ხანმოკლე წუთისოფელში „ღმერთად ქცეულიც“ არ მოსწრებია.

ეს იყო დაბადება ახალი მსოფლიო ცივილიზაციისა, რომელიც ისტორიაში დამკვიდრდა ელინიზმის სახელწოდებით (პირველად ეს ტერმინი სამეცნიერო სიტყვიერებაში შემოიტანა ცნობილმა გერმანელმა ისტორიკოსმა, იოჰან გუსტავ დროიზენმა). ეს იყო, უწინარესად, ელინური კულტურის გატანა და განფენა აღმოსავლეთში, და იქიდანვე — შერწყმა „მომხედურისა“ და „დამხედურისა“ — ელინურისა და აღმოსავლურისა. სამიათასწლოვანმა აღმოსავლურმა ცივილიზაციამ, ნილოსიდან ფენჯაბამდე, თავის წიაღში სრული ცხოველყოფილებით შეირწყა და შეისისხლხორცა ათასწლოვანი უზენაესი ელინური კულტურა. ასევე, თავის მხრივ, ელინურ-ბერძნულმაც უხვად შეითვისა და „შეითავისა“ აღმოსავლური კულტურული მემკვიდრეობა.

და ასე — ელინური გადაიქცა ელინისტურად, ანუ ბერძნული — ბერძნულ-აღმოსავლურად.

და სწორედ ეს იყო ხორცშესხმა ალექსანდრე მაკედონელის საწუთისოფლო ოცნებისა.

რასაკვირველია, ბერძნულ და აღმოსავლურ კულტურათა ურთიერთობანი და „მი-მო-ქცევანი“, ანუ აღმოსავლეთის „ელინიზაცია“ და საბერძნეთის „ორიენტალიზაცია“ უფრო ადრინდელი და ხანგრძლივი პროცესი იყო (ისევე, როგორც ხდება ყოველ მეზობელ ხალხთა კულტურულ ურთიერთობათა ისტორიაში), მაგრამ რ ა დ ი კ ა ლ უ რ - თ ვ ი - ს ე ბ რ ი ვ ა დ ამ პროცესის საფუძვლის დამდები მაინც ალექსანდრე მაკედონელი იყო.

არც ის არის საკმათო, რომ ალექსანდრე მაკედონელი, უწინარეს ყოვლისა, მაინც ტიპური დამპყრობელი იყო და, მსოფლიოს მპყრობელობის ამბიციებს აყოლილი მახვილით, მან თავის თანადროულ მსოფლიოს უზღვავი და უზღავი სისხლი და ცრემლი ანთხევანა. ამ მხრივ, მისანიშნებელია ძველ დროშივე გავრცელებული ანეკდოტი — თითქოს, ერთ მეკობრე-ყაჩაღს ეთქვას ალექსანდრესთვის: მეც იმასვე ვაკეთებ, რასაც შენ, ოღონდ უფრო მკირე ძალებითო. მაგრამ — რა გაეწყობა — ეს მსოფლიოს დამწიოკებელნი და სისხლმაქცევარნი დღემდე, მაინც „ისტორიის ნებიერნი“ დარჩენილან: ისტორიკოსი, მწერალი, თუ საერთოდ ყოველი „რჭულის“ კალმოსანი, ძველთაგანვე, ისე თავდავიწყებით ეტანებოდა ამ მსოფლიო სისხლში მობანავე „მსოფლიო დამპყრობელთა“ თავგადასავლებს, როგორც დამპალ ლეშს მშიერი სვაი. ამიტომ არც ერთ სოფოკლეზე, არისტოტელეზე, არქიმედეზე და ლეონარდოზე არ დაწერილა იმდენი ფოლიანტი, რამდენიც ალექსანდრე მაკედონელზე, კეისარზე, ჩინგის ხანზე და ნაპოლეონზე, ანუ საერთოდ — მსოფლიო ისტორიაში არც ერთ დიდ მეცნიერსა და ხელოვანზე არ დახარჯულა იმდენი საწერანი, რამდენიც ადამიანთა გვაიმებზე აღზევებულ „მსოფლიო დამპყრობლებზე“.

მაგრამ ალექსანდრე მაკედონელის სისხლიან მახვილს მაინც დიდი, სამომავლო, კულტურული აზრი და გეში მიუძღოდა წინ.

ალექსანდრეს თავდაპირველი პოლიტიკური განაზრახი — შეექმნა ერთიანა, „ევრაზიული“ ანუ „აღმოსავლურ-დასავლური“ მსოფლიო სახელმწიფო — სრული კრახით დამთავრდა: მისგან შექმნილი მსოფლიო სახელმწიფო მისი სიკვდილისთანავე დაიხვრა და დაიშალა. დიდ კოსმოკრატორს ჯერ კიდევ სიცოცხლას ნიშატი სრულად არ გასცლოდა, რომ მისი „ელინისტური მსოფლიო“ უმაღვე „ელინისტურ სახელმწიფოებად“ დანაქუწდა და დაიფლითა. მაგრამ ეს — სავსებით ბუნებრივად — ასედაც უნდა მომხდარიყო, რამდენადაც შიშველი იარაღითა და ძალადობით ყოველგვარი „კოსმოპოლისის“, გინა „მსოფლიო სა-



ზელმწიფოს“ დამკვიდრება წმინდა წყლის იდეალიზმია. ხაზს ვუსვამთ სიტყვა „დამკვიდრებას“, ვინათგან ასეთი ამბიციით აკვიატებული „კოსმოპოლისის“ შექმნას მართლაც ახერხებენ ალექსანდრე მაკედონელის მსგავსი „კოსმოკრატორები“ და „კოსმოფაგები“, მაგრამ ერთია არარსებულის შექმნა და მეორე და სულ სხვა — შექმნილის დამკვიდრება. ალექსანდრემ შექმნა და მისგან შექმნილი მხოლოდ მანამ მკვიდრობდა, სანამ თვითონ იყო ცოცხალი, ხოლო, როგორც კი თვითონ აღესრულა, — კაცთა სისხლითა და ძვალ-ხორციით ნაგები მისი მსოფლიო საზელმწიფოც უმაღლვე აღესრულა. ეს, — რაც შეეხება ალექსანდრეს პოლიტიკურ კოსმოპოლიტიზმს და მის კრახს; მაგრამ ალექსანდრეს განაზრახთა მეორე მხარე — კულტურული კოსმოპოლიტიზმი — საუსებით რეალურ მოვლინებად იქცა.

მაშ, „ალექსანდრიზმი“ პოლიტიკური განზრახულობით სრული იდეალიზმი აღმოჩნდა, ხოლო კულტურული განზრახულობით — სრული მატერიალიზმი.

ალექსანდრესეულ ელნიზმში სრული განიფებით შეერწყა ერთ-ერთს ელიზური („წმინდა ბერძნული“) და ორიენტალური („წმინდა აღმოსავლური“) მოვლენები: ბერძნული დემოკრატიზმი და აღმოსავლური მონარქიზმი, ბერძნული მატერიალიზმი და აღმოსავლური მისტიციზმი, ბერძნული ანთროპომორფიზმი და აღმოსავლური აბსტრაქტიზმი, ბერძნული რაციონალიზმი და აღმოსავლური ირაციონალიზმი.

ყოველი მანამდელი ექო და ანტიექო აღმოსავლეთ-დასავლეთის სულიერი ურთიერთობისა, ალექსანდრე მაკედონელის წყალობით, ერთსხეულებრივ სიმფონიად იქცა.

არისტოტელე და კალანე, თავიანთი ფილოსოფიებით, მანამდე ჩაკეტილნი იყვნენ, ერთი — საბერძნეთში, მეორე — ინდოეთში. ალექსანდრემ კი ეს „ლოკალური ფილოსოფოსნი“ ერთბაშად „გაამსოფლიოვა“ — ერთი აღმოსავლეთისკენ განავრცო და „გააშინაურა“, მეორე — დასავლეთისკენ.

არისტოტელე ისევე გახდა მსოფლიო აზროვნების მეუფე, როგორც ალექსანდრე იყო მსოფლიოს პოლიტიკური მეუფე, და აქ ცხადზე ცხადია უდიდესი ნაცვალებითი მიძღვნა მოწაფისა მასწავლებლისადმი...

თვითონ დროიზენმა ელნიზმი სამას წელიწადში გაიგულისხმა — 334—30 წლებში, ანუ — ალექსანდრეს აღმოსავლურ ლაშქრობათა დასაწყისიდან რომაელთა მიერ ეგვიპტის დაპყრობამდე. მაგრამ, ვინათ-

გან ელინისტური ცივილიზაცია რომის მსოფლიო იმპერიის ხანაშიც კიდევ ხუთასი წელიწადი პირველობდა და დომინანტობდა, ამდენად მთელი ეს რვაასწლოვანი კულტურული ისტორია მეცნიერებაში, ზოგჯერ, „ორ პერიოდად“ განიხილება — „ალექსანდრიული“ და „რომაული“. მაგრამ ასეთი ქრონოლოგიური დაყოფა სავსებით პირობითია, ვინაიდან ელინიზმი მაინცდამაინც ტიპოლოგიურად ერთი მთლიანი, „განუყოფელი“ ფენომენია საერთო-საკაცობრიო ცივილიზაციის ისტორიაში.

სამი ათასამდე ხელოვანი და მეცნიერი მისცა ელინიზმმა მსოფლიოს; მათ შორის, მწერლები და პოეტები — კალიმაქე კირენელი, არატოს სოლეი, აპოლონიოს როდოსელი, ანტიპატროს სიდონელი, ანტიმაქოს კოლოფონელი, ფილეტას კოსელი, პერმესიანაქტოს კოლოფონელი, ეეფორიონი, პარტენიონი, ასკლეპიადე სამოსელი, პოსეიდიპე, ჰედილოსი, ანიტე ტეგეელი, ჰედილე, მოირო, ნოსიდა ლოკრელი, ლეონიდე ტარენტელი, მელეაგრე გადარელი, მენანდრე, ალექსანდრე ეტოლიელი, სოსიფანე სირაკუზელი, დიონისიადე ტარსელი, ჰომეროს ბიზანტიონელი, ფილისკოს კერკირელი, ლიკოფრონ ქალკიდელი, სოსითეოსი, მაქონ სიკიონელი (თუ კორინთელი), რინთონ ტარენტელი, ჰერონდა, თეოკრიტოსი, ეკლესიასტე, ლონგე, ჰელიოდორე, ქსენოფონტ ეფესელი, ქარიტონ აფროდისელი, აქილეეს ტატიოსი და ლუკიანე სამოსატელი, ფილოსოფოსები — ეპიკურე, თეოფრასტე ლესბოსელი, სტრატონ ლამფსაკელი, ანდრონიკე როდოსელი, ბოეთოს სიდონელი, მენიპე გადარელი, ზენონი, ქრისიპე, სენეკა, ეპიქტეტე და მარკუს ავრელიუსი; ისტორიკოსები და გეოგრაფოსები — არისტობულე, ნეარქოსი, ანდროსთენე, ონესიკრიტოსი, პტოლემეაიოსი, მანეთონი, ბეროსი, პოლიბიოსი, პოსიდონიოსი, დიოდოროს სიცილიელი, დიონისე ჰალიკარნასელი, სტრაბონი, პლუტარქოსი, აპიანე ალექსანდრიელი, არიანოსი, კლავდიოს პტოლემეაიოსი და პავსანია; ფილოლოგოსები და გრამატიკოსები — არისტოფანე ბიზანტიონელი, არისტარქე სამოთრაკელი, კრატეტ მალოსელი, დიონისიოს თრაკიელი, აპოლონიოს დისკოლოსი, პეროდინე და ჰეფესტიონი; მათემატიკოსები და ასტრონომები — ევკლიდე, არისტარქე სამოსელი, სელევკოს ქალდეველი, ჰიპარქოს ნიკეელი და არქიმედე სირაკუზელი; ხუროთმოძღვარნი და მოქანდაკენი — დეინოკრატე როდოსელი, სოსტრატოს კნიდოსელი, პარმენისკე, ქარეს ლინდოსელი, აგესანდროსი, პოლიდოროსი, ათენადოროსი და ევტახიდე სიკიონელი.

ელინისტურმა ხანამ უძღვნა მსოფლიოს სახვითი ხელოვნების განსაცვიფრებელი ნიმუშნი: როდოსის კოლოსი, ფაროსის შუქურა, აფროდიტე მილოსელი, აპოლონ ბელვედერელი, ლაოკონი, ანტიოქიის ტიხე, ფარნეზის ხარი და პერგამონის საკურთხეველი.

ელინიზმის წიაღში დაიბადნენ — ქრისტიანიზმი და ნეოპლატონიზმი.

ელინიზმის უპირველესი მატარებელი, გამტარებელი და გამავრცელებელი იყო ქალაქი პოლისი, და აქაც ალექსანდრე გახლდათ პირველი საფუძვლის ჩამყრელი და საძირკვლის გამსკვნელი. 70—80 ქალაქი დაუარსებია ქალაქთმშენებლობის ამ „მსოფლიო მანიაკს“ და მისა „ალექსანდრიები“, „ალექსანდროპოლისები“, „ნიკეები“ და „ნიკიფორიები“ ბურჯებად, ბჭეებად და ნიშანსვეტებად ედგნენ მისგანვე შექმნილ ახალ, „ალექსანდრეულ“, მსოფლიო ცივილიზაციას. მის შემდგომ კიდევ, მისი მიმბაძველი „მემკვიდრენი“ („დიადოხოსებო“) და „მიმდევარნი“ („ეპიგონები“) მსგავსივე „ალექსანდრული სიშმაკით“ აშენებდნენ ახალ ქალაქებს, ელინიზმის ახალ კერებს, ბურჯებს და ნიშანსვეტებს.

საუკუნეები მოატარებდნენ ალექსანდრე მაკედონელის მქუხარე სახელს.

ითქმოდა სინამდვილე.

ითქმოდა ლეგენდა.

მიეწერებოდა, რაც მან თქვა და არა თქვა.

მიეწერებოდა, რაც მან ჰქმნა და არა ჰქმნა.

და ყოველივე — ისე, ვითარცა ადამიანები მუდამყამს მიუგებენ „მოკვდავ ღმერთთაგან“ რჩეულ სახელს, დიადსა და მარად სახსოვარს.

## შ ე მ ო კ ლ ე ბ ა ნ ი:

არ. — არიანოსი  
არისტ. — არისტოტელე  
დემოსთ. — დემოსთენე  
დიოდ. — დიოდოროს სიცილიელი  
დიო ქრ. — დიონ ქრისტოსტომი  
ევრიპ. — ევრიპიდე  
ვალ. მაქს. — ვალერიუს მაქსიმე  
თეოპ. — თეოპომპე  
თუკ. — თუკიდიდე  
იუსტ. — იუსტინე  
კლავდ. ელ. — კლავდიუს ელიანუსი

კურც. — კურციუს რუფუსი  
პავს. — პავსანია  
პლინ. — პლინიუსი  
პლ. — პლუტარქოსი  
პოლიბ. — პოლიბიოსი  
პოლიენ. — პოლიენუსი  
სენ. — სენეკა  
სტრაბ. — სტრაბონი  
ფრონტ. — ფრონტინუსი  
ციც. — ციცერონი  
პერ. — პეროდოტე

## შ ა ნ ი ზ ვ ნ ე ბ ი

### თ ა ვ ი I

1. პერ. VIII, 137—139
2. დიო ქრ. II, 18
3. თუკ. II, 100, 2
4. დიოდ. XIV, 37; არისტ. პოლიტ. V, 8, 11.

### თ ა ვ ი II

1. თეოპ. ფრგამენტები 27; პოლიბ. VIII, 12, 5 და ა. შ.
2. ფილიპემ თავის ახალ საომარ წყობას საფუძვლად დაუდო ეპამინონდას „ირიბი წყობა“, რომელიც თებელმა სარდალმა გამოიყენა სპარტელთა წინააღმდეგ 371 წელს, ქალაქ ლევკტრასთან მომხდარ ბრძოლაში. ეპამინონდამ აქ სპარტელთა ჩვეულებრივი, სწორხაზოვანი ფრონტის პირისპირ, თებელთა ჭარი განალაგა „ირიბად“— განსაკუთრებულად გაძლიერებული მარცხენა ფლანგით წინ; ხოლო უფრო სუსტი მარჯვენა ფლანგით უკან, დაქანებით. თებელებმა ასეთი „ირიბი სოლით“ გაარღვიეს და განადგურეს სპარტელთა განლაგებანი.
3. ფრონტ. IV, 2, 6.

4. პოლიენ. IV, 2, 3.
5. იუსტ. VIII, 3, 10.
6. Белох Ю., История Греции, т. II, М., 1899, 415.
7. ოთხასი წლის შემდეგ პლუტარქოსს კიდევ უნახავს მდინარე კეფისეს პირზე დიდი, ბებერი მუხა, რომლის ქვეშ თავისი ლაშქრით საომრად გამზადებული მდგარა კაბუკი ალექსანდრე მაკედონელი (პლ. ალექს. 9).
8. ქერონეის ბრძოლის შესახებ: დიოდ. XVI, 85; პოლიენ. IV, 2, 2, 7; პლ. ალექს. 9; იუსტ. IX, 3, 9; პავს. VII, 6, 5; XII, 3,3; სტრაბ. IX, 2,36.
9. პავს. IX, 1, 8; IX, 37, 8; IV, 27, 10; დიოდ. XVI, 87; იუსტ. IX, 4, 6—10.
10. დიოდ. XVI, 91; იუსტ. IX, 5, 8.
11. თეოპ. ფრაგმ. 249; დემოსთ. ოლინთ. II, 18.

### თ ა ვ ი III

1. აპლ. ალექს. 2.
2. პლ. ალ. 3.
3. პირველად ეს ჩაუწერია თავის „მოგონებებში“ არისტოქსენოს ტარენტელს, არისტოტელეს მოწაფესა და ალექსანდრეს თანამედროვეს. იხ. პლ. ალ. 4.
4. პლ. ალ. 5.
5. პლ. ალ. 4.
6. კურტ.
7. პლ. ალ. 6.
8. ახ. წ. I საუკუნეში კიდევ უჩვენებდნენ არისტოტელეს ქვის სავარძელს მისი ლექციებისთვის განკუთვნილ ნიშფაიონის ჩრდილოვან ხეივანში. იხ. პლ. ალ. 7.
9. პლ. ალ. 9; კურტ. VIII, 1, 25.
10. პლ. ალ. 9.
11. პლ. ალ. 10; არ. III, 6, 5.
12. დიოდ. XVI, 94; ვალ. მაქს. VIII, 14. ეს ანეკდოტი პლუტარქეს ალექსანდრეს სახელთან აქვს დაკავშირებული.
13. პლ. ალ. 10; იუსტ. XI, 2, 1—3; დიოდ. XVII, 2, 1; არ. I, 25, 1.
14. დიოდ. XVII, 2, 2.

### თ ა ვ ი IV

1. დიოდ. XVII, 3; პლ. დემოსთ. 22, ფოკიონი. 16.
2. დიოდ. XVII, 2.
3. დიოდ. XVII, 5.
4. იქვე.
5. დიოდ. XVII, 4.
6. Дройзен И., История эллинизма, т. I, 1890, 64—65.
7. დიოდ. XVII, 4, 7.

8. არ. I, 1, 2.
9. პლ. აღ. 10; დიოდ. XVII, 2; იუსტ. IX, 7; პავს. VIII, 7, 7.
10. არ. I, 1, 4—6.
11. არ. I, 5—6; I. 6, 1—10.
12. იუსტ.; XI, 2, 8.
13. თებეს გარშემო გამართული ბრძოლებისა და მისი ტრაგედიის შესახებ: არ. I, 7—9; დიოდ. XVII, 11—14; პლ. აღ. 11; იუსტ. XI, 3, 4.
14. პლ. აღ. 12.
15. დიოდ. XVII, 16, 2.
16. პლ. აღ. 15.
17. იხ. არ. VII, 9, 6.

### თ ა ვ

1. ეან-ეკ რუსო.
2. დიოდ. XVI, 41—42.
3. დიოდ. XVI, 44, 1; XVI, 46, 4; თეოპ. ფრაგმ. 135.
4. არ. II, 14, 2.

### თ ა ვ ი

1. აზიაში მოლაშქრე საომარ ძალთა შესახებ: დიოდ. XVII, 17; არ. I, 11, 3; Дройзен И., История эллинизма, т. I, 1890, 94; Белох Ю., История Греции; т. II, 1899, 497.
2. არ. I, 18, 4.
3. არ. I, 11, 2.
4. Белох Ю., История Греции, т. II, 498.
5. არ. I, 11, 7—8.
6. არ. I, 12, 8; I, 16, 3.
7. ამ ანეკდოტის შესახებ იხ. პავს. VI, 18, 2.
8. გრანიკოსის ბრძოლის შესახებ: არ. I, 13—15; დიოდ. XVII, 19, 21; პლ. აღ. 16.
9. არ. I, 16, 4; VII, 10, 4; იუსტ. XI, 6, 13.
10. არ. I, 17, 5.
11. Дройзен И., История эллинизма, т. I, 1890, 111.
12. არ. I, 18, 19; დიოდ. XVII, 22; სტრაბ. XIV, 1, 7.
13. არ. II, 1, 1.
14. პლ. აღ. 17.
15. ამ შეთქმულების შესახებ: არ. I, 25; დიოდ. XVII, 32 და 80; კურტ. VII, 1 და ა. შ.
16. არ. III, 2, 5.

17. კურტ. III, 1, 21.
18. დიოდ. XVII, 30; კურტ. III, 2, 1.
19. დიოდ. XVII, 30, 4; კურტ. III, 2, 18.
20. არ. II, 4, 7—11; პლ. აღ. 19; სენ. რისხე. II, 23.
21. კურტ. III, 8, 10.
22. არ. II, 6, 3—6.
23. პლ. აღ. 20.
24. კურტ. III, 8, 19.
25. პლ. აღ. 20.
26. ისოსის ბრძოლისა და მისი შედეგების შესახებ: არ. II, 10—11; დიოდ. XVII, 33—36; პლ. აღ. 20; კურტ. III, 9, 1—12; 10, 1—10; 11, 1—27.
27. ციცი შინ. XV, 4, 9; ატიკ. V, 20, 3.
28. პლ. აღ. 21.

### თ ა ვ ი

1. იხ. დიოდ. XVII, 48; კურტ. IV, 1, 33.
2. არ. II, 14; კურტ. IV, 1, 6—7.
3. კურტ. IV, 5, 11.
4. პოლიენ. IV, 3, 3.
5. საერთოდ დარიოსისა და ალექსანდრეს მიმოწერის დროსა და შინაარსში წყაროებს ერთი, შეთანხმებული აზრი არ გააჩნიათ.
6. „ტიროსის ომის“ შესახებ: არ. II, 17—24; დიოდ. XVII, 40, 2—5; პლ. აღ. 24—25; კურტ. IV, 2—4.
7. ასე უწოდებს არიანოსი (II, 25, 4); კურტიუსთან კი მოხსენიებულია ბეტისი, ხოლო იოსებ ფლავიუსთან (იუდ. სიძვ. XI, 8, 4) — ბაბამესე.
8. არ. II, 26, 4; კურტ. IV, 6, 11—12.
9. ლაზის ბრძოლათა შესახებ: არ. II, 25, 4—27; კურტ. IV, 6, 7—31; პლ. აღ. 25.

### თ ა ვ ი ი

1. არ. III, 1, 4.
2. ალექსანდრიის დასაწყისის შესახებ: არ. III, 1, 5; კურტ. IV, 8, 1—2; პლ. აღ. 26.
3. არ. III, 3, 5; პლ. აღ. 27.
4. არ. III, 4, 5; კურტ. IV, 7, 25—27; პლ. აღ. 27.
5. პლ. აღ. 28.

### თ ა ვ ი ი ა

1. პლ. აღ. 30; კურტ. IV, 10, 25—34; არ. IV, 20, 1—3; დიოდ. XVII, 54.
2. იხ. არ. III, 8, 3—5; კურტ. IV, 9, 2—4.

3. არ. III, 8, 6.
4. დიოდ. XVII, 55, 5.
5. არ. III, 7, 6; კურტ. IV, 10, 2—6.
6. არ. III, 8, 7; პლ. აღ. 31.
7. არ. III, 9, 5—8.
8. იხ. კურტ. IV, 13, 4—10; პლ. აღ. 31; არ. III, 10, 1—2.
9. პლ. აღ. 32.
10. იხ. პლ. აღ. 32; პოლიენ. IV, 6.
11. წყაროები ბრძოლაში დახოცილთა რიცხვს სხვადასხვანაირად წარმოგვიდგენენ. საერთოდ გავვაშელას ბრძოლის შესახებ; არ. III, 13—15; დიოდ. XVII, 58—61; პლ. აღ. 32—33; კურტ. IV, 15—16; V, 1.
12. პლ. აღ. 34.
13. წყაროებში მოცემული სხვადასხვა რიცხვთაგან ჩვენ საშუალოს ვღებულობთ; იხ. არ. III, 18; დიოდ. XVII, 56; კურტ. V, 3, 17.

### თ ა მ ი X

1. დიოდ. XVII, 65; კურტ. V, 1, 40.
2. პლ. აღ. 39.
3. დიოდ. XVII, 68, 1.
4. არ. III, 18, 1—9; დიოდ. XVII, 68, 1—7; კურტ. V, 4, 1—34.
5. დიოდ. XVII, 69, 3—9; კურტ. V, 5, 5—24.
6. პლ. აღ. 37; დიოდ. XVII, 71; კურტ. V, 6—9.
7. დიოდ. XVII, 70, 1.
8. დიოდ. XVII, 70, 6.
9. პლ. აღ. 37.
10. პლ. აღ. 38.
11. იქვე.
12. პლ. იქვე; დიოდ. XVII, 72, 5—6; კურტ. V, 7, 3—7; არ. III, 18, 11—12.
13. იხ. კლავდ. ელ. IV, 29.
14. პლ. აღ. 39.
15. პლ. აღ. 40.
16. იქვე.
17. პლ. აღ. 41.
18. არ. III, 19, 5.
19. კურტ. V, 8, 6—17; V, 9, 1—8.
20. კურტ. V, 11, 5.
21. კურტ. V, 11, 5—6.
22. პლ. აღ. 43.
23. პლ. აღ. 42.
24. არ. III, 22, 1.
25. არ. III, 23, 4; დიოდ. XVII, 76.



26. პლ. აღ. 44; კურტ. VI, 5, 19.
27. კურტ. იქვე.
28. არ. II, 13, 6, დიოდ. XVII, 48; კურტ. IV, 1, 39.
29. დიოდ. XVII, 62.
30. დიოდ. XVII, 63; კურტ. VI, 1—16; იესტ. XII, 1, 8—12.

## თ ა ვ ი X I

1. პლ. აღ. 47.
2. პლ. აღ. 46.
3. არისტ. ფრაგმ. 81.
4. არისტ. პოლიტ. VII, 6, 1.
5. იქვე, III, 8, 1—2.
6. პოლიბ. XII, 23.
7. არისტ. პოლიტ. VII, 14.
8. იქვე, VII, 14, 15.
9. პლ. აღ. 47.
10. იქვე.
11. იქვე.
12. იქვე.
13. ამ შეთქმულების შესახებ: არ. III, 26, 1—3; დიოდ. XVII, 79, 1—6; 80, 1—2; პლ. აღ. 49; კურტ. VI, 7, 1—35; 8, 1—26; 9, 1—36; 10, 1—37; 11, 1—40.
14. არ. VII, 6, 1; პლ. აღ. 47.
15. არ. III, 28, 2—3.
16. არ. III, 29, 5.
17. არ. III, 29, 2—5.
18. ბესას შეპყრობის ამბავს ასე, და ყველაზე სარწმუნოდ გადმოგვცემს არიანოსი (III, 29, 6—7; 30, 1—4). იხ. აგრეთვე — კურტ. VII, 5, 19—26; დიოდ. XVII, 33, 7—8.
19. არ. III, 30, 10—11; კურტ. VII, 6, 1—7.
20. არ. IV, 1, 1—2.
21. არ. IV, 2, 2.
22. არ. IV, 3, 1—4; კურტ. VII, 6, 16—23.
23. კურტ. VII, 7, 1.
24. არ. IV, 4, 1—8; კურტ. VII, 9, 9—16.
25. არ. IV, 5, 1.
26. არ. IV, 5, 2; კურტ. VII, 7, 30—39.
27. კურტ. იქვე.
28. არ. IV, 6, 3—5; კურტ. VII, 9, 21—22.
29. ეს ცნობა ეკუთვნის მხოლოდ კურტიუსს — VII, 10, 10.
30. Дройзен И.. История эллинизма, т. I, 1890, 252.

31. არ. IV, 7, 3; კურც. VII, 10, 10; დიოდ. XVII, 83, 9. პლუტარქოსი კი გად-  
მოგვცემს, რომ ბესა ხის დადრეკილი ტოტებით გახლიჩეს (ალ. 43).
32. არ. IV, 7, 2; კურც. VII, 10, 11.
33. ევრიპ. ანდრომ. 687.
34. კლიტოსის მკვლელობის შესახებ: არ. IV, 8, პლ. ალ. 50—52; კურც. VIII,  
1, 22—52.
35. კურც. VIII, 3, 9.
36. არ. IV, 18, 5—7 და IV, 19, 1—4.
37. არ. IV, 19, 4—6.
38. კურც. VIII, 4, 27.
39. არ. IV, 10, 2.
40. პლ. ალ. 28.
41. იქვე.
42. პლ. ალ. 52.
43. იქვე, 54.
44. არ. IV, 12, 3—5; პლ. ალ. 54.
45. კურც. VIII, 7, 1—14.
46. „პერმოლაოსის შეთქმულების“ შესახებ: არ. IV, 13, 1—7; 14, 1—4; კურც.  
VIII, 6, 7—30; 7, 1—14; 8, 1—23; პლ. ალ. 55.

## თ ა ვ ი XII

1. პერ. III, 94; VII, 66.
2. არ. ინდ. 19; კურც. VIII, 25, 6; პლ. ალ. 64.
3. კურც. VIII, 5, 3—4.
4. არ. V, 1—2; კურც. VIII, 10, 13; იუსტ. XII, 7.
5. არ. IV, 27—28; კურც. VIII, 10; იუსტ. XII, 7; დიოდ. XVII, 84.
6. არ. V, 3, 6.
7. პლ. ალ. 60.
8. კურც. VIII, 13, 21.
9. არ. V, 15, 1—2; პლ. ალ. 60.
10. ამ ბრძოლის შესახებ: არ. V, 16—18; დიოდ. XVII, 87—89; პლ. ალ. 60;  
კურც. VIII, 14, 1—46.
11. არ. V, 18, 7.
12. არ. V, 19, 1.
13. კურც. IX, 1, 1—3.
14. არ. V, 19, 5; პლ. ალ. 61.
15. არ. V, 22—24; კურც. IX, 1, 14—18.
16. კურც. IX, 1, 24—30.
17. არ. V, 25—26; კურც. IX, 2.
18. არ. V, 27; კურც. IX, 3, 5—15.
19. დიოდ. XVII, 94.

20. არ. V, 29, 1.
21. დიოდ. XVII, 95, 1—2; არ. V, 29; კურტ. IX, 3, 19; პლ. აღ. 62.
22. კურტ. IX, 3, 20; არ. VI, 2, 1.
23. არ. VI, 3, 3—5; პლინ. XIX, 1.
24. არ. VI, 9—10; დიოდ. XVII, 99; კურტ. IX, 5; პლ. აღ. 63.
25. არ. VI, 16, 3.
26. არ. VI, 16, 1; დიოდოროსთან (XVII, 102) — პორტიკანი.
27. პლ. აღ. 65.
28. არ. VII, 1, 5—6.
29. არ. VI, 17.
30. კურტ. IX, 7.
31. არ. VI, 19; დიოდ. XVII, 104; პლ. აღ. 66; კურტ. IX, 9, 26.

### თ ა ვ ი X III

1. არ. ინდ. 34, 1.
2. დიოდ. XVII, 111, 1.
3. შერე კი გამოირკვევა, რომ კიროსის საფლავი გაუძარცვავს მაკედონელ პოლიმაქეს. ალექსანდრემ პოლიმაქე ამ ბოროტებისთვის სიკვდილით დასაჯა (პლ. აღ. 69).
4. არ. VI, 30.
5. იქვე.
6. არ. VII, 4—5; დიოდ. XVII, 107, 6; პლ. აღ. 70.
7. არ. VII, 3; სტრაბ. XV, 68; კლავდ. ელ. II, 41; პლ. აღ. 69; ციც. ტუსკ. II, 22.
8. არ. VII, 6, 3—4; დიოდ. XVII, 108, 1—3; პლ. აღ. 71.
9. არ. VII, 8, 3; კურციუსი ოცდაათს ასახელებს (X, 2, 30).
10. არ. VII, 8—11; დიოდ. XVII, 109; პლ. აღ. 71; კურტ. X, 3.
11. კურტ. X, 3, 7—14.
12. პოლიენ. IV, ვ. 7.
13. არ. VII, 11.
14. არ. VII, 12, 1; დიოდ. XVII, 109, 1.
15. არ. VII, 12, 3.
16. არ. VII, 12, 4; იუსტ. XII, 12, 9.
17. არ. 12, 6.
18. კლავდ. ელ. II, 19.
19. დიოდ. XVIII, 8.
20. დიოდ. XVII, 108, 8; პავს. II, 34, 4.

1. არ. VI, 13; დიოდ. XVII, 110.
2. პლ. ევბ. 2.
3. არ. VII, 13; პლ. იქვე.
4. პოლიბ. X, 17.
5. არ. VII, 14; პლ. აღ. 72; დიოდ. XVII, 110, 8.
6. არ. VII, 15; დიოდ. XVII, 112; XIX, 20; პლ. აღ. 72; პოლიენ. IV, 3, 31.
7. არ. VII, 16, 5—6.
8. პლ. აღ. 74.
9. იქვე.
10. არ. VII, 22.
11. იქვე, 23.
12. იბ. დიოდ. XVIII, 4.
13. დიოდ. XVII, 115.

## ალექსანდრე მაკედონელი და „ქართლის ცხოვრება“

ალექსანდრე მაკედონელის, მისი ცხოვრებისა და საქმიანობის „ლოგის“ გარეშე არც ქართული მწერლობა და სიტყვიერება დარჩენილა. უწინარესად ყოვლისა, ქართველ ავტორებს მაინც ის აინტერესებდათ, თუ რა მიმართებანი და შეხების წერტილები უნდა ჰქონოდა მსოფლიოს უდიდეს დამპყრობელს თვითონ საქართველოსთან. გამორჩევით — ქართლთან, ანუ იბერიასთან.

პირველ რიგში ყურადღებას იქცევენ ის ქართული წყაროები, რომლებიც ხელაღებით აცხადებენ, თითქოს, ალექსანდრე მაკედონელს დანამდვილებით ელაშქროს ქართულ მიწა-წყალზე.

ჯერ მოვუსმინოთ IX საუკუნის ზელნაწერს, „მოქცევაი ქართლისაი“ უცნობ ავტორს (ივანე ჯავახიშვილისა და სიმონ ჯანაშიას მიერ გამართული ტექსტის მიხედვით):

მოვიდა ალექსანდრე მაკედონელი და „იხილნა ნათესავნი სასტიკნი ბუნთურქნი, მსხდომარენი მდინარესა ზედა მტკუარსა მიხუევით ოთხ ქალაქად და დაბნები მათი: სარკინე ქალაქი, კასპი, ურბნისი და ოძრახე და ციხენი მათნი — ციხე დიდი სარკინისაი უფლისციხე, კასპისა, ურბნისისა და ოძრახისა“. ბუნთურქთა გარდა, აქვე ცხოვრობდნენ „ქალდეველთაგან გამოსხმულნი ჰონნი“. მისდგა ალექსანდრე, „მეფე ყოვლსა ქუეყანისაი, და დალეწნა სამნი ესე ქალაქნი და ციხენი და ჰონთა დასცა მახვილი. ხოლო სარკინესა ქალაქსა ებრძოლა ათერთმეტ თთუე...“ ბოლოს სარკინეც აიღო ალექსანდრემ... „და თანა ჰყვანდა ალექსანდრეს მეფესა აზოი, ძე არიან ქართლისა მეფისაი. და მას მიუბოძა მცხეთაი საჯდომად და საზღაური დაუდგა მას: ჰერეთი და ეგრისწყალი და სომხითი და მთაი ცროლისა და წავიდა.

ხოლო ესე აზოი წარვიდა არიან ქართლად, მამისა თვისისა. და წარმოიყვანა რვაი სახლი და ათნი სახლნი მამამძუძეთანი. და დაჯდა ძუელ მცხეთას. და თანა ჰყუანდეს კერპნი ღმრთად გაცი და გა.

და ესე იყო პირველი მეფე მცხეთას შინა — აზოი, ძე არიან ქართველთა მეფისაი, და მოკვდა“. (იხ. ივ. ჯავახიშვილი, თხზულებანი თორმეტ ტომად, ტ. VIII, 1977, 114—115; სიმ. ჯანაშია, შრომები, ტ. III, 1952, 41—42).

ახლა „მოქცევაი ქართლისაის“ ეს ცნობა დავიხსნათ არქაიზმისაგან, გადმოვიღოთ ჩვენს თანამედროვე სიტყვიერებაზე და გავაზროთ დასკვნების სახით:

1. ალექსანდრე მაკედონელი მოვიდა ქართლში, მაგრამ ეს როდი ყოფილა შემდეგდროინდელი ქართლი — მტკვრის ხეობა და საერთოდ კავკასიონის სამხრეთი ნაწილი. ის კი არა და, საერთოდ ამიერკავკასიაშიც არა ყოფილა მამინ ქართველთა საცხოვრისი; არამედ იგი ყოფილა სადღაც შორს, ამიერკავკასიიდან სამხრეთით, და სახელად იმ „პირველ“, „ძველთაძველ“, ქართველთა „წინარ-სამშობლოს“ რქმევია არიან-ქართლი.

2. არიან-ქართლიდან ალექსანდრემ წამოიყვანა ადგილობრივ ქართველთა მეფის ძე, სახელად აზო, და წამოემართნენ ჩრდილოეთით, მტკვრის ხეობისკენ.

3. მოვიდნენ ალექსანდრე და აზო ამ უცხო ქვეყანაში (ჯერ კიდევ „არასაქართველოში“!) და დახვდათ აქ ოთხი დიდი ქალაქი: სარკინე (უფლისციხით), კასპი, ურბნისი და ოძრხე (ეს სამაც მათივე სახელწოდების ციხეებით).

4. ადგილობრივ მოსახლეობას შეადგენდნენ ველური ბუნთურქები და ჰუნები (არსად არავითარი ქართველები!)

5. ალექსანდრემ დაიპყრო ყველა ქალაქი თავისი ციხეებითურთ. ყველაზე დიდხანს — თერთმეტი თვე — გაუძალაღდა სარკინე..

6. ალექსანდრემ ახლად დაპყრობილ ქვეყანაზე საბატონოდ, დასვა აზო „არიანელი“, ძე არიან-ქართლის მეფისა, და რეზიდენციად მიუჩინა „ძველი მცხეთა“. თვითონ ალექსანდრე კი გაბრუნდა სამხრეთისკენ.

7. ალექსანდრეს წასვლის შემდგომ აზო არიანელი წავიდა თავის სამშობლო არიან-ქართლში, წამოიყვანა იქიდან რვა სახლი (სახლი — გვარი, ან ოჯახი) წარჩინებულნი და ათი სახლი ნათესავ-მოყვარენი და დაასახლა ისინი მცხეთაში. ამასთან, აზო არიანელმა თავის წინაშე სამშობლოდან თან მოიტანა და მცხეთაში დადგა არიანელ ქართველთა სალოცავი კერპები — გაცი და გა.

8. ამრიგად, აზო არიანელი იყო პირველი ქართველი მეფე მცხეთა-

ში და აქვე აზოხგან მოყვანილი თვრამეტი „სახლი“ (გვარი, ან ოჯახი) არიან-ქართველი იწყება „ახალი ქართლის“ დაფუძნება, განვითარება და განვრცობა საერთოდ მომავალი საქართველოსი.

„მოქცევაი ქართლისაის“ მომდევნოდ ახლავე მოყუსმინოთ მეორე წყაროს, უფრო ვრცელსა და ანგარიშსაწევს. ეს არის განთქმული საისტორიო კრებულის, „ქართლის ცხოვრების“ ერთ-ერთი ავტორი, XI საუკუნის ისტორიკოსი, ლეონტი მროველი. აი, რას ვკითხულობთ ალექსანდრე მაკედონელის „ღროებაზე“ მის თხზულებაში, რომელსაც ჰქვია — „ცხოვრება ქართველთა მეფეთა“:

„ესე ალექსანდრე გამოჩნდა ქუეყანასა საბერძენეთისასა. ქუეყანასა რომელსა ჰქვიაან მაკედონი, ძე ნიკიტანებისა, მეგვიბტელისა, ვითარცა წერილ არს ამბავი მისი წიგნსა ბერძენთასა.

ამან ალექსანდრე დაიპყრნა ყოველნი კიდენი ქუეყანისანი. ესე გამოვიდა დასავლით, და შევიდა სამხრით, შემოვიდა ჩრდილოთ, გარდა-მოვლნა კავკასნი და მოვიდა ქართლად. და პოვნა ყოველნი ქართველნი უბოროტეს ყოველთა ნათესავთა სჯულითა, რამეთუ ცოლ-ქმრობისა და სიძვისათვის არა უჩნდა ნათესაობა, ყოველსა სულეერსა ჰამდეს, მკუდარსა შესჰამდეს, ვითარცა მხეცნი და პირუტყვინი, რომელთა ქცევისა წარმოთქმა უხმ არს. და იხილნა რა ესე ნათესავნი სასტიკნი წარმართნი, რომელთა-იგი ჩუენ ბუნთურქად და ყოჩაყად უწოდოთ, მსხდომარენი მდინარესა მას მტკუარისასა მიხვევით, დაუკვირდა ესე ალექსანდრეს, რამეთუ არა რომელნი ნათესავნი იქმოდეს მას. და ენება რათამცა აღმოფხურნა იგინი ქალაქებისა მისგან, არამედ მას ეამსა ვერ უძლო, რამეთუ პოვნა ციხენი მაგარნი და ქალაქნი ძლიერნი. კუალად გამოვიდეს სხუანი ნათესავნი ქალდეველნი, და დაეშენნეს იგინიცა ქართლს.

შემდგომად ამისსა განძლიერდა, ალექსანდრე და დაიპყრა ყოველი ქუეყანა, და აღმოვიდა ქუეყანასა ქართლისასა. და პოვნა ციხე-ქალაქნი ესე ძლიერნი შუა-ქართლ: წუნდა, ხერთვისი მტკუარისა, ოძრხე მოკიდებული კლდესა ღადოსსა, თუხარისი მდინარესა ზედა სპერისასა, რომელსა ჰქვიაან ჭოროხი, ურბნისა, კასპი და უფლისციხე. ქალაქი დიდი მცხეთა და უბანნი მისნი, სარკინე, ციხე დიდი და ზანავი. უბანი ურიათა, და რუსთავი, და დედა-ციხე სამშვილდე, და მტუერის ციხე. რომელ არს ხუნანი, და კახეთისა ქალაქნი. ამით ყოველთა ციხე-ქალაქთა შინა პოვნა კაცნი სასტიკად მბრძოლნი. და განუყო ლაშქართვისნი და ყოველთა ამით ციხე-ქალაქთა გარემოადვირნა, და თვით

დადგა მცხეთას, და დაუდგინნა ლაშქარნი იმიერ და ამიერ, ზემოთ ქუეშოთ, და თვით დადგა ქსანს ზედა, ადგილსა, რომელსა ჰქვიან ნასტაქსი.

ხოლო მტურერის ცახესა და თუხარისსა არა ჰბრძოდა, რამეთუ ვერ შეუძლებდა დაპყრობად. ხოლო სსუანი ესე ციხენი და ქალაქნი დაიპყრნა ექუს თუე. ხოლო სარკინელთა ბუნთურქთაგანთა აგინეს მეფესა. განუწყურა ალექსანდრე და არლარა ინება ზავი, და ვედრება მათი არა შეიწყნარა, და რქუა მათ: „ვინათგან მაგინეთ მე, ესე არს ნაცვალი თქუენი, რათა დაგხოცნე ყოველნი“. და მოიცვა ქალაქი სარკინე, და ვერა სადეთ განერა ერთიცა კაცი. ხოლო სარკინელთა შესქირდა, რამეთუ ბრძოდა თერთმეტ თუე. იწყეს ფარულად კლდესა კაფა, და განხურითეს კლდე იგი, რომელი ლბილ იყო და ადვილად სახურეტელი. და განკრბეს ხურელსა მას სარკინელნი ღამე, და შეივლთოდეს კავკასიად, და დაუტევეს ცალიერად ქალაქი.

დაიპყრა ალექსანდრე ყოველი ქართლი, და მოსრნა ყოველნი იგი ნათესავნი აღრეულნი ქართლს მყოფნი, და უცხონი იგი ნათესავნი მოსრნა და დაატყვევნა, და დედანი და ყრმანი უცებნი, თხუთმეტისა წლისა უმცროსნი; და დაუტევნა ნათესავნი ქართლოსიანნი, და დაუტევა მათ ზედა პატრიკად სახელით აზონ, ძე იარედოსისი, ნათესავი მისი ქუეყანით მაკედონით, და მისცა ასი ათასი კაცი ქუეყანით პრომიით, რომელსა ჰქვიან ფროტათოს. ესე ფროტათოსელნი იყვნეს კაცნი ძლიერნი და მხნენი, და ევირთებოდეს ქუეყანასა პრომისასა. და მოყვანნა ქართლად, მისცა აზონს პატრიკსა. და დაუტევა ქართლს ერისთავად აზონ, და მის თანა სპანი იგი, მპყრობელად ქართლისა.

და უბრძანა ალექსანდრე აზონს, რათა პატივსცემდენ მზესა და მთოვარესა და ვარსკულავთა ხუთთა, და ჰმსახურებდენ ღმერთსა უხილავსა, დამბადებელსა ყოვლისასა. რამეთუ მას უამსა არა იყო წინასწარმეტყუელი და მოძღუარი სჯულისა ჰეშმარიტისა, რომელმანცა ასწავა და ამხილა, არამედ თვით მოიგონა სჯული ესე ალექსანდრე, მეფობასა შინა მისსა ყოველსა ქუეყანასა სჯული ესე დაუდგა. და წარვიდა ალექსანდრე.

ხოლო ამან აზონ მოარღვივნა ზღუდენი ქალაქსა მცხეთას საფუძვლითურთ, და დაუტევნა ოთხნი იგი ციხენი, რომელნი მოსდგმიდეს პირსა ქართლისასა: თავადი ციხე, რომელ არს არმაზი; და ერთი ციხე დასასრულსა არმაზისა ცხვირისასა; და ერთი თავსა ზედა მცხეთისასა; მეოთხე ციხე, დასავლით, მცხეთა მტკუარსა ზედა. და ესენი მომტკი-



ცნა, და განაესნა იგინი ლაშქრითა და ყოველთა ქართლისა ქალაქთა მოარღვივნა ზღუდენი, და დაიპყრნა ყოველნი საზღვარნი ქართლისანი, ჰერეთითგან და ბერდუჯის მდინარითგან ვიდრე ზღუადმდე სპერიისა. და დაიპყრა ქართლსა ზედა ეგრისიცა, და მოხარკე ყვნა ოსნი, ლეკნი და ხაზარნი.

და ვითარ წარვიდა ალექსანდრე ეგვიპტედ, აღაშენა ქალაქი ალექსანდრია, და თორმეტ წლამდის მოვლო ყოველი ქუეყანა, თორმეტსა წელსა შინა დაეპყრნეს ყოველნი კიდენი ქუეყანისანი.. და მეთოთხმეტესა წელსა ალექსანდრიას შინა მოკუდაო იგი, უსწორო დიდი ხელმწიფე. და ვითარ მოკუდებოდა იგი, სიცოცხლესავე შინა მისსა განუტევნა ყოველნი მთავარნი, რომელნი შეპყრობილ და დამონებულ იყვნენ მისგან. და იგინი წარვიდეს თვის-თვისად ქუეყანად, ვითარცა ბრძანებულ იყო.

მერე მოიყვანნა ოთხნი კაცნი, ტომნი მისნი, რომელნი იყვნენ სახელით: ანტიოქოზ, ჰრომოს, ბიზანტიოს და პლატონ.

და მისცა ანტიოქოზს ასურასტანი და სომხითი, და კერძო აღმოსავლეთისა უჩინა მას. და მან აღაშენა სახელითა მისითა ქალაქი ანტიოქია.

ხოლო ჰრომოს მისცა თრიმიკოსი, და უჩინა კერძო დასავლეთისა. და მან აღაშენა ქალაქი ჰრომი.

და ბიზანტიოსს მისცა საბერძნეთი და ქართლი, და უჩინა კერძო ჩრდილოსა. და მოუწერა წიგნი ანდერძი აზონ პატრიკსა, ერასთავს ქართლისასა, რათა მსახურებდეს იგი ბიზანტიოსს. და მან აღაშენა ქალაქი ბიზანტია, რომელსა აწ ჰქვიან კონსტანტინეპოლი.

ხოლო პლატონ დაუტევა ალექსანდრიას.

და მოკუდა ალექსანდრე.

ხოლო ამან აზონ დაუტევა სჯული ალექსანდრეს მოცემული, იწყო კერპთმსახურებად, და შექმნა ორი კერპი ვეცხლისანი: გაცი და გაიმ. და მონებდა იგი ბიზანტიოსს, მეფესა საბერძნეთისასა. იყო კაცი ძნელი და მესისხლე, და ესე დააწესა და ამცნო სპათა მისთა, ვითარმედ: „ყოველთა ქართველთაგანმან რომელმან პოვოს საჭურველი, მოკალთ იგი“. და ჰყოფდეს ჰრომნი იგი ესრეთ ქართველთა ზედა, და ვინცა ვინ გამოჩნდის ქართველთაგანი ქმნულ-კეთილი და ასაკოვანი. მოკლიან იგი. და იყო ჭირი დიდი ნათესავსა ზედა ქართველთასა. და ესე აზონ მათ ჰრომთაცა ზედა იყო მესისხლე, და მოესრნეს მრავალნი ქათგანნი.

მას უამსა იყო ჭაბუკი ერთი მცხეთას ქალაქსა შინა, რომელსა ერ-  
ქუა სახელი ფარნავაზ. ესე ფარნავაზ იყო მამულად ქართლელი, ნათე-  
სავი უფლოსი, მცხეთოსის ძისა, და დედულად სპარსი ასპანელი. და  
იყო იგი ძმისწული, რომელი მოსლვასა მას ალექსანდრესსა მცხეთელ  
მამასახლისი ყოფილიყო.

ესე სამარ და ძმა მისი მამა ფარნავაზისი, მოკლულ იყო ალექსან-  
დრესგან“ (იხ. ქართლის ცხოვრება, სიმ. ყაუხჩიშვილის გამოცემა,  
ტ. I, 1955. 17—20).

აქ შევაჩეროთ თხრობა ლეონტი მროველისა; მის ზოგიერთ პასაჟს,  
მოვლენათა სწორი თანმიმდევრობისთვის, ადგილი მოვუნაცვლოთ და,  
ისევ არქაიზმისგან „თავდახსნით“, გავიზროთ ტექსტიდან მომდინარე  
დასკვნები:

1. დასავლეთიდან, საბერძნეთ-მაკედონიიდან წამოსულმა ალექსან-  
დრემ, ეგვიპტელი ნიკტანების ძემ, სამხრეთის დამორჩილების შემდეგ,  
გეზი აიღო ჩრდილოეთისკენ, მოვიდა ჩრდილოეთს, გადმოვლო კავკა-  
სიონი და იქიდან დაეშვა ქართლის მიწაზე.

2. ქართლში ალექსანდრეს, ქართველთა გარდა, დახვდნენ „ნათე-  
სავნი უცხონი“ — ბუნთურქნი, ქალდეველნი, ყიფჩაყნი — რომლებიც  
უზნეო, უკეთურნი, უკულტურო ცხოვრებით ცხოვრობდნენ. ალექსან-  
დრემ იერიში მიიტანა ქართლის ცახე-ქალაქებზე, მაგრამ ვერაფერს  
გახდა და ხელცარიელი გაბრუნდა უკან.

3. მას შემდეგ, რაც „დაიპყრა ყოველი ქუეყანა“, ხელმეორედ მო-  
ვიდა ალექსანდრე მაკედონელი ქართლს. მოვიდა და გაუსია ჯარები  
ციხე-ქალაქებს.

4. თვითონ მცხეთაზე მიიტანა იერიში. „დიდი მცხეთა“ ქართლის  
მთავარი ქალაქი იყო. იქ იჯდა ქართლის მამასახლისი, სახელად — სა-  
მარ. ალექსანდრემ მცხეთა აიღო, სამარი მის ძმასთან ერთად შეიპყრო  
და ორივე დახოცა.

5. მცხეთიდან ნასტაკისში დადგა და იქიდან ხელმძღვანელობდა  
ალექსანდრე ქართლის ქალაქებთან ბრძოლას. მისმა ჯარებმა ექვს თვე-  
ში აიღეს: წუნდა, ხერთვისი, ოძრხე, ურბნისი, კასპი, უფლისციხე, ზა-  
ნავი, რუსთავი, სამშვილდე. მიუვალობის გამო, ხელი აიღო ხუნანისა  
(„მტურის ციხე“) და თუხარისის დაპყრობაზე.

6. სარკინეზე იერიშის დროს იქაურმა ბუნთურქებმა აგინეს მე-  
ფეს. ალექსანდრემ სარკინე ალყაში მოაქცია. როცა მისჭირდათ. სარ-  
კინელებმა შეწყალება და შერიგება სთხოვეს ალექსანდრეს, მაგრამ

ამან უარა შეუთვალა: რაკი მაგინეთ, ყველა უკლებლივ უნდა დაგზო-  
ცოთო. თერთმეტი თვის თავზე ალექსანდრე შევიდა სარკინეში, მაგრამ  
ქალაქი დაცარიელებული დახვდა — სარკინელებს ღბილი კლდე გა-  
ეხვრიტათ და გაპარულიყვნენ.

7. ყველა უცხოელნი — „ნათესავნი აღრეულნი ქართლს მყოფ-  
ნი“ — ალექსანდრემ ან ამოწყვიტა, ან დედაწულიანად ტყვედ აიყვანა.  
დატოვა მხოლოდ ქართველნი და პატრიკად, ანუ ერისთავად, დაუნიშ-  
ნა თავისი თანამემაჟულე, მაკედონელი, სახელად — აზონ არიდოსის  
ძე, რომელსაც სამხედრო ძალად და „მპყრობნელად ქართლისა“ და-  
უტოვა ასი ათასი ჯარისკაცი „პრომის ქუეყნიდან“. ამასთან, ალექსან-  
დრემ აზონს უბრძანა ქართველთა შორის რელიგიურ საშულად და-  
ენერგა შეიდთა მნათობთა (მზის, მთვარის და ხუთი პლანეტის) თაყუა-  
ნისცემა. ყოველივე ამის შემდეგ, ალექსანდრე მაკედონელი წავიდა  
საქართველოდან.

8. ალექსანდრეს წასვლის შემდგომ, აზონმა განამტკიცა თავისი ძა-  
ლაუფლება. მცხეთას მოარღვია ძველი კედლები, ხელახლა აღადგინა,  
განამტკიცა და ჯარით გაავსო ოთხი ციხე, პირველ რიგში — „თავადი  
ციხე“ არმაზი; შემოიმტკიცა ქართველთა ქვეყანა — ჰერეთიდან და  
ბერდუჯიდან სპერის (შავ) ზღვამდე; დახარკა ჩრდილო კავკასიელი —  
ოსები, ლეკები, ხაზარები.

9. ალექსანდრე ქართლიდან ჩავიდა ეგვიპტეს. იქ ააშენა ქალაქი  
ალექსანდრია. ამის შემდეგ თორმეტი წელიწადი ილაშქრა და დაიპყ-  
რო „ყოველნი კიდენი ქუეყანისანი“. მობრუნდა ისევ ეგვიპტეს და  
გარდაიცვალა იქვე.

10. სიკვდილის წინ ალექსანდრემ მიიხმო ოთხი თანამემამულე თა-  
ნამებრძოლი — ანტიოქოზ, პრომოს, ბიზინტიოს და პლატონ — და  
გაუყო მათ თავისი სამფლობელონი: ანტიოქოზს — ასურასტანი და  
სომხეთი, პრომოსს — თრიმიკოსი და საერთოდ დასავლეთ ქვეყნები,  
ბიზინტიოსს — საბერძნეთი, ქართლი და საერთოდ ჩრდილო ქვეყნები,  
ხოლო პლატონს — ეგვიპტე. ამათგან — ანტიოქოზმა დააარსა ქალაქი  
ანტიოქია, პრომოსმა ქალაქი რომი, ბიზინტიოსმა ქალაქი ბიზინტია,  
რომელსაც შემდეგ ეწოდა კონსტანტინეპოლი.

11. აზონმა ალექსანდრეს ანდერძიდან ზოგი რამ აღასრულა, ზოგიც  
უარყო. იგი ემორჩილებოდა ბიზინტიოსს, საბერძნეთის გამგებელს,  
მაგრამ გააუქმა შეიდთა მნათობთა თაყუანისცემა და სალოცავად მცხე-  
თაში აღმართა ვერცხლის კერპები — გაცი და გაიმ. აზონი აღმოჩნდა  
სასტიკი, სისხლისმოყვარე დესპოტი, რომელიც უკიდურესად ავიწ-

როებდა და სასიკვდილოდაც არ ინდობდა არც ქართველებს და არც თავის თანამდგომ რომაელებსაც.

ახლა შევაჯამოთ და განვსაზღვროთ ორივე წყაროს მეცნიერული ღირებულება.

ამ მხრივ მართლაც შეიძლება რაიმე მოინახოს საყურადღებო. მაგალითად, ნდობას იმსახურებს აქ მოხსენიებულ ქართულ ქალაქთა და ციხე სიმაგრეთა არსებობა, რაიც ნივთიერადაც დასტურდება თანამედროვე არქეოლოგიური მონაცემების წყალობით. ყურადღებას იქცევს ზოგაერთი ტერმინი და სახელდებაც. მაგალითად, ლეონტისგან ნათქვამი: ალექსანდრემ ქართლში აზო პატრიკად დასვაო. ეს სიტყვა შეიძლება ძველი ქართული ტერმინოლოგიის გასახსნელადაც გამოდგეს. სახელდობრ — „პატრიკი“, ბერძნული „პატრიკოს“ და ლათინური „პატრიციუს“ — სიტყვისაგან „პატერ“ („მამა“) — ძალიან ესატყვისება ქართულ წყაროებში ხშირად ნახსენებ ტიტულს — „მამფალი“ („მამაუფალი“, „მამამთავარი“).

ცალკე დგას „მოქცევაი ქართლისაის“ ავტორისგან არიან-ქართლისა და იქიდან ქართველთა „მოსვლის“ ამბავი. მეცნიერებამ დღეისათვის სავესებით მყარად და ურყევად იცის, რომ ქართველი ტომები ქართულ მიწა-წყალზე თავდაპირველი მკვიდრნი არიან და მათი „მოსვლა“ თუ ვისმესგან „მოყვანა“ რომელიდაც „წინარე საქართველოდან“ მათთვის მანამდე „უცხო“ მტკვრის ხეობაში — კარგა ხანია, მეცნიერული მსჯელობის ფარგლებს გაშორდა; ასე რომ — არიან-ქართლის პრობლემა პრობლემურობიდან მოიხსნა, თუმცაღა დასაშვებია, რომ ავტონთონ-ქართველობას საქართველოში, ძველ საუკუნეთა რომელიდაც მომენტებში, ახლო თუ შორეულ ქვეყნებიდან მიგრირებული ეთნიკური ნაკადებიც შემოერთვოდნენ. მაშ, საქართველო თავიდანვე, მიწა-წყლითაც და მასზე მოსახლე ხალხითაც მარადღეამს საქართველო იყო. ზოლო, უკეთუ არიან-ქართლის პრობლემა პრობლემურობას ოდესმე ისევ დაუბრუნდება, მაშინ მსჯელობა შესაძლებელი იქნება მხოლოდ ქართული ცივილიზაციის „მეორადი ნაკადის“ ანუ „ძირითად ქართულში“ მიგრაციის გზით მოსული „შენაკადის“ გარშემო.

მაგრამ ყველა ეს საკითხი აკი ამ წიგნის ინტერესთა სფეროებს შორდება. ჩვენ კი მხოლოდ ალექსანდრე მაკედონელისა და ქართული სინამდვილის ურთიერთშეხებისა და შეცნობის მომენტები გვაცინტერესებს. და ეს ორი წყაროც სწორედ ისეთ საინტერესო საკითხს ეხება,

როგორც საქართველოში ალექსანდრე მაკედონელის მოსვლა უნდა იყოს. ეხება და სრული დაჯერებითაც მოგვეთხრობს ყოველი ისტორიკოსისთვის ამ „მომხიბლავ ამბავს“. ის კი არა და, თუ კარგად დაფუკვირდებით, ლეონტი მროველი იმასაც კი გვეუბნება, ალექსანდრემ ორჯერ ილაშქრა საქართველოშიო...

მაგრამ ჩვენ, ალექსანდრეს ლაშქრობათა თხრობისას, — როცა მის მარშრუტებს მაკედონიიდან ინდოეთამდე და ინდოეთიდან ბაბილონამდე კვალში ვუდევით — დავინახეთ, რომ ალექსანდრეს ქართულ მიწაზე ფეხიც არ დაუდგამს. არც ერთი ავტორი-„ალექსანდროლოგი“, არც ალექსანდრეს მხლებელი და თანამედროვე, არც შემდეგდროინდელი, ერთი სიტყვითაც არ მიანიშნებს ალექსანდრეს ყოფნაზე საქართველოში. ამიტომ მცდარია ყოველივე, რაიც „მოქცევაი ქართლისაჲმ“ და ლეონტი მროველმა შეგვატყობანეს ალექსანდრე მაკედონელის გარშემო.

მცდარია ალექსანდრეს ლაშქრობა საქართველოში.

მცდარია არსებობა აზო არიანელისა, თუ აზონ მაკედონელისა, ვითარცა ალექსანდრე მაკედონელის პოლიტიკური პარტნიორისა.

მცდარია და საესებით ანაქრონისტული იმდროინდელ (ძვ. წ. IV ს.) საქართველოში ცხოვრება ბუნთურქებისა, ჰუნებისა, ყივჩაყებისა.

მცდარია ალექსანდრეს ლაშქარში რომაელების ყოფნა.

მცდარია ალექსანდრეს სიკვდილი ალექსანდრიაში.

მცდარია ალექსანდრეს ანდერძი ოთხ კაცზე სამეფოს ოთხად განაწილებისა.

მცდარია ოთხივე ვითომ დიადოხოსის სახელნი — ანტიოქოზ, ჰრომოს, ბიზინტიოს, პლატონ. ასეთი სახელის თანამებრძოლნი — აზონისა არ იყოს — ალექსანდრეს არა ჰყოლია. ისინი ისეთივე შეთხზული, ეპონიმური სახელებია, როგორც იგივე ლეონტი მროველის „საყვარელი მეთოდოლოგიით“ გამოგონილი — ჰაოს, ქართლოს, ლეკოს, კავკასოს, ეგროს, მცხეთოს, უფლოს და სხვ. მისთ.

ალექსანდრე მაკედონელის საქართველოში ლაშქრობის სიმცდარე „თანმიმდევრულად“ გაიმეორა სახელოვანმა ვახუშტი ბატონიშვილმა, „ქართლის ცხოვრების“ სწორედ „თანმიმდევრულად გადამწერელმა“...

იგივე გაიმეორა თეიმურაზ ბატონიშვილმაც თავის თხზულებაში — „ისტორია ივერიისა“. მისი „სიახლე“ საქართველოში ალექსანდრე მაკედონელის შესვლის მარშრუტთა დადგენაში მდგომარეობს. იგი წერს „ოდეს სძლო ალექსანდრემან დიდმან მაკედონელმან მესამედ დარიოს

მეფესა სპარსთასა და მოიკლა დარიოზ ლტოლვასა შინა ბესის ვისმე დიდებულისაგან თვისისა, შემდგომად მისსა მოვიდა საქართველოსა ზედა დარუბანდის გზით“ (ისტორია ივერიისა, 1848, 109). გაეიხსენოთ, რომ მესამედ ალექსანდრემ დარიოსი 331 წელს გავგამელას ველზე გაანადგურა, ხოლო დარიოსი ბესამ მოჰკლა ერთი წლის შემდეგ, 330 წელს, კასპიის ზღვიდან სამხრეთ-აღმოსავლეთ მხარეში. მაშასადამე, თუ მეცნიერ უფლისწულს ვერწმუნეთ, ალექსანდრე რომ დარუბანდზე წამოსულიყო, ჯერ კასპიის ზღვისთვის აღმოსავლეთიდან ჩრდილოეთით უნდა შემოეარა, ვოლგის შესართავი გამოეველო და დარუბანდზე ისე დაშვებულიყო. დარუბანდიდან კახეთში შემოვიდა ალექსანდრეო, — განაგრძობს თეიმურაზი — პანკისის ხეობაშიც ავიდაო და იქიდან, თითქოს, ადგილობრივმა მცხოვრებლებმა ალექსანდრეს ის მთაც დაანახეს, რომელზეც პრომეთეოსი იყო მიჯაჭვული. პანკისიდან ალექსანდრე დაეშვა სამხრეთით, მწვეავე ბრძოლის შემდეგ აიღო რუსთავი, მერე მცხეთა და დანარჩენი ქალაქები ქართლისა. ქართლიდან ალექსანდრე გაბრუნდა ჩრდილოეთით, გაიარა დარიალის კარი, გადალახა იალბუჯის მთა და გაემართა სკვითთა დასალაშქრავად.

ბოლოს, წინარე წყაროთა შეცდომა გაიმეორა ცნობილმა ისტორიკოსმა მარი ბროსემ (იხ. მისი „საქართველოს ისტორია“, ნაწ. I, 1895, 21).

ახლა ისმის კითხვა, საიდან უნდა გაჩენილიყო ეს მცდარი ინფორმაციები ქართულ წყაროებში? არც „მოქცევაი ქართლისაის“ ავტორი და არც ლეონტი მროველი არ ასახელებენ, საიდან და რა წყაროებით ისარგებლეს, როცა ისინი ასე დარწმუნებით წერენ ალექსანდრე მაკედონელის „ქართული ლაშქრობის“ თაობაზე. მაგრამ ბოლოს და ბოლოს მაინც გამოჩნდა ცდომილების სათავეები, — გამოჩნდა იგი თვითონ ბერძნულ და ლათინურ საისტორიო ნაწერებში. ყველაფერი კი დაუკავშირდა „ინდოეთის კავკასიონს“ — ძველი პარაპამისის, ანუ შემდგომდროინდელი ჰინდუყუშის მთებს. აქ არის მწვეერვალი, სახელად — კროუკასი, რომელიც ფონეტიკურად ძალზე ეხამება „კავკასს“ და „ინდოეთის კავკასია“ ხშირად პონტოს კავკასიად ხმიანდებოდა, და მასთან იმ კავკასიონად, რომელზეც მიჯაჭვული იყო პრომეთეოსი. და გავრცელდა „ლოგოსი“ იმის თაობაზე, რომ ალექსანდრე მაკედონელმა სხვა მრავალ ქვეყანათა შორის დაიპყრო კავკასია და მისი მთავარი ქვეყანა — იბერია. ბევრ ავტორს უკვე წერილობითაც შეჰქონდა თავის თხზულებაში ეს მცდარი ამბავი.

I საუკუნის მეცნიერმა და მწერალმა, გაიუს პლინიუს უფროსმა (23—79) თავის თხზულებაში — „ბუნების ისტორია“ — ასეთი რამ ჩაწერა:

„ასეთია მაკედონია (და ალექსანდრე მაკედონელი), რომელსაც ოდესღაც ეპყრა მთელი ქვეყანა და რომელმაც გადაიარა აზია. არმენია, იბერია, ალბანია, კაპადოკია, სირია, ეგვიპტე, ტავროსი და კ-კკასოსი“ (IV, 39).

კიდევ I საუკუნეში ქვინტუს კურციუს რუფუსმა ჩაწერა „ალექსანდრე მაკედონელის ისტორიაში“ (VII, 3): ალექსანდრეს ჯარმა ჩვიდმეტ დღეში გადავლო კავკასიონი და იმ კლდის ძირში, რომელზეც პრომეთეოსი იყო მიჯაჭვული, მეფემ კიდევ ერთი ქალაქი — ალექსანდრია დააარსაო. ეს მართლაც ასე მოხდა, მაგრამ მოხდა ინდოეთში, პინდუსის მთის ძირში, პაროპამისადების ოლქში.

მერე, III საუკუნეში, პლინიუსის ნათქვამი სიტყვა-სიტყვით გაიმეორა გაიუს იულიუს სოლინუსმა „ღირსშესანიშნავ მოგონებათა კრებულში“ (IX, 19): „ალექსანდრე დიდმა დაიპყრო აზია. არმენია, იბერია, ალბანია.... გადავიდა ტავროსისა და კავკასოსის მთებზე“.

მაგრამ დასაწყისშივე თვითონ ანტიკური დროის ავტორებმა დაიწყეს მათსავე ისტორიოგრაფიაში გაპარული შეცდომის გასწორება. ჯერ ყურადღება მივაქციოთ ძვ. წ. II საუკუნის (200—120 წწ.) დიდი ბერძენი ისტორიკოსის, პოლიბიოსის ერთ ცნობას, სადაც ლაპარაკია „ფაზისის მიდამოებზე“ და მის ზემოთა მხარეზე, რომელიც ფაზისიდან აღწევს პირკანიის (კასპი-ს) ზღვამდე; და ამ ქვეყანაში „ცხოვრობს დიდი სიმრავლე მამაცი და განსაკუთრებით მხედრობაში (გაწაფული) ხალხისა, რომელიც სრულიად დამოუკიდებელია ყოველგვარ სამზადისში, რაც კი ომისათვის არის საჭირო. ეს სახელმწიფო ჯერ კიდევ სპარსელთა დროიდან შემოინახა, რადგან ალექსანდრეს დროს იგი მხედველობიდან გამოეპარათ“ (პოლიბიოსი, „მსოფლიო ისტორია ორმოც წიგნად“, V, 55, 8—9).

ექვს არ იწვევს, რომ აქ ლაპარაკია საქართველოზე, რომლის დაპყრობა ალექსანდრეს „გამოკპარკია“ თუ „გამორჩინია“. მთავარი ამ შემთხვევაში ის გახლავთ, რომ ანტიკური სამყაროს ისტორიოგრაფიის „მეორე მწვერვალი“ (თუკიდოდეს შემდგომ) საქართველოში ალექსანდრე მაკედონელის ყოფნას საერთოდ გამორიცხავს.

მაგრამ საქართველოში ალექსანდრე მაკედონელის ლაშქრობათა ცდომილების ბუნება მაინც ყველაზე კარგად წარმოადგინა სტრაბონმა.

ძველ და ახალ საუკუნეთა მიჯნის (ძვ. წ. 63 — ახ. წ. 23) შესანიშნავმა ისტორიკოსმა დ გეოგრაფოსმა. და წერს სტრაბონი თავის განთქმულ „გეოგრაფიაში“ (XI, 5, 5): „მრავალთა მიერ განსადიდებლად გადმოცემული თხრობანი თუ ერთსა და იგივე აზრს შეიცავენ. ეს იმით. რომ მომთხრობნი მლიქვნელობაზე უფრო ზრუნავენ, ვიდრე ჭეშმარიტებაზე. ასეთია, მაგალითად, კავკასიონის გადატანა ინდოეთის მთებთან. კავკასიონი ხომ კოლხეთისა და ევქსინის ზემოთ მდებარეობს. ელინებიც ხომ ამ მთებს ეძახდნენ კავკასიონს, რომლებიც ინდოეთს დაშორებული არიან 30 000 სტადიონზე უფრო მეტით; (აქი ამავე კავკასიონს) ასახელებს მითოსი, რომელიც ეხება პრომეთეოსსა და მის ბორკილებს... ხოლო უფრო სასახელო იყო ალექსანდრესთვის აზიის დაპყრობა ინდოეთის მთებამდე, ვიდრე ევქსინისა და (კოლხეთის) კავკასიონის კუთხემდე. მაგრამ დიდება მთისა, მისი სახელი და ეს ამბავი, იაზონისა და მისი თანამებრძოლების შესახებ რომ ფიქრობენ, — რომ მათ (ე. ი. არგონაველებმა) კავკასიის სანახებამდე უშორესი ლაშქრობა ადასრულეს და ისიც, რომ პრომეთეოსი გადაცემული იყო მისაჯაჭვავად კავკასიონზე ვითარცა ქვეყნის კიდეზე — (ყოველივე ამის გამო) უნდოდათ როგორმე ესიამოვნებინათ მეფისთვის და გადაიტანეს მთის სახელი ინდოეთში“.

სტრაბონის ეს სიტყვა გვარიანი ინვექტივაა ყოველი დროის მუყალბე ისტორიკოსისთვის. ეს საერთოდ. ხოლო კერძოობით — იგი სრული დამაჯერებლობით გვარწმუნებს, რომ ალექსანდრეს „ნამდვილ კავკასიაში“ და მის მთავარ ქვეყანაში — იბერიაში — არ ულაშქრია: ოღონდ ეს იყო, რომ მისმა მლიქვნელმა მეისტორიეებმა კავკასიონის მთის სახელოვნება („მთათა მეფეა კავკასიონიო“, — ამბობდა ესქილე) მათი მბრძანებლის განსადიდებლად გამოიყენეს და საამისოდ შორეულ ინდოეთში ჩაღწეულ დამპყრობელს მარად სახსოვარ უძვირფასეს არმალანად აღუბეჭდეს.

და, კიდევ ერთხელ წერს სტრაბონი: კავკასიონისა და პრომეთეოსის ამბები ზოგიერთებს „გადმოაქვთ პონტოდან აქ (ინდოეთში) უმწეო მიზეზით. — რაკილა ხედავენ, რომ პაროპამისადეში არის წმინდა გამოქვაბული და უჩვენებენ ვითომც აქ ყოფილიყოს მიჯაჭვული პრომეთეოსი და აქ მოსულიყოს ჰერაკლეც პრომეთეოსის გასათავისუფლებლად, და ვითომც ეს იყოს ის კავკასიონი, რომელსაც ელინები (სინამდევლეში) თვლან პრომეთეოსის მიჯაჭვის ადგილად“ („გეოგრაფია“. XV, 1, 8).



განსაკუთრებული მნიშვნელობა ამ შემთხვევაშიც უნდა მიეკუთვნოს ალექსანდრე მაკედონელის ლაშქრობათა ყველაზე ვრცელსა და სანდო ავტორს, არიანოსს, რომელიც პირდაპირ წერს ინდოეთს შესახებ საგანგებოდ დაწერილ წიგნში („ინდიკე“, II, 3—4): როცა მაკედონელებმა პარაპამისოსში „ალექსანდრესთან ერთად ილაშქრეს, მას კავკასიონი უწოდეს, (მაგრამ) ეს სხვა კავკასიონია, სკვითის კი არა...“

და მეორეგან, ისევ სრული სინათლითა და დამაჯერებლობით:

„რაც შეეხება კლდეს, აორნოსს, რომელიც ალექსანდრემ ძალით აიღო, ხოლო პერაკლემ კი ვერ შეძლო მისი დაპყრობა, — მე მგონია, რომ ეს მაკედონელების ტრაბახია, ისევე როგორც. მაგალითად პარაპამისოსს რომ კავკასიონს უწოდებენ მაკედონელები, თუმცა არაფერი აქვს მას საერთო ნამდვილ კავკასიონთან“ („ინდიკე“, V, 10).

ბოლოს, ახალი დროის ქართული ისტორიოგრაფიაც სავსებით ბუნებრივად მივიდა იმ დასკვნამდე, რომ საქართველოში ალექსანდრე მაკედონელსა და მის ლაშქარს ფეხიც არ დაუდგამს. ამ მხრივ ერთაზროვანია ყველა მკვლევარი: დ. ბაქრაძე, მ. ჯანაშვილი, ივ. ჯავახიშვილი, კ. კეკელიძე, ს. ყაუხჩიშვილი, სხვანი და სხვანი.

მაინც რა წყაროებით და ინფორმაციებით იკვებებოდნენ „მოქცევის“ ავტორი და ლეონტი მროველი საქართველოში მაკედონელთა ლაშქრობის მტკიცებათა უამს, — ამ კითხვას მართებული პასუხი მოუძებნეს კ. კეკელიძემ და ს. ყაუხჩიშვილმა, რომელთაც საძიებელ წყაროდ მიიჩნიეს ფსევდოკალისტენეს რომანი — „ალექსანდრიანი“.

კ. კეკელიძე:

„...ბერძნული წყარო ლეონტისა არის ფსევდოკალისტენეს პოპულარული რომანი „ალექსანდრია“... ამ წიგნიდან უნდა იყოს შემოტანილი ჩვენს მატთანში, საზოგადოდ, ცნობა ალექსანდრე მაკედონელის ჩვენში ყოფნის შესახებ“ (კ. კეკელიძე, ძველი ქართული ლიტერატურის ისტორია, ტ. I, 1981, 255).

ს. ყაუხჩიშვილი:

„ამ რომანში („ალექსანდრიანი“) ალექსანდრეს მიეწერება ისეთი ქვეყნების დაპყრობაც, სადაც მას არც კი გაუვლია. ასე მაგალითად, ამ რომანით ი ბ ე რ ი ა ც ალექსანდრეს მიერ დაპყრობილი ქვეყნების რიცხვშია, მიუხედავად იმისა, რომ თავდაპირველად არც ერთ ისტორი-

კოსს ამის შესახებ არაფერი ჰქონდა ნათქვამი“ (ს. ყაუხჩიაშვილი, ბერძნული ლიტერატურის ისტორია, ტ. II, 1949, 232).

ამ მტკიცებას შეიძლება დაემატოს შემდეგი: ლეონტი მროველისათვის ფსევდოკალისტენეს „ალექსანდრიანის“ პირველწყაროობა მტკიცდება ლეონტისავე ცნობის პირველსავე სტრიქონში, სადაც იგი ლაპარაკობს ალექსანდრეს წარმომავლობაზე: „ესე ალექსანდრე გამოჩნდა ქუეყანასა საბერძნეთასასა, ქუეყანასა რომელსა ჰქვიან მაკედონი, ძე ნიქტანებისი, მეგვიპტელისა, ვითარცა წერილ არს ამბავი მისი წიგნსა ბერძენთასა“ (ხაზი ჩვენია — ლ. ს.)

აქ ლაპარაკია ეგვიპტის ფარაონ ნექტანებ მეორეზე. და საქმე ისაა, რომ მართლაც დადიოდა ხმა, ალექსანდრე ფილიპეს შვილი კი არა, თითქოს, ეგვიპტელი ფარაონისა და ქურუმთმთავრის, ნექტანების ძე ყოფილიყოს. ეს ხმა მალე „ლიტერატურულ ჯორად“ იქცა და „ალექსანდრიანის“ საწყის მოტივდაც იგივე აღმოჩნდა, სწორედ ეს „ალექსანდრიანი“ უნდა იყოს ლეონტი მროველის მკვებავი წყარო, რასაც თვითონვე ადასტურებს კიდევ — „ვითარცა წერილ არს ამბავი მისი წიგნსა ბერძენთასაო“...

მაშ, ერთხელ კიდევ დავასკვნათ, რომ საქართველოში ალექსანდრე მაკედონელს არ ულაშქრია. მაგრამ აქვე ისიც უნდა დაეძინოთ, რომ მსოფლიოს ამ უდიდეს დამპყრობელს საქართველო არც „გამოჰპარვია“ და არც კიდევ მისგან უბრალოდ გულგრილი ხელის ჩაქნევით არ ჩაუვლია. საქმეც ის გახლავთ, რომ საქართველოზე ლაშქრობა და მისი დაპყრობა. ჰქვიან პოლიტიკოსსა და სტრატეგოსს სწორედ აგრე უბრალო „გზად გავლის“ საქმედ არ მიუჩნევია. როგორც ჩანს, კავკასიურ-ქართული მიწა-წყლისა და საერთოდ კავკასიელი ხალხებისადმი ინტერესი ალექსანდრე მაკედონელს სიკვდილის კარამდე არ მოშორებია. ამ წიგნშიც თავის ადგილზე ითქვა, რომ ალექსანდრემ ძალაჲს კარგად იცოდა, რა ცხოველმყოფელი მნიშვნელობაც ექნებოდა ევროპასა და ინდოეთს შორის იმ სამომოსვლო გზას, რომლის შუაგული ნაკვეთი სწორედ საქართველოზე გადიოდა. მხოლოდ ეს იყო, რომ ალექსანდრეს იმეამად, სპარსელთა ძალებზე ადევნებულ სამხრეთული გზებიდან, არასგზით არ შეეძლო ჩრდილოურ ტეხილზე გადასვლა, რასაც მისთვის შესაძლოა დიდი ზიანი და იქნებ კატასტროფაც ერგუნებინა. ჰელესპონტ-პროპონტიდის, ბოსფორის, პონტოსა და კოლხეთ-იბერიის სალაშქრო მაგისტრალი ალექსანდრეს სამომავლო გენერალურ განაზ-

რახად ქეონია გულს ამოჭრილი. ხოლო, ამ გრანდიოზული გეგმის განხორციელება, მისივე აზრით, მთელი აზიისა და ევროპის საომარ ძალთა თავმოყრას მოითხოვდა! ამაზე ნათლად მეტყველებს ყველაზე სანდო და საიმედო ავტორის, ისევ არიანოსის ცნობა, რომელიც ჩვენ აღრეც ვახსენეთ ამ წიგნში. მოდიოთ, ერთხელ კიდევ გავიხსენოთ და გულდასმით გავსინჯოთ ალექსანდრეს „ანაბასისის“ ეს ადგილი — IV, 15, 4—6:

„იმევე უამს (ქალაქ ზარიასპაში, ბაქტრიაში) ალექსანდრესთან მოვიდა ფარასმანი, ხორაზმელთა მეფე, 1500 მხედრით. ფარასმანმა თქვა, რომ ის ცხოვრობს კოლხთა მოდგმისა და ამჰონი ქალების ახლოს და უკეთუ ალექსანდრეს სურს, თავს დაესხას კოლხებს, აჰაძონებს და დაიმორჩილოს ევქსინის პონტომდე გავრცელებული ტომები, — ის სიტყვას იძლევა, რომ იქნება მისი მეგზური და სურსათსაც მოუმზადებს ჯარებ-სათვის... (ალექსანდრემ) ფარასმანი შეაქო და მასთან მამინევე შეკრა სამეგობრო კავშირი, მაგრამ იქვე უთხრა, რომ ახლა არა აქვს დრო პონტოზე გალაშქრებისა... რადგან ახლა იგი შეპყრობილია ინდოეთზე ფიქრით და ზრუნვით; ინდოეთის დაპყრობას რომ მორჩება, მთელი აზიაც მის ხელში იქნება: ხოლო აზაას რომ დაიპყრობს, დაბრუნდება ელადაში, და აი მაშინ, იქიდან პელესპონტისა და პროპონტიდის გავლით შეიჭრება პონტოს შიგნით და ამისთვის მოიხმარს მთელ თავის ძალებს, როგორც საზღვაოს, ისე სახმელეთოს...“

ალბათ, ხელახალ კომენტირებას აღარ საჭიროებს ეს ადგილი ეგზეზომ ანგარიშგასაწევი ავტორის თხზულებიდან...

ცალკე, თავისი „საკუთარი კოლორით“ გვევლინება დავით აღმაშენებლის ისტორიკოსის შეხედულებანი ალექსანდრე მაკედონელზე. ჯერ ეს ადგილი გავიხსენოთ მისი თხზულებიდან — „ცხოვრება მეფეთფისა დავითისი“:

„(ალექსანდრემ) პირველად მამულისა თვისისანი შეკრიბნა და მით დაიპყრნა დასავლისანი ევროპი, იტალია, რომი და აფრიკეთი, და მათითა წარტანებითა დაიპყრა ეგვიპტე, შესრულმან კარქედონით. და მიერ ეგვიპტით პალესტინე და ფინიკე, და კილიკიასა თვისად შექმნელი, წინაგანწყო დარიოსს. და რაეამს სპარსეთი მოირთო, მაშინლა სძლო პიროს ჰინდოსა, და ეგრეთდა ამით ყოვლითა მოვლო ყოველი ქვეყანა; და ქმნა, რა იგი ქმნა“ („ქართლის ცხოვრება“, ს. ყაუხჩიშვილის გამოცემა, ტ. I, 1955, 358—359).

აქ შესანიშნავად, მართებული ცოდნითა და გააზრებით არის წარ-

მოდგენილი ალექსანდრე მაკედონელის საქმეთა დასაწყისი, მისი ძალაუფლებისა და დაპყრობების ზრდა, ზრდისა და აღმავლობის საფეხურები და ბოლოს მსოფლიო მბრძანებლად გადაქცევა. აქვე ფრიად მისანიშნებლად გამოსჩანს, რომ იგი, მიუხედავად იმისა, რომ ეგზომ ყურადღებით ჩამოთვლის ალექსანდრეს ყველა უმთავრეს დაპყრობას — ქართველი ისტორიკოსი ერთი სიტყვითაც არაფერს ამბობს საქართველოში ალექსანდრეს ყოფნისა თუ არყოფნის თაობაზე. ეტყობა, დავითის ისტორიკოსი ან საერთოდ არ იცნობს ამგვარ წყაროს, ან თუ იცნობს, იმდენად არასწორად თვლის, რომ მას მსჯელობის ღირსადაც არ თვლის... დავითის ისტორიკოსისათვის ალექსანდრესთან დაკავშირებით, მთავარი მასთან დავით აღმაშენებლის შედარებაა:

„ჩუენი ესე გვირგვინოსანი და ახალი ალექსანდრე, დაღათუ იყო ჟამით შემდგომი, არამედ არა საქმითაცა, არცა განზრახვითა, არცა სიმხნითა უმცირე, და თვით მათ საქმეთა შინა, რომელთა მძლედ იქმნის ალექსანდრე, არა უმდაბლე, არამედ, მრავლითა უმაღლეს მგონიეს ესე. და რაოდენ საწუთოთა და ზორციელთა შინა იგი მისთა სწორთა და მისგან და მის ჟამისათა ყოველთა უმაღლეს და უზეუთაეს იყო. ეგეოდენ ესე საღმრთოთა და ქრისტეს მცნებათა შინა ზორციელთავე თანა მისთა პირველთა ყოველთა ჰმატდა. რამეთუ არა სცა ძილი თუალთა, არცა ჰრული წამთა, არცა განსუენება ზორცთა თვისთა; არა მიდრკა გემოვნებათა მიმართ, არცა ნებასა ზორცთასა; არა სასმელ-საჭმელთა, არცა სიმღერა-სილოდათა და არათურთითა არარა ზორციელთა შეაკრა გონება, გარნა საღმრთოთა და სასულიეროთა ყოველთა დასრულებად და უდებებად მზიდველთა ნებისათა. და განიცადეთლა ოთხთა ამათ წელთა ქმნილნი მისნი, რომელთა მრავალგზის ქმნულთა მცირედი მეგულეების თქუმაღ“ (იქვე, 338).

და კიდევ:

„ხოლო ამად რა თხრობად მოვიწიე, ვაებისა ღირსად შევრაცხენ დიდნი იგი და სახელოვანნი გამომეტყუელნი, ვიტყვი უკუე უპიროსსა და არისტოვლის ელინთა, ხოლო იოსიპოს ებრაელსა, რომელთაგანმან ერთმან ტროადელთა და აქვეელთანი შეამკენა თხრობანი, თუ, ვითარ აღამემნონ და პრიაშოს, ანუ აქილევი და ეკტორი, მერმეცა ოდისეოს და ორესტი ეკუთენეს, და ვინ ვის მძლე ექმნა; და მეორეჲან ალექსანდრესნი წარმოთქუნა მძლეობანი, სიმხნენი და ძლევა-შემოსილებანი; ხოლო მესამემან ვესპასიანე ტიტოის-მიერნი მეტომეთა თვისთა-ზედანი ჰიარნი მისცნა აღწერასა. და ვინათგან ამათ ნიეთნი საქმეთანი არა

აქუნდეს კმად მისათხრობელად, ამისთვისცა მის ხელოვნებითა რიტორობისათა განავრცელნეს, ვითარცა იტყვას თე-ო სადაჲ ალექსანდრე: „არა დიდ იყავ აქილევ, არამედ დიდსა მიემთხვიე მაქებელსა უპიროსს“. რამეთუ ოცდარვა წელ განგრძობასა ტროადელთა ბრძოლისასა ვერა-რა ღირსი ქებოსა იქმნა. ხოლო მეფისა დავითისი ესეოდნითა მიმართ წინაგანწყობა სამ უამდმდე იყო, და ვერცა პირველსა კუეთებასა შეუძლეს წინადადგომად. ჰქონებოდესმცა ამათ ბრძენთა თხრობათა ნივთად საქმენი დავითისნი, და მათმცა აღწერნეს ჯეროვნად მათისაებრ რიტორობისა, და მაშინლამცა ღირს ქმნილ იყვნეს ჯეროვანსა ქებასა“ (იქვე, 342).

და, ბოლოს:

„...ქართველთა ოდენ სპითა ვერცარას ალექსანდრე იქმოდა კარგსა. და თუცა დავითს სპარსთა ჰქონებოდა მეფობა, ანუ ბერძენთა და ჰრომთა ძალი, ანუ სხუათა დიდთა სამეფოთა მაშ-მცა გენახნეს ნაქმარნი მისნი, უაღრესნი სხვათა ქებულთანი“ (იქვე, 359).

ქართველი ისტორიკოსი გვარწმუნებს, რომ დავით აღმაშენებელი ნიჭით, საქმით, განზრახულობით, სიმხნით თუ სიმამაცით გაცილებით მაღლა („მრავლითა მაღლა“) იდგა ალექსანდრე მაკედონელზე. უსწორო იყო დავითი სხეულის სიმძლავრითა და სულის სისპეტაკითო. იცის ქართველმა ისტორიკოსმა ვინ არიან, რანი არიან და რა დაუწერიათ ჰომეროსს, არისტოტელეს და იოსებ ებრაელს (ფლავიუსს) — ჰომეროსმა ტროადელთა და აქაველთა გმირობას უძღვნა თავისი „დიდი და სახელოვანი გამომეტყველება“, არისტოტელემ — ალექსანდრე მაკედონელს, იოსებ ფლავიუსმა კი — ვესპასიანე-ტიტესა და იუდიველთა ურთიერთ ომს. მაგრამ მაინც მებრალებიანო ეს დიდმეტყველნი ხელოვანნი, ვინათგან „ნივთნი საქმეთანი“ (ფაქტური მასალები, რეალურად მომხდარი ამბები) საკმარისი არ ჰქონდათ და ამიტომ იძულებული იყვნენ, „ხელოვნებითა რიტორობისათა“; ყველაფერი გაეზვიადებიათო. ამასთან დაკავშირებით, დავითის ისტორიკოსი იშველიებს თვითონ ალექსანდრეს ნათქვამს აქილევსის საფლაგზე: „ნეტავ შენ, ბედნიერო ჭაბუკო, რომ სიცოცხლეში ჰპოვე უერთგულესი მეგობარი, ხოლო სიკვდილის შემდგომ უდიდესი მეხოტბეო“. ამ შეგონებიდან ქართველ ისტორიკოსს მეორე ნაწილი აინტერესებს — ნეტავ შენ, აქილევსო, მეხოტბედ რომ ჰომეროსი გამოგიჩინაო. და ამ ნათქვამის ქვეტექსტიც და აზრიც ისე ესმოდა ჩვენს ისტორიკოსს, როგორც გულისხმობდა თვითონ მაკედონელი — აქილევსი იმოდენა რო-

დი იყო, რამოდენაც ჰომეროსმა დახატაო, ანუ — აქილევსი არც დიდი იქნებოდა და იქნებ არც ვისმეს გახსენებოდა, მეხოტბედ დიდი ჰომეროსი არ გამოსჩენოდაო, ანუ კიდევ — აქილევსის სიდიდის შემოქმედი ჰომეროსის სიდიდეაო. აქილევსმა ტროელებთან ომს ოცდარვა წელიწადი შეაღია\*, დავითმა კი სამ წელიწადში ამდენი ბრძოლა „პირველსავე კუთებასა“ მოიგო. ამიტომ „ვების ღირსად“ მიმაჩნია ჰომეროსიც, არისტობულეც და იოსებ ფლავიუსიც, რომ მათ „თხრობათა ნივთად საქმენი დავითისნი“ არა ჰქონიათ, და რომ ჰქონოდათ — აი, მაშინ გენახათ, რასაც ნიშნავსო ნამდვილი გმირი და საქმენი საგმირონი! მერე — ქართველთა ეგზომ მცირე ჯარით დავითი რომ მოღენა გმირობებსა და სასწაულებს ახდენდა, — ისეთივე მცირე სპით ალექსანდრე ვერაფერსაც ვერ გახდებოდა. ხოლო, დავითს რომ სპარსეთის, საბერძნეთის, რომისა თუ სხვა რომელიმე დიდი ქვეყნის მეფობა ჰქონოდა და იმდენი საომარი ძალები ჰყოლოდა (რამდენიც ალექსანდრეს ჰყავდა), „მაშინმცა გენახნეს ნაქმარნი მისნი, უაღრესნი სხუათა ქებულთანი“...

სწორედ რომ დიდ ჰუმპარიტებას ბრძანებს დიდი ხელმწიფის დიდი ისტორიკოსი.

---

\* ანტიკურ და ბიზანტიურ ისტორიოგრაფიაში არსებობდა ორი ვარიანტი ტროას ომის ხანგრძლივობისა — 10 წელიწადი და 28 წელიწადი. ამის შესახებ იხილეთ სიბ. ყაუხჩიშვილის სტატია — ფირესტე//ორესტე“ (ლიტერატურული ძიებანი, 11, 1944 წ.).

## შ ი ნ ა ა რ ს ი

წინაბჭე	3
ზღურბლი	8
თავი I. ძველი მაკედონია	11
თავი II. ფილიპე მაკედონელი	17
თავი III. ალექსანდრეს ზეობის დნაწყისი	39
თავი IV. ალექსანდრე ბალკანეთზე	43
თავი V. სპარსეთი ალექსანდრეს ვალაშქრების წინ	61
თავი VI. ალექსანდრე მცირე აზიაში	69
თავი VII. ალექსანდრე სირია-ფინიკია-პალესტინაში	101
თავი VIII. ალექსანდრე ეგვიპტეში	119
თავი IX. ალექსანდრე მესოპოტამიაში	129
თავი X. ალექსანდრე ირანში	147
თავი XI ალექსანდრე ცენტრალურ აზიაში	171
თავი XII. ალექსანდრე ინდოეთში	222
თავი XIII. ალექსანდრეს დაბრუნება	276
თავი XIV. ალექსანდრეს უკანასკნელი წელსაბრუნაეი	304
თავი XV. ალექსანდრეს სიკვდილის შემდგომ	317
ბოლობჭე	329
შემოკლებანი, შენიშვნები	334
დამატება, ალექსანდრე მაკედონელი და „ქართლის ცხოვრება“	343

გამომცემლობის რედაქტორი მ. ჩხაიძე  
მხატვარი ა. ბუაძე  
სამხატვრო რედაქტორი ი. ჩიქვინიძე  
ტექნიკური რედაქტორი ფ. ბუღალაშვილი  
კორექტორი ე. წერეთელი

გადაეცა წარმოებას 3.03.93. ხელმოწერილია დასაბეჭდად 27.07.94.-  
საბეჭდი ქალაქი 60×84/16. პირობითი ნაბეჭდი თაბახი 22,75.  
სააღრ.-საგამომც. თაბახი 17,46. ტირაჟი 10 000. შეკვეთის № 114.

#### ფასი სახელშეკრულებო

თბილისის უნივერსიტეტის გამომცემლობა,  
თბილისი, 380028, ი. ჭავჭავაძის პროსპექტი, 14.

საქართველოს რესპუბლიკის პოლიგრაფიისა და საგამომცემლო-  
საქმიანობის სახელმწიფო კორპორაციის ბეჭდვითი სიტყვის  
კომბინატი. თბილისი, მარჯანიშვილის ქ. № 5.



**Саникидзе Леван Давидович**

**АЛЕКСАНДР МАКЕДОНСКИИ**

**(на грузинском языке)**

**Издательство Тбилисского университета**

**Тбилиси, 1994**